

ИТГЭЛ Найдвараар Ирээдүйгээ Хар!

Өдөр бүр сайн
сайхан ирнэ
гэж хүлээ



ЖОЙС МАЙЕР

**ИТГЭЛ
НАЙДВАРААР
ИРЭЭДҮЙГЭЭ
ХАР!**

*Өдөр бүр сайн сайхан
ирнэ гэж хүлээ*

....

ЖОЙС МАЙЕР

DDC
158.1
J-78

Өөрөөр тэмдэглэснээс бусад Библийн эшлэлийг Ариун Бичээс Нийгэмлэгийн © 2013 оны “Ариун Библи”-ээс авав. Библийн эшлэлүүдийг англи хэлээрх орчуулгын New International Version хувилбараас NIV, The Amplified Bible хувилбараас AMP, New King James Version хувилбараас NKJV гэсэн тэмдэглэгээтэйгээр тус тус орчуулж орууллаа.

Англи хэл дээр эх нь “**Get Your Hopes Up!**” нэртэйгээр хэвлэгдсэн.

Зохиогчийн эрх © 2015 Зохиогч: Жойс Майер
© Монгол “Жойс Майерийн үйлчлэл”

Орчуулж, хянан тохиолдуулж, хэвлэлийн эхийг бэлтгэн хэвлэсэн: Лотар ХХК

“Итгэл найдвараар ирээдүйгээ хар!”
Өдөр бүр сайн сайхан ирнэ гэж хүлээ
Жойс Майер
Mongolian
ISBN: 978-99973-3-435-0

Худалдахыг хориглоно!
Зөвхөн үнэгүй тараахад зориулагдсан

Бүх эрх хамгаалагдсан. АНУ-ын Зохиогчийн эрхийн 1976 оны Актын дагуу, энэхүү номын ямар ч хэсгийг хэвлэлийн газрын зөвшөөрөлгүйгээр хуулбарлах, мэдээллийн системд оруулах, электрон хуулбараар тараах зэрэг нь зохиогчийн эрхийг зөрчиж, зохиогчийн оюун өмчийг хулгайлж байгаа хууль бус хэрэгт тооцогдоно.

Зохиогчийн эрхийг дэмжиж буй танд баярлалаа.

*“Өө Эзэн, одоо би чухам юуг хүлээнэ вэ?
Миний найдвар Танд л байна”.*

Дуулал 39:7

АГУУЛГА

ОРШИЛ 7

ХЭСЭГ I

ӨӨДЛӨН ДЭЭШЛЭХ

НАЙДВАР ТЭМҮҮЛЭЛ

- БҮЛЭГ 1: Хүсэл хүлээлтийнхээ түвшинг өндөрсгө 16
БҮЛЭГ 2: Удирдагч Бурханыг дага 28
БҮЛЭГ 3: “Чадахгүй” гэдэг бүхнийг илрүүлж, устга 40
БҮЛЭГ 4: Найдварын эрч хүч 52
БҮЛЭГ 5: Шинэ хүн болсон өөрийгөө таньж мэдэгтүн 66

ХЭСЭГ II

ШАНАЛАН ЗОВЖ БАЙСАН Ч

НАЙДВАР ӨВӨРЛӨ

- БҮЛЭГ 6: Өөдөө дээшээ харагтун! 80
БҮЛЭГ 7: Бэрхшээлээ биш ерөөлөө тоологтун! 91
БҮЛЭГ 8: Найдварын Үгс 102
БҮЛЭГ 9: Урагшилсаар бай 115

ХЭСЭГ III

НАЙДВАР БА АЗ ЖАРГАЛ

- БҮЛЭГ 10: Аливаа зүйлээс сайн сайхныг нь олж хар 130
БҮЛЭГ 11: Найдварын хоригдлууд 142
БҮЛЭГ 12: Хэн нэгний залбирлын хариу байгтун! 152
БҮЛЭГ 13: Найдвар бол бидний зангуу 164

ХЭСЭГ IV

НАЙДВАР ЭНД БАЙНА

- БҮЛЭГ 14: Маргааш болтол гэж хойшлуулах хэрэггүй 176
БҮЛЭГ 15: Бурханы төлөвлөгөөг ойлго 184
БҮЛЭГ 16: Сонголт таных 195
БҮЛЭГ 17: Найдвараа дүүргэн бялхуулцгаая! 207

ТӨГСГӨЛИЙН ҮГ 219

ИТГЭЛИЙН ЗАЛБИРАЛ 221

ЗҮҮЛТ 222

ИТГЭЛ НАЙДВАРЫН ТУХАЙ БИБЛИЙН ИШЛЭЛҮҮД 224

ЗОХИОГЧИЙН ТУХАЙ 230

ОРШИЛ

Итгэлгүйгээр Эзэн Бурханд таалагдана гэдэг боломжгүй бөгөөд Өөрийг нь хайгчдад Тэр Шагнагч нь болдог гэдэгт Түүнд ойртон ирэгч нь итгэх (Еврей 11:6-г унш) ёстой. Итгэл бол *найддаг* зүйлсийн маань бодит байдал, баталгаа (Еврей 11:1-ийг унш) юм. Гичний үр төдийхэн хэмжээтэй итгэл байхад уулыг нүүлгэж чадна гэж Бурханы Үг бидэнд (Матай 17:20-ыг унш) амлажээ. Эзэн Бурханы амлалтыг хүлээж авна гэдэг итгэлээр Абрахам *найдсан* (Ром 4:18-ыг унш) юм. Харин зарим хүн итгэлтэй байх гэж хичээдэг боловч найддаггүй. Эзэн Бурхан агуу сайхан сэтгэлтэй тул өөрсдөд нь ямар нэг сайн сайхан зүйл тохиолдоно гэсэн эерэг хүлээлт тэдэнд байдаггүй. Найдлага нь итгэлийн өмнө явдаг бөгөөд итгэлтэй нягт уялдаатай гэж би боддог. Үүнийг нэг нэгнээс нь салгах боломжгүй. Тэгэхлээр мухардаж цөхрөөд, сөрөг бодолд автсан хүн итгэлээр алхаж, амьдарч яаж чадах юм бэ? Бурхан байдаг гэдэгт тэр итгэж байж болох ч итгэлийн хүн гэдэг Эзэн Бурхан амьд гэдэгт итгэхээс илүүг хийдэг бус уу? Эзэн сайн бөгөөд Өөрийг нь эрэн хайгчдыг шагнадаг гэдэгт нь мөн итгэдэг биз дээ. Авах гавьяатайдаа биш, харин Эзэн Бурхан өгнө гэж амласан болохоор нь Эзэний сайн сайхныг тэд хүлээдэг, бас найддаг юм.

Сүүлийн 38 жилийн хугацаанд би дэлхий даяар аялж, Эзэний Үгийг номлож, зааж байна. Энэ хугацаанд яг л та бүхэн шиг олон гайхалтай хүмүүстэй би уулзаж учирлаа. Бизнес хийдэг хүмүүс, гэрийн эзэгтэй нар, ажил эрхэлдэг ээжүүд, зураачид, номлогч үйлчлэгч нар, томоохон бизнес эхлүүлж амжилтад хүрэгсэд, улс төрчид, сайн дурынхан, өрх толгойлсон ээж нар, өрх толгойлсон аав нар гээд л. Нийгмийн

амьдралын янз бүрийн түвшний эрэгтэй, эмэгтэй хүмүүстэй уулзаж танилцах завшаан надад тохиолдсон гэж хэлж болно.

Зарим хүн энэ дэлхийг эзэгнэж, амжилтын оргилд хүрчихэв үү гэлтэй мундаг сайхан амьдарч байна. Өөр зарим нь шар нар, бор хоногийг арай ядан өнгөрөөж, амь зууж байгаагаа надад итгэн ярьдаг. Шуудхан хэлэхэд амьдралын хатуу хөтүүд сөхөрч, бэрхшээл зовлон туулж яваа, аргаа барсан хүн ч олон байна.

Гэвч хэн ч бай, яаж ч амьдарч байгаа ялгаагүй, бүгдэд нь нэг л юм маш их дутагдаж байгааг би олж харсан. Энэ бол бид бүгдэд туйлын их хэрэгтэй ганц л зүйл болох “найдвар” юм.

Найдна гэдэг сайн сайхныг өөдрөг баг итгэлээр зөгнөн мөрөөдөхийг хэлнэ. Энэ бол хөлөг онгоцуудыг бүгдийг нь хөөргөн шидлэх хүчит давалгаа мэт хамгийг хамарсан, асар нөлөөтэй түлхэгч хүч билээ. Бид боомт руу алгуур дайвалзан орж байна уу, усан онгоцны зогсоолд шигдээстэй байна уу, далайд эрэлхэгээр аялан явна уу хамаагүй, итгэл найдвар яг л хөвүүр тэмдэг шиг бөгөөд “Юу гээч? Яаж ч байсан бүх зүйл сайн сайхан болж бүтнэ” гэж итгэх зүрх зоригийг өгөх бидний сэтгэлийн уяа болдог. Хэдийгээр заримдаа тайлбарлашгүй байдаг ч үгүйсгэж огт болдоггүй. Өнөөдөр л шантарч болохгүй шүү гэсэн мэдрэмжийг маань тэтгэдэг. Хэзээ мөдгүй сайн сайхан зүйл тохиолдох нь гэсэн итгэл бол найдвар юм!

Ийм учраас л, найдвар ямар гайхалтай хүчин чадалтайг олж харахад тань туслах найдварын тухай ном бичих зайлшгүй шаардлагатай гэж би итгэдэг. Бусад бүх зүйл нуран унахад үлдэж хоцрох гуравхан зүйл байхын нэг нь энэ гэдгийг Библи бидэнд хэлсэн (1 Коринт 13:13-ыг унш) байдаг шүү дээ. Та яг одоо хэн байгаа, амьдрал ахуй чинь ямар байгаагаас үл шалтгаалаад, найдвар өвөрлөхгүй л бол амжилттай сайн амьдарч чадахгүй ээ. Нөхцөл байдал тааруухан байлаа ч танд найдвар заавал хэрэгтэй. Амьдрал ахуй боломжийн байсан ч ийм чигээрээ байгаасай гэсэн найдвар ч бас танд хэрэгтэй. Та итгэл найдварын цэцэрлэг дотор амьдрах аваас ямар нэг зүйл заавал цэцэглэн дэлбээлж байдаг юм шүү!

Найдвар хэдий агуу зүйл боловч буруу зүйл дээр суурилагдах нь амархан байдаг. Хэрэв та хэн нэг хүнээс зуурч, түүнд найдна гэвэл тэр чинь хүч чадлын барьцгүй эх сурвалж байх болно. Ажил албаа, мөнгө олох чадвараа, эсвэл тэтгэврийн санд хуримтлуулсан мөнгөө найдлагаа болговоос сэтгэл гонсойход хүрч мэднэ шүү. Авьяас чадвартаа найдлага тавьбал, өөртөө итгэх итгэл чинь ганхахын цагт энэ найдвар чинь гандан бүдгэрэх вий.

Үнэндээ энэ хялбархан л даа: “Найдвар гэдэг бол эх сурвалжаа юуг болгосон, бат бэх чанар нь яг түүн шигээ л байдаг зүйл”. Тийм болохоор л бидний итгэл найдварын эх суурь нь Эзэн Бурхан ба Түүний Үгээр өгөгдсөн амлалтууд байх ёстой. Эзэн Бурханыг эх ундаргаа болгоогүй бол найдвар гэдэг зүгээр нэг хий мөрөөдөл, сэтгэлээ хуурах түр зуурын арга байх болно. Хамгийн гол нь, таныг өвөрлөөсэй гэж миний уриалаад байгаа энэ найдвар бол, найдвар гэж энэ дэлхий нэрлэдэг тэр зүйлээс маш өөр юм. Итгэгч хүний найдвар бол хэзээ ч ганхашгүй, эрх хүчин төгөлдөр, бүгдийг мэдэгч, үүрд мөнхөд оршигч, цор ганц үнэн Бурхан Эзэн бөгөөд Түүний Хүү, Есүс Христ дээр суурилдаг.

Үүнийг ингэж хэлж болох юм: “Эзэн Бурханд найдахгүйгээр, таны хийж чадах юм тийм ч их биш. Харин Эзэн Бурханд найдвараа тавьдаг бол, таны хийж чадахгүй зүйл тийм ч их биш ээ”.

Эзэний Үгийг зориулалт гарган уншиж, судалбаас Бурханы хүүхдүүд итгэл найдвар өвөрлөн амьдрах зүрх зориг гаргаснаар юу тохиолдож байсныг бид олж хардаг. Хуучин, Шинэ гэрээг бүхэлд нь уншаад үзэхэд, яг л бидэн шиг алдаа дутагдалтай, буруу зөрүүтэй эгэл жирийн хүмүүс боломжгүй зүйлсийг даван туулсан байдаг. Яагаад гэвэл, Эзэн Бурхан гайхалтай сайхан зүйлийг бэлдсэн байгаа гэж итгэж найдах сонголтыг тэд хийсэн..., итгэлээ Түүнд өгсөнд байдаг юм.

- Еврей хүүхдүүд нь олон үеийн турш Египетэд боолчлогдож байсан боловч эрх чөлөөний найдвар нь хар-

гис хэрцгий дарангуйлагчдын гараас чөлөөлөгдөх Мосегийн мөрөөдлийг асаасан билээ.

- Израилийн цэргүүд Голиатаас айн сүрдэж, нуувч шуудуундаа хоргодож байхад “Энэ филист хүнийг алж, Израилаас ичгүүр шившиглэлийг арилгах хүнийг яах вэ?” (1 Самуел 17:26-ыг унш) гэж асуух шалтгааныг ялалтын найдвар нь Давидад өдөөсөн юм.
- Өөрийнх нь ард түмнийг устгах гэж буй Хаманы хорон төлөвлөгөөг мэдсэний дараа, өөрөө энэ бүхэнд оролцвол өөрчлөлт авчирна гэсэн найдвар нь тогтсон заншлыг зөрчин, хаантай уулзах хүсэлт гаргах зүрх зоригийг Естер хатанд өгсөн билээ.
- Амлагдсан Мессиа бол Есүс мөн гэсэн найдвар нь эгэл жирийн тэр эрчүүд ажил төрөл, найз нөхөд, гэр бүлээ хүртэл орхиод, загалмай хүртэлх замаар бүхнийг хаяж, Түүнийг дагах шалтгаан нь болсон байдаг.

Тэгвэл маш өргөн хүрээг хамардаг, бүхий л саад бартааг хэмхчдэг найдварын мөн чанарыг та олж харж байна уу? Библийн энэ бүх жишээн дээр, найдвар зөвхөн сэтгэл сэргээх бодол юмуу бүдгэрэн замхрах хий мөрөөдөл байсангүй. Харин найдвар нь “*Эзэн Бурхантай хамт бол боломжгүй зүйл гэж юу ч байхгүй*” гэсэн унтаршгүй галт шуурга мэт байлаа.

- Мосегийн хувьд, найдвар нь боолчлолын гинжийг тасалсан;
- Давидын хувьд, найдвар нь хэний ч асууж зүрхлээгүй асуултыг асуусан;
- Естерийн хувьд, найдвар нь түүний ард түмнийг сүйрлээс аврахдаа Эзэн Бурхан өөрийг нь ашиглаж чадна гэдэгт бат итгэсэн;
- Шавь нарын хувьд, найдвар нь шинэ амьдралыг эхлүүлэх хүчийг өгч, дэлхийг өөрчлөх хүмүүс болох зүрх зоригийг өгсөн.

Та бүхний амьдралд ч найдвар ийм зүйлсийг хийж чадна гэдэгт би итгэж байна. Тиймээс энэ номыг уншиж байгаад чинь үнэхээр их баярлаж байна. Ийм учраас бас урагш давшин, *найдвараа сэрээхэд* чинь урам зориг өгөх энэхүү номын хуудас бүрд дүрслэн өгүүлж буй хүмүүсийн амьдралд тохиолдсон явдлууд, Библийн зарчмууд, амьдралдаа хэрэгжүүлэх сургамжуудыг ашиглахдаа би баясан баярлаж байна! Найдлага тасрахаас татгалз, эрмэлзэл тэмүүлэл дүүрэн бай... бүр зориудаар ийм байх гэж хичээгтүн!

Та анзаарсан уу, үгүй юу мэдэхгүй... амьдралын чинь туршид энэ дэлхий таныг *“Найдвар бүү өвөрлө”* гэж ухуулсаар ирсэн бус уу? Өнгөрсөнд амссан шарх зовлон, одоо туулж буй бэрхшээл гонсойлт, ирээдүйн талаарх эргэлзээ зовнил бүгд л хэт их хүлээлт найдлага тавиад хэрэггүй гэж заасаар ирсэн. *“Сэтгэл чинь гонсойход хүрч мэдэх болохоор аливааг бодитоор хар, биеэ барь, хэт их зүйл бүү хүлээ”* гэнэ.

Жирэмсний тест хоёр зураастай гарчихлаа... *“Найдвар бүү тавь, өнгөрсөн удаад яалаа даа, санаж байна уу?”* Таныг гомдоосон хүн уучлал эрж, эвлэрэхийг хүсэж байна... *“Найдвар бүү тавь, тэр чамайг дахиад л гомдоох биз”*. Ажил төрөлтэй холбоотой сайхан боломж нээгдлээ... *“Найдвар бүү тавь, амжилттай бүтэх ч юмуу, үгүй ч юмуу хэн мэдлээ”*.

Тэгвэл итгэл найдвар үгүй амьдралыг амьдрал гэхэд үнэндээ хэцүү. Магадгүй та надад: *“Харамсаж байснаас болгоомжтой хандсан нь дээр шүү дээ, Жойс”* хэмээгээд өөрийгөө зүгээр л хашир болгоомжтой хүн гэж хэлж болох юм. Гэвч үнэндээ та айж байна. Шархалж, гомдохоос айж байна, сэтгэлээр унахаас айж байна, үзээд алдахаас айж байна. Энэ айдас чинь үндэслэлтэй ч байж магадгүй. Та асар хүнд зовлон амсаж, сэтгэл гонсойлгож, итгэл цөхрөөсөн зүйл олныг туулсан байж болох юм. Хал үзэж, халуун чулуу долоосон болохоор юу ч өөрчлөгдөхгүй гэж та боддог болж. Харин Эзэний Үг үүнээс сайн сайхан зүйлийг бидэнд хэлдэг. Эзэн Бурхантай хамт бол бүх зүйл боломжтой гэж!

Амьдралаа өөрчлөх цаг чинь иржээ! Шилдэг сайныг найдан хүлээхийн тулд Эзэнд итгэ. Найртай сайхан харилцаа, хамгийн сайхан боломж, хамгийн сайхан гэр бүл, хамгийн сайхан мэдээ, хамгийн шилдэг үр дүн, хамгийн сайхан амьдралын төлөө найд. Өнөөдөр өөрт чинь ямар нэг сайн сайхан зүйл тохиолдоно гэж хүлээ!

Хамгийн боломжтой сайн сайхан амьдралыг танд өгөхийг Эзэн Бурхан хүсдэг. Үнэн болов уу гэж үүнд та эргэлзэж байгаа бол Есүсийг илгээхдээ Тэрээр хамгийн шилдэг сайныгаа танд өгсөн гэдгийг санагтун. Есүс үхсэн болохоор, Түүний авралын бэлгийг та хүлээж авснаар тэнгэр диваажинд очиж, мөнхөд амьдарч чадахаар болсон. Түүнчлэн Тэр үхсэн болохоор энэ дэлхий дээр ч сайн сайхан амьдрах боломж танд бас ирсэн билээ.

Иохан 10:10-р ишлэлд, Эзэн Есүс: “Би тэднийг амьтай, сайн сайхан амьдарч, бялхсан амьтай (дүүрээд, халин урсан) байлгахын тулд ирсэн” (AMP буюу The Amplified Bible Библийн Англи хэлээрх орчуулгын хувилбар) хэмээн айлджээ.

Энэхүү номыг уншиж байхдаа, таныг “амьтай, сайн сайхан амьдраасай” гэж Эзэн Бурхан хүсдэг гэдгийг олж харах байх гэж би танд найдаж байна. Сүнс, оюун ухаан, сэтгэл санаа, харилцаа, бие махбод гээд таны бүхий л зүйл дээр жил бүр, өдөр хоног, мөч болгонд Эзэн хамгийн сайныг хүсдэг. Танд Бурхан хамгийн сайн сайхныг хүсдэг юм байна гэдгийг мэдэхээр итгэл найдвар өвөрлөхгүй байж та чадахгүй ээ. Таны бүхий л хэрэгцээг хангаж, бусдад туслах чадвартай болгохыг Эзэн хүсдэг.

Та шаналж зовоод, энэ бүхэн засрах эсэхэд эргэлзэж байгаа бол... *итгэл найдвараар ирээдүйгээ хар.*

Амьдралын даваа нугачааг туулж, зүдэрч ядраад, дахиад юу тохиолдох бол гэж зүрхшээж байгаа бол... *итгэл найдвараар ирээдүйгээ хар.*

Үр хүүхдээ өсгөж байхдаа тэдний амьдралд юу тохиолдох бол гэж санааширч суугаа бол... *итгэл найдвараар ирээдүйгээ хар.*

Цоо шинэ, адал явдалт аяныг эхлүүлээд, урьд хожид гаргаж байгаагүй эрсдэлтэй алхам хийж байгаа бол... *итгэл найдвараар ирээдүйгээ хар.*

Итгэл найдвараа сэрээхээр та зориглох аваас амьдралд чинь олон зүйл өөрчлөгдөж эхлэх болно. Итгэл ихсэж, баяр хөөр эргэн ирж, амар амгалан ноёрхоно. “Хүнд бэрхийг дөнгөн данган туулж гарсан атлаа ингээд байж байгаа минь л яамай, дараа нь аз дайрах байлгүй” гээд сэтгэл ханачихсан сууж байгаа бол энэ номыг одоо буцаагаад тавиарай гэж хэлье.

Харин өөрчлөлт хийхэд бэлэн байгаа бол, илүү сайн сайхан зүйлд бэлэн байгаа бол цааш уншаарай. Найдвар бол өөрөөс нь зуурагч хэн бүгдийн амьдралд гайхалтай сайхан өөрчлөлтийг авчрах арга зэвсэгтэй. Энэ бол санаа, төсөөллийн очийг бадраах хурдасгуур (Сургаалт үгс 24:14-ийг унш), амьдралын шуурга улайран эргэлдэхэд биднийг хөдөлгөөнгүй барьж тогтоох зангуу (Еврей 6:19-ийг унш), илүү сайн сайхан амьдралыг цогцлоохоор зориглох бат итгэл (Сургаалт үгс 23:18-ыг унш), хэзээ ч ганцаар орхигдохгүй гэдгээ мэдэх тайвшрал (Ром 5:5-ыг унш) билээ.

Энэ танд сайхан сонсогдож байгаа бол урт удаан хугацаанд хийгээгүй байсан байж мэдэх тэр нэг зүйлээ зориглон хийгтүн: “Итгэл найдвар өвөрлөгтүн!” Танд нигүүлслийг үзүүлэхээр Эзэн хүлээж байгаа учраас үүнийг хийсэндээ та баярлах нь гарцаагүй.

ХЭСЭГ I

ӨӨДЛӨН ДЭЭШЛЭХ НАЙДВАР ТЭМҮҮЛЭЛ

....

“...Харин Эзэнд найдагчид хүчээ сэлбэнэ. Тэд бүргэд мэт жигүүр дээрээ элин халина...”

Исаиа 40:31

Өөрт байгаагаас илүү зүйлийг хүсэх нь буруу бөгөөд шунал мөн гэж хүмүүс ихэнхдээ боддог. Өөрт байгаадаа үргэлж сэтгэл өег хангалуун байх ёстой нь үнэн боловч зөв шалтгаанаар хүсэж байгаа л бол зөв зүйлийг илүү ихээр хүсэх нь буруу биш гэдэг нь яриангүй. Тэгвэл бид сэтгэл хангалуун байгаа хэрнээ яаж илүү ихийг хүсэх юм бэ? Би яг одоо бол амьдралдаа байгаа бүх зүйлд сэтгэл маш их хангалуун байна. Яагаад гэвэл, миний амьдралд хүссэн зүйлээ төгс цагтаа Эзэн хийдэг гэдэгт би итгэдэг. Миний баяр хөөр, сэтгэл хангалуун байдал Христэд суурилдаг учир би маш их аз жаргалтай байж чаддаг бөгөөд нэмээд өөр юу ч хэрэггүй. Тэгсэн мөртлөө, Бурхан зөвшөөрч байгаа бол амьдралдаа аль болох хол явж, Эзэний төлөө болоод бусдын төлөө хүний хувьд хийх боломжтой бүхнээ хийхийг хүсэж байгаа тул би бүх зүйлээс дахиад илүү ихийг хүсэж байна. Бурханы надад өгөхийг хүсэж байгаа хамгийн сайн сайхан амьдралаас илүүг ч, дутууг ч би үл хүснэ.

Би Бурханыг амьдралдаа улам ихээр хүсэж байна. Түүнтэй улам ойртож, улам дотно нөхөрлөн алхахыг хүсэж байна

(Филиппой 3:10-ыг унш). Илүү их мэргэн ухаан, илүү тогтвортой, тууштай байдал, илүү сайн нөхдийг би хүсэж байна. Үр хүүхдүүддээ би илүү ихийг хүсэж байна. Улам олон хүн Христийг Аврагчаа хэмээн хүлээн аваасай гэж хүсэж байна. Илүү их гайхамшиг, эдгэрэл, чөлөөлөлт, хүч чадлыг харахыг би хүсэж байна.

Бид юу байгаадаа санаа зовж, сэтгэл түгшихгүй байхын зэрэгцээ зөв цагт нь, зөв шалтгаанаар илүү ихийг хүсэх тийм хэмжээнд сэтгэл хангалуун байж болно гэж би үнэнээсээ итгэдэг (Филиппой 4:11, 19-ийг унш).

Өөрсдийнх нь төлөө Эзэн Бурханы хийж чадах бүхнээс доогуур зүйлд сэтгэл ханагчид нь, Эзэн Бурханы агуу байдал илрэн харагдахад саад бологчид гэж би үздэг. Аугаа хүчтэй гэдгээ бидний хүн нэг бүрийн амьдралаар илчлэн харуулахыг Эзэн хүсдэг. Эзэн бол биднийг хамгийн агуу залбирал, хүсэл, бодол, найдвар, мөрөөдлөөс ч халиаж, бидний зүрхлэн гуйж, бодож, сэтгэж чадахаас маань илүү дээгүүр, зүйрлэшгүй давуугаар, халгин цалгиаж, бялхаан дүүргэх чадалтай (Ефес 3:20-ийг унш)!

НЭГДҮГЭЭР БҮЛЭГ

Хүсэл хүлээлтийнхээ төвшинг өндөрсгө

*“Эзэнийг хүсэн хүлээгтүн! Тууштай байж,
зүрхээ зоригжуулагтун! Тийм ээ, Эзэнийг
хүлээж, найдаж, хүсэн хүлээгтүн!”*

Дуулал 27:14 (AMP)

“Хүлээлт өндөртэй байх нь бүх зүйлийн
түлхүүр”.

—Сэм Вальтон

Бэтти гэдэг эмэгтэйн тухай би ярьж өгье. Бэтти итгэгч эмэгтэй. Библиэ тогтмол уншдаг. Орон гэргүйчүүдэд ноосон хөнжил тараах хүмүүнлэгийн ажилд сайн дураараа сард нэг удаа оролцдог. Сайхан эмэгтэй байгаа биз?

Гэхдээ Бэттигийн тухай таны мэдэх ёстой өөр зүйл бас бий л дээ. Найзууд нь түүний дэргэд байхгүй үедээ: “муу амтай Бэтти” гэж хочилдог. Энэ хочийг өгсөндөө тэд эвгүйцдэг ч шударгаар хэлэх юм бол Бэтти өөрөө ийм нэрийг олж авсан гэхэд бараг болно. Яагаад гэвэл, бүх юмыг муугаар бодож, муу л юм болно гэж тааварлаж, нөхцөл байдлаас дандаа болохгүй, бүтэхгүй байгааг нь тэр олж хардаг. Нэг жишээ ярья л даа.

Өнгөрсөн зун, Бэтти нөхөр (бүтэлгүй Фил гэдэг) хоёр хүүхэдтэйгээ (санаанд хүрдэггүй Уил, төөрсөн хурга Мээган

гэдэг) аяллаар явжээ. Фил уг нь халамжтай сайн нөхөр, Уил, Мээган хоёр ч сайн хүүхдүүд гэдгийг би хэлэх нь зүйтэй. Гэхдээ Бэтти тэдэндээ өндөр итгэл найдвар тавьдаггүй. Тэднийхээ төлөө ч нэг их зүйл найдан хүсдэггүй. Хамгийн гол нь, хочноос нь харахад л тэр гэр бүлийнхнийхээ талаар мууг төсөөлж хүлээж байдаг нь тодорхой.

Нэлээд хэдэн сарын өмнөөс Фил, Бэтти хоёр зуны долоо хоногийн аяллаараа нэгэн алдартай амралтын газарт очихоор төлөвлөжээ. Гэвч аялал ойртох тусам бүх зүйл бүтэлгүйтэх юм шиг Бэттид санагдах болов. Амралтын газар хүртэл 300 бээрийг машинаар туулахдаа Бэтти: “Ёстой бүтэхгүй санаа байсан юм. Одоо тэр газрын бүх үйлчилгээнд хэдэн бээрийн урт дараалал үүсчихсэн байгаа даа. Зочид буудал нь ч гэсэн сурталчлаад байсан шигээ гоё биш байх. Энэ долоо хоногт бороо тасралтгүй орно гэж барихад ч бэлэн байна” хэмээн гасалж гонгиносоор байв. Нөхцөл байдал ямар ч байлаа гэсэн хамгийн сайнаараа хичээнэ гэдгээ, бүх юм бүтэлтэй сайхан болно гэж Фил ч, хүүхдүүд нь ч Бэттид итгүүлэхийг хүссэн боловч тэр сэтгэл дундуур зангаа тавьсангүй. Хөөрхий Фил, Уил, Мээган гурав... 300 бээрийг туулах гэж 1000 бээр хүнд ачаа зөөсөн мэт л болж.

Гэхдээ энэ амралтын аялал Бэттигийн төсөөлж байсан шиг тийм муу байгаагүй гэдгийг хэлэхэд илүүдэхгүй биз. Усан парк дээр ердийнхөөс дараалал арай ихтэй байв. Фил, Уил, Мээган гурав үүнд юм бодсонгүй. Харин ч хүлээлтийн хэдэн минутыг дараа нь ямар гулгуураар гулгаахаа хоорондоо ярьж, инээж хөхрөн өнгөрөөж байв. Харин Бэтти: “Ийм юм болно гэж би хэлээд байсан биз дээ” хэмээн амандаа үглэж, маш их бухимдалтай байлаа.

Эхний оройноо зоог барьсан ресторан нь бодсон шиг сайхан байсангүй. Фил, Бэтти хоёрын захиалсан ундааг дуусчихжээ гэж зөөгч хэлжээ. Фил өөр юм захиалав. Харин Бэтти хямарч бухимдахаар шийдэж: “Арай ч дээ, итгэмээргүй юм!” хэмээн гүнээ санаа алдаж байв.

Тэгээд зочид буудлын өрөөнд ортол ёстой гэвчээрийн хязгаарыг нь давжээ. Өрөөндөө тухлаад байтал зурагт нь олигтой гарахгүй байв. “Мэдээд байсан юм аа. Ёстой мэдээд байсан юм. Мэдээд байсан юм!” гэж уурандаа багтарсан Бэтти зэвүүцэн үглэж байв. “Энэ зочид буудал нь авах юмгүй байгаа гэж би мэдээд байсан юм”. Фил бүртгэлийн ажилтан руу нь залгахад, зурагтыг нь тэр даруй шинэ зурагтаар сольж өгөв. Гэвч хохирол хэдийнээ учирсан байлаа.

Муу амтай Бэтти муухай амралт эдлэв... гэвч энэ бол өөрийнх нь л харж хүлээсэн зүйл мөн шүү дээ.

Зүрхтэй холбоотой хэрэг

Бэттигийн түүх бол зарим үед тантай, бас надтай айхтар адилхан харагддаг тэр нэг хүний тухай зохиомол түүх билээ. Бид бүгдээрээ л цаг агаар “өдрийн ихэнх үед нарлаг” гэдгийг биш, харин “багавтар үүлтэй” гэдгийг нь цохож, “аяганд ус байна” гэхийн оронд “аяганы дундуур ус байна” гэсэн гутранги хандлага, гундуу хүлээлттэй байгаагаа олж хардаг.

Бэттигийн хувьд, гундуу, гутранги хүлээлтээсээ болж зуны амралтаа таатай сайхан эдэлж чадаагүй. Тэгвэл маш олон хүн ийм л хүлээлтээсээ болоод амьдралдаа аз жаргалыг мэдэрч чаддаггүй аж. Тэд сөрөг, алдаа хайсан, өөлж голсон хандлагатайгаар өдөр хоногийг элээж, таагүй муу юм тохиолдоно гэсэн завгүй бодлоосоо болоод хамгийн сайхан зүйл ирнэ гэж бараг л найдаж чаддаггүй. Нэг л юм бүтэхгүй тийшээ хандвал: “Тээр, өнөөдөр азгүйтнэ гэдгээ мэдээд байсан юм аа” гэж бодох ба бүх юм болж бүтэж байхад ч “Энэ байдал ч нэг их удаан үргэлжлэхгүй байх” гэж санана. Бүтэлтэй, бүтэлгүй ямар ч өдөр байсан, уулын оргилд, эсвэл хөндийн дунд явж байлаа ч тэд амьдралаасаа аз жаргалыг мэдэрч чаддаггүй. Яагаад гэвэл, тэд өөрсдийгөө чадна гэж хэзээ ч найдаж чаддаггүй юм. Та бид хоёр Бэтти шиг арай ч тийм тартагтаа тулчихаагүй байж болох ч итгэл найдвар өвөрлөдөггүй маань бидний амьдралд хортой нөлөө үзүүлээд байгааг үнэнээр нь өчих нь

зүйтэй. Тэгвэл хамгийн сайн сайхан зүйл ирнэ гэдэгт итгэж, Эзэн Бурхан юу хийхийг харахаар үүд хаалгаа нээгээд үзвэл яасан юм бэ?

Гундуу доогуур хүлээлт гэдэг бол дуусаж өгдөггүй залхмаар өдрийг дургүйцлээ илэрхийлэн өөртөө үглэж өнгөрөөхийг юмуу, өнөөдөр чинь ямар азгүй өдөр вэ гэх гайхшаа барсан мэдрэмж төдий зүйл биш. Энэ бол илүү ноцтой гүнзгий асуудал буюу *сүнслэг* асуудлын шинж тэмдэг. Алхам тутамдаа сэтгэл гонсойсоор сүүлдээ ийм л зүйл харж хүлээдэг зуршил өөртөө тогтоочихсон байж болно. Өөрийгөө үнэлэх үнэлэмж хэт доройгоос болоод ямар ч сайн юм хүртэх эрхгүй гэж өөрийгөө бодож, сайн сайхныг хүлээхээ больчихсон хүмүүс ч байдаг. Эзэн Бурхан бол сайн бөгөөд хүүхдүүдийнхээ төлөө сайн сайхан зүйл хийж өгөх хүсэлтэй гэдгийг огт мэдэхгүй хэсэг бүлэг бас байна. Яг энэ шинж тэмдгүүдээс үүдсэн эрсдэл маш өндөр юм. Зүрх сэтгэлд минь энэ үед юу болж байдгийг өвчин зовлон тусаж, бие өвдөхөд ямар байдгаар дүрслэн харуулъя. Иймэрхүү яриа болдог гэх үү дээ:

Эмч: Бие чинь эвгүйрхээд сүнсээрээ, сэтгэл санаагаараа тавгүй байна гэж та хэллээ. Ямархуу зовуурууд илэрч байна?

Өвчтөн: За, эмч ээ, ирээдүйгээ бодохоор л таагүй оргиод байх юм. Амьдрал маань сэтгэл гонсойлтоор дүүрэн байсан болохоор би өөрөө ч, гэр бүл маань ч бүтэлтэй сайхан амьдарна гэж найдан харж чадахгүй юм даа.

Эмч: Зовууруудыг чинь сонсохоор бүх юм тодорхой байна. Итгэл найдвараа алдах өвчний хүнд хэлбэр танд туссан байна.

Бэтгигээс илэрч харагдсан зовуур тэмдгүүд бол бүх юмыг муугаар харах, санаа зовох, үглэж гомдоллох байсан. Зүрх сэтгэл нь ямар байгаагаас л энэ бүх шинж тэмдэг үүдэлтэй. Тэр итгэл найдвараа алдсан байв. Гэр бүлээрээ сайхан аялна гэж найдахын оронд байж болох хамгийн муу хувилбаруудыг төсөөлж байсан. *“Дийлдэхгүй урт дараалалтай болчихсон*

байгаа даа. Аятайхан хоолны газар ч олдохгүй биз. Буудал нь гэж авах юмгүй бохир байгаа даа” гээд л. Найдлага төрүүлчихмээр юм энд огт алга. Гэвч Фил, Уил, Мээган гурваас илэрч байсан шинж тэмдгүүд өөр байв. Тэд эерэг, цовоо цолгиун, урамтай сэргэлэн зангаар ямар ч нөхцөл байдал тулгарсан хамгийн сайнаараа давж гарахад бэлэн байсан. Итгэл найдвараар дүүрэн төдийгүй найдан хүлээх зүйл нь ч тэнгэр тулам өндөр байлаа.

Бэттид болон гэр бүлийнхэнд нь тулгарсан нөхцөл байдал ав адилхан байсан боловч яг тухайн нөхцөл байдлуудад тэд харилцан адилгүй хариу үйлдэл үзүүлсэн гэдгийг тэмдэглэх нь зүйтэй. Бүгдээрээ л урт дараалалд зогсож, нэг л зоогийн газарт хооллож, ажилладаггүй зурагтын өмнө суусан шүү дээ. Бэттигийн уруу дорой хүлээлтүүд тохиолдсон бүх явдлаар батлагдсан бөгөөд энэ нь түүнийг сэтгэлээр унахад хүргэжээ. Харин гэрийнхнийх нь өөдрөг хүлээлт тодорхой шалгуурт оров. Гэлээ ч тэд итгэл найдвараа алдахгүй, өөдрөг тэмүүллээ гээхгүй байх сонголт хийснээрээ тухайн нөхцөл байдлуудыг даван гарч, урагшлахын сацуу аян замынхаа алхам бүрээс таашаал авч чадаж байна.

Яг үүнтэй холбогдуулаад танаас нэг чухал юм асууя: Танд ямар шинж тэмдэг, зовуурууд илэрч байна вэ? Та зүрх сэтгэлээ үнэнээр нь шинжээд үзвэл, тэндээс юу олж харах бол?

Та Фил, Уил, Мээган гуравтай адилхан байна уу? Ирээдүйгээ өөдрөг сайхнаар төсөөлөн, өнөөдрийг өчигдрөөс илүү сайхан гэж, маргаашаа өнөөдрөөс илүү байна гэж харж чадаж байна уу? Өөрийн чинь амьдралд Эзэн Бурхан гайхалтай зүйл хийж өгнө гэсэн хүлээлт мөрөөдөлтэйгөөр өглөө бүрийг жаргалтай угтаж байна уу?

Эсвэл муу ёрлодог Бэттитэй илүү адилхан байна уу? Таагүй болохгүйг нь л бодож зууралдаад байгаагаа та харж байна уу? Болоогүй байхад л муу

Өөрийн чинь амьдралд Эзэн Бурхан гайхалтай сайхан зүйл хийж өгнө гэсэн хүлээлт мөрөөдөлтэйгөөр өглөө бүрийг та жаргалтай угтаж байна уу?

юм болсон юм шигээр санаа зовдог уу? “Хар даа, дахиад л ингэнэ гэж мэдээд байсан юм. Энэ ёстой бүтэхгүй. Олигтой юм болохгүй гэдгийг нь мэдэх ёстой байсан юм. Нэг л ёозгүй санаадаад байна шүү” гэх мэтийн юм ярьдаг уу?

Итгэлийн холбоос

Итгэл найдварын энэхүү аянаа эхлүүлэхэд зүрх сэтгэлээ дүгнэж харах нь бидэнд маш чухал дасгал болно. Бурханд най-

Том зүйлийг хүлээж хардаг хүнийг нэрлэ, тэгвэл би эрэлхэг итгэлээрээ юу хийж чаддагийг нь ярьж өгье.

дах, эерэг хүлээлттэй байх зэрэг нь итгэлтэй маш нягт уялддаг. Эндээс ургуулаад үзвэл, тухайн хүний хүлээлт хэр түвшинд байх нь итгэлийнх нь түвшингөөс шууд шалтгаалдаг гэж хэлбэл ойлгоход илүү амархан болно. Дутуу дундуур хүлээлттэй хүнийг нэрлэ, багахан итгэл харуулдгийг нь би

ярья. Том зүйлийг хүлээж хардаг хүнийг нэрлэ, тэгвэл би эрэлхэг итгэлээрээ юу хийж чаддагийг нь ярьж өгье. Хүлээлт найдлагаа Бурханд тавих тухай бид ярьж байгаа шүү дээ. Энэ бол дан эерэг хандлагаас ч илүү зүйл. Энэ бол таныг хайрлаж халамжилна, санааг чинь зовоож буй бүхэнд анхаарлаа хандуулна гэдэгт нь Эзэн Бурханд итгэж найдахыг хэлнэ.

Бидний итгэл буюу эерэг, найдвар дүүрэн хүлээлт маань Бурханд таалагддаг гэж Бурханы Үгэнд хэлсэн байдаг (Еврей 11:6-г унш). Таарч байсан хүмүүсийнхээ итгэл найдварын улмаас Эзэн Есүс онцгой зүйл хийж өгч байсан гэдгийг Сайнмэдээний номуудад хэдэнтээ өгүүлдэг (Матай 9:29, Марк 5:34, Лук 7:50, Лук 17:19-ийг унш). Яг ийм гайхамшгийн тухай Марк номын 10-р бүлэгт мөн өгүүлжээ. Энэ түүх нь бүхэлдээ хүлээлт найдлагын ач холбогдлыг харуулдаг бөгөөд өнөөдөр танд ч, надад ч маш чухал учраас би унших дуртай.

Марк 10:46-47:

“...Есүс шавь нартайгаа болоод үй олонтой Иерихогоос гарч явтал Тимайн хүү Бартимай

*гэгч сохор гуйлгачин замын хажууд сууж байв.
Назарын Есүс явж байгааг тэр дуулаад,
- Давидын хүү Есүс ээ, намайг [одоо] өршөөгөөч
гэж хашхирч эхлэв”.*

Бүгдээрээ Бартимайн тухай аваад үзье л дээ. Бүтэхгүй, болохгүй гэж муу бүхнийг хүлээх бүх шалтаг шалтгаан түүнд байсан. Яагаад гэвэл, олон түмний хайрлах задгай хэдэн зоосоор амь зуулгаа залгуулчих юмсан гэж замын хажууд өдөр бүр гуйлга гуйн сууна. Хэцүү бэрх амьдралаасаа болоод хэрвээ хүн ямар нэг сайн сайхан зүйлийг хүлээж харахаа танаж болих ёстой бол тэр хүн нь Бартимай мөн байв. “*Ингээд нэмэргүй дээ. Угаасаа бүтэхгүй. Юу ч өөрчлөгдөхгүй. Есүс намайг юу гэж анзаарах вэ дээ. Ийм юманд найдаад яахав дээ?*” гэж бодож болох л байсан. Хэн ч үүнийг нь буруутгахгүй.

Гэвч тэр амьдралдаа илүү агуу зүйл хүлээж авахаар итгэж найдаж зүрхэлсэн юм. Болохгүйг биш болохыг бодож сэтгэхээр шийдэв. “Давидын хүү Есүс ээ, намайг [одоо] өршөөгөөч” хэмээн хашхирч эхлэхдээ тэр хүлээлт найдвараа “танаж бууруулаагүй” юм. Ямар шаргуу шавдуулан гуйж байгааг нь дууных нь өнгөнөөс та сонсож байна уу? Энэ боломжийг яаж ч байсан алдаж болохгүй юм шүү гэсэн эрмэлзэл Бартимайгаас харагдаж байна. Түүнийг: “дуугүй бай гэж олноороо зандарсан” (Марк 10:48-ыг унш) боловч тэр харин бүр улам чанга хашхирсаар байв. Бартимай тайвширсангүй. Тэр Есүс зогсож түүнийг дуудах хүртэл хашхирсаар байв.

Энэ түүхийн хамгийн гайхалтай хэсгүүдийн нэг нь энэ: Бартимайг Есүсийн өмнө авчрахад, Эзэн санаанд оромгүй нэг зүйл асуув. 51-р ишлэлд, сохор гуйлгачнаас: “Өөрийнхөө төлөө юу хийлгэхийг Надаас хүснэ вэ?” гэж Есүс асуужээ.

Хачин асуулт байгаа биз? Шавь нар ч бас: “Өөрийнхөө төлөө юу хийлгэхийг Надаас хүснэ вэ?” гэв үү? Эзэн, харахгүй байна уу? Энэ чинь сохор хүн. Яагаад ийм юм асууна вэ?” гэж бодоо байх. Гэвч Есүс илүү гүн гүнзгий утга учиртай зүйлийг асууж байлаа. “Чи юуг хүлээн найдаж байна? Хоол өгөөсэй гэж горьдож байгаа юм уу? Гараасаа хөтлөх хэн нэгэнтэй болохыг хүсэв үү?

Өглөг өгөөч гэж гуйж байгаа юм уу?” Мэдээж энэ бүхэн Бартимайд хэрэгтэй байсан. Итгэл багатайхан хүн бол энэ бүхний аль нэгийг л гуйгаад сэтгэл ханачих байсан биз.

Гэвч Бартимайн хүсэж хүлээсэн юм илүү агуу зүйл байлаа. “Өөрийнхөө төлөө юу хийлгэхийг Надаас хүснэ вэ?” гэж Есүсийг асуухад Бартимай өчүүхэн ч тээнэгэлзэлгүйгээр, арай том юм гуйчихаж байгаа юм болов уу гэж бодох ч үгүйгээр: “Рабуни (Багш гэсэн утгатай), намайг дахин хардаг болгооч” гэж зоригтой дуугарлаа. Энэ түүх хэрхэн цааш үргэлжилдгийг та мэдэж байгаа байх. Бартимайн итгэл Есүст маш их сэтгэгдэл төрүүлсэн. 52-р ишлэлд: “Яв. Итгэл чинь чамайг эдгээлээ гэсэнд тэрээр тэр даруй дахин хараа орж, Есүсийг замд нь дагалаа” гэж бичсэн байдаг.

Бурханаас хамгийн сайн сайхныг хүлээж авна гэж итгэх зүрх зориг гаргасан учраас тэрээр Эзэнээс яг түүнийгээ хүлээж авсан. Таны хувьд ч адилхан. Ямархуу амьдралаар амьдрах вэ гэдэгт чинь таны хүлээлт найдлагын төвшин ийм л чухал нөлөөтэй. Таны амьдралд агуу зүйлийг хийнэ гэж Бурханаас найдан харахгүй л юм бол Тэр тийм зүйл хийхгүй. Харин хүлээлт найдлагын төвшингөө улам өндөрсгөж, амьдралд чинь Бурхан агуу зүйлийг хийхийг хүсэж байгаа гэж хүлээх аваас танд зориулсан агуу төлөвлөгөө Бурханд байгаа гэдгийг та мэдэж, улмаар мөрөөдөж, итгэж, гуйж, бат зоригтой итгэлээр үйлдэж эхлэх болно.

Бурханаас сайн зүйлсийг хүлээж авна гэж найдан хүлээх нь зөвшөөрч болохоор зүйл үү гэдэг дээр эргэлзээтэй байгаа бол Исаиа номын энэ хэсгийг та аажуу тайван уншаад, тунгаан бясалгана уу.

“Эзэн [чин сэтгэлээсээ], та нарт нигүүлсэнгүй хандан хүлээж байна [хүлээн, харж, хүсэн тэмүүлж]. Тиймээс Тэр та нарт өршөөл, хайр энэрлээ үзүүлэн өндөрт байж байна. Учир нь Эзэн шударга ёсны Бурхан. [Түүний ялалт, Түүний таа-

*Танд зориулсан,
таны төлөөх
агуу төлөвлөгөө
Бурханд бий.*

лал, Түүний хайр, Түүний амар амгалан, Түүний баяр хөөр, Түүний юутай ч зүйрлэшгүй бөгөөд эвдэршгүй бат нөхөрлөлийн төлөө] Түүнийг [үнэн сэтгэлээсээ] хүсэн хүлээж, харж, тэмүүлэгчид нь бүгдээрээ ерөөгдсөн (жаргалтай, золтой, атаархмаар) ажээ!”

Исаиа 30:18 (АМР)

Бурхан Өөрийн сайн сайхныг үзүүлэх хүнээ эрж хайж байдаг. Өөрт чинь Бурхан сайн сайхнаа харуулаасай гэж (хүлээн найдаж) харж байгаа бол та энэ шаардлагад нь нийцэж байна. Тэр бол өөр бусад бүхнээс хавьгүй чухал учраас Өөрийгөө танд өгнө гэж Бурханаас найдан хүлээгтүн. Тэр бол бидэнд хэрэгтэй бүхий л зүйл гэдгийг санагтун!

Хүлээлт найдлагынхаа түвшинг өндөрсгөх гурван алхам

Энэ бүлгийг уншаад: “*Жойс, үүнийг чинь уншихад сайхан сонсогдож байна л даа, гэхдээ би яаж илүү ихийг найдан хүлээх юм бэ? Үр хүүхдээ хоолтой ундтай байлгаж, ажил төрлөө аятайхан шиг аваад явчих юмсан гэж хэрэндээ их хичээж, ийш тийшээ гүйн юм юм амжуулж, ахуй амьдралынхаа зардлыг арай ядан төлж барагдуулдаг хүн. Өдийг хүртэл байдаг чадлаараа ажиллаж хөдөлмөрлөж явна. Тэгэхлээр хүлээлт найдлагынхаа түвшинг яаж өсгөнө гэж?”* хэмээн та асууж байж болох юм.

Итгэлийн талаар би олон зүйлийг хэлж чадна. Яг энэ сэдвээр хичнээн мянган ном бичигдсэн байгаа. Гэхдээ яг одооноос эхлээд таны хийж болох гурван энгийн алхмыг зааж өгье. Үүнийг хийх аваас итгэл найдварын түвшинээ өсгөж дээшлүүлэхэд чинь тус болно:

1. Итгэ

Учир шалтгаантай болохоороо л Бурханы хүүхдүүд “итгэгч” гэж нэрлэгддэг юм. Эргэлзэж тээнэгэлзэхээр, шантарч ухрахаар, больж хаяхаар уруу татагдах үедээ

*Эргэлзэж
тээнэгэлзэхээр,
шантарч ухрахаар,
больж хаяхаар
уруу татагдах үедээ
энэ бүхний оронд
итгээд үзье гэдэг
сонголтыг хий.*

энэ бүхний оронд итгээд үзье гэдэг сонголтыг хий. Танд Бурхан хайртай гэдэгт, танд өгөхөөр сайн сайхан зүйлийг бэлдчихсэн байгаа гэдэгт нь итгэ. Хэрвээ бид итгэвэл Бурханы алдрыг харна гэдгийг Есүс хэлжээ (Иохан 11:40-ийг унш.) Алдар нь Бурханы агуу сайхан бүхний бодит илрэл билээ.

2. Гуй

Иаков 4:2-т: “Та нар гуйдаггүй учраас та нарт байдаггүй” гэсэн байдаг. Та Бурханд итгэхээр сонгосон тул бүхий л хэрэгцээг чинь хангаж өгнө гэсэн. Тиймээс тэдгээр хэрэгцээг чинь хангаж өгөхийг Бурханаас гуйж эхлэгтүн. Түүнтэй хүсэл мөрөөдлөө хуваалц. “Өөрийнхөө төлөө юу хийлгэхийг Надаас хүснэ вэ?” гэж Бартимайгаас Есүс асуусанчлан, танаас ч бас асууж байна. Зөвхөн Түүний л хийж чадах тэр л зүйлийг хийж өгөхийг Эзэнээс гуйх зүрх зоригтой байгтун. Мэдээж, бид бүгдээрээ л Бурханы хүсэл биелэгдэхийг хүсэж, гуйж байгаа зүйл маань бидэнд тохирохгүй, хэрэггүй зүйл байваас тэр юмыг бидэнд Бурхан өгөхгүй, харин илүү дээр зүйлийг өгнө гэдэгт баттай итгэх ёстой.

3. Харж хүлээ

Таны залбиралд Бурхан хариулж, хэрэгцээг чинь хангаж, Бурханаас өгөгдсөн хүсэл мөрөөдлийг чинь биелүүлж өгнө гэсэн хүлээлт найдлагатайгаар өдөр бүрийг туулж өнгөрүүл. Хүсэж байсан зүйлээ биелэгдэхийг та хараахан бодитоор хараагүй, таны найдаж байснаар энэ зүйл болоогүй ч бай, энэ бол Бурхан ажиллахгүй байна гэсэн үг биш юм шүү. Найдан хүлээх хандлагаа тээсээр, Бурханы хийж байгаа зүйлийг анзаарч ажигласаар бай. Хүссэн юмуу хэрэгтэй байгаа зүйлээ хүлээх зуураа, Бурханы хийж байгаа бүх зүйлийг талархан хүлээж авагтун.

Бурхантай илүү гүн гүнзгий харилцаатай болох, Бурханы Үгийг илүү сайн ойлгодог болох, гэр бүлийнхээ харилцааг бат бэх болгох, санхүүгийн тал дээр чөлөөлөгдөх, сургуульдаа эргэж сурах, Бурханы үйлчлэл хийх, цоо шинээр эхлэх боломж гээд өнөөдөр та юуг найдан харж байна, зүрхэндээ байгаа тэр л зүйлийнхээ төлөө (Бурханы Үгэнд хэлсэнтэй нийцэж л байгаа бол) итгэ, гуй, найд, эрж хай.

Хүсэл хүлээлтээ өсгөснөөр ирдэг жинхэнэ өөрчлөлт

Таны найдлага хүлээлтийн төвшин хэр өндөр байна амьдрал чинь түүнчлэн өрнөнө. Найдсанаар эргэн тойрон, нөхцөл байдал чинь тэр даруйдаа өөрчлөгдчихгүй боловч яг тэр хүрээлэл, нөхцөл байдалдаа хариу үзүүлэх арга зам чинь таны хүлээлт найдлагаар өөрчлөгддөг.

*Таны найдлага
хүлээлтийн төвшин
хэр өндөр байна
амьдрал чинь
түүнчлэн өрнөнө.*

Таны хүлээлт найдвар таныг өөрчилнө. Нөхцөл байдал өөрчлөгдөхийг баяртайяа хүлээх шинэ хандлагыг танд өгнө. Өөрийн тань амьдралд агуу төлөвлөгөө бэлтгэсэн байгаа гэдэгт Эзэнд итгэх нь бат зоригтой, өөртөө итгэлтэй, баяр хөөрөөр бялхсан итгэгч байх шалтгаан болно.

Агуу хүлээлт найдвар тээснээр ирдэг баяр хөөрийг дүрсэлсэн энгийн нэг түүхийг би олж уншсан юм:

“Нэгэн гэр бүлд нэг өндгөн эсийн ихэр болох хоорондоо усны дусал мэт ижилхэн хөвгүүд мэндэлжээ. Тэдний бүх зүйл ялгахын аргагүй ижил мөртлөө нэг л юм өөр байв. Нэг нь аливаа юмны гэрэл гэгээтэй талыг дандаа олж хардаг итгэл найдвар өвөрлөсөн өөдрөг тэнүүн сэтгэлтэй. Харин нөгөө нь бүх юмыг болохгүй бүтэхгүй талаас нь хардаг, дэндүү гутранги нэгэн байлаа. Хэт өөдрөг, хэт гутранги болж байгаад нь хөвгүүддээ

зовнисон эцэг эх нь сүүлдээ эмчид авчирч үзүүлжээ. Эмч нэг зүйл хийж үзэхийг зөвлөв гэнэ. “Одоо төрсөн өдөр нь болохоор гутранги хүүдээ гялалзсан сайхан унадаг дугуй, өөдрөг хүүдээ овоолсон малын өтөг бэлгэнд өгөөд үз” гэжээ.

Аав, ээж нь хоёр хүүдээ ив ижилхэн хандахыг үргэлж эрхэмлэж ирсэн тул ингэх нь арай л дэндүү санагдсан ч энэ нөхцөлд эмчийн зөвлөгөөг дагахаар шийдэв. Ихрүүдийн төрсөн өдөр ч болов. Тэд хүүхдэд авч болох хамгийн үнэтэй, хамгийн шилдэг загварын уралдааны дугуйг гутранги хүүдээ бэлэглэж гэнэ. Гэтэл хүү дугуйгаа харангуутаа: “Энийг чинь унах юм бол би ойчоод хөлөө хугалчих юм байна” гэж хэлэв.

Харин малын өтгөөр дүүргэж, сайхан боосон хайрцгийг өөдрөг сэтгэлтэй хүүдээ бэлэглэв. Хүү бэлгээ задлангуут хэсэг гайхаж балмагдсан ч: “Та нар намайг хуурч чадахгүй дээ! Ийм их өтөг нь байгаа юм чинь одой морь энэ хавьд байж л таараа!” гэж хашхирсаар гүйж гараад хайж гарч гэнэ”.¹

Найдвар өвөрлөгтүн!

Хүлээлт найдварын төвшингөө одоо өндөрсөгтүн хэмээн таныг би ятгах байна. Таны байгаа нөхцөл байдал ямар байгаа

Туулж ирсэн, одоо байгаа байдлаа үүнээс илүү яах вэ дээ гэсэн байдлаар бүү хар.

нь хамаагүй. Танд тулгарч байгаа ямар ч саад бэрхшээлээс Эзэн Бурхан агуу билээ. Туулж ирсэн, одоо байгаа байдлаа үүнээс илүү яах вэ дээ гэдгээр бүү хар. Өнгөрсөнд амссан бүхнээ өөрийн ирээдүй мэтээр бүү бод. Үүнийхээ оронд, таны амьдралд бүр илүү

сайныг Эзэн Бурхан хийх болно гэдэгт итгэхээр сонго. “Өөрийнхөө төлөө юу хийлгэхийг Надаас хүснэ вэ?” гэж танаас Есүс асууж байна. Энэ бол үнэхээр агуу хүчтэй асуулт юм шүү. Тиймээс урагш алхаж, найдвар өвөрлөгтүн! Одой морь энэ хавьд байж л таараа!

ХОЁРДУГААР БҮЛЭГ

Удирдагч Бурханыг дага

“Сэтгэл минь бүхлээрээ Таныг яг дагаж,
Танаас чанга зуурчээ
Таны баруун мутар намайг түшиж байна”.
Дуулал 63:8 (АМР)

“Найдвар” гэдэг үгийг хүн болгоны магнай дээр Бурхан бичиж өгчээ.
—Виктор Хьюго, “Лес Миизрэблс”

Бүх цаг үеийн туршид хүүхдүүдийн тоглодог байсан тоглоомууд дунд “Удирдагчаа дага” гэдэг тоглоом нэлээд дээгүүр байранд орох байх. Бүгдээрээ ар араасаа жагсан зогсоод, удирдагчийнхаа хийж байгаа зүйлийг дуурайж хийдэг энэ тоглоомыг хүүхэд бүр л бэлтгэл анги юмуу бага сургуульд байхдаа найзуудтайгаа цэцэрлэгт хүрээлэнд очоод тоглож үзсэн байдаг. Яаж тоглодгийг нь санаж байна уу? Урд талынхаа хүний мөрийг алдалгүй гишгэхдээ түүний урд байгаа хүмүүсийн мөрийг ч алдалгүй дагах хэр хэцүү байдгийг санаж байна уу? Дугуй хоолойгоор гараад, дүүжин дамжуургыг гараараа зүүгдэн туулаад, шатаар авирч, гулгуураас гулсан буудаг. Ингээд л тоглоомын талбайгаа бүтэн тойрдог байсан.

Удирдагчаа дага гэдэг тоглоомоос миний хамгийн сайн санаж байгаа зүйлсийн нэг нь удирдагчийн ур чадвараас тоглоом хэр хөгжил хөөртэй байх нь тун ч их хамаардаг байсан.

Удаан хөдөлгөөнтэй, уран сэтгэмжгүй, зүг чигийн мэдрэмж муутай удирдагчтай байвал хүүхдүүд амархан алддаг. Сонирхол нь буураад өөр юм тоглохоор тарцгаачихдаг сан. Бас хэтэрхий хурдтай, уян шалмаг хөдөлгөөнтэй, эсвэл даргархуу, бусдыгаа хэтэрхий шахдаг удирдагчтай байвал тоглоом бас л нэг их удаан үргэлжилдэггүй. Яагаад гэвэл, гүйцэж хийж чадах хүүхэд гардаггүй. Энэ тоглоомыг амжилттай сайн тоглохын тулд зөв хүүхдээ удирдагч болгох ёстой. Хурдаа яг тохируулж чаддаг, тоглоомыг сонирхолтой болгож, очмоор байгаа газар руу маань алдуулахгүй дагуулдаг удирдагч хэрэгтэй байдаг.

Удирдах нь гол түлхүүр юм. Хүүхэд бага наснаас өсвөр насанд хүрэхэд, тэр ч байтугай, “эрийн цээнд” хүрэх үед ч энэ үнэн бидний дотор бат суурилан үлдсэн байдаг. Мэдлэг чадвартай дасгалжуулагчтай байвал танай баг нэлээд амжилттай явах магадлалтай. Урагшлах тэмүүлэлтэй, урам зориг өгдөг багштай байх аз таарвал тухайн хичээл дээрээ өөр багштай байснаас илүү сайн болох боломжтой. Байдаг чадлаа дайчлахыг дарга чинь танаас шаардаж, амжилт гаргахаар байр сууринд тавих аваас та ажилдаа дур сонирхолтой байж, өөрт ноогдсон үүргээ хамгийн сайнаараа хийх болно. Өнөөг хүртэл хэр өндөр амжилтад хүрсэндээ, үүнтэй холбоотой амсаж туулсан зүйлсдээ та хэр сэтгэл хангалуун байгаа нь хэнийг дагахаар сонгосонтой чинь шууд хамааралтай.

Хүүхдийн тоглоомын талбай, сагсан бөмбөгийн талбай, анги танхим, хурлын өрөөний ширээн дээр хэрэгжиж байгаа тэр л зарчим таны амьдралын бусад гүнзгий салбаруудад ч хэрэгжинэ. Үүнд удирдлага гол түлхүүр хэвээрээ л байна. Хэнийг, юуг дагахаар сонгох чинь амьдралдаа хэр сэтгэл хангалуун байхыг тодорхойлно. Зүгээр нэг дарга, багш, эцэг эхээ дагах тухай би энд яриагүй. Харин илүү том шийдвэрийн тухай ярьж байна. Эзэн Бурханыг мөн таны амьдралд зориулсан Түүний төлөвлөгөөг дагахаар сонгох тухай ярьж байна.

Та амьдралаа өөрийнхөө төлөвлөснөөр туулж, бүх асуудлын учрыг олж, өөрийнхөө бодсон санаснаар болгох гэвэл

эцэстээ шаналж зовсон, аз жаргалгүй нэгэн болох нь тодорхой. Таны төлөвлөгөө угаасаа буруу, муу учраас ийм гэх гээгүй л дээ. Харин Бурханы төлөвлөгөө үүнтэй чинь зүйрлэшгүй агуу болохоор тэр юм.

Бурханы төлөвлөгөөнд захирагдахын оронд өөрийнхөө төлөвлөгөөг баримтлахаар шийдэх үедээ хамгийн шилдгийг биш, түүний удаахыг та сонгож байгаа хэрэг юм. Түүнчлэн, өөрийнхөөрөө

хийх гэж зүтгэхэд нэлээд стресс дарамт дагалдаж ирнэ. Орох гэсэн сургууль чинь таныг элсүүлээгүй, бизнес хийгээд үзтэл бүтэлгүйтээд, гэрлэнэ гэж бодож байсан хүн чинь таныг голж, байр чинь зарагдахгүй байх гээд л ямар ч саад бартаа танд учирсан бай өөрийнхөө хүчээр асуудлыг засаж шийдэх ёстой болох учраас ийм их дарамт стресс бий болох юм. Та удирдагч бол өөрийнхөө дутагдал доголдол, алдаа бүтэлгүйтэл, хязгаарлагдмал, хүчин мөхөс байдлыг дэндүү их мэдрэх тул найдвараа алдахад амархан байдаг.

Харин найдвар дүүрэн амьдрахыг та хүсэж байгаа бол таны хийж чадах хамгийн сайн зүйл удирдах үүргээ Эзэн Бурханд даатгах явдал. Түүнийг удирдагчаа болго. Тэгээд Түүнд агуу төлөвлөгөө байгаа, тэр төлөвлөгөөгөө төгс гүйцэлдүүлэхээр Эзэн ажиллаж байгаа гэдэгт бүх зүрхээрээ итгэн дагах шийдвэр гарга. Одоо уншихаа хэсэг болиод, өөрөөсөө ингэж асуу: *“Би Бурханыг идэвхтэйгээр улайран дагаж байна уу, эсвэл намайг дага гэж би Бурханаас хүсээд байна уу?”* Бурхан бол яг тохиромжтой хурдаа тааруулж, болж байгаа зүйлсийг сонирхолтой байлган, магадгүй таны явахыг хүсэхгүй газар руу дагуулж мэдэх ч, эцэстээ яг зөв цагт, зөв газарт чинь гайхамшигтайгаар авчрах тийм л удирдагч байх болно. Бурханыг хүлээнэ гэдэг нь зүгээр суугаад л юу ч хийхгүй алмайна гэсэн үг биш. Харин ч эсрэгээрээ. Та ирээдүйгээ төлөвлөсөөр, өмнөө байгаа үүргийг амжилттай биелүүлэхээр

Таны төлөвлөгөө угаасаа буруу, муу учраас ийм гэх гээгүй л дээ. Харин Бурханы төлөвлөгөө үүнтэй чинь зүйрлэшгүй агуу болохоор тэр юм.

шаргуу хөдөлмөрлөн зүтгэсээр байх ёстой. Гэхдээ Түүний чиглүүлгийг гуйн Бурхантай цаг өнгөрөөснийхөө дараа эдгээрийг хийх ёстой л доо. Бас өөрийнхөөрөө төлөвлөгөө гаргахдаа түүнээсээ тэгтлээ их зуурахгүй байх ёстой. “Эзэн, миний амьдралд зориулсан төлөвлөгөө Танд байгаа гэдэгт би итгэж байна. Намайг явуулахыг хүссэн газар руугаа чиглүүлээч. Таны төлөвлөгөөнд багтаагүй үүд хаалгууд байвал хааж, намайг эдлээсэй гэж бодож байгаа боломжуудынхаа үүд хаалгыг нээж өгөөч. Өнөөдөр, мөн өдөр болгон намайг удирдаж, чиглүүлээч” гэсэн хандлагаар өдөр бүрийг туулах хэрэгтэй.

Аливаа зүйл бүтэлгүйтэж, нөхцөл байдал хүндэрлээ гээд Бурханы чиглүүлгийг дагаж байгаа хүмүүс сандарч цочирддоггүй. Сайн, муу ямар ч нөхцөл байдлыг бүгдийг нь төлөвлөгөө, зорилгоо биелүүлэхийн төлөө Эзэн ашиглаж чадна гэж тэд итгэдэг. Бид бүгдээрээ л алдаа гаргаж, олон зүйл дээр сургамж авдаг ч найдвараар дүүрэн байвал энэхүү аянаа баяртай туулж чаддаг. Төлөвлөгдөөгүй байтал тойруу зам руу орж будилж төөрөх үе заримдаа тохиолдсон ч Бурханы зорилго эцэстээ заавал биелэгддэг.

Өөртөө биш Бурханд итгэ

Бурханыг удирдагчаа болгож, таны амьдралд зориулсан агуу төлөвлөгөө Түүнд бий гэдэгт итгэж байгаа цагт сүнслэг өсөлт, гэр бүлийн харилцаа, эрүүл мэнд, үр хүүхэд, бусад хүмүүс, ажил төрөл, санхүү мөнгөний тал дээр өндөр итгэл найдлага тавих илүү амархан байдаг. Таны амьдралд онцгой зорилгыг Бурхан өгсөн гэж итгэж, тэр зорилгыг гүйцэлдүүлэхийн тулд Түүний чиглүүлгийг дагахаар сонгох нь бүхэлдээ итгэлээр хийх үйлдэл билээ.

Хүмүүсийн заримдаа тоглодог “итгэлээр арагшаа уналт” хийхтэй энэ их адилхан. Ингэхдээ нэг хүн нөгөөгийнхөө урд талд зогсоод, ямар ч тор, зөөлөвч тавилгүйгээр шууд гэдэргээ уналт хийнэ. Ард нь байгаа хүн харин уналт хийж байгаа хүнийг газарт унахаас нь өмнө барьж авахад бэлэн байх үүрэг-

тэй юм. “Эзээн, би Таны чиглүүлгийг дагах сонголтыг хийж байна. Миний гаргаж болох ямар ч төлөвлөгөөнөөс Таны төлөвлөгөө хавьгүй агуу гэж би итгэдэг” гэж та хэлж байгаа бол ард байгаа хүн таныг түшээд авна гэж найдахтай нэлээд төстэй. Гэхдээ нэг том ялгаа бий л дээ. Юу гэвэл, таныг Бурхан зүгээр нэг түшээд авахгүй. Тэр таныг түшиж аваад, байснаас чинь өндөр газарт аваачдаг.

Юу гэвэл, таныг Бурхан зүгээр нэг түшээд авахгүй. Тэр таныг түшиж аваад, байснаас чинь өндөр газарт аваачдаг.

Бурханд бүрэн итгэж сурах бол миний олон жилийн туршид суралцаж байгаа, одоо ч өдөр бүр суралцсаар байдаг зүйл билээ. Зөвхөн өөртөө итгэх зуршил надад амь бөхтэй суусан байв. Бусад хүнд итгэхийг олон жилийн туршид оролдож үзээд үргэлж л сэтгэл гонсойж, шаналж шархалж үлддэг байснаас энэ зуршлыг би өөртөө хэвшүүлсэн юм. Яагаад гэвэл, ингэх болгондоо би дахиад хэнд ч итгэхгүй гэж өөртөө тангаргалдаг байв. Энэ харамсалтай явдлуудаас болж: “Ямар нэг юмыг бүтэлтэй сайн хийхийг хүсэж байгаа юм бол өөрөө л хийх ёстой. Хэн нэгнээс ямар нэг юм гуйхгүй байж чадвал, зүрх сэтгэлээ хэнд ч нээхгүй байвал тэд чамайг шархлуулж чадахгүй” гэж итгэхэд хүргэсэн юм. Гэтэл миний энэ сэтгэлгээ эрүүл биш байжээ. Ингэснээрээ би зөвхөн хүнд итгэж чадахаа больсон төдийгүй Бурханд итгэхэд ч энэ надад саад болж байв. Энэ бол Эзэний тусламжийг авч байж таслах хэрэгтэй болсон тийм муу зуршил байлаа.

Өөртөө биш Бурханд итгэх талаар Бурханы Үгэнд маш тодорхой өгүүлсэн байдаг. Сургаалт үгс 3:5-6-д (АМР):

“Бүх зүрх, бүх бодлоороо Эзэнд түш, итгэ, найд, өөрийнхөө ухаарал, ойлголтод бүү түшиглэ. Бүх замаараа Түүнийг мэдэж, таньж, ойлгож ав, чиний замыг Тэрээр удирдаж, шулуун дардан болгоно” гэжээ.

Бурханд “итгэх”-ийн тулд Тэр танд хайртай, Тэр сайн бөгөөд танд туслах хүч Түүнд бий, танд туслахыг Тэр хүсдэг,

танд Тэр *туслах болно* гэдэгт л итгэх хэрэгтэй юм. Бурханаас *өөр* бүх зүйлд итгэх юмуу Бурханд итгэхээсээ *урьтаад* бүх зүйлд итгэх үе бидэнд олонтаа гардаг. Бурханд болон Түүний үгэнд итгэхээсээ илүү найз нөхөд, банк, хөрөнгийн зах зээл, засгийн газартаа, эсвэл өөрсдийн авьяас билиг, чадвартаа бид итгэдэг. “Хийх ёстой гэсэн бүхнээ хийж үзээд бүтсэнгүй. Одоо тэгэхлээр хийж чадах зүйл байхгүй юм чинь залбирах л үлдэж байх шив дээ” гэж хэн нэгний ярьж байхыг та сонсож байсан уу? Бидний ихэнх маань л ингэж хэлж үзсэн байдаг төдийгүй энэ бол үнэнээ өчиж байгаа хэрэг юм. Энэ бол: “Би өөрөө өөртөө туслах гэж оролдсон боловч чадсангүй. Бусдаас тусламж авах гэсэн ч бүтсэнгүй. Миний хийх гэсэн бүх зүйл болж өгөхгүй байна. Тэгэхлээр Бурханд итгээд үзэхээс өөр ямар ч арга үлдсэнгүй бололтой” гэсэн л санаа.

Ямар ч тулаанд орсон залбирал бидний хамгаалалтын эхний шугам байх ёстой. Бүх зүйлийг туршиж үзсэний дараа гомдлын мөр гээд хийх ёстой юм биш.

Амьдралдаа Өөрийг нь хамгийн түрүүнд тавихыг Бурхан биднээс хүсдэг. Цаг үргэлж... бүх зүйл дээр... Өөрт нь баттай итгэж, итгэж найдаасай гэж Тэр биднээс хүсдэг.

Өөрт нь найдвараа тавьж, Өөрт нь итгэлээ өгөөсэй гэж биднээс Тэр хүсдэг. Учир нь, ингэх аваас бид сэтгэлээр унахгүй, үр жимсгүй амьдрахгүй юм. Бидэнд өгөхийн тулд Эзэн

Амьдралдаа Өөрийг нь хамгийн түрүүнд тавихыг Бурхан биднээс хүсдэг. Цаг үргэлж... бүх зүйл дээр... Өөрт нь баттай итгэж, итгэж найдаасай гэж Тэр биднээс хүсдэг.

Есүсийн амиа өгсөн тийм л ялалттай, бялхсан, баяр хөөрөөр дүүрэн амьдралд Тэр биднийг хөтөлдөг. “Өөр юун дээр ч биш, харин намайг зөвт болгосон Есүс Христ дээр би найдвараа суурилуулсан” гээд алдартай магтан дуу байдаг даа. Бүхий л найдвараа Бурханд тавь. Тэгээд төсөөлж болох хамгийн сэтгэл хөдлөм аянд бэлэн байгтун.

Бурханы чиглүүлгийг хэрхэн дагах вэ?

Би Удирдагчийг (Есүсийг) дагахаар шийдсэн бол, Ром 8:4-т хэлсэнчлэн: “Итгэгч бид “махбодын дагуу бус, харин Сүнсний дагуу” амьдарч, алхаж чадна. Сүнсийг (Бурханы төлөвлөгөөг) биш махбодыг (өөрийнхөө төлөвлөгөөг) дагаж байгаа эсэхээ мэдэх аргуудын нэг бол сэтгэлдээ амар амгалан биш, дотроо зөрчилтэй байна уу гэдгээ шалгах. Нэг зүйлийг хийх гэж байгаа боловч энэ талаар сэтгэлд чинь амар тайван байхгүй бол зүгээр л битгий хий”.

Жишээ нь: Та ажил хайж байна гэж бодъё. Мэргэжлээрээ ажиллаж болох нэг боломжийн ажил олдсон нь гэр бүлээрээ өөр тийшээ, бүр хол нүүж очих болж байв. Энэ талаар та залбираагүй бөгөөд олдож болох цор ганц боломж л энэ юм чинь заавал нүүх хэрэгтэй гэж өөртөө үнэмшүүлээд Бурхантай зөвлөлдөлдгүйгээр ийм шийдвэр гаргаж байгаа бол олон жил үргэлжлэх зовлонд унах юмаа л та өөрөө хийж байж мэднэ. Хол нүүхийг гэрийнхэн чинь яг ч бүгдээрээ дэмжихгүй, таны шийдвэрээс болж хэрүүл маргаан, үймэн шуугиан дэгдэж байгаа бол илүү тодорхой чиглүүлэг хүлээн, Бурханыг эрэлхийлэх нь зүйтэй.

Гол нь, санаа бодол чинь тогтож өгөхгүй, зовууртай, тайван биш бөгөөд таны шийдвэрээс болж сэтгэлийн зовлон үүдэж байгаа бол тэр юмаа битгий хий! Сэтгэлдээ амар тайван биш байгаа зүйлээ хийх гэж өөрсдийгөө ятган үнэмшүүлэх явдал бидэнд олонтаа тохиолддог бөгөөд энэ бол үүдээ дэлгээд зовлон гамшиг дуудаж байгаатай адил. Дээрх жишээнд гарсанчлан: “За, яах вэ дээ, би нүүхийг тэгтлээ хүсэхгүй байна, гэрийнхэн маань ч үүнийг эсэргүүцэж байна, тэр ажил ч гэсэн миний хайж байсан ажил ч яг биш л дээ. Гэхдээ гайгүй байх аа. Надад таарсан хамгийн л боломжийн ажлын санал юм чинь. Тэгээд ч би хүлээсээр залхаж дууслаа” гэх маягаар сэтгэлээ хуурч дөнгөдөг. Иймэрхүү шалтаг тайлбараас болгоомжилж бай. Хэдий тэсвэр алдаж байлаа ч, нүүх

тухайд сэтгэлдээ амар тайвангүй байгаа бол илүү дээр боломжийг танд өгөх хүртэл нь Бурханыг хүлээсэн нь өлзийтэй.

Санхүү мөнгөний тал дээр өөрийнхөө хэрэгцээг хангаж, гэр бүлээ тэжээн тэтгэх шаардлагатай байгааг чинь ойлгож байна л даа. Гэвч сэтгэлдээ амар тайвангүйгээр хол газар нүүж байснаас тохиромжтой сайн ажил олдох хүртэл хүлээнгээ байгаа газартаа ямар ч хамаагүй олдсон ажлаа хийгээд байж байсан нь дээр байж болох юм. Эзэний амар амгалан нь таны оюун бодолд ургасан асуулт бүрийн эцсийн шийдийг гаргах шүүгч мэт байг (Колоссай 3:15-ыг унш).

Нөхцөл байдал ямар ч байлаа гэсэн энэ зарчим хэрэгждэг. Хань ижлээ сонгох, хамрагдах чуулганаа сонгох, худалдаж авах юмаа сонгох, харилцаандаа эрүүл хил хязгаарыг бий

болгох гээд нөхцөл байдлын жагсаалт дуусахгүй үргэлжилнэ. Бурханы мэргэн ухаан, амар амгаланг мөшгихийг үргэлж зорилгоо болго.

Ямар шийдвэр гаргахаа мэдэхгүй байвал, Бурханы чиглүүлгийг дагаж байна уу, өөрийнхөө хүслийг дагаж байна уу гэдгээ ялгаж харж чадахгүй байгаа бол шүүгч рүүгээ л ханд. Сэтгэл тань амар амгалан байгаа эсэх дээр үндэслэн шийдээ гарга!

Ямар шийдвэр гаргахаа мэдэхгүй байвал, Бурханы чиглүүлгийг дагаж байна уу, өөрийнхөө хүслийг дагаж байна уу гэдгээ ялгаж харж чадахгүй байгаа бол шүүгч рүүгээ л ханд. Сэтгэл тань амар амгалан байгаа эсэх дээр үндэслэн шийдээ гарга!

Та Бурханы чиглүүлгийг амьдралдаа дагахаар нэгэнт шийдсэн байлаа ч алдаа гаргах үе гарна. Ийм үед сэтгэлээр бүү уна. Амьдралын сургуулийн нэгээхэн хэсэг л энэ юм шүү дээ. Есүсийг дагаж байхдаа шавь нар ч алдаа гаргаж л байсан. Бурхан хэлсэн гэж бодоод хийж байтал биш гэдгийг нь ухаарвал, хийхээ болиод хойш ухрахаасаа хэзээ ч бүү ич. “Би алдаа гаргажээ” гэдгээ хэлээд л, цааш урагшил. Бурханы төгс төлөвлөгөөг дагаж чадалгүй алдах үе надад олон тохиолдож байсан. Танд ч бас тохиолдоно. Яг үнэндээ, энэ бол Бурханыг

зөв сонсож сурах арга замуудын нэг шүү дээ. Бурхан яг хэлж байна уу, үгүй юу гэдгийг мэдэхийн тулд зарим зүйлийг туршиж, алхам хийх хэрэг гардаг. Өөрийнхөө байгаа нөхцөл байдал дунд Бурханы хүслийг олж мэдэхээр чадах бүхнээ хийгээд, тодорхой чиглүүлэг олж харахгүй байвал явцын дунд таныг Бурхан илүү тодорхой чиглүүлнэ гэдэгт итгээд зүрхээ сонсож, тэнд байгаа зүйлээ хий. Унтраастай байгаа машиныг хэн ч жолоодоод явж чадахгүй, Бурхан ч чадахгүй гэж би олонтаа хэлдэг. Хэрвээ бид амьдралаа зогсоолд тавиад унтраачихсан байгаа бол асаагаад хөдлөх хэрэгтэй. Ядаж хаашаа ч хамаагүй хөдлөөд үзэх хэрэгтэй. Ихэнхдээ бид алхам хийж байж л тодорхой мэддэг!

Тантай Бурхан хамт бөгөөд замын турш алхам бүрд чинь таныг хөтөлнө

Итгэгч бид хэзээ ч ганцаараа байдаггүй гэдгийг мэдэхэд юутай сайхан бэ! Хувь хүнтэй холбогдуулаад үүнийг тайлбарлая: Та хэзээ ч ганцаараа биш юм. Яагаад гэвэл, таныг Бурхан алсаас удирддаггүй. Таны зүрх сэтгэлд Тэр оршдог бөгөөд таныг юу ч туулж байлаа хамаагүй алхам бүрд чинь хамт явдаг. Тантай хамт хэн ч зогсохгүй байгаа юм шиг харагдаж байлаа ч, зовлон бэрхшээлийг орь ганцаар туулж байгаа мэт танд санагдаж байлаа ч, тантай хамт байж, таныг хөтөлнө гэж Тэр амласан учраас Бурханд найдвараа тавь.

Амьдралын хэцүү бэрхийг туулах үед маань биднийг итгэл найдвараа алдсан, юунд ч найдаж хүлээж чадахгүй болгохыг диавол хүсдэг. Заримдаа ч бид ийм болдог. Биднийг Есүст болон Түүний амлалтуудад хараагаа чиглүүлэхийн оронд асуудал бэрхшээлдээ хамаг анхаарлаа чиглүүлдэг байлгах гэж муу нэгэн оролддог. Иошуа цөлийг туулж явах үед: “Өөрийнх нь амлалтуудад хараагаа чиглүүлж, түүнээс баруун тийш ч, зүүн тийш ч бүү хазай, тэгвэл хаа явсан газраа амжилт олох болно” (Иошуа 1:4-7-г унш) гэж Бурхан айлдсан байдаг. Зовлон гамшиг ирэх үед энэ дэлхийн санаа зовнил, айдас түг-

шүүрээс болж итгэл найдвараа бүү алд. Найдварын хоригдол байж, Эзэн Бурханаас хоёр дахин их шагнал авагтун.

“Найдварын хоригдлууд аа! Бэхлэлт [аюулгүй байдал, цэцэглэлийн] уруу буцагтун.

Би чамд өмнө байсан цэцэглэлийг хоёр дахин ихээр сэргээнэ гэдгээ яг энэ өдөр тунхаглаж байна”.

Зехариа 9:12 (АМР)

Онгоц жолоодож сурч байсан нэг хүний тухай би саяхан уншсан юм. Нэг сургуулилтын үеэр, онгоцоо маш өндөрт гаргаж байгаад доош шумбуул гэж багш нь хэлэв. Дагалдан зааврын дагуу хийсэн боловч дараа нь яахаа мэдэхгүй, бэлтгэлгүй байлаа. Доош шумбаад удаагүй байтал онгоцны хөдөлгүүр унтарснаа онгоц хяналтгүй болон огцом доошоо унаж эхлэв. Сандарч мэгдсэн дагалдан залуу тусламж эрэн багш руугаа харсан боловч тэр нэг ч үг хэлсэнгүй гэнэ. Залуу тэр даруй биеэ барьж, өөрийгөө тайвшруулаад өмнөх сургуулилт дээр хийснийхээ дагуу нөхцөл байдлыг гартаа авчээ. Өмнөх сургуулилтаар сурсан зүйлээ ийнхүү анх удаа хэрэглэж, сорилтыг давжээ.

Онгоц өндрөө авч, нислэг хэвийн болсны дараа дагалдан хичнээн их айж балмагдан, аргаа барснаа багшдаа хандан уудалж гарав. Багш нь ажлаа хийж байснаа гэнэтхэн алга болчихсон юм шиг санагдсаныг тэр хэлээд, тун ч их дургүйцэж байгаагаа илэрхийлэв. Харин бухимдлаа гаргаж дууссаных нь дараа нислэгийн удирдагч багш нь дагалдандаа тайвнаар ингэж хэлэв: “Би засаж чадахааргүй тийм аюултай байдалд энэ онгоцыг чи оруулж чадахгүй. Онгоц жолоодож сурахыг үнэхээр л хүсэж байгаа юм бол дээш хөөрөөд, дахиад үүнийг хий”. Хэдийгээр дагалдан хүнд сорилтод орж, орь ганцаараа яахаа ч мэдэхгүй байгаа юм шиг аймшигтай мэдрэмжийг хэсэг хугацаанд амссан ч багш нь тэр бүх хугацаанд дэргэд нь байж л байсан. Дагалдангаа тэр аюул осолд оруулахгүй байсан. Харин ч ирээдүйд өөрт нь маш чухал хэрэгтэй тийм л чадваруудыг дагалдандаа зааж, эзэмшүүлэхдээ учирсан сорилт зовлонг ашигласан юм.¹

Асар өндрөөс шумбалт хийж байгаа юм шиг, хөдөлгүүр чинь унтраад, ямар ч жолоодлогогүйгээр доош огцом унаж байгаа юм шиг санагдах үе танд тохиолдож байж болох учраас энэ түүхийг би тантай хуваалцсан юм. Хань ижлээсээ салж сарних, хүсэл мөрөөдөл замхрах, хүнд өвчний онош сонсох, үр хүүхэд буруу замаар орох, итгэл эвдэгдэх, ажил төрөлгүй болох гээд л олон хүнд үе тохиолдоно. Яг ийм үеүдэд яахаа мэдэхгүй цочирдож, гав ганцаараа байгаа мэт санагдах нь хэвийн л зүйл юм. Тэрхэн зуурд ганцаардаж, айж, орхигдож хаягдсан мэт мэдрэмж амсаж байна гээд та тийм байна гэсэн үг биш. Бурхан яг дэргэд чинь байна. Тэр танаас алхам ч холдоогүй.

Дэд хууль 31:8-д (NIV буюу New International Version–Библийн англи хэлээрх орчуулгын хувилбар): Бурхан “чамайг хэзээ ч орхихгүй, чамайг хаяхгүй” гэсэн ба Матай 28:20-д: “Би та нартай үргэлж хамт байх болно” гэж Есүс амласан байдаг. Амьдралд тохиолдох аливаа зүйл дээр та ганцаараа биш, Тэр таныг хэзээ ч орхихгүй гэдгийг Бурханы Үгэнд Эзэн олонтаа батлан хэлсний дөнгөж хоёрхон жишээ л энэ. Таны хувьд хамгийн бүтэлгүй муухай өдөр байсан ч, хамгийн хүнд сорилт бэрхшээл тулгарсан нөхцөл байдал дунд ч, ганцаараа биш гэдгээ та мэдэгтүн.

Найдвар өвөрлөгтүн!

Таны хамгийн их тэмүүлэн хүсдэг зүйл юу вэ? Бодох төдийд л баяр төрүүлдэг нэг зүйл чинь юу вэ? Ашгийн бус байгууллага байгуулах уу? Амьдарч байгаа газраа сайн дурын ажил хийх үү? Компани байгуулах уу? Гэр бүлтэй болох уу? Их сургуульд сурч төгсөх үү? Таны зүрхэнд Бурхан оруулж өгсөн учраас таны зүрхний хүсэл маш хүчтэй байх нь олонтаа. Та юу хийнэ гэж найдаж байна түүнийгээ Бурханд даатгаж, Түүний чиглүүлгийг гүй. Энэ талаар сэтгэлдээ амар амгаланг мэдэрч байвал хэрэгжүүлэх алхам хийгтүн. Бурханыг дагана гэдэг бол хойш суугаад, зүгээр л хүлээгээд байхыг хэлэхгүй. Харин

Бурханыг дагана гэдэг бол хойш суугаад, зүгээр л хүлээгээд байхыг хэлэхгүй. Харин зүрх зоригтой байж, үүнийхээ төлөө явахыг хэлнэ.

зүрх зоригтой байж, үүнийхээ төлөө явахыг хэлнэ. Урагшлах, найдвар өвөрлөгтүн... таны төсөөлж чадахаас илүү агуу зүйл рүү таныг Бурхан хөтлөн дагуулж байна.

ГУРАВДУГААР БҮЛЭГ

“Чадахгүй” гэдэг бүхнийг илрүүлж, устга

“Эзэн Есүс Христийн (Мэссиа) маань Бурхан ба Эцэг магтагдах (хүндлэгдэх, ерөөгдөх) болтугай. Учир нь Бурхан Өөрийн агуу өршөөлөөр, үхэгсдээс амилсан Есүс Христийн амиллаар биднийг амьд найдвар өөд... дахин төрүүлсэн”.

1 Петр 1:3

“Дахиад жаахан гэсвэр, дахиад жаахан зүтгэл гаргачихвал ямар ч нэмэргүй найдлагагүй мэт байсан зүйл гайхалтай ялалт болон хувирдаг”.

—Эльберт Хуббард

1981 онд, өөрийн хүчээр саятан болсон Юүжин Лэнг гэгч тэртээ 50 жилийн өмнө сурч байсан, хотын төвийн ядмагхан хэсэгт байрладаг бага сургуульдаа зочилжээ. Тус сургуулийн зургадугаар ангиа төгсөж байгаа хүүхдүүдэд илтгэл яриа хийхээр очсон боловч индэрт гарахынх нь өмнө захирлын хэлсэн зүйл Лэнгийн сэтгэлийг тун их зовоожээ. Сургуулийнх нь нийт сурагчид ахлах сургуульд элсдэг ч тэднээс дөрөвний гурав нь бүрэн дунд боловсролын дипломоо авахаасаа өмнө сургуулиа орхидог гэсэн статистик бий

гэдгийг дуулгаж л дээ. Уг нь бол шаргуу хөдөлмөрлөхийн ач холбогдол, ажиллаж хөдөлмөрлөснөөр л хүн амжилтад хүрдэг тухай хүүхдүүдэд ярихаар төлөвлөсөн байсан боловч сургуулийн захирлын хэлсэн цочирдом статистик мэдээнээс болоод ярих юмаа шууд өөрчилж гэнэ. Юүжин Лэнг нэг маш сонин гайхалтай зүйл хийхээр сэдэв.

Хаарлем бага сургуулийн зургадугаар анги төгсөгчдийн урд гараад, бүр 1963 онд Вашингтонд болсон жагсаалд оролцоходоо доктор, бага Мартин Лютер Кингийн хийсэн “Надад мөрөөдөл бий” хэмээх алдарт илтгэлийг сонсож байсан тухайгаа яриад, хүн бүр хүсэл мөрөөдөл өвөрлөх учиртайг хэлж, тэр төгсөлтийнхөнд мөрөөдөлдөө хүрэхэд нь туслах ямар нэг зүйл хийхийг хүсэж байгаагаа илэрхийлжээ. Тэгээд сурагчидтай нэг тохиролцоо хийж гэнэ: Сургуулиа орхилгүй үргэлжлүүлж, бүрэн дунд боловсролын дипломоо гардан авсан хүүхэд бүрийн коллеж, их сургуулийн төлбөрийг даана гэж тэр амлажээ.

Зургадугаар ангиа төгсөгч тэр хүүхдүүдийн амьдрал яг тэр л өдөр өөрчлөгдсөн ажээ. Тэд итгэл найдвар тээж эхлэв. Олонхынх нь хувьд бүр амьдралдаа анх удаа найдвар гээчийг мэдэрчээ. Хожим ярилцлага өгөхдөө тэдний нэг нь: “Би одоо хүлээж найдах юмтай болсон. Сэтгэл цэлмээд нэг л сайхан байдаг юм байна” гэсэн байдаг. Юүжин Лэнг гэгч энэ хүний өгсөн амлалт сургуулийн хөтөлбөрийн хэмжээнд хэрэгжсэн бөгөөд тэр сургууль дээр эхэлсэн хөтөлбөр нь үндэстнийг хамарсан хөдөлгөөн болжээ. Хотын ядуу хорооллын хүүхдүүдэд итгэл найдвар бэлэглэсэн саятны тухай нийтлэл “*Нью Йорк таймс*” сонины эхний нүүрэнд гарч, “60 минут хөтөлбөр” нэвтрүүлгээр цацагдсан юм. Үүнээс хойш мянга мянган хүн захидал бичиж, утсаар залгах болсон ба “Надад мөрөөдөл бий” хөтөлбөрийг орон даяар сургуулиудад хэрэгжүүлэхэд туслах үндэстний хэмжээний “Надад мөрөөдөл бий сан”-г 1986 онд Лэнг үндэслэжээ. Тэр үеэс хойш нийт 29 муж улсын сургуулиудад 200 гаруй хөтөлбөр хэрэгжүүлснээр 15000 гаруй оюутан (“Мөрөөдлийн эзэд” гэгдэх) тусламж авчээ.

1981 оны зуны эхэн сарын нэгэн өглөө бэлтгэлгүйгээр гэнэт тавьсан Лэнгийн илтгэлийг сонссон анхны “Мөрөөдлийн эзэд” болох зургадугаар ангийн 61 төгсөгчид юу болсон бол? Тэднээс 90 гаруй хувь нь бүрэн дунд боловсролын дипломоо гардахаар сургуульдаа үргэлжлүүлэн суралцаж чадсан бөгөөд ихэнх нь цааш илүү өндөр боловсрол олж авахаар суралцацгаасан билээ. Өөдөө дээшээ дэвшихэд нь хэсэг хүүхдүүдэд тусалъя гэсэн нэгэн бизнесмэний өгөөмөр сэтгэлийн ачаар энэ бүхэн бүтсэн.¹

Найдвар гэдэг хэдийгээр хүчтэй зүйл боловч чадахгүй, болохгүй гэсэн уур амьсгал дотор бол хөгжин дэвждэггүй.

Ядууралд нэрвэгдсэн, ядуу хорооллын тэр хүүхдүүдэд Лэнг амлалт өгөхөөс өмнө “болохгүй, бүтэхгүй” гэсэн манан дунд тэд амьдарч байсан. *“Төлбөрийг нь төлж чадахгүй юм чинь коллежид орж чадахгүй л дээ. Нэгэнт тийм хойно ахлах сургуульд дэвшин орж, төгсөх хэрэг юу байх билээ?”* Харин тэдний хувьд чадахгүй, бүтэхгүй гэдэг сэтгэлгээг нь Юүжин Лэнг арчин зайлуулжээ. Гэхдээ тэр тэдний өмнөөс хичээлд нь яваагүй, гэрийн даалгаврыг нь хийгээгүй, багийн төсөлт ажлуудыг нь хийж өгөөгүй, шалгалтанд нь ороогүй. Энэ бүх хийх шаардлагатай зүйлсээ тэд өөрсдөө хийсэн. Харин Лэнг тэдэнд тулгараад байсан хамгийн том “*чадахгүй, бүтэхгүй*”-г нь тодорхойлоод, арилгаж өгсөн юм. Ингэж л тэд өөдөө дээшээ элин хальсан.

Найдвар гэдэг хэдийгээр хүчтэй зүйл боловч чадахгүй, болохгүй гэсэн уур амьсгал дотор бол хөгжин дэвждэггүй.

Чадахгүй, бүтэхгүй гэж бодох үед чинь Бурхан юу гэдэг вэ?

Та энэ номыг уншиж эхлэхдээ эхний хэсэг “Өөдлөн дээшлэх найдвар тэмүүлэл” гэсэн гарчигтайг анзаарсан байх. Таны амьдралд илүү том, илүү сайн сайхан зүйл хийхийг Бурхан хүсдэг гэдэгт би бат итгэдэг учраас ингэж нэрлэсэн юм. Тэр

таныг улам өөдөө дээшээ байлгаж, илүү өндөр төвшинд авчрахыг хүсдэг. Илүү гүн гүнзгий баяр хөөр, илүү гүн гүнзгий амар амгалан, илүү гүн гүнзгий сэтгэл ханамж, илүү гүн гүнзгий найдвар гээд үүнийг тоочоод байвал барахгүй. Колоссай 3:1-2-т (АМР) хэлэхдээ:

“Тиймээс хэрэв та нар Христтэй хамт [шинэ амь өөд, ийнхүү Түүний үхэгсдээс амилсан амиллыг хуваалцан] амилуулагдсан л юм бол дээгүүрхийг [үүрд мөнхийн баялгийг] зорьж, эрэлхийл. Тэнд Бурханы баруун талд Христ заларч байгаа. Газар дээрх бус дээгүүрх (өндөр дээд зүйлсийг) зүйлс дээр оюун бодлоо чиглүүл” (тодотгол нэмэв) гэжээ.

Бурхантай хамт бол аливаа зүйл улам муудсаар муудсаар байна гэж байхгүй харин сайжирсаар дээшилсээр байдаг. Живсээр доошилсоор байх биш улам өөдөө дээшээ өсдөг.

Тийм ч учраас Сургаалт үгс 4:18-д: “Зөвт хүмүүсийн жим үүрийн цагаан гэгээ, зугуухан тодрох (улам улмаар тодрон гэрэлтэх) гэгээ нь өдрийг дүүрэн авчирна” гэсэн байдаг. Мөн Исаиа 40:31-д (NKJV буюу New King James Version–Библийн Англи хэлээрх орчуулгын хувилбар): Эзэнийг хүлээгчид нь “бүргэд мэт жигүүр дээрээ элин халина” гэжээ. Христ доторх таны амьдрал бол өмнө нь хэзээ байгаагүйгээрээ өндрөөс өндөрт элин хальж, өдөр өдрөөр улам улам гэрэлтэх тийм л амьдрал билээ.

Бурхантай хамт бол аливаа зүйл улам муудсаар байна гэж байхгүй, харин сайжирсаар дээшилсээр байдаг. Живсээр доошилсоор байх биш улам өөдөө дээшээ өсдөг.

Гэвч танд Бурханы өгөхийг хүсэж байгаа тэр амьдралыг амсаж туулахад хамгийн хүчтэй бөгөөд нөлөөтэй бартаа саад болдог зүйлсийн нэг нь чадахгүй, бүтэхгүй гэдэг сэтгэлгээ юм. Чадахгүй, бүтэхгүй гэдэг бол бүхий л нөөц боломжийнхоо дагуу өндрөөс өндөрт дүүлэхэд чинь хаалт болохоор зориулагдсан уучилшгүй сараалжин тор. Жигүүрээ дэлгэн

асар өндөрт элин халих учиртай гайхалтай сүрлэг халзан бүргэдийг төмөр торонд хийчихээд бусад бүргэдийн халин дүүлэхийг харуулбал яах бол? *Чадахгүй, бүтэхгүй* гэдэг сэтгэлгээгээр амьдрах аваас та яг л ийм байна гэсэн үг. Өөрт зориулагдсан амьдралаар замнахын оронд хориг хязгаарлалтаар хашигдаад гагцхичжээ. *"Би уур омгоо барьж чаддаггүй"*. *"Би ажил олж чадахгүй"*. *"Сэтгэлийн зовлонгоо давж би чадахгүй"*. *"Урагш алхаж би чадахгүй"*. *"Ханьтайгаа эвтэй найртай амьдарч би чадахгүй"*. *"Би дахиад хүнд итгэж сэтгэлээ нээж чадахгүй"*. *"Энэ асуудлын учрыг би олж чадахгүй"*. *"Хүүхдүүдээ би ганцаараа өсгөж хүмүүжүүлж чадахгүй"*. *"Ийм юм болж байгаад би итгэж чадахгүй"*. Би... чадахгүй. Би... чадахгүй. Би чадахгүй. Ийнхүү цааш хичнээн ч үргэлжлүүлсэн болно. Хийж чадахгүй, бүтэхгүй гэж хүмүүсийн боддог зүйлсэд төгсгөл үгүй мэт.

Гэхдээ энэ жагсаалтад буй нэг чухал хүчин зүйл байгааг анзаарав уу? Би. Би... чадахгүй. Би... чадахгүй. Би... чадахгүй. Би. Би. Би. Чадахгүй гэдэг бол өөр дээрээ л төвлөрсөн сэтгэлгээ юм. Бусдаас тусламж дэмжлэг авч болдог, Бурханаас тусламж дэмжлэг авч болдог гэдгийг энд огт авч хэлэлцэхгүй байна. Өөрийнхөө хамгийн сул тал дээр *чадахгүй гэдэг нь* төвлөрч, ийм цөхөрсөн дүгнэлт хийж байна: *"Би үүнийг хийж чадахгүй ээ"*.

Чухамдаа энэ цоо шинэ асуудал биш ээ. Библид өгүүлэгддэг эрэгтэй, эмэгтэй хүмүүс ч бас ийм л хандлагатайгаа барьцалдаж байсан. Сара: *"Хөгшин болсон би хүүхэд төрүүлж чадахгүй"* (Эхлэл 18:10-12-ыг унш) гэж бодож байв. *"Би сайн ярьдаггүй юм чинь Фараоны өмнө зогсож чадахгүй"* (Гэтлэл 6:30-ыг унш) гэж Мосе хэлж байсан. *"Би Израилийг удирдаж чадахгүй. Би чинь эцгийнхээ гэрт хамгийн дорой нь шүү дээ"* (Шүүгчид 6:15-ыг унш) гэж Гидеон бодож байв. *"Би ард түмнээ аварч чадахгүй. Яагаад гэвэл, хаантай уулзахаар би ерөөсөө дуудагдахгүй байх"* (Естер 4:11-ийг унш) гэж Естер бодож байв. *"Би бузар уруултай хүн тул эш үзүүлж чадахгүй"* гэж Исаиа бодож байсан (Исаиа 6:5-7-г унш). *"Бидэнд таван талх,*

хоёрхон загаснаас өөр юм байхгүй тул хуран цугласан хүмүүст идэх юм өгч чадахгүй” гэж шавь нар бодож байв (Матай 14:15-18-ыг унш.) Дээрх бүх нөхцөл байдалд *чадахгүй* гэдэг сэтгэлгээ нь өөрсдийнх нь амьдралд Бурханы зориулсан төлөвлөгөөг биелүүлэхэд нь эдгээр эрэгтэй, эмэгтэй хүмүүст саад тотгор болох гэсэн өөрөө өөртөө барьсан төмөр тор мэт ажээ.

Гэвч Сара, Мосе, Гидеон, Естер, Исаиа, дагалдагч нарын хэнийг ч өөрийн хүчээр, чадал чансаагаараа юм хийгээсэй гэж Бурхан төлөвлөөгүй юм. Тэд чадахгүй гэдгийг Тэр мэдэж байсан... гэвч хамаагүй ээ. Яагаад гэвэл, Тэр чадах байсан. Хийх хэрэгтэй аливаа зүйлээ бид Христээр дамжуулан хийж чадна. Бид юутай ч нүүр тулж чадна!

“Намайг хүчирхэгжүүлэгч Түүгээр би [Надад до-тоод хүч чадлыг дүүргэн өгдөг Түүгээр дамжуулан би ямар ч зүйлд бэлэн. Христийн хангалт дэмж-лэг дотор би ямар ч юмаар дутахгүйгээр хангагд-сан] бүгдийг хийж чадна”.

Филиппой 4:13

Сара хүүхэд төрүүлэхэд дэндүү хөгшин болсон байсан. Мосе өөрийнхөө хүчээр Фараоныг ятгаж дийлэхгүй байсан. Гидеон ч бас цэрэг удирдах чадваргүй байсан. Естер хааны өмнө дуудагдаагүй байсан. Исаиа бузар уруултай хүн байсан. Хуран цугласан олонд өгөх идэх юм шавь нарт байгаагүй. Энэ бүгд үнэн. Гэвч Өөрийн зорилго, төлөвлөгөөг биелүүлэхийн тулд тэдний хувьд *чадахгүй* бүхнийг ялан дийлэх төлөвлөгөө Бурханд байсан. Энэ эрэгтэй, эмэгтэй хүмүүс “Би чадахгүй” гэдэг сэтгэлгээгээ илрүүлж, устгах ёстой байв. Өөрсдийн сул талд төвлөрөөд байхаасаа илүү Бурханы хүч чадалд хамаг анхаарлаа хандуулахаар сонгох ёстой байв. Ингэвээс үр дүн нь гайхамшиг байх байлаа. Чухам тэдгээр хүмүүсийн итгэл, дуулгавраар амьдралд нь агуу гайхамшигтай зүйлсийг Бурхан гүйцэлдүүлсэн.

Таны хувьд ч адил юм шүү. “*За даа, үүнийг ч би хийж чадахгүй нь дээ. Энэ нөхцөл байдлыг шийдэж би ер нь чадахгүй юм байна. Дахиад нэг өдөр ийм байвал би тэсэж чадахгүй. Би*

хариулт хүлээж чадахгүй нь. Уучлах арга надад алга. Та миний юу туулж байгааг мэдсэн бол ойлгох байсан даа. Би ерөөсөө чадахгүй нь” гэж та бодож байгаа байх. Үзэж туулсан бүхэн чинь ийм сэтгэгдэл төрүүлж байгааг би ойлгож байна. Гэвч таны... чадахгүй гэж байгааг Бурхан мэднэ гэдгийг танд дуулгая. Гэхдээ хамаагүй ээ. Яагаад гэвэл, Тэр чадна.

“Есүс тэднийг тойруулж хараад,
–Хүмүүсийн хувьд [энэ нь] боломжгүй боловч Бурханы хувьд тийм биш. Учир нь Бурханд бүх юм боломжтой гэж хэлэв”.

Марк 10:27 (AMP)

“Чадна, бүтнэ” гэсэн хандлага тээ

Бусад хүмүүс тэгж хэлсээр байгаад Би чадахгүй гэсэн сэтгэлгээтэйгээр та амьдралаа туулж яваа байж магадгүй. “Чи чадахгүй ээ” гэж дэндүү олон удаа сонссоор үүнийг дотроо бат суулган, өөрийгөө үүгээр тодорхойлдог болчихсон ч байж мэднэ. “Чи чадахгүй ээ” гэдэг үг нь явцын дунд “Би чадахгүй” болж хувирсан байх. Чи чадахгүй гэж бусдад хэлэх дуртай хүмүүс дэндүү олон байдагт би харамсдаг. Заримдаа таны эрхэм дотнын хүмүүс тийм байгаа. Багш, ах эгч дүү, чуулганы удирдагч, эцэг эх, найз нөхөд, таны эрхэмлэн хүндэлдэг хэн нэг хүн гээд л. Танд байгаа нөөц чадавхыг энэ хүмүүс олж харж чадахгүй үед зоригоо мохоож болох юм. Тэдний хэлж байгааг дотроо хүлээн зөвшөөрөх аваас сэтгэлээр унагаж, тэнхээ тамир барж ч дөнгөнө. Гэвч бид өөр замыг сонгож болно. Биднийг чадна гэж хэлж байгаа Бурханд бид итгэх сонголт хийж болно!

Өмнө нь хэн нэг хүн танд хэлж байгаагүй ч “Чи чадна!” гэж одоо Бурхан хэлж байгааг сонсогтун. Энэ бол таны сонсож, итгэх маш хүчирхэг үгс юм. Яагаад гэвэл, “Чадна гэсэн итгэл дээр гайхамшиг биелдэг” гэж би хэлэх дуртай. Та ялан дийлж чадна. Та давж гарч чадна. Та уучилж чадна. Та үр хүүхдээ бурханлаг хүмүүс болгон өсгөн хүмүүжүүлж чадна.

Аз жаргалтай гэр бүлийг цогцлоож та *чадна*. Та туршлагатай, эмх замбараатай болж *чадна*. Та урагш алхаж *чадна*. Та *чадна...* та *чадна...* та *чадна*.

Аливаа сорилт бэрхшээл тулгарахад, хичнээн ч давагдашгүй том санагдаж байсан танд хэрэгтэй бүх хүч чадлыг Бурхан өгөх болно. Бурханы хүч чадлаар зэвсэглэсэн та амьдралдаа буй *чадахгүй* гэсэн сэтгэлгээг бүхэлд нь илрүүлж, устгаад, чадна гэдгээр сольж *чадна*.

Аливаа сорилт бэрхшээл тулгарахад, хичнээн ч давагдашгүй том санагдаж байсан танд хэрэгтэй бүх хүч чадлыг Бурхан өгөх болно.

“Чадна” гэсэн итгэл бол “Хийчихлээ” гэдгийн эцэг нь юм” гэсэн үг (Израильмор Авивор) байдаг.

“Өвчний нарийвчилсан судалгаа: Өвчтөний ойлголтоор” гэдэг нэртэй номдоо Ноорман Коузинс, тамир тэнхээ барсан хүнд бөгөөд ховор өвчин тусаад эмнэлэгт хэвтсэн тухайгаа өгүүлсэн

байдаг. Түүний энэ өвчинд эмчилгээ байхгүй тул үлдсэн амьдралаа зовууртай өнгөрөөхөөс өөр аргагүй гэж эмч нар хэлж л дээ. Коузинс эмнэлгээс гараад, нэг ер бусын зүйл хийсэн байна. Сөрөг бодол сэтгэлгээ, сэтгэл хөдлөл нь бие махбодод хортой нөлөө үзүүлдэг гэдгийг мэдэх тул туулж байгаа нөхцөл байдлынхаа сөрөг бүхнийг устгаж, эерэг болгоныг хүчирхэгжүүлэн нэмэгдүүлэхээр тэр шийджээ. Итгэл найдвар, хайр, баяр хөөр, инээд баясал их тунгаар хэрэглэхээр шулуудаж гэнэ. Ах дүү Марксын бүтээсэн хуучны кинонуудаас өдөр бүр үзэхийн зэрэгцээ “Нууц камер” гэдэг сонирхолтой нэвтрүүлгийг давтан давтан үздэг болжээ. Хэдийгээр хийхэд энэ энгийн зүйл байсан ч өвчин зовлонгоо мэдрээд уйлж хашхирч сууснаас жаахан ч гэсэн ингээд инээж хөхөрч байя гэж Коузинс бодож л дээ. Хэрвээ арван минутын туршид инээж хөхрөх аваас хоёр цаг орчим өвчнөө мартан унтаж болж байгааг тэр нээж гэнэ. Гайхалтай нь, цаг хугацаа өнгөрсөөр түүний өвчин эдгэрэв. “Шинэ Английн анагаах ухааны сэтгүүл” дээр түүний эдгэрсэн тухай түүхийг нийтэлсэн байна.

Амьдралынхаа туршид үзсэн зүйлээ бусадтай хуваалцсанд нь талархаад мянга мянган эмч нар Коузинс руу захиа бичиж, Холливүүд түүний тухай кино хүртэл хийсэн байдаг.²

Өнөө үед бидэнд байгаа эмч нар болоод анагаах ухааны технологийн дэвшлийн төлөө би Бурханд талархдаг. Эмчид очоод хэрэггүй гэсэн утгаар Ноорман Коузинсийн тухай түүхийг та бүхэнд би яриагүй. Харин таныг уруудан доройтуулсаар байх гэж оролдож буй сөрөг хандлага, сэтгэлгээг устгах нь хичнээн хүчтэй зүйл гэдгийн амьд жишээ болгож энэ түүхийг хуваалцсан юм. Ноорман Коузинсийн жишээнээс харахад, эерэг хандлага, сэтгэлгээ нь түүний биеийн өвчин зовуурыг ч эдгээх нөлөө үзүүлсэн байна. "Би чадахгүй" гэсэн сөрөг сэтгэлгээгээ таягдан хаяж, "Би чадна" гэсэн итгэл найдвар өвөрлөхөөр сонгох аваас амьдрал чинь хэрхэн өөрчлөгдөхийг төсөөлөөд үз дээ. Өөрийнхөө хүчээр хийж чадахгүй зүйлсийнхээ оронд Христ дотор хийж чадах зүйлс дээрээ төвлөрөхөөр сонгох аваас таны бодол санаа, үг яриа, үзэл санаа, хандлага өөрчлөгдөнө. Амьдрал чинь өөрчлөгдөнө. Бурханд найдагчид хэзээ ч гонсойж, ичиж гутрахад (Ром 5:4-5-ыг унш) хүрэхгүй ээ.

"Би чадахгүй" гэсэн сөрөг сэтгэлгээгээ таягдан хаяж, "Би чадна" гэсэн итгэл найдвар өвөрлөхөөр сонгох аваас амьдрал чинь хэрхэн өөрчлөгдөхийг төсөөлөөд үз дээ.

Боломжгүйг үйлдэх нь

Хэрвээ бид оролдоод үзэхээсээ айхгүй байх аваас боломжгүй харагдах зүйлсийг Бурханы тусламжтайгаар гүйцэлдүүлж чадна.

Дэлхий даяар алдар нэр нь түгсэн зарим хүн "чадна" гэсэн хандлага тээж гайхалтай зүйлсийг хийсэн байдаг. Тэдний хэлсэн үгсээс энд цөөн хэдийг иш татъя:

“Боломжгүй зүйлийг хийх нь хөгжилтэй ч юм шиг санагддаг шүү”.

Уолт Дисней

“Үзээд алдах сэтгэлтэй хүнд боломжгүй зүйл гэж байдаггүй”.

Их Александр

“Ариун журамт үйлс болгон эхэндээ боломжгүй мэт харагддаг”.

Томас Карлиил

“Таны хүсэл мөрөөдөл боломжгүй болж унтардаг ганц л газар бол таны өөрийн бодол санаа юм”.

Роберт Х. Шүллэр

“Хэрвээ бид боломжгүй зүйл гэж бодоогүйсэн бол бүр ихийг гүйцэлдүүлж чадах байсан”.

Винс Ломбарди

“Миний үгсийн санд “боломжгүй” гэдэг үг байдаггүй”.

Наполеон Бонапарт

“Гүйцэлдэж дуусах хүртлээ үргэлж боломжгүй санагддаг”.

Нельсон Мандела

Амьдралдаа гүйцэлдүүлж чадах зүйлсдээ оюун бодлоороо бүү саад хий. Эзэний адил агуу зүйлсийг бодож сэтгэ! Та ямар нэг зүйл бодож сэтгэх л болно. Гэхдээ яагаад заавал жижиг сажиг зүйл гэж? Маш олон хүн сэтгэл гонсойхыг хүсээгүйдээ л томоор бодож сэтгэхээсээ айдаг гэж би үздэг. Харин огт үзээд алдахгүй байсаар амьдрал тэр чигээрээ гонсойлт болж байснаас хааяа хааяахан л сэтгэл гонсойлт гэдгийг амсах эрсдэл гаргахыг би илүү дээрд үзнэ. Хэзээ ч гүйцэлдэж байгаагүй зүйл хэн нэгнийг хийх хүртэл нь боломжгүй байдаг биш үү. Тэгвэл тэр хэн нэгэн нь яагаад та байж болохгүй гэж?

Манай явуулж байгаа шоронгийн үйлчлэл маш амжилттай байгаа. Гэхдээ өнгөрсөн 16 жилийн хугацаанд, шоронд очиж үйлчилдэг багууд маань засан хүмүүжүүлэх нийт 3200 гаруй газар очиж, ариун цэврийн хэрэглэгдэхүүнүүдтэй бэлгийн багцын хамтаар миний бичсэн 2.7 сая гаруй хувь номыг хүмүүст тараажээ. Америкийн Нэгдсэн Улсын муж болгонд байдаг шоронгуудад бид очсон бөгөөд эхлээд тийш нэвтрэх хүсэлт гаргахад бүгд л “боломжгүй” гэсэн хариу өгч байсан. Тухайн муж улсад байх бүх шоронд нэвтрэх зөвшөөрөл хүсэн бидний анх холбоо барьсан муж улсын шоронгийн хэрэг эрхлэх зөвлөлийнхөн: “Энэ чинь боломжгүй зүйл. Хэн ч өмнө нь ийм зүйл хийж байгаагүй” гэж мэдэгдэж байсан.

Зүрхэлж мөрөөдөгтүн! Мөрөөдөл чинь биелж ч болно шүү дээ! Юу ч мөрөөддөггүй бол мөрөөдөөгүй л зүйлсээ л авна гэсэн үг шүү дээ. Энэ номыг уншаад дуусахдаа та: “*Сайхан ном байна. Итгэл найдвар төрөөд ч байх шиг санагдлаа*” гэж бодож магадгүй. Гэвч амьдралаа байснаараа л үргэлжлүүлээд байхгүй, идэвх зүтгэл гаргаарай гэж таныг ятгая. Таны амьдралд илүү агуу зүйлс гүйцэлдэхэд энэ номын үгс хурдасгуурын үүрэг гүйцэтгэх болтугай. Найдвараа нэмж, ихийг мөрөөдөж, томоор бодож сэтгэ. Хэн нэг нь үүнийг хийх л болно. Та тэр хүн нь байгаарай!

Найдвар өвөрлөгтүн!

Чадахгүй, бүтэхгүй гэсэн сэтгэлгээний төмөр торноос мулт-рахад чинь туслахыг Бурхан хүсэж байна. Магадгүй та анх удаа өнөөдөр л итгэл найдварыг хүлээж авч болох юм. Ямар ч сорилт болон боломж өмнө чинь байлаа гэсэн та амжилтад хүрч чадна. Тантай Бурхан хамт байна. Хэрэгтэй бүхий л хүч чадлыг Тэр хайрлах болно. Бусдын амнаас унах онцгүй сөрөг үгс Бурханы амлалтуудтай, таны амьдралд буй Түүний оршихуйтай дүйх бараа ч байхгүй. Таны төлөө Бурхан зогсож байхад таны эсрэг хэн, юу байгаа нь (Ром 8:31-ийг унш) огтхон ч хамаагүй ээ.

Урагш алхаж, итгэл найдвар өвөрлөгтүн! Өмнө нь та бүтэлгүйтсэн байж болно. Өнөөдөр ялж чадна. Өмнө нь та алдаа гаргасан байж болно. Харин өнөөдөр ухаалаг мэргэн шийдвэрүүд гаргаж та чадна. Өмнө нь та шантарсан байж болно. Өнөөдөр харин хатуужин зогсож чадна. Өмнө нь та тээнэгэлзсэн байж болно. Өнөөдөр харин тууштай шаргуу байж чадна. Өмнө нь хүмүүс танд: “Чи чадахгүй” гэдэг байсан байж болно. Харин өнөөдөр та чадна аа. Амьдралдаа Бурханы өгөх хамгийн шилдэг сайныг амсан баясахад чинь саад болж буй төмөр торноос мултарч гарагтун! Танд зориулсан Бурханы төлөвлөгөө, зорилгуудын дагуу өөдөө дээшээ элин халигтун! Нөхцөл байдал хэцүүдээд ирвэл шаналах, айж цөхрөх хэрэггүй. Та үүнийг хийж ЧАДНА АА!

ДӨРӨВДҮГЭЭР БҮЛЭГ

Найдварын эрч хүч

“Бид... бидний Бурхан бөгөөд Эцэгийн өмнө та нарын итгэлийн үйл, хайрын хөдөлмөр хийгээд Эзэн Есүс Христ дэх найдварын чинь тууштайг байнга санадаг”.

1 Тесалоник 1:3

“Итгэл найдвар тээсэн оюун нь гэрэл гэгээг, нүд нь сайн сайхныг олж хардаг. Үүгээрээ тэр сайхан зураг зурж, тансаг урлал нэхэж шүлжин, ирээдүйгээ баяр баяслаар бялхаадаг”.

—Хенри Ваард Биичер

Би хүмүүстэй найдварын тухай ярихад, найдвар гэж яг юу болох тухайд тэдний олонх нь буруу ойлголттой явдгийг олж мэдсэн билээ. Аливаа зүйлийн мөн чанарыг, хэрхэн үйлддэгийг та ойлгодоггүй бол бүх зүйл амархан нурж унана.

Дөрвөн настай хүүгийнхээ хөлбөмбөгийн багийн дасгалжуулагчаар ажиллахдаа туулсан бэрхшээл сорилгынхоо талаар надад нэг хүний ярьсан хөгжилтэй түүх санаанд орж байна. Улирлын тоглолтын анхны бэлтгэлээ хийхээр талбайд ирээд хүүхдүүдийг хүлээхдээ тэр жаахан сандарч байжээ. Өөрөө тэр урьд өмнө хөлбөмбөгийн баг дасгалжуулж байгаагүй, багийн хүүхдүүд ч гэсэн хөлбөмбөг гэдгийг огт мэдэхгүй тул ажлаа эхлэлгүйгээр больчихсон нь дээр гэдгийг тэр сайн

мэдэж байв. Багийнхан бүгд цагтаа цугларч, цоо шинэ шпигээ углаад, алаглан эргэлдэх, шив шинэхэн бөмбөгнүүдээ өшиглөцгөөж байлаа. Бүгд л баярлан догдолжээ.

Шинэхэн цэрэг шиг туршлагагүй дасгалжуулагч маань дөрвөн настан багийнхнаа цуглуулаад тойруулж зогсоход өхөөрдөж, үр хүүхдээрээ бахархсан эцэг эхчүүд энд тэндээс гар утсаараа зураг дарцгааж, “Улирлын анхны бэлтгэл эхэллээ!” гэсэн зурвастай зургаа олон нийтийн мэдээллийн сүлжээнүүд дээр бүхэнд зарлан оруулцгааж байлаа. Энэ улиралд бүгдээрээ “гайхалтай сайхан” байх болно гэж багийнхандаа дасгалжуулагч мэдэгдээд, багийн гишүүн бүр бэлтгэлийн үеэр хөлбөмбөг тоглох чадвараа хөгжүүлэхэд нь бие биендээ тусалж, дандаа “хөгжилтэй сайхан” тоглоцгоох болно гэлээ. Тоглоно гэдгийг сонсонгуутаа л хүүхдүүд баярлалдан уухайлж, бүгд л шуугилдаж байв. Дасгалжуулагч бэлтгэлээ буухиа дамжуулалтаар эхлэхээр шийдэв. “За, хүүхдүүд ээ. Өнөөдөр бүгдээрээ буухиа уралдаан хийнэ!” гэтэл бүгд нэгэн дуугаар: “Урааа!” хэмээн байдаг чадлаараа орилцгоож байв. Бэлтгэл ангийн бяцхануудын эрмэлзэл тэмүүлэлд урам орсон дасгалжуулагч нь хүүхдүүдийг хоёр эгнээ болгон жагсаав. Тэмдэг хүртэл бөмбөгөө хөлөөрөө залж яваад, буцаад хөлөөрөө залаад ирэх ёстой гэж тайлбарлалаа. Тэгээд: “Яг л буухиа уралдаан шиг хийнэ шүү. Гол ялгаа нь та нар хөлбөмбөгийн бөмбөг өшиглөнө” гэлээ. Хүүхдүүд дахиад л шуугилдан хөөрөлдөв.

“Хүүхдүүд ээ, бэлэн үү?” гэж дасгалжуулагчийг асуухад: “Тиийийм эээ!” гэж хүүхдүүд нэгэн дуугаар уухайлав. “Шугаман дээр байраа эзлээд... бэлтгээд... УРАГШАА!”

“Урагшаа!” гэж дасгалжуулагчийг хашхирангуут жинхэнэ үймэлдээн бужигнаан эхэллээ. Эгнээ болгоны эхэнд байгаа хүүхэд тэмдэг хүртэл бөмбөгөө хөлөөрөө залаад, арынх нь хүүхдүүд ээлжээ хүлээн зогсож байх ёстой (буухиа уралдаан маягаар) атал бүх хүүхэд нэгэн зэрэг бөмбөгөө хөөн, харсан зүгтээ хар хурдаараа жирийцгээв. “Урагшаа!” гэдгийг сонсонгуутаа... бүгд гүйжээ! Ямар ч эмх замбараа байсангүй. Бөөн

бужигнаан. Элэг нь хөших дөхсөн хэдэн эцэг эхийн хамтаар дасгалжуулагч нь багийнхнаа бараг арваад минут хөөцөлдөж байж цуглуулж авлаа. Заримыг нь хаалганы шонгоос буулгаж, заримыг нь хаалтны араас барьж авч, өөр талбай руу өрсөлдөгч багтайгаа нийлэхээр төөрч явсан нэгийг нь арайхийн илрүүлж буцаав.

Тэр оройн бэлтгэл тараад дасгалжуулагч гэртээ ирэхдээ амьдралдаа ядарч үзээгүйгээрээ ядарч сульдсан байлаа. Тэгээд эхнэртээ (бага ангийн багш) түрүүнд болсон бүтэлгүй явдлынхаа талаар ярьж өгчээ. “Би уг нь жагсааж зогсоосон шүү дээ. Буухиа уралдаан хийнэ гэдгээ тайлбарласан. Тэгээд: “Шугаман дээр байраа эзлээд... бэлтгээд... УРАГШАА!” гэж хашхирсан. Гэтэл яаж ийм замбараагүй юм болдог байна аа!” гэв. Эхнэр нь инээдээ барьж ядаад, гайхаж цөхсөн нөхөртөө тайлбарлаж өгч гэнэ. Танай багийнхан дөрөвхөн настай жаалууд шүү дээ. Бага ангидаа ч ороогүй байна. Багаараа уралдаан тэмцээнд оролцох хэмжээнд арай хүрээгүй тул буухиа уралдаан гэж ямар юм байдгийг өмнө нь тэдэнд зааж өгсөн хүн бараг байхгүй биз. Тэр жаалуудын сонсож ойлгосон ганц үг нь “уралдаан”, тэгээд “УРАГШАА!” гээд л хашхирахаар ойлгосноороо л үйлдэж байгаа нь тэр. Тэд яаж уралдахаа зөв ойлгоогүй тул үр дүнд нь сэтгэлээр унамаар бужигнаан үүсжээ.

Энэ түүхийг бодохлоор тэр бяцхан жаалууд уралдааныхаа талаар буруу ойлгосон шигээр найдвар гэдгийг олон хүн буруугаар ойлгож, үүнээс болоод сэтгэл гонсойлт, үймээн бужигнаан үүсдэг аж. Найдварыг бусдаар үйлдүүлэх хэвээр ойлгодог хүн олон байдаг. Нэг ёсондоо сэтгэлийн залхуу мэдрэмж гэж. Бүх зүйл сайхан болох байх гэж найдаад, ямар ч идэвхгүйгээр суугаад л байж байвал бүх юм сайхан болно доо гэж тэд тэс хөндлөн юм төсөөлнө. Гэтэл найдна гэдэг бол зүгээр суугаад, алмайж баймаар мэдрэмж биш юм. Бас зүгээр нэг сэрүүн зүүд, хий мөрөөдөл биш ээ. Хэрэв та найдна гэдгийг ингэж ойлгодог юм бол юу хүсэж байгаагаа ч сайн мэдэхгүй бөгөөд мэдэхгүй болохоор түүнийгээ бас олж авч чадахгүй л болов уу.

Найдвар нь бидэнд эрч хүч оруулдаг бөгөөд хийх ёстой зүйлээ хийх түлхэц үзүүлдэг. Өмнө нь би дурдаж байсанчлан, энэ бол сайн сайхны төлөөх жаргалтай, итгэл дүүрэн хүлээлт бөгөөд тэрхүү сайн сайхны төлөөх жаргалтай, итгэл дүүрэн хүлээлт бол Бурханы Үгэнд дуулгавартайгаар үйлдэж, итгэлийн алхам хийх шалтгаан болдог. Итгэл найдвар гэдэг бол идэвхгүйгээр байлгаж, барьж тогтооход хэцүү дэндүү өрнүүн дэврүүн зүйл билээ. Найдвар нь зоригтойгоор итгэж, зүрхлэн шийдэж, бат шийдвэртэй үгээ хэлж, тэмүүлэл дүүрнээр хагуужин тэсвэрлэдэг.

Итгэл найдвар гэдэг бол идэвхгүйгээр байлгаж, барьж тогтооход хэцүү дэндүү өрнүүн дэврүүн зүйл билээ.

Бурхан гар хумхин сууна гэж байдаггүй учраас итгэл найдвар ч бас гар хумхин суудаггүй. Таны амьдралд Бурхан үргэлж хөдөлж, ажиллаж байдаг. Өөрт нь дуулгавартайгаар үйл хөдлөл хийхийг чинь Тэр хүсдэг. Залхуу, юм бүхнийг хойш тавьдаг, идэвхгүй хүн хэзээ ч аз жаргалтай хүн байдаггүй. Итгэл найдварын хүчийг та ухаарах аваас итгэлээр үйлдэж, зөв цагтаа хийх хэрэгтэй зүйлийг хийхэд бэлэн бөгөөд догдлон хүлээдэг хүн болно.

Заримдаа бид Бурханыг хүлээдэг. Гэвч жинхэнэ хүлээлт идэвхгүй байдаггүй. Сүнслэг оршихуйд энэ нь маш идэвхтэйгээр ажилладаг. Бурханыг хүлээх тухай өгүүлсэн ишлэл тоолшгүй олон байдаг. “Эзэнийг найдан хүлээ” гэж тэнд бичигдсэн байдаг. Бидний амьдралд ажлаа хийнэ хэмээн Бурханыг идэвхтэйгээр найдан хүлээх хэрэгтэйг энэ нь тодорхой болгодог тул би энэ хэсгүүдэд их дуртай. Бурхан сануулангуут л хөдлөхөд бид бэлэн байх ёстой. Бас хүлээх зуураа, бидэнд зориулаад маш том гайхалтай зүйлийг Бурхан бэлдэж төлөвлөж байгаа гэдэгт огтхон ч эргэлзэхгүйгээр бат итгэх хэрэгтэй. Хүүхдээ төрүүлэхээр хүлээж байгаа жирэмсэн бүсгүй мэтээр бид сэтгэх хэрэгтэй! Энэ хорвоод ирэх аян замаа туулж байгаа нялх үрээ тэр байнга бодож, төлөвлөж, мөрөөдөж, бэлдэж, түүний тухай л яриад байдаггүй гэж үү.

Тулаанаас ухран зугтах биш, давшин ор!

Дуулал номыг уншихад Давид итгэл найдвар, хүлээлт мөрөөдлөөр дүүрэн хүн байсныг та эхлээд анзаарах байх. Бичсэн шүлгээс нь үүнийг харж болно. Хэдэн жишээ дурдъя:

“Эзэнийг хүлээж, найдаж, хүсэн хүлээгч бүгд ээ, тууштай байж, зүрхээ зоригтой байлгагтун!”

Дуулал 31:24 (тодотгол нэмэв) (АМР)

“Танд итгэж, найдан, хүсэн хүлээгчдээс хэн нь ч ичгүүр эс болж, гонсойлт үл амсана...”

Дуулал 25:3 (тодотгол нэмэв) (АМР)

“Өө Эзэн, одоо би чухам юуг хүлээж, харна вэ? Миний найдвар, хүлээлт Танд л байна”.

Дуулал 39:7 (тодотгол нэмэв) (АМР)

Талд хонио хариулж явахдаа ч, зугтсан цэргүүдээ удирдаж явахдаа ч, Израилийг захирах хаан байхдаа ч амьдралд нь гайхалтай зүйлийг Бурхан хийж өгнө гэсэн итгэл найдвараар Давид үргэлж амьдардаг байсан. Найдаж байгаа нь энэ гээд тэр гар хумхин алмайн суугаагүй юм. Харин ч эсрэгээрээ. Итгэл найдвар нь түүнийг үйлдэл хийхэд хүргэж байсан. Бурхан ямар нэг гайхамшигтай зүйл хийнэ гэж Давид итгэсэн боловч Бурхантай хамтран зүтгэж, дуулгавартайгаар үйлдэх хэрэгтэй гэдгээ ч мэдэж байсан. Тийм ч учраас Эзэний чиглүүлгийг асуугаад, зоригтойгоор итгэлийн алхам хийдэг байсныг нь бид олонтаа (1 Шастир 14:10, 1 Шастир 14:14, 1 Самуел 23:2, 2 Самуел 2:1-ийг тус тус унш) хардаг.

Хэрэв Голиаттай нүүр тулахдаа Давид хойрго, идэвх зүтгэлгүй, бэлтгэлгүй байсан бол юу болох байсныг төсөөлдөө? “За, яах вэ дээ. Бурхан ямар нэг зүйл хийнэ гэдэгт би найдаж байна. Бусадтайгаа хамт нуувчинд л сууж байхаас даа. Энэ аварга эрийг ниргэхээр Бурхан аянга илгээнэ гэдэгт найдацгаая” гэж Давид хэлж байна гээд төсөөлдөө. Тэр ийм

хандлагатай байсан бол Бурхан өөр хүнээр Голиатыг ялуулах байсан. Бурхан итгэл найдвар өвөрлөн алхам хийдэг хүнийг, өөрийнхөө хийх ёстойг хийх эрмэлзэлтэй хүнийг хайж байдаг. Давид чухам тийм л эр байжээ!

Ах нартаа хүнс хоолыг нь хүргэн дайны талбарт Давид ирээд тэр аварга биет филист хүн Бурханыг хараан, Израилийн цэргүүдийг басан тохуурхаж байгааг харангуутаа найдвар өвөрлөв. Тэгээд хажуудаа зогсож байсан хүмүүсээс: “Энэ филист хүнийг алж, Израилиас ичгүүр шившиглэлийг арилгах хүнийг яах вэ?” (1 Самуел 17:26) гэж асуужээ. Ялагдах тухай тэр бодсонгүй. Алдаж бүтэлгүйтнэ гэж ч санасангүй. Басаж болиулах гэж хэлсэн бусдын үгийг ч тоосонгүй. Харин амжилтад хүрнэ, тулаанд ялна гэдэгтээ тун ч найдаж байв.

Давид чухам энэ найдвараараа л алхам хийсэн юм. Эхлээд найдвар төрсөн болоод ялалт байгуулж ялсан мөчийн хооронд тэр ямар алхам хийж, арга хэмжээнүүд авсныг харцгаая: Өөрийг нь доош хийж, сэтгэлээр унагаж, шүүмжилсэн ахынхаа үгийг тэр эсэргүүцсэн (ишлэл 28-30), өөрт нь тулалдах зөвшөөрөл өгөөч хэмээн Саул хааныг ятгасан (ишлэл 32-37), Саул хааны хуяг дуулгыг өмсөж үзсэн боловч ашиглахгүй байхаар шийдсэн (ишлэл 38-39), дүүгүүрийнхээ сум болгон таван мөлгөр чулуу шилж авсан (ишлэл 40), тэгээд Голиатыг ялна гэдгээ тунхаглан, айлгүйгээр үгээ өчсөн (ишлэл 45-47). Тэгээд филист хүнтэй нүүр тулахаар тулалдааны тэргүүн шугам руу яаран гүйж ирсэн (ишлэл 48). Давид: “*За, яах вэ дээ. Бүх юм сайхан болно гэж би үнэхээр найдаж байна. Хүлээгээд харж байя*” гэсэн хандлагатай байгаагүй. Харин: “*Би Бурханд найдаж байна. Явж, тулаанд ялъя!*” гэсэн хандлагаа илэрхийлсэн. Давид тулаанаас зугтаагүй, нөгөө цэргүүд шиг нуувчиндаа бүгээгүй. Харин Бурхантай хамт байн аварга эрийг ялж чадна гэсэн бүрэн итгэл найдвараар тулаанд өөрөө давшин орсон. Ямар нэг сайн сайхан зүйл болно гэсэн эерэг хүлээлт түүнд байсан юм!

Найдвар бол боломж

Та ч бас Давидад байсан шиг хандлага өвөрлөж болно. Энэ номыг унших зуур зүрх сэтгэлд тань өсөн ургаж байгаа итгэл найдварыг ашиглаад Бурханы чиглүүлгийг эрэлхийлж, итгэлийн алхам хийж, зүрх сэтгэлд чинь Бурханы оруулсан тэр л зүйлийг та зоригтойгоор хийж чадна. Таны амьдралд Бурхан агуу гайхалтай зүйлсийг хийхийг хүсэж байна. Харин та найдвар өвөрлөхгүй, сөрөг хандлагатай байваас түүнийгээ Бурхан хийж өгөхгүй ээ. Таныг эрч хүчтэй, эерэг хүлээлт дүүрэн байж энэ гайхамшигт оролцоосой гэж Бурхан хүсдэг. *“Жойс, итгэл найдвар тээх юмсан гэж би хүсдэг л дээ. Гэхдээ л чадахгүй байна”* гэж та бодож байж болох юм. Тэгвэл найдвар гэдэг бол мэдрэмжээр ирдэг биш. Харин бид сэтгэлдээ өвөрлөө гэж шийдэж байж бий болдог тийм л зүйл билээ.

Тэгвэл найдвар гэдэг бол мэдрэмжээр ирдэг биш. Харин бид сэтгэлдээ өвөрлөө гэж шийдэж байж бий болдог тийм л зүйл билээ.

Найдвар өвөрлөө гэсэн зорилго тавь! Найдвар бол хүчирхэг, ер бусын боломж юм. Та ийм боломжийг алдахыг хүсэхгүй л болов уу. Сэтгэлийн тэнхээ, эрч хүч маань бидний бодол санаатай маш нягт холбоотой. Найдвар тээсэн бодол сэтгэлтэй байвал эрч хүч нэмэгдэж, харин уруу дорой, итгэлгүй бодол тээхэд эрч хүч, сэтгэлийн тэнхээ ч багасаад ирдэг.

Өөрсдийнх нь нөхцөл байдлыг өөрчлөх ямар нэг зүйл Бурхан хийх байх гэж зарим хүмүүс *найддаг* мөртлөө өөрсдөө юу ч хийхгүй байгаад байдаг. Жишээ нь: Ажил төрөл сураглахгүй суугаад л байвал ажилд орж чадахгүй шүү дээ. Гэхдээ бас тодорхой алхмууд хийгээд, завгүй гүйгээд байгаа боловч үр дүнд нь итгэлгүй, сайн юм болно гэж найддаггүй хүмүүс ч бас байна. Энэ хоёр төрлийн аль нь ч хүсэж байгаа зүйлээ олж авч чадахгүй. Харин Бурханаар өгөгдсөн хүсэл мөрөөдөлтэй ховорхон хүмүүс бас байдаг. Тэд залбираад, Бурханы чиглүүлсний дагуу алхам хийдэг бөгөөд хүсэл мөрөөдөл нь

биелэгдэх хүртэл хэр их хугацаа шаардагдахаас үл хамаарч итгэл найдвараа тээсээр байдаг билээ.

Библийг бүхэлд нь уншаад үзвэл, Бурханы хүмүүс ер бусын боломжийг самбаачлан ашиглаж, гайхамшиг үйлдэхэд оролцсон байдгийг олж харж болно. Иерихогийн хана хэрмийг нураана гэж Бурхан амлахад израильчууд хотыг тойрон алхаж, ялалтын уухай хадааж, тулаанд орсон... энэ итгэлийн алхам байв! Есүс 5000 хүнийг хооллохоор зэхэхэд, дагалдагчид хурсан олныг хэсэг хэсгээр нь дугуйруулан суулгаж, хоолыг тарааж өгсөн... бас л итгэлийн алхам байв! Цус алдах өвчтэй эмэгтэйг Есүс эдгээхээс өмнө тэр эмэгтэй өөрөө хурсан олны дундуур зүтгэн гарч, Түүний нөмрөгний хормойд хүрсэн... энэ итгэлийн алхам байсан! Пентекостын өдөр Ариун Сүнс бууж ирэхэд, Петр хүмүүсийн өмнө зогсоод Сайнмэдээг тунхаглаж байв... тэр итгэлийн алхам хийсэн! Библид өгүүлэгдсэн эдгээр эрэгтэй, эмэгтэй хүмүүс боломжийг самбаачлан шүүрч аваад, зоримгоор итгэлийн алхам хийж байсан юм бол та ч, би ч ийм зүйл хийж болохгүй гэж үү?

Таны нөхцөл байдал иймэрхүү байж болох юм:

“Албан тушаал ахиж, илүү сэтгэлд хүрсэн талбар дээр ажиллана гэж найдаж байгаа бол таны хувьд энэ шинэ сорилт юм. Энэ итгэл найдвараараа алхам хий. Тиймийн тулд шинэ ажил төрөлд чинь хэрэгтэй тийм арга замуудаар мэдлэг мэргэжлээ сайжруулахын тулд хичээл сургалтад сууж болох юм. Ажил төрөлдөө амжилт гарган, ахин дэвшиж байгаа хүмүүстэй яриад үз, өөрийгөө бэлтгэхийн тулд юу юу хийх нь зүйтэйг асууж мэд. Тэгээд зохих түвшинд бэлтгэгдсэнийхээ дараа ажил төрөл эрчимтэй хай, зүрхэндээ найдвар тээсээр, эерэг үгийг тунхагласаар үүнийг хийгээрэй.

Хэрвээ та үргэлж л ядарч, үе үе өвдөж байгаа бол эрүүл мэндээ сайжруулна гэсэн найд-

вар тээ. Энэ найдвартаа хөтлөгдөн үйлдэл хийж эхэл. Гэрийнхээ ойролцоо биеийн тамирын танхимд дасгал хийх ч юмуу дасгал хөдөлгөөн хийх шинэ хуваарь өөртөө зохио. Эрч хүчээ нэмэгдүүлэхийн тулд идэж байгаа хоол унд, унтаж нойрсох цагаа ч өөрчлөх хэрэгтэй байж болох юм. Кафиентэй ундаа, цай, кофе хэрэглэхээ болих зэрэг энгийн арга хэмжээнүүд авч ч болно. Эзэн хийх байх гээд хойш суун хүлээгээд байж болно л доо. Гэвч таны хийх ёстой ямар нэг зүйл байгаа эсэхийг Бурханаас заавал асууж лавлах нь зүйтэй.

Зөрчил маргаантай харилцаагаа сайжруулна гэж та найдаж болох юм. Тэгвэл энэ найдвараараа хөтлөгдөн алхам хий. Нөгөө хүнээ алхам хийхийг хүлээж суухын оронд өөрөө алхам хий. Өөрт нь санаа тавьж, урам өгсөн захидал бичих ч юмуу цахилгаан шуудан илгээж болно. Эсвэл хамт кофе уухыг урьж, түүнийг гомдоосон юм байвал өөрөө эхлээд түүнээс уучлал гуй.

Санхүү мөнгөний тал дээр сайжирна гэж, цалингаас цалингийн хооронд дөнгөн данган хүргэж амьдрахаа болино гэж найдаж байгаа бол тэр найдвартаа хөтлөгдөн алхам хий. Сарынхаа төсвийг гаргах ч юмуу, одоо мөрдөж байгаа төсвөө дахин хянаад, мөнгөө юунд үрээд байгаагаа шалгаад үзэж болно. Эсвэл даргатайгаа уулзаад, компанийн ашиг орлогод нэмэр болохын зэрэгцээ өөрөө ч арай ахиу цалин авахаар нэмэлт ажил хийх боломж байгаа эсэхийг лавлаад үз’.

Та юу хүсэж байгаа, юу хэрэгтэй байгаагаа эхлээд маш тодорхой мэд. Энэ талаараа итгэлтэйгээр залбир. Бүрэн дүүрэн найдвар тээсээр Бурханыг хүлээ. Ариун Сүнс ямар нэг чиглүүлэг удирдамж өгөх аваас шалавлан дуулгавартайгаар

дага. Зарим хүн залбирчихаад залбирсан зүйл нь өгөгдөх эсэхэд эргэлздэг. Тийм залбирлууд хариултаа авахгүй. “Ямар ч эргэлзээгүйгээр итгэлээрээ гуй” гэж Бурхан айлдсан байдаг (Иаков 1:6-г унш). Зүрх сэтгэл, бодол санаагаа эргэлзээнээс хамгаалах нэг арга нь итгэл найдвар, эерэг хүлээлтээр дүүрэн байх явдал юм. Найдвар нь ганцхан удаагийнх байж болохгүй. Эсвэл “хааяа хааяахан л байдаг” зүйл ч биш. Бидний амьдралд итгэл найдвар үргэлжид тогтвортой байх ёстой!

Хүсэл мөрөөдлөө биелүүлэхийн тулд ямар алхмууд хийгээсэй гэж Бурхан хүсэж байгааг залбирч асуу. Ямар нэг зүйл хийх санаа Эзэнээс ирсэн байх юм бол таны шаргуу хөдөлмөр зүтгэлийг Тэр чиглүүлж удирдан, ерөөх болно. Өөрийнх нь Үгийг заах, хүмүүст туслах хүсэл мөрөөдлийг миний зүрхэнд Бурхан оруулж өгсөн бөгөөд тэр цаг мөчөөс хойш би идэвхгүй зүгээр суугаагүй гэдгээ үнэнээр нь өчих байна. Сэтгэлээр унамаар, шантарч болимоор хүнд хэцүү өдрүүд надад тохиолдож байсан боловч итгэл найдвараар дүүрэн хэвээр байх учиртайг энэ олон жилд би ухаарч авсан. Ингэснээрээ амьдрал минь ч улам сайн сайхан болохын зэрэгцээ би өөрөө ч улам өөдрөг болж, өсөж өндийсөн. Хүсэл мөрөөдөл, зорилгуудаа биелүүлэхийн төлөө алхам хийхдээ Мосегийн залбирч байсанчлан та: *“Бурхан Эзэний маань ивээл бидэн дээр байх болтугай! Бидний гарын үйлсийг бидний төлөө бат тогтоогооч! Тийм ээ, гарын маань үйлсийг бат тогтоогооч!”* (Дуулал 90:17) хэмээн залбирч болох юм. Идэвхгүй үлбийж суухыг нь ерөөгөөч гэж Эзэнээс Мосе гуйгаагүй ээ. Харин хийж буй ажил үйлсийг нь ерөөхийг гуйжээ.

Эвдэрхий савнуудыг ч Бурхан ашигладаг

Энэ бүлгийг уншихдаа та өмнө нь итгэлийн алхам хийхдээ учир нь олдохгүй хэцүү нөхцөл байдалд орж байснаа зовууртайгаар дурсан санаж байж болох юм. Их л дэврүүн сэтгэлээр эхлээд, зоригтой алхмууд хийж, болох бүтэхийн нь төлөө

байдгаараа зүтгэсэн боловч бүтэлгүйтэж, баларсан түүх олон давтагдсан байж магадгүй. Танд иймэрхүү сэтгэгдэл төрж байгаа бол юу туулж гарч ирснийг чинь би сайн ойлгож байна аа. Чадах бүхнээ хийгээд байхад ч нөхцөл байдал дээрдэхийн оронд бүр дордчихсан юм шиг өдөр надад олонтаа тохиолдож байв. Бид бүгдээрээ л ийм юм туулж гардаг байх. Гэвч бид ирээдүйд дахиад оролдоод үзэх эрмэлзлээ өнгөрсөнд амссан бүтэлгүйтлээрээ бөхөөж болохгүй.

Гэвч бид ирээдүйд дахиад оролдоод үзэх эрмэлзлээ өнгөрсөнд амссан бүтэлгүйтлээрээ бөхөөж болохгүй.

Хүч чадал маань хязгаарлагдмал, алдаа дутагдалтай хүн гэдгийг минь Бурхан сайн мэдэж байгаа. Бидний гаргасан алдаа Эзэнд гэнэтийн цохилт болдоггүй бөгөөд бидний амьдралд ажлаа хийхийг нь болиулж чаддаггүй. Үнэн хэрэгтээ, Өөрийн агуу хүч чадлыг толилуульж харуулахдаа бидний хязгаарлагдмал байдлыг Бурхан ашиглах нь олонтаа байдаг. Юу хэлээд байгааг минь дүрслэн харуулах нэгэн гайхалтай түүхийг би уншиж байснаа санаж байна:

“Энэтхэгт нэгэн усчин амьдардаг байж гэнэ. Хөндлүүр модныхоо хоёр үзүүрт усны савнуудаа бэхлээд усаа зөөдөг байжээ. Усны хоёр хувингийнх нь нэг нь ямар ч өө сэвгүй бүрэн бүтэн тул тунгалаг горхиноос ус дүүргэн аваад эзнийхээ гэр лүү алхаж хүрэх урт замд цалгиаж асгахгүйгээр авчирдаг байлаа. Харин нөгөө хувин нь эмтэрхий, цуурхайтай тул замын турш дусал дуслаар шүүрсээр дөнгөн данган тал устай л ирдэг байв. Ийнхүү усчин эр хоёр жил хагасын туршид эзнийхээ гэр лүү ус зөөхдөө нэг бүтэн, нэг тал хувин ус л дандаа авчирдаг байж гэнэ. Бүтээгдсэн зорилгоо бүрэн төгс гүйцэлдүүлж, амжилттай сайхан яваадаа бүтэн хувин нь их сэтгэл өег байсан нь мэдээж. Харин

цуурсан хувин төгс төгөлдөр биш байгаадаа өөрөөсөө ичиж, хийх ёстой үүргээ дөнгөж тал хувь биелүүлж байгаадаа шаналж зовдог болжээ. Гутармаар бүтэлгүй амьтан гэж өөрийгөө зүхсээр хоёр жил гаруй явсны эцэст өнөөх хувин усчин эзэндээ хандан ингэж хэлжээ: “Би өөрөөсөө их ичиж байна. Намайг уучилж өршөөгөөрэй”. Гэтэл усчин: “Яагаад? Чи юунд өөрөөсөө ичиж байгаа юм бэ?” гэж асуужээ.

“За, би эмтэрхий, цуурхайгаасаа болж энэ хоёр жилийн туршид өдөр бүр л тал хэмжээтэй ус авчирч байлаа. Та намайг усаар дүүргэдэг боловч эзнийх рүү хүрэх замд дусал дуслаар асгарчихдаг. Та бүхий л хүчин чармайлтаа гаргаж ажилладаг ч миний муугаас болж хөлс хүч гаргасныхаа ашиг тусыг бүрэн хүртдэггүй” гэж хувин хэлэв.

Цуурч эмтэрсэн хуучин хувингийн хэлэхийг сонсоод усчин: “Одоо эзнийх рүү буцаад явахад замын хажуугаар гоёмсог цэцэгс ургасан байгааг ажиглаад хар даа” хэмээн аядуухан хэлж гэнэ. Тэгээд тэд толгод өгсөн явах замд хуучин хувин замын хажуугаар ургасан үзэсгэлэнт цэцэгсийг анзаарч харав. Зөрөг замыг туулж дуусахад бас л хагас усаа гоожуулаад асгачихсан байгаадаа хувин сэтгэлээр унав.

Харин усчин хувинд ингэж хэлжээ: “Замын хажуугийн цэцэгс нөгөө талаар биш зөвхөн чиний явдаг талаар алаглан ургасныг ажиглав уу? Чиний өө сэвийг мэдэж байсан тул үүнийг сайнаар ашиглах гэсэндээ зам дагуу чиний явдаг талд би цэцгийн үр суулгасан юм л даа. Горхиноос ус аваад буцах замдаа өдөр бүр чи энэ цэцэгсийг дусал дуслаар усалдаг байсан. Тэгээд ургасан сайхан цэцэгсийг нь түүж, эзнийхээ

ширээг би хоёр жилийн туршид чимэглэж байна. Чи өөрийнхөө байгаагаар байгаагүйсэн бол эзний маань гэрт анхилуун сайхан цэцэгс гэрэл гэгээ авчирч чадахгүй байх байсан”.¹

Яг л энэ цуурсан хувин шигээр та ч бас агуу зүйлсийг гүйцэлдүүлж чадна. Өө сэв, дутуу гуцуу юм байгаа чинь хамаагүй ээ. Итгэл найдвараар хөглөгдсөн шийдэмгий алхмууд хийхэд сул тал гэж ойлгож байгаа зүйлс чинь бүү саад болог. 2 Коринт 12:10-т: “би... хэзээ мөхөсдөнө [хүмүүний хүч чадлаараа], тэр үедээ [үнэхээр] хүчтэй байдаг (чадалтай, Бурханы хүч дотор хүчтэй байдаг)” гэжээ. Үүнийг мэдэхээр сэтгэл тайвширч байна уу? Тантай Бурхан хамт байгаа болохоор сул дорой үедээ ч та хүчтэй байдаг ажээ. Таны амьдралын бүхий л зүйлсийг, тэр ч байтугай цуурхай эмтэрхий болгоныг ямар нэг сайн сайхан зүйл бүтээхдээ Тэр ашигладаг юм.

Найдвар өвөрлөгтүн!

Таны оролцоо гэж байдаг тул найдвар өөрөө сэтгэл хөдөлгөм билээ. Тэнгэрээс хариулт нь унаад ирнэ гээд та гар хумхин хойш суугаад байх шаардлагагүй ээ. Бурханд найдаж, Түүний мэргэн ухаан, чиглүүлэг, зааварчилгааг гуйж, зорилгынхоо дагуу бодитой, жинхэнэ алхмуудыг хийгтүн. Хийж гүйцэлдүүлэх гэсэн зүйл чинь хичнээн хэцүү бэрх харагдавч, хүмүүс таныг болиулах гэж юм хэллээ ч, өдөр болгон итгэл найдвараар удирдуулан алхам хий. Түүнчлэн, таныг хийгээсэй гэж Бурхан чиглүүлж байна хэмээн бодож байгаа зүйлээ дуулгавартайгаар хий, Таны амьдралд ажлаа хийж байгаагийнх нь төлөө Бурханд идэвхтэйгээр талархлаа илэрхийлж болно. Үргэлж эерэг хандлага тээж, амнаасаа ч дандаа эерэг үг гарга. Өмнө нь байгуулж байсан ялалтуудаа эргэн дурсаж, тэдгээрээр урамш. Ялалтад хүрэхийн тулд тууштай бөгөөд сахилга баттай байх шаардлагатай. Үүнээс эрч хүчтэй үр дүн гарна. Тиймээс урагшил, итгэл найдвар өвөрлөгтүн. Аварга

биет дайчинг ялахад нь Давидад Бурхан тусалсан. Танд ч Тэр тусалж чадна.

ТАВДУГААР БҮЛЭГ

Шинэ хүн болсон өөрийгөө таньж мэдэгтүн

*“Харин бид бүгд бүтээлэггүй нүүрээрээ
Эзэний алдрын тусгалыг тольдох мэт ха-
раад, Түүний дүрд алдраас алдарт өөрч-
лөгддөг. Энэ нь Эзэний Сүнсээр ирдэг”.*

2 Коринт 3:18 (NIV)

“Хатуугаас хатуу гуравхан л юм байдаг нь
ган төмөр, очир алмааз, өөрийгөө таньж
мэдэх явдал гурав билээ”.

—Бенжамин Франклин

Өөрчлөлтийг хийх амархан биш ээ. Сайн өөрчлөлт хийхэд ч дадах хугацаа шаардагддаг. Биднийг Бурхан өөрчлөхөд, үнэхээр өөрчлөгдсөн гэдэгтээ итгэхэд маань ч тодорхой хугацаа орно. Энэ үнэн гэдгийг элч Паул мэдэж байжээ.

Паулын тухай бодохлоор, сүнслэг дайчин, Шинэ гэрээний ихэнх хэсгийг бичсэн нэгэн гэдгээр санаанд буудаг. Чуулганы индрээс хүмүүс номлохдоо: “Ром номд Паул юу гэж хэлснийг уншицгаая” эсвэл “Галат номд Паул хэлэхдээ...” гээд л дурдахад хэлсэн зүйлд нь эргэлзэх хүн гардаггүй. Гэтэл хүн бүр л Паулд эргэлзэн, сэжиглэж байсан үе бий. Тэгэхэд тэр агуу элч байгаагүй. Харин муу нэртэй ч шинэ нэртэй болсон энгийн нэг эр байлаа. “*Фарисайн хүү Фарисай.*”

Анхны чуулганыг хавчин зовоогч. Итгэж болохгүй нэгэн” байсан. Тиймээс өөрийгөө Паул гэхээсээ Саул гэдгээрээ мэдэрч, шинэ байдалдаа дасан зохицох хугацаа түүнд хэрэгтэй байсан юм болов уу гэж бодогддог. Хуучин хүн Саулаасаа бүрмөсөн салж явуулахад Паулд хугацаа шаардагдсан болов уу. Хэн нэгэнтэй гар бариад мэндлэхдээ: “Сайн байна уу? Намайг Саул гэдэг... өө... юу л даа... Намайг Паул гэдэг. Би Паул байна” гэж гацаж түгдрэх үе түүнд тохиолдож байсан байх.

Тэгвэл баруунд бол эмэгтэйчүүд гэрлэхдээ нөхрийнхөө овгийг авдаг. Зарим нь үүндээ дасах гэж их л зүдэрдэг аж. Жишээ нь, та Мээри Смит байгаад Мээри Стайборский болжээ. Эсвэл Сээли Жоонс гэдэг нэрэндээ дасчихсан байтал Сээли Риглэштэйн болов. Шинэ нэрэндээ дасахад хугацаа хэрэгтэй. Гэтэл Паул бол нэрээ өөрчилснөөс ч их өөрчлөлттэй нүүр тулсан хэрэг. “Сайн байна уу? Би Паул байна. Би одоо Есүсийн дагалдагч болсон. Би танд Түүний тухай ярьж өгөх гэсэн юм” гэж хэлж байгаагаар түүнийг төсөөлөөд үз дээ. Христэд итгэгчдийг хавчигч фарисай өөрчлөгдөөд, номлогч болж хувирсныг хараад хүмүүс: “Байзаарай. Энэ чинь нөгөө Саул гэдэг залуу биш үү. Түүний тухай би сонсож байсан. Тэр чинь христитгэгчдийг хавчиж, баривчилдаг этгээд шүү дээ... Би л лав түүнд итгэхгүй байна. Үнэхээр өөр хүн болсон гэдэгт нь ёстой итгэж чадахгүй нь” гэгцгээж байсан нь маргаангүй.

Шинэ хүн болсон Паулыг хараад гудамжинд явж байсан дурын хүн яаж хүлээж авч байсныг бид төсөөлж болох ч шавь нар үүнд яг ямар хариу үйлдэл гаргаж байсныг Библид тов тодорхой дүрсэлжээ. Тэд ер хүлээж аваагүй байна. Паул шинэ хүн болсон гэдэгт тэд үнэмшээгүй. Үйлс 9:26-д: “[Паул] Иерусалимд ирж, дагалдагчидтай холбоотой болохыг хичээв. Харин тэд түүнийг дагалдагч гэдэгт итгээгүй тул бүгд түүнээс эмээж байлаа” гэсэн байдаг. Гэвч Барнаб дагалдагч нарын өмнө зогсоод, Паулын зан чанарын талаар гэрчлэн ярьж, батлан даахад л түүнийг хүлээн авах эсэх талаараа тэд бодолцож үзсэн юм. Мэдээж, бидний мэдэж байгаачлан, тэд эцэстээ түүнийг хүлээж авсан л даа. Энэ түүхийн үргэлжлэл нь

Библийн бүхэл бүтэн түүх болсон билээ. Гэхдээ түрүүчийн ишлэл дээр байгаа нэг хэллэгийг анзаарч харахыг та бүхнээс хүсье. “Харин тэд түүнийг дагалдагч гэдэгт итгээгүй” гэж. Гэвч үүнийг бүр эмгэнэлтэй болгож болох байсан нэг зүйл бол: Паул “*өөрийгөө дагалдагч гэдэгт итгээгүй тул*” гэсэн үг байх байсан.

Дагалдагч нарын юу бодохыг Паул захирч чадахгүй байсан шүү дээ. Тиймээс Барнаб дагалдагч нартай ярилцаж, тэдний зүрхийг Бурхан өөрчлөх хэрэгтэй байсан. Энэ бүхэн Паулын хийж чадах зүйлс биш байлаа. Паулын захирч чадах ганц л зүйл нь өөрийнх нь хандлага байв. Гэвч үнэндээ бол бусад хүн юу гэж бодож, итгэх нь огтхон ч хамаагүй байсан байх л даа. Паул өөрөө юу гэж итгэж байсан нь л хамгийн чухал зүйл байв. Хэрвээ Христ дотор шинэ хүн болсноо тэр огтхон ч хүлээн зөвшөөрөөгүй бол агуу замналаа гүйцээн амьдарч тэр чадахгүй байсан. “*Олон газраар явж, Бурханы Үгийг тунхаглах юмсан даа. Уг нь миний зүрх сэтгэлд ийм хүсэл байдаг юм шүү дээ. Гэтэл би чинь чуулганыг хавчигч байсан байдаг. Би ер нь Саулаараа л үлдэх байх даа*” эсвэл “*Би ч амьдралаа хэтэрхий оройтож эхэлж байна даа. Бурханы төлөө хийхийг хүсэж байгаа зүйлсээ бүгдийг нь хийх боломж надад байхгүй л дээ. Би хэтэрхий удаан Саул явжээ*” гээд л тэр бодоод яваад байсан бол яах байсныг төсөөл дөө. Хэрэв ийм хандлагатай байсан бол Паул маш их шаналал зовлонтой амьдрах байсан. Түүгээр хийлгэхээр Бурханы төлөвлөсөн бүхий л зүйлсийг биелүүлж чадахгүй байсан.

Харин түүний амьдралд Бурхан нэгэнт ажиллаж эхлэхэд Саул байхаа нэгэнт больсноо Паул ойлгосон тул Саул шиг амьдрахаа больсон юм. Тэр фарисай шиг сэтгэхээ больж, фарисай шиг ярихаа больж, фарисай шиг үйлдэхээ больсон аж. Ингээд бүх зүйл өөрчлөгдөв. Тэр өөрчлөгджээ. Түүнд итгэл найдвар ирж, итгэл найдварынхаа дагуу үйлдэхээр тэр сонгов. Ариун Сүнсээр хөглөгдсөн Паул ингэж бичжээ:

“Тиймээс хэн нэг нь Христ (Мессиа) дотор байвал [суулгагдвал] тэрээр шинэ бүтээл [бүхэлдээ шинэ

бүтээл] мөн. Харагтун, хуучин нь [өмнөх ёс суртахуун, сүнслэг нөхцөл байдал] өнгөрч, шинэчлэгдсэн бөгөөд шинэ нь иржээ!”

2 Коринт 5:17 (тодотгол нэмэв) (АМР)

“Учир нь хозлуулах [одоо] эс хозлуулахын аль аль нь юу ч биш, харин шинэ бүтээл нь [шинэ төрөлт болоод Мессиа, Христ Есүсийн доторх шинэ мөн чанарын үр дүн болох] л чухал юм”.

Галат 6:15 (тодотгол нэмэв)

“Шинэчлэгдэж, шинэ” нь ирсэн тул, тэр “Христ Есүс дотор шинэ мөн чанартай” болсон тул Паул итгэл найдвараар дүүрэн байсан бөгөөд баяр хөөртэй амьдарсан юм. Өмнөх Саул шигээ сэтгэж, ярьж, санаа зовж, зүтгэж, үйлдэхээ тэр больсон. Тэр өөрчлөгдсөн. Амьдралд нь Бурханы хийж өгсөн шинэ зүйлсийг, өмнө нь нээсэн шинэ боломжуудыг, Бурхан өөрийг нь шинэ замналтай шинэ хүн болгосныг Паул хүлээж авсан.

Хуучин хүнээ тайл

Паулын амьдралд үнэнээр хэрэгжсэн зүйлс таны амьдралд ч үнэнээр хэрэгжинэ. Та ч бас “шинэ бүтээл [Мессиа, Христ Есүсийн доторх шинэ төрөлт, шинэ мөн чанарын үр дүн болох]” мөн. Та ч бас “шинэ болсон” амьдралаар амьдарч чадна. Та хуучин байсан шигээ хүн биш болсон. Таны амьдралд Бурхан маш олон зүйл хийсэн. Тэр таныг өөрчилсөн. Та ч бас миний л адилаар төгс байдлаас их зайтай байгаа нь ойлгомжтой. Гэвч та олон зүйл дээр ахиц гаргаж, эерэг өөрчлөлтийг хийсээр хол явчихаад байгаад ч би итгэж байна. Та хэсэг азнаад, хэн байснаа бодох аваас, юун дээр дотроо зөрчилддөг байснаа санах аваас таныг Бурхан хэр хол авчраад байгааг олж хараад маш их баярлах нь гарцаагүй ээ.

Миний нөхөр Дэйв өнөө өглөө надад цуг гольф тоглодог хүнийхээ тухай ярьсан юм. Эхнэр нь итгэгч боловч хүүхэд насандаа хүчирхийлэл дарамтад амьдарч байсан гунигт дур-

самжаасаа салж, ардаа орхиж чаддаггүй тухай тэр хүн ярьсан аж. Үүнээсээ болж эхнэр нь олон жилийн туршид оюуны бо-лоод сэтгэцийн асуудалтай явж ирсэн нь дотроо тээсээр байсан стресс дарамтаас үүдэлтэй байжээ. Яг адилхан хүнд бэрхийг туулсан атлаа зарим хүн үүнээсээ эдгэрсэн байхад, зарим нь яагаад эдгэрдэггүй юм бол гэж Дэйв бид хоёр ярилцаад нэгэн ижил дүгнэлтэд хүрсэн. Өөрөөр хэлбэл, өнгөрсөнд амссан өвдөлт зовлонгоосоо бүрэн эдгэрэхийн тулд бид Христ дотор шинэ бүтээл болсон гэдэгтээ чин сэтгэлээсээ итгэх ёстой юм байна гэсэн дүгнэлтэд хүрсэн. Хуучин ямар хүн байсан гэдгээсээ бүрмөсөн ангижирч, Христ Есүсийн бидэнд өгсөн, шинэ амьдралаар бид амьдарч сурах ёстой. Өмнө нь байсан нүгэлтэй, шархтай, хүчирхийлэл дарамтад өртсөн хүнээ тайлж, Христ дотор Бурханы бүтээсэн шинэ хүнээ өмсөн амьдрах хэрэгтэй.

*Та хэсэг азнаад,
хэн байснаа бодох
аваас, юун дээр
дотроо зөрчилддөг
байснаа санах
аваас таныг Бурхан
хэр хол авчираад
байгааг олж хараад
маш их баярлах нь
гарцаагүй ээ.*

Итгэгч хүний амьдралд, аливаа зүйлийг Бурхан өөрчилдөг гэдэг ойлголт дээр итгэл найдвар үндэслэдэг. Өөрчлөлт, дахин төрөлт, өөрчлөгдөн шинэчлэгдэх гэдэг нь Баярын мэдээний чухам сайн мэдээ нь юм. Өөрийнхөөрөө байвал та төөрөлдсөн, эвдэрсэн, Бурханаас хол, итгэл найдвараа алдсан. Харин агуу хайрынхаа улмаас Есүсийг Бурхан илгээсэн тул та олдсон, эдгэрсэн, Түүнтэй эвлэрсэн, итгэл найдвар чинь шинэчлэгдсэн. Аврал бол өөрчлөлт бөгөөд таныг, намайг гэсэн Бурханы хайрын улмаас энэ өөрчлөлт боломжтой болсон.

Зөвхөн аврал ч биш бас Бурхантай хамт өдөр тутам алхах нь ч өөрчлөлт юм. Хүмүүс Бурхантай учрахад өөрчлөлт болж байсан тухай Библид бүхэлдээ өгүүлдэг. Абрам Абрахам (Эхлэл 17:5-ыг унш) болсон. Сараи Сара (Эхлэл 17:15-ыг унш) болсон. Иаков Израиль (Эхлэл 32:28-ыг унш) болсон. Симон Петр (Иохан 1:42-ыг унш) болсон. Саул Паул (Үйлс 13:9-ийг унш) болсон. Гэхдээ энэ бүхэн зөвхөн нэр л өөрчлөгдсөн

хэрэг биш. Тэр хүмүүсийн амьдралын замнал өөрчлөгдсөн билээ. Хоньчин нь хаан болж, цагаач нэгэн нь улсын удирдагч болсон. Загасчид нь шавь нар болсон. Фарисай нь элч болсон.

Гэхдээ Паулын зэрэгцээ, эдгээр эрэгтэй, эмэгтэй хүмүүсийн амьдралд Бурхан өөрчлөлт авчрахад, өөрсдийг нь Бурхан ямар шинэ хүн болгон бүтээснийг тэд хүлээж авсан гэдгийг анзаарах нь чухал. Давид хоньчин хүүгийн сэтгэлгээгээр яваад л байгаагүй. Хаан гэдэг үүрэг оройлоо хүлээж авсан. Мосе ч бас фараоноос айж нуугдсан хэвээр үлдээгүй. “Миний ард түмнийг явуул!” гэж зоригтойгоор тунхагласан. Петр айдастай чигээрээ үлдээгүй. Пентекостын өдөр тэр болсон зогсоод, мянга мянган хүний өмнө Үгийг тунхагласан. Амьдралд нь Бурханы хийж өгсөн, хийж өгч байсан зүйлийг тэд бүгд өөртөө суулган хүлээж авсан аж. Тэгвэл та ч ингэж чадна. Хамгийн гол нь, үүнийг та хүлээж авахгүй юм бол Есүс дотор таных болсон тэрхүү сэтгэл хөдлөм, хүчирхэг амьдралаас хол, доогуур төвшинд үргэлж зөрчилтэй явна.

“Таныг Бурхан болзолгүйгээр хайрладаг гэдэгт та итгэдэг үү?” гэж танаас асууя. Таны БҮХ нүгэл уучлагдсан гэдэгт итгэж байна уу? Шинэ зүрх сэтгэл, шинэ сүнстэй шинэ бүтээл болсон гэдэгтээ та итгэдэг үү? Та өөрийгөө хүлээж авсан уу? Та өөртөө дуртай юу? Ирээдүйд таныг сэтгэл хөдлөм зүйлс хүлээж байгаа гэдэгт итгэдэг үү?

Хэрвээ та энэ бүхэнд итгэдэг бол баяр хүргэе. Яагаад гэвэл, гайхалтай сайн сайхныг амсах зам дээр та гарчээ. Харин эдгээрт итгэдэггүй бол итгэх хүртэлээ Бурханы Үгийг судлах хэрэгтэй цаг аж. Сэтгэлдээ мэдэрч байгаа зүйлээсээ илүүтэйгээр Бурханы Үгэнд өгөгдсөн амлалтуудад итгэгтүн. Ялалт байгуулталаа огт бүү шантар. Шинэ бүтээл болсон бодит байдалдаа нийцүүлэн оюун санаагаа шинэчлэгтүн! Тухайлбал, та бол Христ дотор Бурханы зөвт байдлыг өвлөсөн! Есүсийн цусаар та зөвтгөгдөж, ариун болгогдсон! Бурханаас өгөгдсөн авьяас билиг, чадварууд танд бий! Таны дотор Бурханы Сүнс оршдог бөгөөд таныг хэзээ ч орхихгүй,

мартахгүй! Шинэ хүн болсон гэдгээ ухаарах үед шинэ итгэл найдвар танд төрөх нь дамжиггүй.

Ямар хүн байснаа, ямар алдаа хийдэг байснаа, танд тохиолдсон шударга бус зүйлс, туулж өнгөрүүлж байсан бэрхшээл зовлонгууд гээд энэ бүхэн таныг хойш чангаасаар байх албагүй. Би уураа захирч чаддаггүй. “Уур бухимдлаа барихад хэцүү” гэж өөрөө өөртөө хэлээд яваад байх хэрэггүй. Яагаад гэвэл, энэ бол хуучин та шүү дээ. Таны доторхыг Бурхан өөрчилж, таны дотор буй Түүний хүчээр та шинэчлэгдсэн. Та бол одоо Эзэний амар амгалан, баяр хөөрөөр дүүрэн хүн болсон. Энэ хүнийг хүлээж ав. Сайнмэдээний сайн мэдээнд бид итгэснээр энэ бүхэн эхлээд, Бурханы Үгийг судалснаар бид оюун санаагаа шинэчлэн өөрчилж, Христ дотор шинэ хүн болсон бодит байдал дотроо амьдарч эхэлдэг.

Шинэ хүн болсон гэдгээ ухаарах үед шинэ итгэл найдвар танд төрөх нь дамжиггүй.

“За, даа, би хэнд ч итгэж чадахгүй. Өмнө нь буруу хэвшил маягт баригдсан байсан болохоор эрүүл харилцаатай байж огт чадахгүй” эсвэл “Би сайн хүн биш” гэж өөрөө өөртөө үнэмшүүлэн, хохирогч сэтгэлгээндээ баригдаж амьдралаа үрэхийн оронд таны амьдралд ажиллаж буй Бурханы эдгээгч хүчийг хүлээж ав. Та одоо шинэ хүн болсон. Тэр таны шарх бүрийг эдгээж, алдсан бүхнийг сэргээж өгнө. Үнэндээ, танаас авагдсан зүйлсийг хоёр дахин илүүгээр Тэр танд ерөөл болгон (Исаиа 61:7-г унш) өгнө. Та өмнө нь шархалж зовсон бол үлдсэн амьдралынхаа туршид хохирогч мэтээр амьдрах ёстой юм биш. Тэр шарх зовлонгоо давж, ялагч, ялгуусан амьдралаар амьдарч чадна. Та Христ дотор шинэ хүч, шинэ итгэл найдвар дүүрэн шинэ бүтээл болсон. Өнгөрсөн амьдрал чинь таны ирээдүйн замналыг тодорхойлох албагүй гэдгийг санагтун!

Өдөр бүрийг өмнөхөөсөө илүү хүчирхэг болсноо мэдэрч итгэлтэйгээр туулан өнгөрөөж та чадна. Яагаад гэвэл, таны амьдралд Бурхан өдөр бүр агуу ажлаа хийж байна. Гэхдээ энэ бол та хүссэн бүхнээ гүйцэлдүүлж, одооноос

эхлээд ямар ч алдаагүйгээр бүх зүйлийг төгс хийнэ гэсэн үг биш. Харин одоо та шинэ найдвар өвөрлөж болно гэсэн үг. Тэр итгэл найдлага бол яг л Паул шигээр: “Би хэдийнээ олж авсандаа [төгс болсон] эсвэл хэдийнээ төгс болчихсондоо бус, харин Христ Есүст (Мессиад) юуны төлөө баригдсан, түүнийг л барьж авахын (зуурахын) тулд мөрддөг” (Филиппой 3:12) хэмээн тунхаглах урам зоргийг танд өгнө.

Өдөр бүрийг өмнөхөөсөө илүү хүчирхэг болсноо мэдэрч итгэлтэйгээр туулан өнгөрөөж та чадна. Яагаад гэвэл, таны амьдралд Бурхан өдөр бүр агуу ажлаа хийж байна.

“Би үүнийг хийж чадахгүй” эсвэл “Би үүнийг хийхгүй” юмуу “Би мундаг байж чадахгүй” гэсэн гутранги үгсийг өөртөө хэлэн дахин нэг өдрийг бүү үр. Энэ бүхэн таны хуучин хүнийг дүрсэлж болох юм, гэвч Христ дотор шинэ хүн болсон таныг дүрслэхгүй нь мэдээж. Та бол Бурханы хүүхэд. Та давуулан дийлэгч юм. Та сүүл биш толгой. Та Христ Есүс доторх Бурханы зөвт байдал. Энэ дэлхийд байгчаас таны дотор байгаа Тэр Нэгэн бол агуу билээ.

Шинэ хүн болсон танд өв бий

Та итгэгч болоод шинэ гэр бүлд орж ирсэн нь Бурханы гэр бүл билээ. Амьдралдаа туулж буй бэрхшээл зовлонг чинь ойлгодог, туулах замд чинь урам өгдөг Христ доторх ах эгч дүүс танд бий. Бас таныг хэзээ ч орхиж хаяхгүй тэнгэрлэг Эцэг чинь бий. Тэнгэрлэг Эцэгээсээ таны хүлээж авах олон ерөөлийн нэг нь өв залгамжлал билээ. Ефес 1:17-18-д (АМР) ингэж хэлжээ:

“Зүрхний чинь мэлмий гэрлээр дүүрэхэд та нарыг Тэр дуудсан тэрхүү найдварыг болоод ариун хүмүүс (Түүний тусгаарласан хүмүүс) дэх Түүний өвийн алдрын баялгийг та нар мэдэж, ойлгоно...”
(тодотгол нэмэв).

Христээр дамжуулан бидний хүн нэг бүрд өв өгөгдсөн билээ. Тийм учраас бид бол Бурханаас ямар нэг шан горилон, ямар нэг юм олж авахаар ажиллан зүтгэж буй хөлс авдаг зарц нар бишээ. Харин бид бол өв залгамжлагч нар, Түүний хүүхдүүд билээ. Христтэй хамтран залгамжлагчдын хувьд, Түүний олж авсан, бидний төлөө золисон бүхнийг бид хүлээж авдаг. Түүнийх байгаа бүхэн одоо биднийх болсон гэдгийг Библид (Иохан 16:15-ыг унш) өгүүлдэг.

Бурханаас ирэх өвтэй гэдгээ ухаарснаар аливааг харах хараа өөрчлөгдөнө. Асуудал бэрхшээлүүд урьдынх шиг том санагдахаа болино, гонсойлгож буй зүйлс чинь ч ач холбогдолтой байгаа болино, ирээдүй ч айж зүрхшээмээр санагдахаа болино. Танд хэрэгтэй бүхнийг Бурхан хэдийнээ хангаж өгсөн учраас та баяр хөөртэй, итгэл найдвараар дүүрэн байж чадна!

Бид сайн Бурханд үйлчилдэг бөгөөд таны амьдралд сайн сайхныг цутгахыг Тэр хүсдэг. Амьдрал ахуйгаа яаж залгуулна даа гэж өдөр бүр та санаа зовж явдаг бол, ажил албандаа тушаал ахихгүй нь гэж айдаг бол, араар чинь муулсан нэгэнд хорсож явдаг бол өвлөх өвтэй гэдгээ ойлгож байгаа хүүхэд шигээр амьдарч чадахгүй байгаа хэрэг. Санаа зовнил, айдас, хорсол бүгд л хуучин хүний чинь чанарууд. Харин шинэ хүн болсон та итгэж, өөртөө итгэлтэй байж, уучилж чадна. Яагаад гэвэл, амьдралд чинь тохиолдож буй ямар ч зүйлийг Бурхан сайнаар эргүүлж чадна гэдэгт та итгэдэг. Танд зориулаад сайн сайхан зүйлсийг Тэр хадгалсан байгаа гэдэгт итгэдэг. Таны оронд өөр хүн тушаал дэвшвэл танд зориулаад илүү дээр зүйлийг Бурхан бэлдсэн байгаа нь ойлгомжтой. Санаа зовж, сэтгэлээр унах хэрэггүй. Шинэ хүн болсон өөрийгөө хүлээж ав. Бурхан дотор агуу өвтэй гэдгээ ухаар. Танд Бурхан заах

Христтэй хамтран залгамжлагчдын хувьд, Түүний олж авсан, бидний төлөө золисон бүхнийг бид хүлээж авдаг. Түүнийх байгаа бүхэн одоо биднийх болсон гэдгийг Библид (Иохан 16:15-ыг унш) өгүүлдэг.

гэж байгаа зүйлсийн талаар, энэ нөхцөл байдалд танд хэрэгцээтэй бүхнийг Тэрээр хангаж өгнө гэдэгт итгэх найдвар өвөрлөгтүн. Хэн нэгэн нь таны талаар ямар нэг муу юм хэлэх аваас хорсон заныхын оронд үүнийг хэрхэн шийдэхийг нь Бурханаас асуу. Өмнө нь бол та шууд л тэвчээр алдран, тэр хүнийг загнаж зүхэх байсан биз. Гэхдээ тэр бол хуучин та шүү дээ. Тэр үеэс хойш таныг Бурхан маш хол авчраад байна. Түүний дотор өв танд бий. Ямар ч нөхцөл байдлыг Тэрээр сайн сайхан зүйл болгон эргүүлж чадна.

Илүү шинэ, бүр илүү том хүлээлт

Бид энэхүү номоо хүлээлтийн талаар ярьж эхэлсэн. Эхний хэсгийнхээ энэ бүлгийг төгсгөхдөө эдгээр хүлээлтүүдийг өндөрсгөж эхлэх урам зоригийг танд өгөхийг би хүсэж байна. Илүү өндөрт элин халин итгэл найдвар өвөрлө! Найдвар өвөрлөх тусам итгэлээрээ алхахад амархан болно. Эхний энэ таван бүлгээр таны итгэлийг Бурхан барьж босгоосой гэж би залбирсан. Тийм ч учраас Эзэн Бурханаас илүү ихийг хүсэн хүлээх цаг боллоо гэж бодож байна. Тэр танд маш их хайртай учраас таныг хэмжээлшгүйгээр ерөөхийг (Ефес 3:20-ийг унш) хүсдэг.

Хөл хүндтэй бүсгүйг төрөхөө “хүлээж байгаа” гэж ярьдаг. Бүсгүй хүлээж байгаа учраас хийх юмнуудаа төлөвлөж, амжуулж, хүүхдэдээ хэрэгтэй хувцас хунар, угж худалдаж авч, ор, өрөөг нь бэлтгэдэг. Бид ч гэсэн тэдэн шиг үйлдэл хийх хэрэгтэй. Өглөө босохдоо л бид Бурханы агуу ажил хийгдэх тийм л төлөвлөгөөнүүдийг гаргах хэрэгтэй. Бурханы тусламжтайгаар бид: *“Өнөөдөр л тэр өдөр байх. Энэ бол Эзэний бүтээсэн өдөр. Надад агуу сайхан зүйл тохиолдох гэж байна”* хэмээн бодож сэтгэж чадна. Таны гуйсан яг тэр зүйлийг Бурхан хийж өгөхгүй байлаа ч гэсэн хараагаа тэлэх гээд үз. Та нэгийг бодож байхад Бурхан илүү дээрийг бодож байгаа. Зүгээр нэг сайн сайхныг гуйх биш агуу зүйлсийн төлөө итгэж, найд.

Өглөө бүр сэрэнгүүтээ л: “Өнөөдөр ямар нэг гайхалтай юм надад тохиолдоно гэсэн баяр хөөртэй, итгэлтэй хүлээлт би өвөрлөнө. Хань ижил минь намайг ерөөнө. Хүүхдүүд минь хүмүүжилтэй сайн байна. Ажил төрөл дээрээ ч сайхан мэдээ би сонсох гэж байна. Хэн нэгнийг ивээх боломжийг надад Бурхан хайрлана. Шуудангаар ерөөл ирнэ. Өнөөдөр би чөлөөлөлт авна” гэж тунхаглагтун. Нүдээ нээсэн мөчөөсөө л тухайн өдрийг ерөөж, итгэж, найдахаасаа бүү ай. Би энэ номыг “Аз жаргалын ном” гэж нэрлэдэг билээ. Үүнийг уншсан хүн урьдынхаасаа жаргалтай, баяр хөөртэй болно гэж би итгэсэн юм. Найдвар гэдэг бол ямар нэг сайн сайхан зүйл болох гэж байна гэсэн баяр хөөртэй, итгэлтэй хүлээлт билээ!

*Өглөө босохдоо
л бид Бурханы
агуу ажил
хийгдэх тийм л
төлөвлөгөөнүүдийг
гаргах хэрэгтэй.*

Хүлээлтийн хязгаарлагдмал талыг найдвар арчин зайлуулдаг. Та Эзэнээс багыг хүлээж байна уу, ихийг хүлээж байна уу? Бурхан ямар нэг сайн сайхан юм хийнэ гэдэгт найдахад та ойрхон байж болох юм. Ямар нэг сайн сайхан зүйл болно гэдэгт та хагас хугас итгэж байгаа бол урьд хожид байгаагүй агуу зүйлсийн төлөө бүрэн дүүрнээр, чин сэтгэлээсээ итгэгтүн гэж таныг би уриалах байна. Таныг илүү агуу арга замуудаар Бурхан ашиглаж чадна гэдэгт итгээсэй гэж таныг би уриалж байна. Та дуу зохиодог бол, урьд нь бичигдэж байгаагүй агуу сайхан дууг Бурхан танд өгч чадахгүй гэж үү? Та Үгийг номлодог бол номлох бүрд олзлогдогсдыг чөлөөлдөг тийм хүчтэй, агуу гайхалтай үгийг танд Бурхан өгч чадахгүй гэж үү? Та үр хүүхдүүдээ өсгөж байгаа бол, таны хүүхдүүд дэлхийг өөрчлөх агуу хүмүүс болон өсөн торниж яагаад болохгүй гэж? Та яагаад ажил албандаа дэвшиж чадахгүй гэж? Та яагаад гэрлэх хүнтэйгээ учирч, гайхалтай агуугаар амьдарч болохгүй гэж? Сэтгэлийн шархаа та яагаад ялан дийлж чадахгүй гэж? Эргэн тойрондоо байгаа хүмүүсийн амьдралд та яагаад өөрчлөлт гаргаж чадахгүй

*Хэрвээ хэн нэгэнд
ямар нэг сайн зүйл
тохиолдож болох юм
бол тэр нь та байг!*

гэж? Хүлээлт найдлагаар дүүрэн шинэ төвшинд амьдарч эхэлцгээх цаг болжээ. Хэрвээ хэн нэгэнд ямар нэг сайн зүйл тохиолдож болох юм бол тэр нь та байг гэдэгт итгэгтүн!

Найдвар өвөрлөгтүн!

Та өнөөдөр толинд харахдаа таныг Бурхан яаж харж байгаагаар өөрийгөө олж хараасай гэж би найдаж байна. Та бол төөрсөн, эвдэрсэн, ялагдсан, аргаа барсан хүн биш ээ. Та бодол санаагаа, сэтгэл хөдлөлөө захирч чадахгүй, өнгөрсөнд амссан зовлон шархнаасаа эдгэрч чадахгүй хүн ч биш ээ. Та бол энэ бүхнээс хавьгүй илүү нэгэн! Та бол давуулан дийлэгч (Ром 8:37-г унш) билээ. Та бол Христ дотор шинэ бүтээл, таны амьдралд Бурхан ажлаа хийж байгаа. Таныг Бурхан бага багаар, өдөр өдрөөр өөрчилж байна. Та давуулан дийлэгч тул өмнө байснаасаа өөрөөр амьдарч чадна. Энэ үнэнд итгэгтүн! Урагш алхаж, найдвар өвөрлөгтүн!

ХЭСЭГ II

ШАНАЛАН ЗОВЖ БАЙСАН Ч НАЙДВАР ӨВӨРЛӨ

....

*“Энэхүү найдвар [одоо] бидэнд сэтгэлийн зангуу
мэт бөгөөд найдвартай хөдөлгөөнгүй...”*

Еврей 6:19

Бидэнд итгэл найдвар үргэлжид хэрэгтэй. Тэр тусмаа шаналан зовж байгаа үед. Аливаа төрлийн бэрхшээл зовлон дунд, амьдрал хэцүү байхад найдвар улам л барин тавим санагдана. Гэвч урамгүй, дарамттай, итгэл найдваргүй байгаадаа “Би хэцүү бэрх юм туулж байгаа болохоор” гэдэг шалтгаан ашиглахгүй байх нь чухал юм.

Хэдийгээр энэ илүү хэцүү байх ч зовлон бэрхшээлтэй үедээ илүү их итгэл найдвар тээх нь бүр ч чухал. Бэрхшээл зовлондоо шаналж гацахыг маань харах биш зовлонгоо давж гарахад маань туслахыг Бурхан хүсэж байгаа.

Гарз хохирол, хагацал зовлон учрахад үүнийгээ даван туулж, ингэх явцдаа өөрсдийгөө харин алдахгүй байцгаая. Гай зовлон ирэхэд, бүхий л амьдралыг маань эмгэнэл болгон хувиргах чадалтай гашуудал шаналалд зай тавьж өгөх биш зүй ёсоор нь гашуудан шаналаад өнгөрье. Сэтгэл гонсойсон үедээ сэтгэлээ засаж сурцгаая. Дарамт шаналалд автсан үедээ өөдөө дээш ширтэн харцгаая. Яагаад гэвэл, толгойгоо өөдөө байлгаснаар сэтгэл санаа уужирдаг шүү дээ!

Эзэн Есүстэй холбоотой бүх зүйл өөдөө дээшээ байдаг! Тэр дээрээс, диваажингаас ирсэн. Тэр энд ажлаа дуусгаад дээшээ тэнгэр өөд буцсан. Тэр үүлсийн дээр дахин ирж, нүд болгон Түүнийг харна гэдэг амлалт бидэнд өгөгдсөн. Толгойг минь, сэтгэл, сүнс, амьдралыг минь тэр өндийлгөж өргөдөг. Нөгөөтэйгүүр, Люцифер, Сатан, агуу худалч, диавол гэж нэрлэгддэг дайсан бидэнд бий бөгөөд түүний өгөхийг санал болгодог бүхэн доош татаж, унагахаар чангаадаг зүйлс байдаг. Сэтгэлийн дарамт, урам зориггүй байдал, нурмайлт, өвчин, цөхрөл, гуниг гутрал, салалт, үхэл гэх мэтийг тэр өгөхөөр санал болгодог.

Итгэл найдваргүй нурамгар байдал дээр би дайн зарлаж байна. Үүний эсрэг тулаанд надтай нэгдэхийг танаас хүсье. Хаа яваа газартаа итгэл найдварыг цацруулан түгээгч нар байх тууштай шийдвэр бид бүгдээрээ гаргах аваас дэлхий даяараа хэрэгтэй байгаа, асуудлыг шийдэх шийдлийн нэгээхэн хэсэг нь бид байж чадна.

ЗУРГАДУГААР БҮЛЭГ

Өөдөө дээшээ харагтун!

*“Би харцаа уулс өөд өргөнө.
Надад хаанаас тусламж ирэх вэ?
Тэнгэр ба газрыг бүтээсэн Эзэнээс
надад тусламж ирдэг”.*

Дуулал 121:1-2 (NKJV)

*“Найдвар бол
Сэтгэлд мартагдахгүйгээр суудаг
Үггүйгээр хөг аялгуу дуулдаг
Хэзээ ч үл зогсдог
Өд сөдтэй далавч мэт ээ”.*

—Эмили Дикинсон

Амрах боломж гарахаар би кино үзэх дуртай. Дэйв бид хоёр аялж аялчихаад гэртээ ирэхдээ түшлэгтэй сандлаа налаад, нохойгоо өвөр дээрээ авч тухтайхан суугаад сайхан кино үзэнгээ амрахыг хүсдэг. Та ч бас тэгдэг байх. Сайхан кино үзэх цаанаа л таатай байдаг шүү дээ.

Ямар төрлийн кинонд дуртайгаас үл хамаараад (би сонгодог юмуу адал явдалт кинонд дуртай л даа), нэг үзэгдлийг бүгдээрээ л янз бүрийн үйл явдалтайгаар үзсэн байдаг. Адал явдалт, тулаантай, гэмт хэрэгтэй, дайнтай, тэр ч байтугай хайр дурлалын романтик кинонд дээр хүртэл холливүүдийнхэн ийм зүйл оруулахдаа гарамгай. “Өндрөөс айх айдастай” холбоотой үзэгдлийн тухай би яриад байгаа юм л

даа. Тийм үзэгдэлтэй кино та үзсэн л биз дээ? Магадгүй, үйл явдал нь ялгаатай ч тулгарч байгаа гол асуудал нь нэг зүйл буюу ӨНДӨР! Гол дүрийн баатар өндөр хадны ирмэг дээр өлмий дээрээ арай ядан тогтоно. Эсвэл дэнжигнэн ядаж буй гүүрэн дээгүүр бөөн юм болж гарна, эсвэл хотын өндөр цамхаг руу их л зовууртай авирна. Гайтай зүйл заавал болох нь гарцаагүй харагдана. Энэ бүх үзэгдэл дээр гол баатар маань асар өндөрт гарсан байх бөгөөд хүчтэй салхинд цохигдож, нэг хоёр удаа хөл алдах шахна. Тэр болгонд киноны хөгжим түгшүүртэйгээр чангарч, намсана... би маш их сандардаг болохоор ийм үзэгдлийг бараг л харж чаддаггүй!

Миний үзсэн шиг олон удаа ийм үзэгдлийг та үзсэн бол яг ийм нөхцөл байдал дунд хэн нэг нь заавал энэ ухаалаг үгийг хэлдэг. Гол дүр юмуу дүрүүд хадны хамгийн нарийхан ирмэгээр явахад, гүүрний хамгийн эгзэгтэй хэсгээр өнгөрөхөд, эсвэл уулын хамгийн аюултай хавцлаар авирахад нэг нь заавал ингэж хэлдэг: “Юу ч болж байсан доошоо бүү хар!” Зөв зөвлөгөө байгаа биз дээ? Анхаарлаа төвлөрүүлээд, яг явж байгаа газраа л хар, урагшлаад л бай, *доошоо битгий хар*. Гэвч яагаад ч юм дуртай киноны маань баатрууд энэ үгийг сонсох нь ховор. Шууд л тааж болохоор. Ийм үг сонсонгуутаа хийдэг анхны зүйл нь тэд доошоо хардаг. Тэгээд яг л нэгэн адил үр дүнд хүрнэ. Цочирдож сандарна.

Та энэ зарчмыг өнөөгийн амьдралдаа холбон хэрэгжүүлж болох юм. Яг одоо та газрын гадаргаас олон мянган метрийн өндөрт биш (тийм биш байгаа байх аа гэж би найдаж байна) байна л даа. Гэвч санхүүгийн бэрхшээл гэдэг хавцлын ирмэгээр явж байж болох юм. Юу юугүй л хальтраад уначих гэж байгаа юм шиг санагдаж байгаа байх. Эсвэл яйжигнасан гүүр шиг савлаж байгаа дэнжигнэсэн харилцаан дунд ч байж болох юм. Яг л

Юу ч хийж байсан доошоо бүү хар.

хэзээ мөдгүй нурж унах гэж байгаа юм шиг. Эсвэл маш өндөр саад бэрхшээл рүү сандарч тэвдэн, айж мэгдсээр авирах гэж оролдож байж ч мэднэ. Хэрэв байдал ийм байгаа бол,

та өнөөдөр шаналал зовлон туулж байгаа бол би танд дээрхтэй төстэй зөвлөгөө өгье. Юу ч хийж байсан доошоо бүү хар.

Хүнд нөхцөл байдал дунд байгаа хэрнээ ихэнх хүмүүс буруу зүйл рүү хараагаа чиглүүлдэг учраас би “доошоо битгий хараарай” гэж хэлж байгаа юм. Тэд бэрхшээл зовлонгийнхоо хэмжээг, нүүр тулж байгаа эрсдэлээ, бусдын хэлэх таагүй, сөрөг зүйлийг, өмнө нь амссан шаналал зовлонгоо, эрүүл бус мэдрэмж, сэтгэл хөдлөлөө, эсвэл алдаа гаргахаас айх айдсаа гол зүйл болгон хардаг. Тэд бол бүгдээрээ “доор” байгаа зүйлс. Тийшээ харлаа гээд авирахад чинь ямар ч тус болохгүй.

Харин тусламж хэрэгцээтэй үед илүү дээр сонголт байдгийг Библи бидэнд хэлдэг. Бидэнд хэрэг тус хүргэхгүй зүйлсийг харж байхын оронд өөдөө дээшээ хар гэж Бурханы Үг бидэнд айлджээ. Бидэнд үргэлж тусалдаг Нэгэнийг анхааран хар. Еврей 12:2-т (NKJV) хэлэхдээ: “...бидний итгэлийг зохиогч бөгөөд төгсгөгч болох Есүс өөд харцгаая...” мөн түүнчлэн Исаиа 45:22-т: “Би Бурхан, Надаас өөр Бурхан байхгүй тул дэлхийн бүх хязгаар аа, Над өөд эргэж аврагдагтун” хэмээн айлджээ. Давид хаан ч бас гамшиг зовлонг туулахдаа дээд тэнгэр өөд ханддаг байжээ. Яагаад гэвэл, дээрээс түүнд тусламж ирдэг гэдгийг тэр мэддэг байв. Таныг ч бас ингээсэй гэж уриалъя. Хэрвээ та ямар нэг бэрхшээл зовлонг туулж, юу хийхээ, хаашаа явахаа, бүр хаашаа харахаа ч мэдэхгүй байгаа бол... зүгээр л өөдөө хар. Эзэнийг хар. Тэр бол танд тусалж чадах Нэгэн, таныг аварч чадах Нэгэн. Тэр таныг унагаахгүй Нэгэн. “Та нарын золилт айсуу тул тэргүүнээ өргө” гэж Есүс (Лук 21:28-ыг унш) айлджээ. Доошоо харлаа гээд тэнд бидний золилт байхгүй ээ. Харин өөрсдийг маань золин авна гэсэн хүлээлттэйгээр бид Бурхан өөд дээшээ харах учиртай.

“Өөдөө дээшээ хар” гэдэг нь зүгээр нэг тэнгэр өөд өлийн ширтэхийг хэлээгүй. Энэ бол найдвар өвөрлөсөн хандлагаар,

Хэрвээ та ямар нэг бэрхшээл зовлонг туулж, юу хийхээ, хаашаа явахаа, бүр хаашаа харахаа ч мэдэхгүй байгаа бол... зүгээр л өөдөө хар.

зерэг үзэл бодол тээж, сайн сайхныг хүлээн харна гэсэн үг. Бурхан бол сайн бөгөөд бидний төлөө үргэлжид сайн сайхныг төлөвлөж байдаг.

Бурханы байрыг өөр юу ч эзлэх ёсгүй

Нөхцөл байдал тодорхой биш үед бид хүмүүс рүү юмуу ямар нэг зүйл рүү харах нь олонтаа. Үүнийг ойлгож болох ч ихэнхдээ энэ нь үр нөлөөгүй байдаг. Хэдийгээр бид Бурханд итгэх ёстой гэдгээ мэддэг ч, бидэнд Бурхан хайртай, бидэнд зориулсан төлөвлөгөө Түүнд бий гэдэгт итгэдэг ч гарт баригдахуйц ямар нэг зүйлээс зуурах гэсэн төрөлх уруу татлага бидэнд ирдэг. Нэг ёсондоо нүдээр харагдахуйц зүйлээс зуурах гэсэн хүсэл юм. Угтаа бол бид Бурханыг харж чадна. Гэхдээ бид итгэлийн нүдээр л Түүнийг харах ёстой. Бид Түүнийг зүрх сэтгэлээрээ харж, итгэл найдвараа үргэлжид Түүн дээр тавих ёстой.

Дэлхийн улс орнуудаар аялж, хүмүүст үйлчилж, тэдний төлөө залбирч, бэрхшээл зовлонгоо давахад нь тусалж байхад ажиглагдсан нэг зүйл бол хүмүүс зовлон туулах үедээ Бурхан өөд харъя гэж бодохоосоо урьтаад хараагаа чиглүүлдэг зүйл нь маш олон байдаг ажээ. Нийтлэг жишээнүүдээс хэдийг энд дурдъя.

Найз нөхдөө харах

Шаналал зовлонгоо уудлан итгэж ярьж, тусламж авахаар хандах найз нөхөдтэй, тэр тусмаа тантай хамт залбирч, сэтгэлийн дэм хайрлах итгэгч найз нөхөдтэй байна гэдэг сайхан зүйл мөн. Гэвч найз нөхдөд чинь таны асуудал бэрхшээлийн бүх хариулт байхгүй шүү дээ. Хэдийгээр тэд таны төлөө сайныг хүсэх авч Бурханы Үгтэй нийцэхгүй зөвлөгөө танд өгөх аваас таныг буруу чигт хандуулчихаж мэднэ. Найз нөхөд маань биднийг өрөвдөн хайрлах ч бидний сонсох ёстой зүйлийг үнэнээр нь хэлэхийг хүсэхгүй л болов уу. Өөрийгөө өрөвдөж суухаа болих хэрэгтэйг минь Дэйв надад нэг удаа

хэлснийг би санаж байна. Ингэж хэлсэнд нь дургүй хүрч, түүнд би уурлаж байлаа. Гэвч тэр үнэнийг хэлсэн, яг ийм үг би сонсох ёстой байсан. Дэйв надад жинхэнээсээ хайртай тул сонсохыг хүссэн биш, сонсох хэрэгтэй үгийг минь л хэлж шүү дээ. Тухайн хүндээ сонсох зайлшгүй хэрэгтэй үгийг нь хэлэхийн оронд найзууд нь өрөвдөж тусалсаар амьдралын буруу хэвшлээсээ салж чадахгүй, гацахад нь нөлөөлж байсан тийм нөхцөл байдлуудыг би харж байсан.

Хүнд хэцүү цагт найз нөхдөө найдан түшиж, туслалцаа дэмжлэг авах нь буруу юм биш боловч таны амьдралд Бурханы байх ёстой байранд найз нөхдөө оруулж болохгүй. Тиймээс шаналал зовлон дундаа юуны түрүүнд Эзэн өөд оч. Тухайн нөхцөл байдалдаа Бурханы чиглүүлгийг эрэлхийл. Эзэний Үгийг унших цаг гаргаж, Эзэнийг эрэлхийлэн залбирсныхаа дараа найз нөхөд рүүгээ хандаж, танд Бурхан юу гэж хэлж байгаа талаар тэдэнтэйгээ хуваалцаж болох юм. Найз нөхөд чинь бол таны л адил хүн гэдгийг санаарай. Танд туслах чадал нь ч хэмжээ хязгаартай. Та зөвхөн л тэдэндээ найдан түших аваас сэтгэл гонсойж хоцроход хүрнэ.

Хань ижлээ харах

Гэрлээд тун ч удаагүй байхдаа миний ойлгож авсан зүйлсийн нэг нь Дэйвийг аз жаргалынхаа эх ундарга мэтээр үзэж түүнээс хамаарч болохгүй юм байна гэсэн ойлголт байлаа. Тэр бол Бурханы байх ёстой байр байв. Хань ижил маань биш харин Бурхан л бидний баяр баяслын эх ундарга (Дуулал 43:4-ийг унш) билээ.

Дэйв өглөөг надтай хамт өнгөрүүлэхийн оронд гольф тоглохоор юмуу сагсан бөмбөгийн тэмцээн үзэхээр явчихлаар би маш их гуньж бухимддаг байсан үеэ санадаг. Үнэндээ Дэйв намайг тоогоогүйдээ тэгдэг байсан юм биш л дээ. Тэр бол маш халамжтай сайн нөхөр бөгөөд надтай хамт цагийг өнгөрүүлэхдээ дуртай байсан. Гэвч би л түүнийг цаг үргэлж дэргэдээ байлгах гэдэг байжээ. Дэйв л намайг аз жаргалтай, сэтгэл хангалуун байлгах ёстой гэж би харж байсан учраас

бухимддаг байсан юм. Нөхөр дэргэд минь л байж байвал сэтгэл амар, тайван байх юм шиг надад санагддаг байж. Гэвч зөвхөн Бурхан л хийж чадах зүйлийг хийлгэхээр бид хэн нэгийг (хань ижлээ ч гэсэн) харж байгаа л бол өөрсдөө сэтгэл санаагаар унахад хүрнэ гэдгийг Эзэн надад харуулсан билээ.

Надад зөвхөн Бурхан л өгч чадах зүйлсийг Дэйвээс хүчээр олж авах гэхээ болих тэрхэн мөчөөс л би амьдралдаа... гэр бүлийн харилцаандаа цоо шинэ амар амгалан, баяр баяслыг олж авсан. Бухимдах юм гарлаа гэхэд, ярилцах хүн хэрэгтэй байвал Дэйв намайг түшиж тулж, сэтгэлийн дэм хайрлахаар үргэлж л дэргэд минь байдаг боловч бүх нөхцөл байдалд бидэнд хэрэгтэй бүх зүйлийг зөвхөн Бурхан л хангаж өгч чаддаг гэдгийг тэр минь ч, би ч одоо мэддэг болсон.

Өөртөө найдах

Амьдралын хатуу хөтүүг туулах үедээ хүн бүр л: “Би өөрөө л өөрийгөө бодох ёстой юм байна” гэж бодох хандлагатай байдаг. Бага байх үеэс л хажууд байж туслах хүн байгаагүй болохоор өөрөө л өөрийгөө аваад явах шаардлагатай байснаас ийм бодолтой болох нь бий. Гэвч өөрөө хүчтэй хүн болохоороо, эсвэл авьяас чадалдаа эрдээд, эсвэл өөрийнхөө чадвараар иймэрхүү бөглөрлөөс гарчихна гэж итгэх нь илүү амархан байдгаас ч болдог байж болно.

Та энэ амьдралыг орь ганцаараа туулахаар заяагдсан юм биш ээ. Өөрийнхөө хүчээр яаж ч хичээгээд барахгүй үе гэж амьдралд олон тулгарна. Зөвхөн Бурханы хүчээр л туулж гарч чадах нөхцөл байдлууд таны амьдралд учирна. Одоо харин Бурхан өөд харж сураарай гэж танд зөвлөе. Заавал илүү том саад бэрхшээл тулгаруулж байж, заавал гүн шаналал амсаж байж цөхрөнгөө бараад Түүн рүү хандах албагүй шүү дээ. Харин өглөө сэрэнгүүтээ л: “Эзэн, өнөөдөр би Танд итгэж байна. Надад хайрлагдсан авьяас билиг, чадваруудын төлөө Танд талархъя. Би

Зөвхөн Бурханы хүчээр л туулж гарч чадах нөхцөл байдлууд таны амьдралд учирна.

өөрийнхөө ойлголтод түшиглэхгүй ээ. Би Танд түшиглэнэ. Давуулан дийлж, ялалттай амьдрахад минь өнөөдөр надад шаардагдах мэргэн ухаан, чиглүүлэг, ивээл нигүүлслийг хайрлаач!” хэмээн залбирал тунхагладаг зуршилтай бологтун.

Сайн найз нөхөдтэй байх гайхалтай, бурханлаг хань ижилтэй байх ч гайхамшигтай, Бурханаар өгөгдсөн авьяас билиг, чадваруудаа олж харах ч чухал боловч эдгээрийн аль нь ч таны амьдралд эзлэх ёстой Бурханы байр суурийг бүү булааг. Дуулал 37:39-д: “Зөвтийн [үргэлж зөвт байдаг] аврал Эзэнээс ирнэ. Тэрээр зовлон шаналангийн цагт хүч чадал нь буюу” гэжээ. Эзэн бол бидний хоргодох газар, бат цайз билээ. Өөр хэн ч биш ээ. Тиймээс ч хэцүү бэрх цагт хүмүүс рүү биш Эзэн өөд харахдаа бид итгэл найдвараар дүүрдэг юм.

Хэн нэг нь таныг гонсойлгож, сэтгэлээр унахад хүргэв үү? Үүнээс болж уурлаж, хорсож байна уу? Хэрэгцээгээ хангуулахын тулд Бурханд хандахын оронд тэр хүнд хандсан нь өөрийн чинь буруу байсан гэж та хэзээ нэг цагт бодож байв уу? Би хатуурхсандаа ингэж хэлээгүй юм шүү. Эсвэл сэтгэл чинь өвдсөнийг өрөвдөж ойлгоогүйдээ ч биш. Ер нь сонсох шаардлагатай үнэнг сонсоход эхэндээ маш өвдөлттэй байдаг нь олонтаа байдаг. Хэрвээ бид Бурханд биш харин хүмүүст итгэл найдвараа өгч, тэднийг илүү түшдэг бол тэдний сул талуудыг Тэр илчилж, сэтгэлийг минь гонсойлгох боломжийг тэдэнд олгоно. Ингэснээрээ бид эцсийн эцэст Түүн рүү эргэх болно. Үүнийг сонсоход таатай санагдахгүй байж болох ч үнэн биднийг чөлөөлдөг юм шүү!

Шуургыг тоолгүй Есүс дээр анхаарлаа төвлөрүүлэгтүн

Матай 14:24-33-т нэгэн гайхалтай сэтгэл хөдлөм дүр зураг дүрслэгджээ. Шавь нар шөнөөр Галил нуурыг гатлахаар явж байтал догшин шуурга дэгджээ. Хэрвээ шуурган дунд завин дээр амиа авч гарч чадах хүмүүс байдаг гэвэл тэр нь Петр болон шавь нар байх байсан. Үнэндээ тэд бол туршлагатай

загасчид байсан шүү дээ. Анх удаагаа ч шуурганд дайрагдаж байгаа биш. Гэвч энэ шуурга тэдний үзэж туулснаас илүү догшин ширүүн, хүчтэй шуурга байлаа.

Та иймэрхүү нөхцөл байдалд орж байв уу? Тухайн нөхцөл байдлыг даваад гарч чадна гэж бодож байтал энэ шуурга өмнөхөөсөө өөр гэдэг нь илэрхий болж байв уу? Шавь нарт ийм л зүйл тохиолджээ. Тэд энэ шуурганаас өөрсдийгөө аварч гарч чадахааргүй тийм шуурга байв.

Шавь нарт тусламж хэрэгтэйг хараад, Есүс “нууран дээгүүр алхан тэднийг зүглэн ирж явав” (ишлэл 25) гэсэн байдаг.

Таныг аврахад саад болж чадахаар хүчтэй шуурга гэж Бурханы хувьд байдаггүй ажээ.

Яг энэ хэсгийг Библид аядуу зөөлнөөр бичсэнд би дуртай. Энд бүдүүн бийрээр, том үсгээр бичээгүй. Энэ өгүүлбэрийн төгсгөлд анхаарлын тэмдэг ч тавьсангүй. Есүс усан дээгүүр алхсан. Үүнд бид гайхан балмагдах учиргүй аж. Биднийг зовж байх үед Тэр шаардлагатай бүхнийг хийж чадна, хийх ч болно гэдгээ

Бурхан хэлж байгаа мэт. Таныг аврахад саад болж чадахаар хүчтэй шуурга гэж Бурханы хувьд байдаггүй ажээ.

Есүс завь руу хүрч ирэхэд шавь нар айж сандрав. Есүсийг хий үзэгдэл гэж бодож л дээ. Харин Петр: “Эзэн, хэрэв Та мөн юм бол усан дээгүүр алхаж, Тан дээр очихыг надад тушаагаач” (ишлэл 28) гэв. Есүс: “Ир” гэж хэлэхэд Петр завинаасаа гарч, гайхамшгаар усан дээгүүр алхав. Петр үүнийг өөрийн хүчээр хийсэнгүй (усан дээгүүр алхах хүч түүнд байгаагүй нь ойлгомжтой), бас Петр бусад дагалдагч нарын тусламжтайгаар ч үүнийг хийсэнгүй (давалгаан дээ-гүүр тэнцвэрээ олж ямар хурдтай явах талаар шаардлагатай зөвлөгөөг тэд өгөөгүй). Эзэн л үүнийг хийж чадах байв. Петрийн цор ганц найдвар нь Эзэн байсан.

Петр Есүс рүү чиглэн алхахдаа таны, бас миний олонтаа хийдэг тэр л зүйлийг хийсэн. Эзэнээс тэр хараагаа салгаж, доошоо харав. Давалгааг хараад, шуургыг анхаарч эхлэв. “Есүстэй хамт би усан дээгүүр алхаж байна! Ямар гайхалтай

вэ! Миний амьдралд Бурханы хийж өгөх зүйлсэд ямар ч хэмжээ хязгаар гэж байхгүй юм байна!” гэж бодохын оронд, “Би живчихвэл яана аа? Ингэж алхах чинь боломжгүй шүү дээ? Есүс намайг аврах юм болов уу даа?” гэж Петр бодож эхэлсэн. Өөрт өгөгдсөн амлалт өөдөө харахын оронд асуудал бэрхшээл рүүгээ доош харахлаар л ийм юм болдог. Анхаарлын тэмдэг асуултын тэмдэг болж хувирдаг. Итгэл айдас болон хувирдаг. Тэгээд л живж эхэлнэ. Гэвч итгэл маань сул үед ч бидэнд тусалдаг Аврагч бидэнд байдагт талархана. Есүс Петр рүү хүрч очоод, аварсан. Шавь нар түүнийг авраагүй. Есүс аварсан билээ.

Энэ түүх бол таны амьдралд салхи шуурга ирэхэд яг юу болдгийг маш оновчтойгоор зураглан харуулна. Гэхдээ шуурга хичнээн хүчтэй байсан ч, Бурханы хувьд дийлдэхээргүй хүчтэй биш ээ. Тэр таныг яг хаана байгааг чинь хардаг, таныг аврахаар ирдэг. Өнөөдөр танд зовлон бэрхшээл байгаа бол Бурханыг эрэн хайж эхлэгтүн. Есүсийг хүрч ирэхэд нь гайхан цочирдсон шавь нар шиг бүү байгаарай. Харин ч үйл явдлын дунд Бурхан гарч ирнэ, Тэр хожимдохгүй бөгөөд шуургыг намдаана гэдгийг баяртайгаар хүлээгтүн!

*Харин ч үйл
явдлын дунд
Бурхан гарч ирнэ,
Тэр хожимдохгүй
бөгөөд шуургыг
намдаана гэдгийг
баяртайгаар
хүлээгтүн!*

Та Түүн рүү харж байгаа л бол амь амьдралыг чинь устгахаар аюул занал болж байгаа зүйлсийн дээгүүр та алхаж чадна. Есүсийг анхааран харж байгаа тул та амар амгалан, баяр хөөртэй, сэтгэл хангалуун, аз жаргалтай амьдарч чадна. Харин сөрөг муу мэдээ, айдас зовнил, бусдын санаа бодол, дайсны заль мэх, худал хуурмаг гээд янз бүрийн давалгаа руу харах тэрхэн мөчдөө тэдгээрээс болж живнэ. Нүүр нүдгүй салхи шуурган дунд, амьдралын чинь бүх зүйл дайвалзан ганхаж, нурж унах гэж буй мэт санагдаж байлаа ч Эзэн өөд хар. Дайвалзаж ганхахгүй цор ганц Нэгэн бол Тэр билээ.

Үргэлж түшиж тулж болох ганц зүйл

Таныг гонсойлт, цөхрөл, дарамтаар дүүрэн биш итгэл найдвараар дүүрэн байгаасай гэж Бурхан хүсдэг. Библийн Ром номын 5:5-д, Бурханыг итгэл найдвараа болгосон хүмүүс хэзээ ч гонсойхгүй бөгөөд хэзээ ч ичгүүрт орохгүй гэсэн байдаг. Хөөх! Бодоод үз л дээ. Найз нөхдөдөө найдахад сэтгэл гонсойдог. Банкинд байгаа мөнгөндөө итгэл найдвар тавихад сэтгэл гонсойно. Улс төрчдөд итгэл найдвараа тавихад урам хугарч, сэтгэл гонсойдог. Ажил төрөлдөө найдвараа тавилаа гээд сэтгэл гонсойдог. Харин Бурханд итгэл найдвараа өгвөл та хэзээ ч сэтгэл гонсойхгүй ээ. Хэдийгээр тухайн үедээ ойлгож чадахгүй зүйлсийг та туулан гарч болох ч, тэр бүхнийг эцэст нь Тэр сайнаар эргүүлдэг.

Танд итгэл найдвар байгаа л бол боломж байна гэсэн үг. Яагаад гэвэл, Бурханаас бусад бүх зүйл хувирч өөрчлөгддөг билээ. Танд ямар ч муу мэдээ ирсэн хамаагүй: “*За яах вэ, энэ зүйл өөрчлөгдөнө*” гэж юуны түрүүнд бодох нь зүйтэй. Санхүү мөнгөний байдал өөрчлөгддөг, үр хүүхдүүд өсөн өөрчлөгддөг, дарга даамал өөрчлөгддөг, нөхцөл байдал өөрчлөгддөг. Харин Бурхан өөрчлөгддөггүй. Бурхан бол хад. Тэр хувиршгүй, өөрчлөгдөшгүй. Малахи 3:6-д: “Эзэн Би өөрчлөгдөшгүй” хэмээн айлдсан байдаг. Хүмүүс өөрчлөгдөн хувирдаг, цаг агаарын байдал өөрчлөгддөг, нөхцөл байдал өөрчлөгддөг, санаа бодол өөрчлөгддөг, ааш авир хуйсганаж өөрчлөгддөг, шийдвэр зориулалт өөрчлөгддөг, ажил төрөл өөрчлөгддөг, сургууль соёл ч өөрчлөгддөг. Яг үүнд бид дасан зохицдог ч байж болох юм. Гэхдээ аливаа зүйлс хувирч өөрчлөгдөж байх болно гэдэг бол энэ дэлхийн талаарх бидний итгэж болох ганц үнэн. Тийм ч болохоор бид Эзэнд итгэл найдвараа тавьж, Хадан дээр амьдралаа барьж байгуулах нь чухал. Тэр бол хэзээ ч хувиршгүй Нэгэн гэдгийг мэдэж, Бурханыг өөрт хэрэгтэй бүх зүйлийнхээ гол эх сурвалж болгож байгаа л бол өөрчлөгдөн хувирдаг аливаа зүйлийг та давж гарч чадна. Яагаад гэвэл, таны амьдралын үндэс суурь Бурхан юм.

Заавал үүрэх албагүй сэтгэл санааны асар их шаналал зовлонг бид тээж явдаг. Харин Бурханд найдвараа тавьж, зөвхөн Бурхан л хийж өгч чадах зүйлийг өөр бусдаас хүлээхээ болих юм бол тэгэхгүй ээ.

Найдвар өвөрлөгтүн!

Өдөр бүр таатай сайхан байх албагүй, шуурга болгоныг ч мэдээгээр зарлахгүй. Толгой өвтгөсөн, зүрх сэтгэл шаналгасан зүйл байж л байна. Нэг өдөр ийм байгаад өнгөрөх юмуу олон өдөр үргэлжилж ч болно. Гэвч танд ямар ч зовлон учирсан бай, **ӨӨДӨӨ ДЭЭШЭЭ ХАРАГТУН** хэмээн таныг урамшуулахыг би хүсэж байна. Таагүй нөхцөл байдлууд дээр, таныг эсэргүүцэж буй бусдын үгэнд, эсвэл айдас төрүүлсэн бодлуудад анхаарлаа бүү хандуул.

Өөдөө дээшээ харах аваас итгэл найдвар дахин төрнө. Салхи шуурга хүчтэй байж болох ч Бурханаас илүү хүчтэй биш ээ. Таны хийх ёстой зүйл бол зөвхөн Есүс рүү харж, танд хүрэхийн тулд шаардлагатай бүхнийг Тэр хийнэ гэдэгт, усан дээгүүр ч алхана гэдэгт итгэгтүн. Урагш алхаж, найдвар өвөрлөгтүн! Үүнийг даван туулсныхаа дараа та урьдынхаасаа хүчирхэг болсон байх болно. Есүс дээр хараагаа төвлөрүүлж, эерэг хандлага тээж, урагш алхсаар, юу ч хийж байлаа гэсэн... доош бүү хар.

ДОЛДУГААР БҮЛЭГ

Бэрхшээлээ биш ерөөлөө тоологтун!

*“Сэтгэл минь ээ, Эзэнийг магтагтун
Түүний ач тусыг бүгдийг нь бүү март...”*
Дуулал 103:2 (NIV)

“Харанхуйн дунд л оддыг та харж чадна”.
—Мартин Лютер Кинг жр.

Орой харанхуйд түлхүүрээ гээсэн хүний тухай түүхийг би сонсож билээ. Түлхүүрээ заавал олно гээд сүүлдээ гадаа гудамжны буланд, шонгийн гэрэл доор ухаан мэдрэлээ алдтал хайв. Улайран хайж байгааг нь хажуугаар өнгөрөх нэгэн хүн хараад, түлхүүрээ олоход нь туслах гэжээ. Нэлээд хугацаанд шаргуу хайсны эцэст нөгөө танихгүй хүн ингэж асуув: “Та түлхүүрээ яг хаана унагасан юм бэ? Хаахна унасныг нь мэдвэл олоход амархан байж мэднэ”. Гэтэл түлхүүрээ гээсэн хүн огтхон ч тээнэгэлзэлгүйгээр: “Гэртээ байхдаа унагаачихсан юм аа” гэж гэнэ. Энэ хариултад мэл гайхсан нөгөө хүн: “Гэр дотроо унагаасан юм бол яагаад гудамжны гэрэл дор хайгаад байгаа юм бэ?” гэтэл түлхүүрийн эзэн: “Энд илүү гэрэлтэй болохоор л” гэж хариулжээ.

“Хачин л түүх байна. Ингэж хайгаад нэмэргүй гэдгийг хүн бүр л мэднэ шүү дээ” гэж та эхлээд бодох байх. Гэр дотроо унагасан түлхүүрээ гудамжны гэрэл дор хайна гэдэг мунхаг

сонсогдож магадгүй. Гэхдээ би нэг зүйл тайлбарлах гэж энэ түүхийг ярьсан юм. Хэрэгтэй юмаа эрэхдээ буруу газраас хайгаад байх үе бидэнд олон гардаг. “Хайрыг би даанч хамаагүй буруу газраас хайжээ” гэсэн үгтэй хуучны нэг дуу байдаг даа. Энэ үнэн гэж би боддог. Бас итгэл найдварыг ч бид ихэнхдээ буруу газруудаас хайдаг гэж би боддог.

Би амьдралдаа аз жаргалыг амсахыг үнэхээр хүсэж байгаа л бол итгэл найдварыг хаанаас хайх вэ гэдэг дээрээ үндсэн өөрчлөлтийг хийх учиртай. Бидний нөхцөл байдал ямар байх нь хамаагүй. Есүс цаг үргэлжид итгэл найдварын маань эх сурвалж байх ёстой. Бид хэр баяр хөөртэй амьдрах нь бидний нөхцөл байдлаас шалтгаалах ёсгүй. Урьд нь тохиолдож байгаагүй таагүй өдөр боллоо ч гэсэн би юу алдав гэдгээ биш харин надад юу үлдэж хоцорсон бэ гэдгээ олж харж сур.

Би юу алдав гэдгээ биш харин надад юу үлдэж хоцорсон бэ гэдгээ олж харж сурах аваас ганхахгүй итгэлтэй, баяр хөөрөөр дүүрэн, найдвар дүүрэн хандлага тээж чадна. Эзэн юуг хийхгүй байна гэж та бодож байгаагаа биш харин Бурхан юу хийж байгааг үргэлж олж харж бай.

Бага залуу байхад минь энэ үнэнийг хэн нэг нь надад хэлээд өгчихсөн ч болоосой гэж би боддог. Олон жилийн туршид би зовлон шаналлаар дүүрэн, цөхөрч гонсойсон итгэгч байсан. Үүнд олон шалтгаан байсны нэг нь би цаг үргэлжид өөрт байхгүй юмаа л бодож шаналдаг байсан явдал. Би ингэж бодоод зогсохгүй үүндээ гомдол зовлон тоочдог байлаа. Залбирах цаг гаргалаа гэхэд өөрт байхгүй зүйлээ л Эзэнд тоочсоор өнгөрөөнө. “Бурхан минь, надад хангалттай мөнгө алга. Бусад хүнийх шиг авьяас чадвар надад байхгүй. Хүүхэд нас минь ч сайхан өнгөрөөгүй шүү дээ” гээд л. Ингээд л угсруулж өгнө дөө. Эргэн тойрноо хараад л өөрт байхгүй зүйлсийг өдөр бүр данслан бүртгэх ажилтай байв.

Харин өөрт минь юу их байгааг, би буруу газруудаас л хайгаад байсныг Эзэн надад харуулж эхэлсэн. Алдсан, хагацсан, байхгүй зүйлдээ л анхаарлаа хандуулаад байх

аваас ялалт ирэхгүй ээ. Алдаж, үгүй болсон юмныхаа төлөө гомдол зовлон тоочиюд хамаг тэнхээгээ барж, хүчээ зориулахын оронд өөрт үлдэж хоцорсон зүйлс дээр анхаарлаа хандуулахыг Эзэн надад заасан билээ. Тансаг амралтад явах мөнгө надад байгаагүй ч ядаж л тухайн сарынхаа амжиргааг залгуулах хангалттай мөнгө байсан. Бусдад байгаа шиг гайхалтай ур чадвар надад байгаагүй ч би санаа бодлоо зөв сайн илэрхийлж чаддаг хүн байв. Яг л үүнийг минь бусдад туслахдаа Бурхан хожим нь ашиглах болсон юм даа. Хүүхэд байхдаа хүчирхийлэл зовлон амссан боловч Бурхан намайг эдгээж байлаа. Эр нөхөр, үр хүүхэд минь төгс төгөлдөр биш ч, гэр бүлтэй болох ерөөл надад Эзэн хайрлажээ. Ээж ч, аав ч намайг үл тоомсорлон орхисон боловч Эзэн намайг үрчлэн авсан (Дуулал 27:10-ыг унш) ажээ.

Алдсан зүйлсийнхээ оронд өөрт үлдэж хоцорсон зүйлс дээрээ би анхаарлаа улам их төвлөрүүлэх болсноор хандлага минь улам өөрчлөгдөж эхлэв. Амьдралдаа байгаа Бурханы ерөөл, Түүний тааллыг би харж эхэлснээр итгэл найдвар маань өндрөөс өндөрт элин халих болов.

Танд ч бас ийм зүйл тохиолдох боломжтой. Өнөөдөр та юу үзэж туулж байлаа ч амьдралдаа шинэ баяр хөөрийг амсаж чадна. Та зарим зүйлийг алдсан байж болно. Танд зарим ашигтай, давуу тал байхгүй байж ч болно. Харин алдсан зүйлсдээ анхаарлаа хандуулахын оронд, юу үлдсэн байгааг амьдралаасаа хайн нэгжиж болохгүй гэж үү? Олсон зүйлдээ харин та гайхаж балмагдах вий.

Гурван зоос ба Бурхан

Тереза эх Энэтхэгт илтгээлтийн ажлаа анх эхлүүлэх үедээ ямар ч мөнгөгүй байсан тухай би уншиж байсан юм. Калькуттад өнчин хүүхдийн асрамжийн газар байгуулж, хүмүүст туслах түүний мөрөөдөл байв. Гэвч төсөв мөнгө нь байсангүй. Түүнээс хэдий хэр мөнгө байгааг асуухад: “Гурван зоос бий” гэжээ. Түүний хийх гэж буй илтгээлтийн ажил

бүтэлтэй болох эсэхэд эргэлзсэн хүмүүс: “Гуравхан зоосор чи юу хийж чадах юм бэ?” хэмээн асууж байлаа. Харин Тереза эх: “Надад гурван зоос бас Бурхан байна. Өөр юу хэрэгтэй юм бэ?” гэж хариулжээ.

Энэ хандлага нь л надад маш их таалагддаг. Өөрт нь Бурхан байсан болохоор гуравхан зоостойдоо Тереза эх санаа зовоогүй юм! Бидэнд Бурхан юу өгчихсөн байгааг нарийн тодорхой тоолж эхлэх аваас бидний амьдрал хэр өөрчлөгдөх бол гэж би боддог. Бусдад байгаатай харьцуулаад үзвэл тийм ч их санагдахгүй байж болох юм. Залбирч гуйсантайгаа харьцуулахад ч бага санагдаж магадгүй. Гэвч жаахан байгаа нь л Бурханд хэрэгтэй бүх зүйл билээ. Бурханы мутарт бол гуравхан зоос ч хангалттай их. Хэдхэн талх, хоёрхон загасаар 5000 эрийг (дээр нь эмэгтэйчүүд, хүүхдүүд нэмэгдэнэ) Бурхан хооллож чадаж байсан юм бол танд байгаа багахан зүйлээр Тэр юу хийж чадах талаар бодоод үз дээ. *“Гэхдээ надад юу ч байхгүй шүү дээ. Гурван зоос ч алга”* гэж та бодож байж болох юм. Тэгвэл Бурхан энэ ертөнцийг бүхлээр нь оргүй хоосноос бүтээсэн учраас урам хугарах хэрэггүй. Оргүй хоосны дээгүүр итгэлийн үгээ Тэр тунхагласнаар бүх зүйл эхэлсэн. Бидэнд байгаа зүйл хэр их, бага байх нь хамаагүй, бид ч бас үүнийг хийж чадна.

Хүнсний дэлгүүрт тооллого хийхийг та харж байсан уу? Тооллого хийж буй ажилчид дэлгүүрт байгаа бүх зүйлийг тоолох гайхалтай харагддаг. Гартаа тоологч хэрэгслээ бариад, аливаа бүтээгдэхүүний ширхэг бүрийг хаягжуулж, яг таг тоолсныхоо дараа дахин баталгаажуулан тоолж, тоо ширхэгийг шалгаж тааруулдаг. Юуг ч орхихгүй тоолдог нь л надад гайхалтай санагддаг л даа. Бүр хамгийн жижигхэн зүйлсийг ч орхилгүй тоолдог гээч. Цаастай бохь болгоныг, цохигдож хонхойсон лааз болгоныг, харлаж шахагдсан гадил бүрийг, нөөцөнд байгаа юуг ч орхилгүй бүгдийг нь тоолдог.

*Бурханы
мутарт бол
гуравхан зоос ч
хангалттай их.*

Тэгвэл амьдралдаа байгаа бүх зүйлийг тоолж, бидэнд хайрласан Бурханы ерөөл бүрийг тоолоод үзвэл сайхан санаа биш гэж үү? Ингэвэл найдвар маань өсөж, итгэл маань баригдах буй за. Хараахан олж аваагүй, өөрт байхгүй зүйлсээ яриад л гансран суухын оронд бидэнд аль хэдийнээ өгсөн байгаа бүх зүйлийнх нь төлөө Бурханд талархан итгэлтэйгээр алхаж бид чадна. Бид бүх зүйлийг ширхэгчлэн тоолох хэрэгтэй. Хэдий жижиг харагдаж байгаа ч хамаагүй тоолоод, үүний төлөө Бурханд таларх. Таны төлөө Бурханы хийж өгч байгаа бүх зүйлийг анзаарч хардаг зуршил тогтоо. Түүний ерөөлүүдийн талаар тунгаан бясалгах тусам итгэл найдвар чинь улам бялхан дүүрнэ. Есүсийг бидний төлөө Бурхан илгээсэн бөгөөд үүнийг Тэр хийсэн юм бол бусад бүх зүйлийг бидэнд өгөхгүй гэж үү?

Тэгвэл амьдралдаа байгаа бүх зүйлийг тоолж, бидэнд хайрласан Бурханы ерөөл бүрийг тоолоод үзвэл сайхан санаа биш гэж үү?

Тооллогын цаг

Хүн бүрийн тооллогын жагсаалт өөр өөр харагдах болно. Яагаад гэвэл, бидэнд яг адилхан авьяас билиг, чадвар, давуу тал, нөөц чадавх байдаггүй. Бас хүн бүрд адилхан зүйл адилхан цагт байдаггүй. Гэвч өөр хүнд байгаа зүйлийг танд өгнө гэж, танд байгаа зүйлийг тэр хүнд бас өгнө гэж Бурхан огт амлаагүй ээ. Энэтхэгт айлчлах үедээ би уяман өвчтэй хүмүүсийг хөл хорьсон газарт очиж байснаа санаж байна. Гэрт нь очиж үзэхгүй юу гэж уяман өвчтэй нэг хүн надаас асуусан юм. Тэр маш их баяртай байсан болохоор түүнтэй хамт очиж гэрийг нь үзэхээр дуртайяа явсан. Гэтэл түүний гэр гэж нэрлэсэн газар нь толгодын хажуугаас ухаж гаргасан гурван метр орчим урттай, хоёр метр орчим өндөртэй нүхэн гэр байсан билээ. Гараар хийсэн дүүжин ор өлгөж, хоёрын зэрэг лаазаар хийсэн сав ба хэдэн аяга тавагнаас өөр тавилга

байгаагүй ээ. Ийм багахан зүйлтэй мөртлөө тэр ямар их баяр хөөртэй амьдарч байгааг, асар их юмтай мөртлөө би ямар сэтгэл ханамжгүй амьдардагаа ухаараад, буруу явж байгаагаа би ой тойндоо ортол ойлгосон гэдгээ өчих байна.

Үүнийг санангаа, Бурханд талархах зүйлсийн нэгэн жагсаалт санал болгоё. Энд бичигдсэн бүхэн (яг одоо) танд байхгүй байж болох юм. Эсвэл эдгээрийн ихэнх нь танд байж ч болох юм. Гэвч надтай тааралдсан тэр уяман өвчтэй хүнд эдгээрийн аль нэг нь л байсан бол тэр асар ихээр догдлон баярлах байсан байх:

- толгой хоргодох дээвэр;
- танд анхаарч, хойноос чинь явдаг найз нөхөр;
- танд хайртай гэр бүл;
- хөдөлж явж байгаа машин (тийм ээ, бараг хөдөлдөггүй байсан ч болно);
- цатгалан гэдэс;
- цоргоноос гоожих халуун, хүйтэн ус;
- алиа хошин зан;
- тогтмол цалин;
- тухтай ор;
- зүрхний хүсэл, мөрөөдөл;
- хүүхдүүдийн сурч боловсрох боломжууд;
- таныг дэмжиж урамшуулдаг нутгийн чуулган;
- эрүүл саруул бие цогцос;
- дүүрэн хувцастай шүүгээ;
- унших Библи;
- ирээдүйд итгэх итгэл найдвар.

Миний санаанд орж буй цөөн хэдэн зүйл л энэ байна. Энэ талаар бодож тунгаан, залбирах цаг та гаргах юм бол үүнээс арав дахин урт жагсаалт гаргаж чадна гээд барихад ч болно.

Миний дурдсан зарим зүйл дэндүү энгийн санагдаж болох юм. Гэвч энэ тухай сайтар бодож тунгаах аваас танд байгаа хамгийн энгийн эдгээр зүйлс ч байхгүй хүн энэ дэлхий даяар

олон байгаа шүү дээ. Устай, хоолтой, орох оронтой байна гэдэг нь байх л ёстой мэтээр харах зүйлс биш ээ. Эдгээр үндсэн хэрэгцээг хангаж өгснийх нь төлөө бид Бурханд талархах хэрэгтэй. Ийм л байх ёстой юм шигээр хоромхон зуур ч бодох хэрэггүй ээ.

Найдвар үргэлж бий

Үнэнийг хэлэхэд, хүн ер нь амьдралын хэцүү бэрхийг л олж харж, сэтгэлээр унахад амархан байдаг учраас Бурханы хийж өгсөн сайн сайхан бүхнийг олж харж, данслан тэмдэглэх нь чухал юм. Саад бэрхшээлийг л хараад явбал итгэл найдвараа алдах амархан. Банкинд байгаа мөнгөө хараад сэтгэлээр унаж болох юм. Заримдаа бас хүүхдүүдээ харахаар гараа алдлаад: “Ямар ч найдвар алга даа” гэмээр үе ч тохиолдож болно. Эсвэл өөрийгөө хараад ч тийм үг хэлэхэд хүрч мэднэ! Одоо ч ашиггүй боллоо доо гэж бодсоор ажил руугаа сажлах үе ч гарж болно. Таныг диавол ийм л байдалд оруулахыг хүсэж байгаа. Биднийг урамгүй, итгэл найдваргүй бариад байж чадвал нь бид бат итгэлээр урагш алхаж чадахгүй бөгөөд Бурханы төлөвлөсөн сайн төлөвлөгөөнүүдээс хойш хоцорно гэдгийг тэр мэддэг учраас юм.

Алдсан, өөрт байхгүй зүйлсээ л тоочих уруу татлагыг эсэргүүц. Бурханы хийж өгсөн, хийж байгаа, хийх бүх зүйлийг олж харах сонголт хий. Ингэх аваас найдвар амилж, баяр хөөр чинь нэмэгдэж, итгэл чинь өсөж, үйл хөдлөл чинь ч идэвхжинэ. Итгэл найдварын цэцэрлэгт амьдрах аваас ямар нэг зүйл үргэлжид цэцэглэх болно гэж хэлж байсныг минь санаж яваарай.

“Найдвар алга даа” гэхийн оронд “Найдвар үргэлж бий!” гэж тунхагла. Танд Бурханы өгсөн зүйлс юу юу байгааг бүртгэн дансалж, илүү их зүйлийн төлөө найдах сонголт хийхээр шийдээрэй. Эзэн Бурханы хайрласан ерөөлүүдийг

“Найдвар алга даа” гэхийн оронд “Найдвар үргэлж бий!” гэж тунхагла.

жагсаан бич, өдөр бүр үүнийгээ чанга дуугаар өөртөө уншиж тунхаглаж байсан ч болно шүү. Өөрт байгаадаа та анхаарлаа хандуулах тусам амьдралд чинь хийж өгсөн Бурханы сайн сайханд улам их гайхан бахдах болно. Ефес 1:3-т хэлэхдээ:

“Бидний Эзэн Есүс Христийн Эцэг Бурхан магтагдах болтугай. Тэрээр Христ дор тэнгэрлэг оршихуй дахь аливаа сүнслэг ерөөлөөр биднийг ерөөсөн” гэжээ.

Энэ танд найдварыг өгнө. Өнөөдөр та юу ч туулж байлаа хамаагүй, хэрэгтэй бүхнээрээ ерөөгдөх болно. Танд хүч чадал хэрэгтэй байвал, танд итгэл хэрэгтэй байвал, танд найдвар хэрэгтэй байвал, танд найз нөхөр хэрэгтэй байвал, ойлгож хайрлах хүн хэрэгтэй байвал, амар амгалан, баяр хөөр, зөвт байдал хэрэгтэй бол, мөнгө, эрүүл мэнд, эдгэрэл, ялалт хэрэгтэй байвал Бурхан энэ бүхнийг танд хангаж өгөх болно. Филиппой 4:19-д (АМР): “Миний Бурхан алдар дахь баялгаараа Христ Есүс дотор та нарын хэрэгцээ бүрийг харамгүйгээр хангаж өгнө (дүүрч бялхтал)” хэмээн айлджээ.

Энэ бүх зүйлийг Бурхан үнэхээр одоо хангаж өгөх юм болов уу, ирээдүйд юм болов уу гэж эргэлзэх үедээ Түүний аль хэдийнээ хийж өгсөн зүйлсийг харагтун. Ерөөлүүдээ бүртгэсэн дансаа эргэж нягтлаад, ирээдүйн төлөөх итгэлээ нэмэгдүүлэх урам зоригийг үүнээс ав. Давид үүнийг л хийсэн шүү дээ. Саул хаан болон өөрийнх нь ах нар Голиатыг ялж чадах эсэхэд нь Давидад эргэлзэж байсан. Харин Давид түр азнаад, өөрийнх нь амьдралд Бурханы хийж өгсөн сайн сайхныг дурсаж, тоочсон. Тэр: “Таны боол би арслан, баавгайн аль алиныг нь алсан билээ. Тэр хозлуулаагүй филист хүн амьд Бурханы цэргийг шившиглэсэн тул тэдний нэгэн адил болох болно” (1 Самуел 17:36) гэжээ. Энэ бүхнийг түүний амьдралд Бурхан хийж өгч байсан учраас одоогийн нөхцөл байдалд бүр илүү агууг Бурхан хийж өгнө гэдэгт Давид бат итгэлтэй байсан. Өөрийн замналаар амьдрахад хэрэгтэй итгэл найдварыг ерөөлөө тоолсноороо Давид олж авсан.

Таныг ерөөх нь Бурханы хийх дуртай зүйл мөн

Өөрийн чинь амьдралд Бурханы хийж өгсөн сайн сайхан бүхнийг бүртгэн данслаад, ерөөлөө тоолж эхлэх аваас таны зүрх сэтгэл хэмжээлшгүй баяр хөөрөөр бялхах болно. Талархалтай сэтгэл, гундуу гонсгор сэтгэл хоёр хоёулаа нэгэн дор орших боломжгүйг би анзаарсан. Бурханы ерөөлүүд болоод Түүний тааллыг анхаарч харах цаг өдөр бүр та гаргах аваас Эзэний баяр хөөрөөр бялхан дүүрэх болно... та зогсож чадашгүйгээр баярлан хөөрөх болно.

*Талархалтай
сэтгэл, гундуу
гонсгор сэтгэл
хоёр нэгэн
дор орших
боломжгүйг би
анзаарсан.*

Эзэний баяр баясгалан бидний хүч чадал хэмээн Бурханы Үгэнд тунхагласан (Нехемиа 8:10-ыг унш) байдаг. Маш олон хүн баяр хөөр үгүй унтарсан хандлагаасаа болоод үхээнц, үргэлж ядарч гундсан, ажлынхаа ширээнээс гэрийнхээ буйдан руу арай ядан хөлөө зөөсөн хүмүүс явдаг. Зарим хүн ажлаасаа тарж гэртээ ирэхдээ шургаж унатлаа ядарсан байдаг. Гэхдээ энэ нь хийдэг ажлаасаа болж биш харин ажиллаж байгаа газар болоод хамтран зүтгэгчдийнхээ талаар таагүй хандлагатайгаас болсон байдаг. Сөрөг хандлага гэдэг бидний амьдралын бүхий л салбарт муугаар нөлөөлөх агаад эрүүл мэндэд ч хортой. Бидэнд Бурханы өгсөн зүйлсэд баярлаж, амьдралын сайн сайханд анхаарлаа хандуулахаар шийдэх аваас бид зөвхөн илүү их баяр хөөртэй төдийгүй улам эрүүл саруул болно.

Би өдөр болгон Эзэнтэй хамт байх цаг гаргахдаа тэмдэглэл хөтөлдөг. Намайг урамшуулж баярлуулж байгаа ишлэлүүдийг, тухайн өдөр залбирч байгаа гуйлтуудаасаа заримыг нь, зүрх сэтгэлд минь Эзэн хэлж байна гэж бодож байгаа зүйлсээ бичиж тэмдэглэхийн сацуу Эзэн надад хийж өгсөн онцгой зүйлсийг ч бүртгэж тэмдэглэдэг. Олон олон жилийн туршид хөтөлсөн ийм тэмдэглэлүүдээ би хадгалсан

бөгөөд хааяа хааяа гаргаад, уншдаг. Хуучин тэмдэглэлийн дэвтрийнхээ хуудсыг эргүүлэн сөхөх бүрд, сайн сайхныг бүр илүү идэвхтэйгээр хүсэн хүлээ гэдгийг жилдээ хэд хэдэн удаа надад Бурхан сануулдаг нь сонирхолтой байдаг. Энэ их чухал байх л даа. Итгэл найдвараар дүүрэн байх үед, амьдралд минь ямар нэг агуу зүйлийг Бурхан хийж өгөх гэж байна гэж хүсэн хүлээх үед, би баяр хөөрөөр бялхаж, сүнс минь барьж босгогддог. Би ер нь тогтмол амин дэм уудаг л даа. Харин найдвар бол “баяр хөөрийн амин дэм мөн” гэж би боддог. Бид найдварыг өдөр бүр өндөр тунгаар ууж байх хэрэгтэй! Тийм ч учраас миний дуртай ишлэлүүдийн нэг нь энэ байх:

“Эзэн [чин сэтгэлээсээ], та нарт нигүүлсэнгүй хандан хүлээж байна [хүлээн, харж, хүсэн тэмүүлж]. Тиймээс Тэр та нарт өршөөл, хайр энэрлээ үзүүлэн өндөрт байж байна. Учир нь Эзэн шударга ёсны Бурхан. [Түүний ялалт, Түүний таалал, Түүний хайр, Түүний амар амгалан, Түүний баяр хөөр, Түүний юутай ч зүйрлэшгүй бөгөөд эвдэршгүй бат нөхөрлөлийн төлөө] Түүнийг [үнэн сэтгэлээсээ] хүсэн хүлээж, харж, тэмүүлэгчид нь бүгдээрээ ерөөгдсөн (жаргалтай, золтой, атаархмаар) ажээ!”

Исаиа 30:18 (AMP)

Танд сайн сайхнаа харуулахаар Бурхан үнэхээр “хүлээн, харж, хүсэн тэмүүлж” байна. Тийм ч учраас та амьдралдаа сайн сайхныг баяртайгаар хүсэн хүлээх учиртай. Үүнийг хийх гэж Бурхан дурамжхан зөвшөөрсөн юм биш ээ. Тэр дуртайяа үүнийг хийхийг хүсдэг. Таны төлөө Есүс амиа өгсөн учраас та “амьтай, сайн сайхан амьдарч, бялхсан амьтай” (Иохан 10:10) болсон юм. Тиймээс сөрөг муу хандлагаасаа зууран амьдралаа бүү үр. Эзэнээс сайн сайхныг хүсэн

Танд сайн сайхнаа харуулахаар Бурхан үнэхээр “хүлээн, харж, хүсэн тэмүүлж” байна. Тийм ч учраас та амьдралдаа сайн сайхныг баяртайгаар хүсэн хүлээх учиртай.

хүлээсэн сайн зөв хандлагатай байхыг хичээ. Бид хүртэх гавъяатай учраас биш харин Бурхан сайн учраас бид ийнхүү хүсэн хүлээдэг! Танд өгсөн бүх зүйлд нь талархах сэтгэлээр Бурханыг магтагтун.

Найдвар өвөрлөгтүн!

Энэ бүлгийг уншиж дуусахдаа: “*Би хэр итгэл найдвар өвөрлөдөг хүн бэ?*” гэж өөрөөсөө асуу. Залбиралд чинь Бурхан хариулна, хүсэл мөрөөдлийг чинь биелүүлнэ, хэрэгцээг чинь хангаж өгнө, амьдралд чинь гайхалтай зүйл хийж өгнө гэж хүлээн өдөр бүр та баярлан догдолдог уу? Та хүссэн шигээ итгэл найдвар өвөрлөж чадахгүй байгаа бол энэ байдлаа өөрчилж болно. Энэ тийм ч ээдрээтэй хэрэг биш. Юу алдсан бэ гэдэгтээ биш, харин танд юу үлдсэн байна вэ гэдгээ олж харахаас л энэ бүхэн эхэлнэ.

Амьдралдаа хүлээж авсан ерөөлүүдээ бүртгэж дансал. Таны жагсаалтад бичигдэх зүйлийн олонхи нь мэдээжийн харагдаж байгаа том зүйлс байх болно. Гэхдээ жижиг зүйлс ч энэ жагсаалтад багтах учиртай. Амьдралынхаа салбар бүрийг анхааралтай нэгжиж хараад, таныг Бурхан тасралтгүй ерөөсөөр ирсэн жижиг сажиг, анзаарагдаагүй зүйлсийг ч олж харахыг хичээ. Ингэж чадвал амьдралаа харах хараа чинь орвонгоороо өөрчлөгдөхийг та анзаарна. Талархах сэтгэл өвөрлөж эхлэхэд, таны гэрлэлт, гэр бүл, ажил төрөл, хүсэл тэмүүлэл, энэ бүхнээ харах хараа чинь бүхэлдээ өөрчлөгдөх болно.

Тэгвэл өнөөдөр урагш алхаж, итгэл найдвар өвөрлөгтүн. Таныг өмнө нь Бурхан ерөөсөөр ирсэн, үүнийг батлах бүхэл бүтэн жагсаалт бүртгэл танд байна. Энэ бол ердөө эхлэл. Тэр танд зориулан асар их зүйлийг бэлдсэн байгаа. Ганцхан, та л зөв газраас эрж хайгтун!

НАЙМДУГААР БҮЛЭГ

Найдварын Үгс

“Сэтгэл минь ээ, чи юунд цөхөрнө вэ? Яагаад чи дотор минь гасалж, үл чимээгүй болно вэ? Бурханд найд, Түүнийг хүсэн хүлээ. Учир нь миний [гунигт сэтгэлийн минь] тусламж, миний Бурхан Түүнийг би дахин магтах болно”.

Дуулал 43:5 (АМР)

“Ирж буй оны босгон дээр итгэл найдвар инээмсэглэн зогсож, “илүү их аз жаргал ирнэ ээ...” гэж шивнэнэ”.

—Альфред, Лорд Теннисон

Идэж буй хоол хүнс маань бидний биед нөлөөлж байгаа шиг, амнаас гарч буй үг маань бидний сүнс, оюун ухаан, сэтгэл санаанд нөлөөлдөг. Тэр ч байтугай бие махбодид ч нөлөөлдөг гэж би үздэг. Яагаад гэвэл, ярих яриа маань найдвар дүүрэн, баяр хөөртэй байх тусам бид илүү их эрч хүч, сэтгэлийн тэнхээг олж авдаг. Эерэг, өөдрөг хандлага нь маш олон өвчин, зовуурын үндсэн шалтгаан болсон сэтгэлийн дарамтыг зайлуулдаг.

Хэдэн жилийн өмнө би эрүүл мэнддээ онцгой анхаарах шийдвэр гаргаж билээ. Тэнхээ тамир минь муудаж, амархан өвдөж, өвчин зовлонд ээрүүлээд салахгүй байсан юм л даа. Өмнө нь би хэд хэдэн ч удаа янз бүрийн хоолны дэглэм

барьж, дасгал хийх хуваарь гаргаж үзсэн л дээ. Гэтэл өөр-төө зориулж зоочихоод байсан цагийг маань миний завгүй ажлын хуваарь булаагаад таардаг байлаа. Ингээд л надад сайн биш гэдгийг нь мэдэж байгаа мөртлөө, мөнөөх завгүй хэмнэлдээ буцаад орчихдог. Эцэстээ би ёстой боллоо, ханалаа гэсэн цэгтээ хүрсэн. Үргэлж ядарч цуцсан байдалтай явсаар би залхаж дууссан гэж хэлж болно.

Юуны түрүүнд анхаарч эхэлсэн зүйлсийн маань нэг бол зүй зохистой хооллолт, дасгал хөдөлгөөний дэглэм гэж юу болох талаар судалж, ам руугаа хийж байгаа юм бүхэн бидний биед нөлөөлдөг болохыг ухаарсан явдал байв. Эрүүл хооллох чухал гэдгийг бүгдээрээ л мэднэ. Гэхдээ хоол тэжээлийн сонголт бидний бие махбодид яг яаж нөлөөлдгийг тэр бүр ухаардаг бил үү? Тухайн өдөр юу идсэнээс таны сэтгэл санаа, хэр их үр бүтээлтэй байх болон ямархуу хандлага тээх чинь шалтгаалж болно. Сайн байна уу, муу байна уу, ногооны салад байна уу, нарийн боов байна уу хамаагүй, ам руугаа хийж байгаа бүхэн чинь таны бие ямар байхад нөлөөлнө. Түүнчлэн сэтгэлзүй, бодол санаанд чинь ч нөлөөлнө.

Үүнчлэн, өөдрөг тунхаглал, сөрөг үг яриа, таны амнаас гарч буй үгс амьдралд чинь маш олон арга замаар нөлөөгөө тусгадаг байна. Үгэнд хүч гэж бий. Таны хэлэх үгнээс болж юм өөрчлөгддөг. Та ямар нэг юм хэлэнгүүт, тэр нь таны чихээр орж, сэтгэл сүнсэнд чинь шууд хүрдэг. Амь амьдралаар дүүрэн үг байх аваас та илүү баяр хөөр, илүү эрч хүчийг мэдэрнэ. Харин болохгүй байгаа юм бүхнийг ярьж, нөхцөл байдалдаа гутарч гонгинох хандлагатай бол тэр үгс чинь сөрөг нөлөө үзүүлж, тамир тэнхээг чинь сорж, гутранги тэр ч байтугай бүр сэтгэл гутралд автахад хүргэнэ. Найдвар өвөрлөхөө дараа гэж бүү хойшлуул. Яагаад гэвэл, “найдвар сунжирваас зүрхний өвчин” (Сургаалт үгс 13:12-ыг унш) гэжээ.

Тэр тусмаа ямар нэг хэцүү бэрхтэй нүүр тулах үед, итгэл найдвар дүүрэн үгс маш чухал. Шаналж зовж байхдаа таны хийж чадах хамгийн чухал зүйлсийн нэг бол эерэг, итгэл дүүрэн үгийг тунхаглах юм. Таны үг л дангаараа нөхцөл

байдлыг өөрчлөх чадалтай гэж би хэлээгүй юм шүү. Зөвхөн Бурхан л ингэж чадна. Гэхдээ таны амнаас гарах үг сүнс-лэг ертөнцөд өөрийн гэсэн хүчтэй байдаг бөгөөд Бурханы хэлж байгаатай нийцсэн үг яриа амнаас чинь гарах үед Түүний төлөвлөгөөнүүд таны амьдралд маш хурдан биелэгдэж эхэлдэг. Сөрөг таагүй нөхцөл байдлын талаарх хандлагыг чинь таны үг өөрчилж чадна. Мөн хэр хурдан үүнийг даван туулахаа тодорхойлоход чинь тусална. Израильчууд цөлд явж байхдаа гомдоллож гонгиносоор байсан. Тэгээд ч тэндээ үлдсэн юм. Уг нь арван нэгхэн хоногт туулах аяныг тэд дөчин жил явсан. Тэдний ихэнх нь хүссэн газартаа хүрч чадаагүй.

Шаналж зовж байхдаа таны хийж чадах хамгийн чухал зүйлсийн нэг бол эерэг, итгэл дүүрэн үгийг тунхаглах юм.

Гомдол зовлон тоочиж, юу болохгүй, юу бүтэхгүй байна гэж бодож байгаага л учир начиргүй урсгаад байх нь олон хүний бодож байгаагаас илүү том асуудал билээ. Эзэний сонорт энэ нь бузар мууд тооцогдоно! Амьдралынхаа туршид гомдол зовлон тоочиж, болохгүй бүтэхгүйгээ дуудаж яваа хичнээн хүн ингэснээсээ болж хүссэн сайхан амьдралаа хэзээ ч олж авч чадаагүй өнгөрч байгаа бол доо гэж би гайхдаг. Тэгэхлээр зөвхөн л хүслээ гээд сайн сайхан юмс хүрээд ирчихгүй гэдгийг харж байгаа биз дээ. Бурханд итгэх амьд найдвар, хүчтэй итгэл бидэнд хэрэгтэй. Түүнчлэн эерэг бодол санаа, итгэл найдвараар дүүрэн үгс бидэнд хэрэгтэй. Бид хий гэж дуудсан үед алхам хийдэг, хүлээж байх зуураа талархах сэтгэл өвөрлөдөг байх хэрэгтэй.

Амнаас гарах үг минь хичнээн хүчтэй тухай ойлголт мэдлэг хомс байснаасаа болоод амьдралынхаа эхний дөчин таван жилийг би өгөгдсөн өдөр хоногуудаа баллаж, сайн сайхан ирээдүйдээ саад хийж өнгөрөөсөн. Би олон салбар дээр мэдлэг ойлголт дутмаг байсан боловч үгний хүчийг мэдээгүй минь л том асуудал байжээ гэж үздэг. Хэрвээ та үг ямар хүчтэй талаар аль хэдийнээ мэдлэгтэй байсан бол зөв чиглэлдээ

явсаар байхад чинь энэ бүлэг урам сэргээлт болох буй за. Харин энэ тухай цоо шинээр сонсож байгаа бол амьдралыг чинь өөрчлөх хүчтэй ойлголт юм шүү.

Амнаас гарах үгээ өөрөө захирдаг гэдгээ та ухаараагүй байж болох юм. Юу хэлэхээ та өөрөө л сонгож чадна. Таны юу хэлж байгаа чинь маш чухал ач холбогдолтой гэж хэлж байгаад минь итгээрэй. Үгийн сайн нярав байгтун! Үгээ ухаалгаар сонго. Үг бол амилуулах ч, үхүүлэх ч хүчээр дүүрэн байдаг гэж Бурханы Үгэнд хэлсэнд итгээрэй.

“Хэл гэдэг амилуулах бас үхүүлэх хүчтэй.

Хэн үүнд дурлана үр жимсийг нь [үхлийг юмуу амийг] хүртэнэ”.

Сургаалт үгс 18:21

Зовлон бэрхшээлээ л тоочоод байхаа боль

Есүс Өөрт учирсан зовлон бэрхшээлийнхээ талаар огтхон ч ярьж байгаагүйг та анзаарч байв уу? Тэр яриад байж болох л байсан. Танд бас надад учирч байгаа шиг маш олон асуудал бэрхшээл Түүнд учирч л байсан. Есүс цаг зав муутай байсан. Бүдүүлэг дээрэнгүй, залхмаар өөдгүй хүмүүстэй Есүс таарч байсан. Маш хүнд бэрх нөхцөл байдалтай ч нүүр тулж байсан. Ертөнцийн нүглийн төлөө аймшигтай зовлон эдэлж, загалмай дээр үхнэ гэдгээ Тэр мэдэж байсан мөртлөө шүү дээ.

Гэвч Сайнмэдээний номуудыг уншаад үзвэл, Есүс ямар нэг зүйлийг өөчлөн гонгинож байсныг, гомдол зовлон тоочиж, үглэн дургүйцэж байжээ гэж тодорхойлж болох юу ч олохгүй ээ. Үг ямар их хүчтэйг Тэр хараажаар мэдэж байсан. Зовлон эдэлж, үхэх цаг нь ойртоход шавь нартайгаа үүнээс хойш дахиж олон юм ярихгүй гэж Тэр хэлсэн (Иохан 14:30-ийг унш) байдаг. Тэр яагаад ингэж хэлсэн юм бол? Үгийн хүчийг Тэр мэддэг байсан учраас, хүнд хэцүү, зовлон шаналал туулах үедээ буруу зөрүү зүйл ярих уруу татлага их байдгийг Тэр бас мэддэг байсан учраас ажээ. Хүн төрөлхтөнийг аврах

төлөвлөгөө Эцэгт нь байгаа бөгөөд энэ төлөвлөгөө Өөрөөс нь шалтгаална гэдгийг Тэр мэдэж байсан. Тиймээс ч Бурханы тушаасан ёсоор хийхийн тулд шаардлагатай бүхнийг хийхээр Тэр шулуудсан байжээ. Диаволд биш харин Бурханд ашиглагдаж болох үгийг хэлэх ч үүнд хамаарч байв.

“Би та нартай олон юм дахиж ярихгүй. Учир нь ертөнцийн захирагч (гарисан бузар муу захирагч) ирж байна. Түүний юу ч Миний дотор байхгүй [Надтай адил зүйл түүнд юу ч байхгүй. Түүнд хамаарах юм Миний дотор юу ч байхгүй. Намайг захирах хүч ч түүнд байхгүй].

Харин [Сатан ирж байгаа ба] Би Эцэгээ хайрлаж, Эцэгийн Надад тушаасан ёсоор хийдгээ ертөнцөд мэдүүлнэ (итгүүлнэ). [Эцэгийнхээ тушаалуудын дагуу бүрэн дүүрнээр Би үйлддэг] Босоцгоо, эндээс явцгаая”.

Иохан 14:30-31

Мэдээж, Есүс маш олон зүйлийн тухай ярьсан. Нүглийн тухай ч ярьсан. Фарисайчуудыг Есүс загнаж, шавь нараа зэмлэн залруулж ч байсан. Сайнмэдээний номуудыг уншаад үзэх юм бол, Есүс маш олон зүйлийн талаар ярьсан боловч Өөрт тулгарсан бэрхшээл зовлонгоо огт тоочиж байсангүй. Лук 4:22-т хүмүүс: “амнаас нь гарах нигүүлслийн үгст гайхаж байв” гэсэн байдаг. Есүс даалгавар биелүүлж, илгээлтийн ажил хийж байсан. Тиймээс ч өдөр тутмын амьдралд тулгарах асуудал бэрхшээлүүдэд сатаараагүй. Өөрийнх нь хэлсэн үгс бол сүнс ба амь гэж Тэр (Иохан 6:63-ыг унш) айлджээ.

Тэгвэл таны хэлсэн үгс сүнс ба амь мөн үү, эсвэл махбодын бөгөөд үхлийнх үү? Харин үүн дээр танд өөрчлөлт хэрэгтэй байгаа бол яг одоо та өөрчилж чадна гэдэг сайхан мэдээг хэлье. Бурханаас маш их тусламжийг авахгүйгээр хэл амаа захирах боломжгүй гэдгийг хүлээн зөвшөөрөх ёстой эхний хүн нь би өөрөө билээ. Гэхдээ бид энэ салбар дээр зөв шийдвэр гаргаж, Бурханы хүслийн дагуу үйлдэх аваас эерэг өөрчлөлт гаргахад маань Тэр мэдээж тусална.

Нарийн замаар яв

Амь руу хөтөлдөг нарийн замаар ор, сүйрэлд хөтөлдөг өргөн замаас зайлсхий гэж Есүс бидэнд заасан (Матай 7:13-14-ийг унш). Нарийн замаар явахад илүү хэцүү гэдэг нь тодорхой. Нарийн замаар явахад махбодын, хорвоогийн арга замуудад маань зай байдаггүй гэж би дандаа хэлдэг. Хэлмээр байгаа юмаа хэлээд л, үгийн хүчийг тоолгүйгээр амьдралаа туулж бид болно л доо. Гэвч ингэснээрээ Есүсийн сэрэмжлүүлэн хэлсэн, сүйрэлд хөтөлдөг өргөн зам дээр гарчихдаг бөгөөд хэн маань ч үүнийг хүсэхгүй л болов уу.

Болохгүй, бүтэхгүй байгаа бүхэн дээр анхаарлаа төвлөрүүлэх амархан л даа. Болж, бүтэж байгаа гэхээсээ болохгүй, бүтэхгүй байгаа зүйлсийг бид голлож ярих нь их байдаг юм шиг санагддаг. Ингэж байгаа бол итгэл найдвар дүүрэн биш, итгэл найдвар дутуу байна гэсэн үг. *“Хүүхэд өвдчихлөө”*. *“Замын түгжрээ их байна”*. *“Хөл өвдөөд байна”*. *“Эдийн засаг доройтож байна”*. *“Тэр намайг юу гэсэн гээч? Ёстой дургүй хүрч байна”* гээд л. Ийнхүү бид болохгүй бүтэхгүй байгааг зүйлсийг л яриад байх аваас амьдралд маань нөлөөлөх хүчийг үүнд улам их олгоод байгаа хэрэг юм.

Зовлон бэрхшээлээ хэтэрхий их ярьснаараа улам дордуулаад байгаа юм биш биз гэж өөрийгөө та бодож байв уу? Гомдол зовлон тоочдогоосоо болоод л амьдралдаа өөрөө ахиж дэвжихгүй байгаа юм биш гэж бодож байв уу? Яг энэ тухай

Сорилтын үеийг туулахдаа таны хийх хамгийн оновчтой зүйл бол ямар том, дааж давшгүй зовлон бэрхшээл туулж байгаагаа ярих биш, Бурхан ямар агуу, хүчтэй тухай ярьж эхлэх явдал билээ.

надтай Ариун Сүнс нүүрэлдэж хэлэхээс өмнө энэ талаар би бодож байсангүй. Тэр надад хэлж өгсөнд би маш их баярладаг. Яагаад гэвэл, ойлголт ухаарал дутмаг байгаа салбар дээрээ бид өөрчлөлт хийж чадахгүй шүү дээ.

Сорилтын үеийг туулахдаа таны хийх хамгийн оновчтой зүйл бол ямар том, дааж давшгүй зовлон

бэрхшээл туулж байгаагаа ярих биш, Бурхан ямар агуу, хүчтэй тухай ярьж эхлэх явдал билээ. Өдөр болгон Бурханы Үгийг тунгаан бясалгах цаг гаргаж, туулж байгаа нөхцөл байдал дээрээ Түүний амлалтуудыг тунхаглагтун. Яг одоо амьдралд тохиолдож байгаа зүйлсийн оронд Бурхан таны талд байвал юу тохиолдох боломжтой гэдэг дээр анхаарлаа хандуулах үед агуу хүч нь цутгагдах болно.

Зөв зүйлийг зориуд үйлд

Сэтгэлдээ дандаа эерэг юм мэдрэхгүй, амнаасаа эерэг үг гаргахыг дандаа хүсэхгүй үе тохиолдож болно. Өглөө нүдээ нээхэд л аймшигтай хэцүү санагдахаар тийм өдрүүд ирнэ. Яг ийм үеүдэд хорсол занал тээж, гомдол зовлон тоочиж, гутранги үзлээр амьдралаа харах дэндүү амархан байна. Гэвч та сэтгэлийн мэдрэмждээ захирагдаж амьдрах албагүй. Мэдрэмж гэдэг барьцгүй зүйл бөгөөд ямар ч хамаагүй хүчин зүйлээс хамаараад маш хурдан өөрчлөгдөн хувирч байдаг.

Энэ номоороо хэлэх гэсэн гол санаануудын маань нэг бол бид зориудаар итгэл найдвар тээх ёстой юм. Зүгээр суугаад л, найдвар төрөөсэй гэж хүсэх юмуу найдвар төрөөсэй гээд залбираад орхичих биш юм. Бид өдөр бүр “итгэл найдвар дүүрэн” (дүүрэн найдвартай) байхаар сонгох учиртай. Өөрийнхөөрөө сонголт хийх эрхтэй байхын олон гайхалтай талын нэг бол бид хандлагаа, бодол санаагаа, үгээ, үйлдлээ сонгож чадах нь юм. Та надтай адилхан бол буруу юм хийчихээрээ хамгийн эхлээд: “*Би яаж ч чадаагүй юм чинь яах юм бэ?*” гэж боддог байх. Тэгээд л яагаад зөв юм хийж чадаагүй талаараа элдэв төрлийн шалтаг тоочиж гарна даа.

Иймэрхүү зүйл өрнөдөг байх: “*Би итгэл найдвар тээхийг хүссэн ч гэлээ амьдралд минь ямар ч баяртай зүйл тохиолдохгүй байна. Харсан бүхнээс л хэцүү асуудлууд харагдаад байгаа болохоор яаж намайг эерэг үзэлтэй бай гэж шаардаад байгаа юм бэ? Бусад олон хүмүүст байгаа шиг аз завшаан надад таарсансан бол арай дээр хандлага тээж болохсон*”. Тэгвэл энэ нь

ийм байж болох л байсан: “Одоо миний нөхцөл байдал сайнгүй байгаа ч би итгэл найдвар дүүрэн байхаар сонгож байна. Өнөөдөр миний амьдралд ямар нэг сайхан зүйл тохиолдоосой гэж би хүсэн хүлээж байна! Тийм ээ, миний амьдралд, надаар дамжуулаад ямар нэг сайн сайхан юм өнөөдөр тохиолдоосой!”

Ийм мэдрэмж төрөхгүй байсан ч, өдөр бүр зориудаар үүнийг хийх аваас сэтгэл санаа чинь эцэстээ өөрчлөгдөх болно. Цаг нь болоход таны мэдрэмж гаргасан шийдвэртэй чинь уялдаад ирнэ. Нөхцөл байдал яаж ч харагдаж байсан хамаагүй, тухайн өдрөө Есүстэй хамт байх нь Түүнгүйгээр байхтай харьцуулшгүй билээ. Тэр бидэнд хайртай учраас, Тэр бидний төлөө байдаг учраас, Тэр юуг ч өөрчилж чадах учраас бид үргэлж итгэл найдвар тээж болно! Тэр бол шударга ёсны Бурхан, Тэр буруу зүйлсийг зөв болгон засаж залруулж чаддаг билээ!

Сэтгэл гонсойсон гундуу өдрүүдэд тэр мэдрэмжүүдээрээ дөрлүүлэхгүй гэж тууштай шийдвэр гаргаж бай. Гутранги үзэлтэй, сөрөг муу юм ярьдаг байхын оронд Бурханы Үгийн дагуух тунхаглалууд хийгтүн!

- Бурхан надад хайртай гэдгийг би мэднэ (Ефес 3:19);
- Амьдралдаа Эзэний сайн сайхныг харах болно гэдэгтээ би итгэдэг (Дуулал 27:13);
- Намайг хайрладаг Христээр дамжуулаад би давуулан дийлэгч болсон (Ром 8:37).

Би бараг дөчөөд жил хүмүүст зааж, номлол хийж байна. Амьдралынхаа бараг өдөр болгон би Бурханы Үгийн талаар тунгаан бясалгаж, тунхагласаар л байна. Сэтгэл ямар байгаагаас үл шалтгаалаад, Христ дотор би хэн бэ гэдгээ өөртөө сануулдаг. Та ч бас ингэж болно. Өөр хүнээр хэлүүлж, дэмжүүлж байж ингэхийг бүү хүлээ, Эзэн дотор өөрөө өөрийгөө сэргээн зоригжуулж, идэвхжүүл.

Үүнийг би тэмцээний өмнө өөрийгөө зоригжуулах уухай гэж бодох дуртай. Сургуульд байхдаа янз бүрийн тэмцээн уралдаанд орж байсан бол та үүнийг ойлгож байгаа

байх. Хөгжөөн дэмжигчид уриа хадааж, багийнхан тоглож, сурагчид нийтээрээ тэмцээнийг үздэг. Ийм тэмцээнд бүгдээрээ хожино л гэж оролцдог. Баг нь ялаагүй байгаа ч хөгжөөн дэмжигчид аль хэдийнээ уухайлаад эхэлчихсэн үзүүлбэр үзүүлж байдаг.

Таны амьдралд уухайлан дэмжих зүйл яриангүй байгаа. Ямар ч эсэргүүцэл тулгарлаа гэсэн хамаагүй, Бурхан таны талд байгаа бөгөөд Тэр ялагдашгүй билээ. Тиймээс урагш алхаж, уухай дэмжлэгийг сонс. Амьдралд чинь Бурханы авчирч байгаа ялалтад баярлан догдол.

*Өөр хүнээр хэлүүлж,
дэмжүүлж байж
ингэхийг бүү хүлээ,
Эзэн дотор өөрөө
өөрийгөө сэргээн
зоригжуулж,
идэвхжүүл.*

Магтаал дунд найдвар төрдөг

2 Шастир 20-р бүлэгт, Иехошафат хаан болон Иудагийн цэргүүдийн эсрэг асар их цэрэг дайран ирж байгаа тухай түүх гардаг. Дайран ирж буй цэргүүд тооны хувьд дэндүү давуу учраас ард олон айн дагжиж байлаа (2 Шастир 20:15). Танд ийм мэдрэмж төрж байсан үе бий юу? Эсвэл одоо танд тийм санагдаж байна уу? Ялагч болон гарч ирэх боломжгүй дэндүү том зовлон бэрхшээл өөрт чинь учирсан юм шиг санагдаж байна уу?

Энэ тулаан түүнийх биш харин Бурханых гэдгийг Иехошафат хаанд мэдэгдсэн байдаг. Эзэнээс авсан энэ үгээрээ зэвсэглэсэн Иехошафат цэргүүдээ тулаанд бэлтгэдэг. Гэхдээ энэ тулаанд орохдоо ердийнхөөс өөр зүйл тэр хийжээ. Бүх хүмүүсийн бодож байсанчлан хамгийн зориг хүчтэй дайчдаа тэргүүн эгнээнд жагсаан тулаанд оруулахын оронд харин тэр байранд нь магтаалын дуучдыг Иехошафат тавьжээ.

2 Шастир 20:21-д:

*"...Эзэнд дуулж, ариун [тахилчийн] хувцас өмсөн
Түүнийг магтах хүмүүсийг томилжээ. Тэд цэргүүдийн өмнө явж,*

–Эзэний энэрэл хайр үүрд мөнх тул Түүнд талархал өргөө гэж дуулж байлаа” гэжээ.

Иехошафат тулааныг магтаалаар эхлүүлэв. Ямар сайхан зураглал байсан бол оо. Бүхэл бүтэн арми тэр чигээрээ магтаалын туган дор тулалдаанд орохоор жагсан явжээ.

22-р ишлэл дээр ингэж бичжээ: “тэднийг уухайлж, магтаж эхэлмэгц” дайсны цэргүүдийг хооронд нь Бурхан хутгалдуулан самууруулав. Тэд Иудагийн эсрэг тулалдахын оронд самуурч будлиад бие биенийхээ эсрэг байлджээ. Тулааны талбар дээр Иехошафат цэргүүдийнхээ хамт ирэхэд дайсан устгагдсан байлаа. Амласан ёсоороо Бурхан энэ тулаанд ялав.

Айж мэгдэн, гомдол зовлон тоочихоор зовлон бэрхшээл дундаа бид Бурханыг магтан алдаршуулахад диавол самуурч будилдаг гэж би боддог. Магтаал, талархал түүнийг үнэхээр ялдаг.

Магтаал бол маш хүчтэй зэвсэг. Та Бурханд итгэж, Түүнд бүрэн найдан түшиж байгаагаа үүгээр батлан тунхагладаг. Нөхцөл байдал сайжрахлаар л итгэл найдварын үг хэлье гэж бүү хүлээ. Би аль болох шууд, энгийнээр хэлэх гэж хичээе: Таны амьдралд яг одоо юу ч тохиолдож байсан хамаагүй, өвчин зовлон, элдэв бэрхшээл, хагацал ганихрал, айсуй зовлонгийн айдас аль нь ч Бурханыг магтахаас таныг бүү сатааруулаг. Энэ бүгдээс үл хамааран, хэлэх үгээ анхааралтай сонгож, Бурхан бол итгэмжит гэдгийг, амьдралдаа ямар нэг сайн сайхан зүйл тохиолдохыг хүсэн хүлээж байгаа гэдгээ ам ангайн, зоригтойгоор тунхагла.

Ром 4:20-д: “Абрахам “итгэлээр хүчирхэгжихдээ Бурханд алдрыг нь өргөж” байсан гэжээ”. Магтаалын үгийг тунхаглах үед таны амьдралд яг ийм зүйл болдог. Та тулгарч байгаа саад тотгор бүрийг ялахын тулд итгэлээр хүчирхэгжин, бэхэждэг. Амьдралынхаа тэргүүн шугам дээр магтаалыг байлгагтун! Эзэнийг магтан алдаршуул.

Түүнийг биш, үүнийг ярьж тунхагла

Хүмүүс итгэл найдвар дүүрэн үедээ өөрсдөд нь ямар нэг сайн сайхан юм тохиолдоно гэж хүлээдэг. Хэлж байгаа үгнээс нь л энэ харагддаг. Байгаа нөхцөл байдал дунд нь ямар нэг сайн сайхан зүйл болно гэдэгт тэд бат итгэлтэй байдаг бөгөөд өөрчлөлт ирж байгаад тэд баярлан баясдаг. Тэд чөлөөлөгдөнө гэж хүлээдэг. Тиймээс ч энэ талаараа ярих дуртай байдаг. Найдвар өвөрлөсөн хүмүүс өөдрөг, өрнүүн сэтгэлтэй. Тэдэнтэй хамт байхад хөгжилтэй сайхан. Найдвар нь халдварладаг билээ! Энэ бол бусдад өгч болох хамгийн сайхан бэлгүүдийн нэг юм. Өөрийгөө та яагаад итгэл найдвар тараагч гэж харж болохгүй гэж? Өнөөгийн бидний нийгэмд энэ л зүйл маш их дутагдаж байгаа шүү дээ. Одоогийн өсвөр насны хүүхэд, залуучуудын төлөө миний сэтгэл их эмзэглэдэг. Тэдэнд маш их урам зориг, дэмжлэг хэрэгтэй байна!

Дэлхий ертөнц, дунд сургууль, их дээд сургуулиуд ихэнх нь л Бурхан бол үлгэр домог гэсэн ойлголтыг түгээж байна. Эсвэл сайндаа л Бурханыг тоож авч хэлэлцээд, анхаараад байх шаардлагагүй Нэгэн мэтээр сурталчилж байна. Дэлхий ертөнц Түүнээс бараг л ичих ёстой юм шигээр Бурханыг хойшоо, далд байлгах санаатай аж. Намайг өсвөр насандаа байхад манай нийгмийн бүхий л салбар нэгжид Бурханы тухай нээлтгэйгээр ярилцдаг байсныг би санаж байна. Өдөр тутмын ярианы маань гол сэдэв Тэр байсан. Сургуулийн ханан дээр Арван хуулийг бичиж, нийтээрээ залбирах нь энгийн л зүйл байсан. Эцэг эх маань Эзэнийг сайн дагадаг хүмүүс байгаагүй ч би сургууль дээрээ, хөршүүдээсээ Бурханы тухай сонсож мэддэг байсан. Гэтэл манай үеийн залуучуудад ийм сайхан боломж үгүй болжээ. Итгэл найдвар гээх нь тэдэнд маш амархан байна.

Маш олон эцэг эхчүүд амжиргаагаа залгуулах гэж завгүй ажилладгаас хүүхдүүдтэйгээ маш бага цаг өнгөрөөх юмуу зарим нь бүр үр хүүхдэдээ зориулах цаг завгүй явж байна. Гэр бүлийн дотор сэтгэл санааны дарамт ачаалал их

байгаагаас эцэг эхчүүд нь хувцаслалт, үсний засалт, хэв маягийн (эсвэл хэв маяггүй байгаа) талаар эсвэл сонгосон найз нөхөд, авсан дүн, хийгээгүй гэрийн ажил гээд тоолж баршгүй өөр олон зүйлийн талаар өсвөр насны хүүхдүүддээ үглэж янших нь их болжээ. Эцэг эх нь үр хүүхдээ зэмлэж залруулалгүй яах вэ. Ингэх ч ёстой гэж би итгэдэг. Гэвч үр хүүхдүүд маань илүү их итгэл найдвар тээдэг байсан бол ийм их зэмлэл залруулга хэрэггүй байхсан даа! Гэр орноосоо л итгэл найдвар олж авахгүй юм бол өдөр бүр дэлхий ертөнцтэй нүүр тулахаар гэрээсээ гарахдаа л аль хэдийнээ итгэл найдваргүй гутранги хүмүүс болчихсон явах аж. Гэтэл дэлхий ертөнц гэдэг тэдний гутранги байдлыг зайлуулах биш харин ч бүр нэмээд өгнө шүү дээ. Тэр тусмаа өнөөгийн манай залуучууд хүүхдүүдэд, сэтгэл засах, урам өгөх, найдвар дүүрэн үгийг хүн бүрд хэлж тунхагла. .

Итгэл найдварыг зогсолтгүй ярьж түгээгч нэгэн байя гэж оюун санаандаа бат суулга.

Итгэл найдварыг зогсолтгүй ярьж түгээгч нэгэн байя гэж оюун санаандаа бат суулга. Энэ ертөнцөд эерэг нөлөөгөө үзүүлнэ гэж шийд. Бусад хүмүүс хамт байхыг хүсдэг тийм л хүн нь бай. Өнөөдөр ямар нэг сайхан зүйл тохиолдоно гэсэн итгэл, найдвар өвөрлөж амьдар.

Найдвар өвөрлөгтүн!

Өнөөдөр та юу хэлж тунхаглах чинь таны маргаашийн амьдралд асар их нөлөөгөө тусгана. Энэ ертөнцөөс ирэх дарамт, дайсны худал хуурмаг нь амьдралаас зөвхөн сөрөг мууг нь олж харахад хүргэж, таныг сэтгэлээр унагахыг бүү зөвшөөр. Бурханы Үгэнд ханд, Түүний амлалтуудыг барин зогс, байгаа нөхцөл байдалдаа амь амьдралыг тунхагла.

Амнаас гарч буй үг болгон чинь танд нөлөөлнө. Тиймээс эрүүл, амь өгөгч үгсийг тунхаглахаар сонго. Хэцүү бэрх нөхцөл байдал бүрийг туулан гарахад эдгээр үгс замыг чинь

засах болтугай. Бэрхшээл зовлонгоо тоочоод байхын оронд Бурханы амлалтуудын тухай ярьж эхэл. Найдварын энэ тунхаглалаараа итгэлээ сэргээн босго.

Урагш алхаад, яг одоо найдвар өвөрлөгтүн! Цөхөрч ядарсан ч, боломжгүй мэт санагдаж байсан ч, тулаанаас болоод итгэлгүй, айдастай байсан ч, тэргүүн шугаман дээр магтаалыг тавь. Ингэх аваас таны төлөө Бурхан тулалдаж буйг та ухаарна. Тиймээс та ер ялагдахгүй ээ.

ЕСДҮГЭЭР БҮЛЭГ

Урагшилсаар бай

“Түүгээр ч барахгүй мөн зовлон дундаа ч бид алдаршуулдаг. Учир нь зовлон нь тэвчээрийг, тэвчээр нь зан чанарыг, зан чанар нь найдварыг төрүүлдгийг бид мэднэ”.

Ром 5:3-4 (NIV)

“Хүн амьд явахын цог жавхаа нь хэзээ ч унахгүйдээ биш, харин унах бүрдээ эргээд босдогт байдаг юм”.

—Нельсон Мандела

Амьтад аюул занал тохиолдож, айдаст автахдаа зөнгөөрөө хийдэг янз бүрийн хариу үйлдэл байдаг аж. Баавгай эргээд дайрдаг бол хэрэм авирдаг, зээр гөрөөс бол үргэн зугтдаг, сохор номин газар ухдаг байна. Зөнгөөрөө хийгддэг энэ хариу үйлдлүүд бүгд идэвхтэй үйлдэл юм. Харин үүнээс тэс өөр хариу үйлдэл үзүүлдэг нэг амьтан байдаг. Энэ бол опоссум. Тэр дайрдаггүй, авирдаггүй, зугтдаггүй, газар ч ухдаггүй. Харин хөшчихдөг. Ямар нэг идэвхтэй үйлдэл хийхийн оронд зүгээр л идэвхгүй болчихдог. Яг үхсэн юм шиг жүжиглэдэг. Тиймээс ч “опоссум шиг жүжиглэж байна” гэсэн хэллэг бий болжээ. Огт хөдөлгөөнгүй болчихвол болно гэж тэр найддаг ажээ.

Хүмүүс ч гэсэн шаналж зовох, айж сандрахдаа сүнслэг опоссум болчихдогийг би олонтаа харж байлаа. Идэвхтэй үйлдэл хийхийн оронд тэд идэвхгүй царайлдаг. Хэцүү цаг

ирэхэд, сэтгэлийн шарх, сэтгэл гонсойсноо шийдвэрлэх болоход тэд зүгээр л хөшчихдөг. Хөдлөхөө больчихно. Танил сонсогдож байна уу? Гэнэтийн гай зовлон, сэтгэл үймүүлсэн хэцүү зүйлээс болоод та хөдөлгөөнгүй байдалд орж байв уу? Юу хийхээ ч мэдэхгүй учраас юу ч хийж чадахгүй тийм нөхцөл байдалд та орж байсан уу?

Явцын дунд таныг хөшөөж орхисон тийм шаналал зовлон танд учирч байсан бол сэтгэлийн зовлон, өвдөлтийг чинь би хөнгөн авч үзэх гээгүй юм шүү. Цаашаа ганц ч алхам хийж чадахааргүй юм шиг санагдахаар тийм хүнд зовлон амссан хэцүү цаг үе надад их байсан. Итгээрэй. Таны юу үзэж туулж байгааг би ойлгож байна. Яагаад гэвэл, дэндүү хэцүү зовлонгоосоо болоод саа дайруулчихсан юм шиг мэдрэмж надад ч бас төрж байсан. Гэвч шаналал зовлон дунд чинь таныг урамшуулж зоригжуулах үг байна Юу гэхээр, заримдаа таны хийж чадах хамгийн сайн зүйл зүгээр л урагшилсаар, хөдөлсөөр байх нь юм.

Заримдаа таны хийж чадах хамгийн сайн зүйл зүгээр л урагшилсаар, хөдөлсөөр байх нь юм.

Танд бүх хариулт ирээгүй байж болно. Ийм нөхцөл байдалд унаснаасаа болж та цочролд орчихоод гарч чадахгүй байж болно. Эргэн тойронд чинь газар дэлхий цөмөрчихөөд байгаа юм шиг санагдаж байж ч магад. Гэвч энэ бүх хэцүү бэрхшээл дунд хэрвээ та урагш хөдөлсөөр байх аваас итгэл найдвараа алдахгүй байхад чинь тусална. Яг одоо хонгилын үзүүрт гэрэл харагдахгүй байж болно. Гэвч бүхий л зовлон шаналлаа Эзэнд хаяж, энэ зовлон дунд тантай хамт байна гэдэгт нь Түүнд итгэвэл Түүнтэй хамт алхах зуураа эдгэрч илааршиж буйгаа та мэдэрнэ. Эцэстээ хонгилын үзүүрт буй гэрлийг хараад зогсохгүй таны амьдралд буй хамаг харанхуйг энэ гэрэл хөөн зайлуулна.

Таны туулж буй нөхцөл байдал хэр хүнд байгаагаас шалтгаалаад, юу ч хиймээргүй юм шиг өдөр заримдаа тохиолдоно гэдгийг би ойлгож байна. Хүнд хагацал тохиолдоход олон үе

шаттай, гашуудах үйл явц угаасаа явагдана. Харин эдгэрлийн үе шатыг туулах явцдаа, өөрийгөө бусдаас тусгаарлах юмуу, шаналал зовлонгоосоо болоод юу ч хийх чадваргүй болж амьдралаа үрэх нь эцсийн хариулт биш гэдгийг сайн санаарай. Энэ зовлонг туулахад чинь Тэр тусалж, үүнийг сайн сайхан зүйл болгон эргүүлж чадна гэдэгт итгэн, итгэлийн алхмууд хийсээр байгаасай гэж танаас Бурхан хүсэж байгаа.

“[Сайн] хүний алхмууд Эзэнээр чиглүүлэгдэж, тогтоогдох агаад... Тэрээр бүдрэвч газар хөсөр унахгүй. Учир нь Эзэн түүний гараас барьж, мутраараа түшидэг”.

Дуулал 37:23-24 (АМР)

Бурханд итгэх завшаан тохионо гэдэг үнэхээр гайхалтай билээ. Энэ нь найдвар өвөрлөх ямар ч шалтгаан байхгүй байхад ч найдвар тээх боломжийг бидэнд өгдөг. Бүх зүйлээ алдчихсан юм шиг санагдаж байсан ч алхам бүрийг чинь чиглүүлнэ гэдэгт нь та Бурханд итгэж болно.

Хорт хавдар тусан хүнд сорилтод орсон найзынхаа тухай би саяхан сонссон юм. Тэр маань эмчилгээнүүд нь дуусаад одоо өдөр тутмын амьдралдаа эргэн ороход бэлэн болоод байгаа билээ. “Миний амьдралд нэгэнт өмнөх шигээ байхаасаа өнгөрсөн болохоор цаашид хэрхэн урагшлах ёстойгоо би сайн мэдэхгүй байна” гэж тэр хэлж байсан. Үүнийг сонсоод та сайн ойлгож байгаа байх л даа. Хайртай хүн чинь өөд болоход амьдралаа түүнгүйгээр та төсөөлж ч чадахгүй байгаа байх. Олон жил ажиллаад, тэндээсээ тэтгэвэртээ гарна даа гэж бодож байсан газраасаа халагдсан байж ч болно. Одоо тэгээд яах вэ? Та яахаа мэдэхгүй байгаа ч Бурхан мэдэж байгаа гэдэгт бат итгэ. Таны алхам бүрийг Тэр чиглүүлэх болно.

Урагш зүтгэсээр байхын хүч

Гурав хоногийн конференц эхлэхийн яг өмнөхөн маш таагүй мэдээ хүлээж авч байснаа би санаж байна. Урагш алхахад их хүнд байсан боловч урагшлах ёстой гэдгээ би сайн мэдэж

байсан. “Ямар ч байсан нэг хөлөө зөөгөөд нөгөө хөлнийхөө урд тавиад бай. Урагш зүтгэ!” гэж Ариун Сүнс хэлж байх шиг санагдаж билээ.

Урагш зүтгэсээр байх нь миний сэтгэлд байсан шаналал, гонсойлтыг авч хаяагүй. Гэвч цөхрөлийн гүн нүхэнд живэхээс намайг хамгаалж байсан бөгөөд хэдхэн долоо хоногийн дотор л тухайн нөхцөл байдал шийдвэрлэгдэж билээ. Сүнслэг төлөвшлийн шинж тэмдгүүдийн нэг бол хэдийгээр хүнд бэрх цаг мөчийг туулж байлаа ч шийдвэр зориулалт дээрээ тууштай зогсох сахилга бат юм. Би өөрөө шаналж зовж байсан ч шаналж зовж байгаа бусад хүмүүст үйлчилсээр байх хэрэгтэй байлаа. Ингэх явцад намайг Бурхан эдгээж, асуудлыг маань шийдэж өгсөн.

Яг зовж байх үедээ хичнээн хэцүү байлаа ч энэ бүх зүйл дуусна, төгсгөл нь заавал ирнэ гэдгийг санагтун. Өвлийн дараа хавар үргэлж ирдэг шүү дээ. Шуурганы дараа нар гардаг. Өчигдөр өдөржин үүл бүрхээд, цахилгаан цахилж, ширүүн бороо орсон ч өнөөдөр тэнгэр цэлмэж, нар гардаг. Цаг агаарын байдал, улирлын өөрчлөлтөөс ч гэсэн муу зүйлс сайн зүйлсэд зайгаа тавьж өгдөг зураглалыг бид олж харж чадна. Өнөөдөр таны амьдралд үүлэрхэг, салхи шуургатай байгаа бол маргааш эсвэл нөгөөдөр, эсвэл тэрний маргааш гэрэлтэх нарыг хүсэн хүлээгээрэй. Шуурга үргэлж шуурахгүй ээ!

Шуурга үргэлж шуурахгүй ээ!

Өвчинд баригдсан нэгэн эмэгтэйн (цус алдах өвчнөөр өвдсөн) жишээг Библид өгүүлсэн байдаг. Тэр эмэгтэй Есүст хүрэхийн тулд чихэлдсэн олны дундуур урагшилсаар *зүтгэн гарчээ* (Марк 5:25-34, Лук 8:43-48-ыг унш). Тэр 12 жилийн турш өвдөөд, байдаг бүхнээ өөрт нь тусалж чадахгүй эмч домчид бариад дууссан байсан ч ухарч зүгээр суухыг, өвчин нь аяндаа арилахыг дэмий хүлээхийг хүсээгүй юм. Найдвартаа хөтлөгдсөн тэр эмэгтэй тулгарах зовлон бүрийг даван туулахаар сонгожээ. Есүст хүрэхэд нь юу ч түүнд саад болж чадаагүй. Чихцэлдсэн олон хүн ч, өвчин нь ч, хэр

удаан хүлээсэн нь ч, эргэлзээ нь ч, шаналал нь ч саад болж чадаагүй. “Түүний дээлд нь л хүрчихвэл би эдгэнэ” гэж өөртөө тэр үглэн (Матай 9:21-ийг унш) байжээ. Эмэгтэй зүрхэндээ итгэл, найдвар тээсээр, урагш зүтгэсээр байв.

Өнөөдөр та ч бас дундуур нь зүтгээд гарах ёстой чихэлдсэн олон хүн байгаа байх. Сөрөг бодлууд гэдэг чихэлдсэн хүмүүс. Урьд өмнө амссан шаналал, шарх гэдэг чихэлдсэн хүмүүс. Таныг үл дэмждэг эргэн тойрны чинь хүмүүсээс бүрэлдэх чихэлдсэн олон. Эсвэл биед чинь буй өвчин гэдэг чихэлдсэн олон хүн байж болох юм. Гэвч энэ бүхний дундуур та зүтгэн гарч, амьдралд учрах таагүй зүйлсээс болж гутарч гонсойсон, зовлонтой хэвээрээ гацаж үлдэхээс татгалзах аваас та чөлөөлөгдөх болно.

Филиппой 3:13-14-т:

“Ах дүү нар аа, би өөрөө барьж авсан гэж боддоггүй [хараахан], харин хийдэг ганц юм маань [миний ганц эрмэлзэл бол] ардхаа мартаж, урдах өөдөө тэмүүлж, Христ Есүс дотор Бурханы дээш чиглэсэн дуудлагын шагналын [эрхэм дээд бөгөөд тэнгэрлэг] төлөө бариа өөд урагшилдаг” (тодотгол нэмэв) гэжээ.

Библийн энэ багц ишлэлд би дуртай. Ард байснаа буюу өмнө нь хийсэн алдаа дутагдал, шаналал зовлонгоо мартаж, өөрийн замналаар урагш зүтгэсээр байгаагаа Паул элч хэлжээ. Та ч бас ингэж чадна. Таныг зуурч, хөдөлгөхгүй байхаар оролдох энэ бүх зүйлийг орхин урагшилж та чадна. Ялагдсан сэтгэлгээтэй байхаасаа өнөөдөр та татгалзаж чадна. “Опоссум шиг жүжиглэхээсээ” өнөөдөр та татгалзаж чадна. Урагшилсаар, зүтгэсээр байх сонголт хийж та чадна.

Бурхан ажилласаар байна

Үүнийг уншаад та: “Жойс, урагш зүтгэсээр байж болно гэж би бодохгүй байна. Би маш хэцүү зовлон туулж байна. Урагш алхам хийх ямар ч аргагүй юм шиг л санагдаж байна” гэж хэлж байж болох юм. Хэрвээ та яг одоо ийм байдалтай байгаа бол

ийм мэдрэмжиндээ битгий бууж өгөөрэй гэж ятгах байна. Бид Бурханыг дагая л гэж байгаа юм бол итгэлээрээ урагш хөдөлсөөр л байх хэрэгтэй. Бурханы Үгийг судлах явцдаа, Бурхан үргэлж хөдөлсөөр, ажилласаар байдгийг би гарцаагүй олж хардаг. Түүгээр ч зогсохгүй, Өөрийн хүмүүсийг... хамгийн хүнд хэцүү нөхцөлд байсан ч урагш алхахыг Тэр үргэлж дууддаг.

Израильчууд Египетээс гарахад Египетийн цэргүүд араас нь мөшгөж, тэднийг Улаан тэнгист шахсан... *Гэтэл тэднийг урагш алхсаар бай гэж Бурхан айлдсан!*

Цөлд 40 жил болсны эцэст Израилийн хөвгүүд Иордан гол дээр ирээд, Канаан нутаг руу нэвтрэн орох эсэхээ мэдэхгүй байсан... *Урагш алхсаар бай гэж Бурхан тэдэнд айлдсан!*

Израилийн цэргүүд бэхлэгдсэн хот Иерихогийн эсрэг тулалдахаар ирээд, тулаанд хэрхэн ялахаа мэдэхгүй байсан ч хотыг тойрон алх гэсэн заавар авсан. Өөрөөр хэлбэл... *Урагш алхсаар бай гэж Бурхан тэдэнд айлдсан!*

Бурханы хүмүүс Канаан нутагт ороод, аварга биетэй хүмүүс тэр газар оршин суудгийг олж мэдэхэд, тэр газрыг байлдан эзэл гэж Бурхан тэдэнд айлдсан... Урагшилсаар бай гэж Бурхан тэдэнд айлдсан ажээ!

Энэ бүх нөхцөл байдалд, хүмүүс “опоссум шиг жүжиглэх” уруу татлагад орж байсан. Учирсан хүнд бэрхшээлээсээ болоод тэд босон зогсож, урагш алхахын оронд нуугдаад, хүлээмээр санагдаж байсан байх. Гэвч энэ жишээ болгон дээр тэднийг асуудал зовлонгоос нь хөглөн гаргаж, ялалтад хүргэнэ гэдэгт нь Түүнд итгээд, урагш зүтгэсээр байхыг Бурхан тэдэнд айлджээ. Тэд тодорхойгүй байдлаас айж, хөшсөн хэвээр суусаар байсан бол өөрсдөд нь зориулсан Бурханы бялхам дүүрнийг амсаж огт чадахгүй байсан.

Тухайн үедээ энэ маш хэцүү байсан ч тэд босон зогсоод, урагш зүтгэхээр сонгосон. Эцэстээ, гавьяа нь ирсэн.

Гэхдээ Библийн жишээ бол зөвхөн Хуучин гэрээний жишээнүүдээр хязгаарлагдахгүй ээ. Есүсийн амьдралын тухай тэмдэглэсэн Сайнмэдээний номуудыг унших аваас Тэр ч бас үргэлж ажиллаж, урагшилж байсныг харж болно. Зовлон учрах болгонд л хөшөөд, сүнслэг опоссум шиг жүжиглээд байгаагүй. Энэ дэлхий дээр юу хийх гэж ирснээ гүйцэлдүүлэх тууштай шийдвэртэйгээр нэг хотоос нөгөө рүү, нэг хүнээс нөгөөд нь Тэр хүрч, сатааралгүй явсаар байв. Хүмүүс Өөрийг нь хүлээж авахгүй байхад ч, фарисайчууд урхинд оруулах гэж оролдох үед ч, цугласан олон Өөрийнх нь эсрэг дайрах үед ч Есүс урагшилсаар, зүтгэсээр байсан.

Дайсны цэргүүдийн эсрэг, гол мөрнийг гаталж, Амлагдсан нутагт ор хэмээн Өөрийн хүүхдүүдийг Бурхан урагш зүтгүүлсээр байсны нэг гол шалтгаан нь хөдөлж, урагшлахад найдвар оршдог учраас юм. Хэрвээ та алхахгүй байгаа бол шинэ газарт хүрч очих найдвар байхгүй шүү дээ.

Урагшлах хөдөлгөөнгүйгээр өөрчлөгдөх найдвар үгүй билээ!

Дуулгавартай алхам хийх нь

Урагш зүтгэсээр байх арга замуудын нэг нь Бурханд дуулгавартай байх явдал. Таныг юу хийлгэхээр Тэр хөтөлж байна, түүнийг нь л хийх. Таныг хийгээсэй гэж Түүний хүсэж байгаа алхмууд жижиг, том байх нь хамаагүй, таны бодоо ч үгүй зүйл ч байж болно. Гэвч Бурханыг дагана гэдэг бол зөв газартаа хүрэх цорын ганц зам билээ.

Израильчуудын талаар, Бурханы оршихуйн үүл тэднийг хэрхэн цөлөөр удирдаж байсан тухай би их боддог. Үүл асрын дээр бүрхдэг ба үүл хөдлөхөд израильчууд аянаа үргэлжлүүлж, үүл тогтоход тэд буудалладаг байсныг Библид өгүүлдэг. Үүл хэзээ хөдлөх гэж байгааг тэд огт мэддэггүй байсан боловч Бурхан хөдлөхөд тэд дагаад хөдлөхөөр үргэлж бэлэн

байх ёстой байв (Тооллого 9:16-23). Харин та бэлэн байна уу? Бурхан ятгах үед заримдаа тэд хөдөлмөөргүй санагддаг байсан байх гэж би боддог. Гэлээ ч цөлийг туулан гарахыг хүсэж байгаа л юм бол Бурханы чиглүүлэгт итгэх ёстой байжээ.

Бид яг л байлдааны бэлэн байдалд буй цэргүүд шиг бэлэн байдалд амьдрах хэрэгтэй. Ийм үед, цэргүүд хэзээ ч хамаагүй үүрэг биелүүлэхээр дуудагдана гэдгээ мэдэж байдаг. Эмч нар ч гэсэн онцгой байдал зарласан үед хэзээ ч хамаагүй дуудагдахад, өвчтөнд тусламж үзүүлэхээр явахад бэлэн байх ёстойгоо мэднэ. Өөр юм төлөвлөсөн байна уу, юу хийж байна хамаагүй. Дуудлага ирэхэд л шууд дагана.

Нэг удаа конференц дээр, магтаалын үеэр би Библиэсээ юм хайж байв. Гэтэл хэдхэн мөчийн өмнө гэрчлэлээ ярьсан эмэгтэйд өөрийнхөө Библийг бэлэглэх ёстой гэсэн бодол гэнэт зурсхийв. Тэр орой номлолоо дууссаны дараа түүнд Библиэ өгөх ёстой гэсэн мэдрэмж хүчтэй төрж байлаа. Гэтэл яасан гээч. Энэ миний бодож төлөвлөсөн зүйл биш төдийгүй тэр Библидээ би их дуртай байсан юм. Яагаад гэвэл, маш олон тэмдэглэл хийсэн байсан л даа. Амьдралдаа ухаарсан долоон хамгийн чухал зүйлээ тэр Библи дээрээ бичиж тэмдэглэсэн байсан. Гэсэн ч Библиэ тэр эмэгтэйд өг гэж Эзэн надад хэлээд байгааг би маш хүчтэйгээр мэдэрч байв. Бурхан яагаад надаас ийм юм хүсэж, энэ чигт хөдөлгөх гэснийг би мэдээгүй л дээ. Үүгээрээ тэр эмэгтэйд урам зориг хайрлах байсан ч байж магадгүй. Эсвэл миний дуулгавартай дагах эсэхийг Эзэн харсан байж болно. Ямар ч шалтгаантай байлаа гэсэн би сонголт хийх ёстой болсон. Дуулгавартайгаар алхам хийх үү, дуулгаваргүй хандах уу. Тэгэхэд би зөв шийдвэр гаргасан боловч тэгж чадаагүй үеүд ч олон байдаг. Дуулгаваргүй байсан үедээ би сүүлд нь үргэлж маш их харамсдаг.

Харин бидний хувьд, харамсах зүйлгүй амьдрах цорын ганц арга зам бол яг одоо л зөв зүйлийг хийх юм!

Таныг чухам юу хий гэж Бурхан танд хэлж байгаа мэт санагдаж байна вэ? Таныг гомдоосон нэгнийг уучил гэж Тэр хүсэж байна уу? Зовлонд унасан нэгнийг ерөөгөөсэй гэж байна

уу? Хөнөөлтэй муу зуршлаасаа салаач гэж байна уу? буруу харилцаагаа тасал гэж байна уу? Анд нөхөртөө урам хайрла гэсэн үү? Асуудлыг нь тулж хэл гэв үү? Эзэн танаар юу ч хийлгэхийг хүслээ ч гэсэн тээнэгэлзэж, цаг алдах хэрэггүй. Дуулгавартайгаар хөдөлж, хийх алхам бүрийг чинь Бурхан хэрхэн ерөөхийг хар. Идэвхгүй үлбэгэр байдлаас л цөхрөл, гутранги байдал үүсдэг гэж би боддог. Харин Бурхантай хамт урагшлах алхам хийх үед итгэл найдвар цэцэглэдэг билээ.

Бие махбодын хувьд, хүн хөдлөөд л байвал, хөдлөх чадвар нь улам сайжирдаг харин хөдөлгөөнгүй байх тусмаа хөдлөх чадвар нь улам мууддаг гэж саяхан би сонссон. Хүмүүс тэтгэвэртээ гараад, юу ч хийлгүй зүгээр суугаад байвал эрүүл мэнд нь доройтож эхлэхээр барахгүй хийж чадах зүйл нь ч улам хумигддаг. Харин идэвхтэй амьдралын хэв маягаа хадгалж, шантарч ухрахаас татгалзсан хүмүүсийн хувьд нас бол ердөө тоо гэдэг нь харагддаг. Үүн шигээр, бид Бурхантай хамт түргэн шуурхай хөдөлдөг байх тусам ингэх нь улам л амархан болно гэж би итгэдэг. Айдсаасаа болж хөшөөд та удаж байгаа бол, дахиад урагшлан хөдлөхөд илүү их хүчин чармайлт шаардагдах байх. Гэлээ ч үүний гавьяа нь ирнэ шүү дээ.

Хаа нэгтээ хөдлөх хэрэгтэй юм шиг санагдаж байгаа ч яг юу хий гэж Бурхан хүсэж байгааг сайн мэдэхгүйгээсээ болоод гацчихаад байгаа бол танаас хоёр зүйлийг асууя: (1) Таныг хийгээсэй гэж Бурханы хүссэн сүүлчийн юм юу байсан бэ? (2) Түүнийг нь та хийсэн үү? Заримдаа бидэнд шинэ заавар өгөхөөсөө өмнө, хамгийн сүүлд өгсөн даалгаврыг нь дуулгавартай дагасан эсэхийг маань Бурхан хардаг. Бурхантай хамт байлаа ч, та хийх ёстой алхмуудаа алгасаж чадахгүй. Нэг удаад нэг л алхам хийнэ.

Заримдаа бидэнд шинэ заавар өгөхөөсөө өмнө, хамгийн сүүлд өгсөн даалгаврыг нь дуулгавартай дагасан эсэхийг маань Бурхан хардаг.

Эзэн таныг дараах зүйлсийг хий хэмээн зүрх сэтгэлд тань хэлж байж ч болох юм:

- эргээд сургуульдаа ор;
- хань ижилтэйгээ ярьдаг хэв маягаа өөрчил;
- баяр хөөртэй хандлага тээ;
- өөрийгөө илүү сайн арчил;
- үгийг судлахад илүү их цаг гарга;
- Библиэ судалж эхэл;
- ядуу зүдүү нэгэнд бэлэг өг;
- хүүхдүүддээ илүү их урам дэм өг;
- нийгэмдээ хандсан сайн дурын ажил хий;
- чуулгандаа үйлчил;
- найздаа гэрчлэлээ ярь.

Одоо хийгээсэй гэж Бурханы хүсэж байгаа алхмыг хийх дургүй учраас алгасаад дараагийг нь хийнэ гэж байхгүй ээ. Амттай сайхан бялуу хийе гэсэн ч гол орцных нь нэгийг хийхгүй бол юу болох вэ? Ганцхан л зүйл орхилоо ч тэр бялуу ч биш, юу ч биш л болно. Гаргасан хүчин чармайлт, оруулсан бусад орц найрлага, бялуу хийхэд зайлшгүй хэрэгтэй тэр нэг зүйлийг орхисноос болоод бүгдээрээ дэмий үрэгдэнэ гэсэн үг.

Нөхөртөө илүү их захирагдах сэтгэлтэй байхыг надаас Бурхан олон жилийн туршид хүссэн юм. Гэвч тэр алхмыг хийхэд би бэлэн биш санагдаж байлаа. Би ингэж чадахгүй, яагаад гэвэл, өмнө нь намайг эрхшээлдээ оруулах гэсэн эрэгтэй хүмүүсийн дарамт дор би амьдарч байсан шүү дээ гэж өөрөө өөртөө би хэлдэг байлаа. Гэвч энэ бол дуулгаваргүй байдлаа өмөөрөх шалтаг төдий л зүйл байсныг би үнэнээр нь өчье. Би нэг л алхмыг хийхгүй орхиод байсан учраас миний амьдралд ч, үйлчлэлд ч ахиц гарахгүй, гагцхиаад байв. Хожим би тэр алхмыг хийсэн бөгөөд Бурханы оршихуйн үүлийг дагасан. Улмаар сайн сайхан зүйлс дахиад тохиолдож эхэлсэн.

Баруун эргэлт, зүүн эргэлт

1987 онд “Лос Анжелес таймс” сонинд 53 настай, уулын цанын тамирчин Эд Кенаны тухай нийтлэл гарсан юм. Кенан бизнесмэн байсан боловч цанаар гулгах дуртай төдийгүй ирж буй Өвлийн Олимпын үеэр уулнаас туг сүлжин буух тэмцээнд оролцохоор бэлтгэлээ базааж байлаа. Түүний хувьд гэхдээ нэг онцгой юм байсан. Тэр хараагүй хүн байв.

Кенан долоон жилийн өмнө хараагүй болжээ. Хоёр нүдээ нэг нэгээр нь алдахдаа хоёр удаагийн хагалгаанд орсон боловч чихрийн шижин өвчний улмаас нүдний торлог бүрхэвч буурч, хараагүй болохыг нь зогсоож чадаагүй байна. Үгээр хэлэмгүй энгүй зовлонг туулахдаа Кенан сонголт хийх ёстой боллоо. Амьдрал өөрт нь муу муухайг өгсөнд бачуурч, өөрийгөө өрөвдсөөр харанхуйдаа сууж үлдэж болно. Эсвэл урагш зүтгэсээр байж болно. Хараагүй болоод зургаан сарын дараа, Колорадогийн Вэилд уулын оройгоос цанаар гулган бууж байхдаа Кенан шийдвэрээ гаргажээ. “Өвчнөөсөө эдгэрнэ гэж өөрийгөө би хүчилсэн. Би уулын оройгоос цанаар гулган бууж чадаж байгаа юм бол санасан бодсон бүхнээ хийж чадах юм байна гэж бодогдсон” гэж тэр хэлсэн байдаг.

1983 онд, Юта мужийн Альта хотод Америкийн Хараагүй Тамирчдын Уулын Цанын Холбооноос зохион явуулсан уулын оройгоос туг сүлжин буух томоохон тэмцээнд тэр түрүүлж, алтан медал авчээ. Дараагийн жилүүдэд нь олон янзын тэмцээн уралдаанд орж, хэд хэдэн алт, мөнгөн медалиар шагналынхаа тоог нэмэгдүүлжээ. Дүүрэн жаргалтай, сэтгэл тэнүүн амьдрахад нь Эд Кенанд харах чадвараа алдсан явдал ч саад болж чадсангүй.

“Уулын оройгоос цанаар гулган бууж байхдаа зоосон тугийг сүлжихдээ яаж хаалганууд дээр нь онож эргэлт хийж чадаж байна аа?” гэж асуухад: “Өөрийнх нь өмнө хөтөч нь уулнаас гулгаж буудаг. Илүү хурдлах хэрэгтэй болмогц хөтөч нь: “Яв, яваарай” гэж маш чангаар хашхирах ба хаалга ойртоход: “Бааааруун эргэ”, “Зүүүүн эргэ” гэж уртаар дууддаг”

гэжээ. Зааварлагчийнхаа чиглүүлэгт итгэж, урагш гулгасаар байх нь л Кенаны хийх ёстой зүйл байдаг ажээ. Хэрвээ ингэж чадвал алдаа гаргалгүй гулгаж, аюулгүйгээр барианд орж чаддаг.¹

Таны туулж буй зовлон бэрхшээл Эд Кенаныхаас өөр ч гэлээ та түүнээс зарим нэг зүйлийг сурч авсан байх аа. Гэнэтийн хагацал зовлон амсахад ямар байдгийг та сайн мэдэж байж болох юм. Сэтгэлээр унаж цөхрөхөд ямар байдгийг ч ойлгодог байх. Аймшигт өвчний онош тавиулаад байгаа байж ч болно. Эсвэл үргэлж дэргэд чинь байна гэж бодсон нэгэн чинь, эсвэл ямар нэг зүйл чинь гэнэт байхгүй болчихсон байж мэднэ. “*Шантарч болих уу, эсвэл урагшлах арга зам байна уу?*” гэж та өөрөөсөө өчнөөн удаа асуугаад сууж байж ч болох юм.

Хичнээн гүн харанхуйтай та дайтаж байлаа ч ганцаараа биш гэдгийг чинь сануулъя. Юу туулж байгааг чинь Бурхан харж байгаа төдийгүй таны хажууд Тэр Өөрөө байгаа. Исаиа 30:21-д: “Та нар баруун тийшээ эргэсэн ч, зүүн тийшээ эргэсэн ч, араас чинь дуугарах “Энэ бол зам. Үүгээр алхагтун” гэх үгийг чих чинь сонсоно” гэсэн байдаг. Таны хөтөч байна гэж Бурхан амлажээ. Хаашаа явахаа мэдэхгүй байгаа бол бүү ай. Опоссум шиг бүү жүжиглэ!

Урагшлах гэдэг нь заримдаа зүгээр л орноосоо босоод, гэрээ цэвэрлэх, ажилдаа явахыг хэлж болох юм. Эсвэл Бурханаас ирэх тодорхой чиглүүлгийг дагахыг ч бас заримдаа хэлнэ. Энгийн юмуу илүү сорилт бэрхшээлтэй, аль нь ч байлаа гэсэн сүнсээрээ хатингаршихгүй байхын тулд идэвхтэй байхыг маань л Бурхан хүсдэг! Таныг Бурхан хөтлөн дагуулах бөгөөд “Баааруун эргэ”, “Зүүүүн эргэ” гэж хэлэхийг нь та сонсох болно. Итгэлээ ашиглах тусмаа улам илүү итгэлтэй болно! “Учир нь хэнд байна, түүнд илүү ихээр өгөгдөнө. Тэр нэгэнд элбэг дэлбэг байх болно. Харин хэнд байхгүй байна, түүнээс байгаа нь хүртэл авагдана” (Матай 25:29) хэмээн Есүс айлджээ. Айж нуугдахын оронд идэвхтэй үйлдэл хийх шаардлагатай итгэлийн тухай Тэр энд ярьж байжээ. Урагш

зүтгэ. Энэ бол таны хийж чадах хамгийн хүчтэй зүйлсийн нэг мөн!

Найдвар өвөрлөгтүн!

Шаналал зовлон, тодорхойгүй нөхцөл байдал, сэтгэлээр унаснаасаа болоод амьдралдаа та урагшлахгүй гацчихаад байгаа бол босон зогсоод, урагш зүтгэ гэж таныг уриалах байна. Амар биш ч та үүнийг хийж чадна аа. Өөрийг чинь гацааж байгаа тэр л зүйлсийн дундуур зүтгээд гар. Юу ч хийхгүй байхын оронд ямар нэг зүйл хийхээр шийд. Таныг Эзэн юу хий гэж хүсэж байна, дуулгавартайгаар хий.

Сэтгэлээр унаж, итгэл найдвараа алдах гэдэг сордог элснээс таныг татан гаргахыг Бурхан хүсэж байна! Тиймээс алхам хий, найдвар өвөрлөгтүн! Яг одоо та олж харж чадахгүй байлаа ч, таны амьдралд гайхалтай төлөвлөгөө Бурхан гаргасан байгаа. Та үргэлжид шаналан зовохгүй ээ. Гэрэлт ирээдүй өмнө чинь байна. Дахиад опоссиум шиг жүжиглэхээ боль.

“Учир нь харагддаг аливаа зүйл нь гэрэл юм. Тиймд «Нойрсогч оо, сэр. Үхэгсдээс бос. Христ чиний дээр гэрэлтэх болно» гэдэг”.

Ефес 5:14

ХЭСЭГ III

НАЙДВАР БА АЗ ЖАРГАЛ

....

“Иаковын [онцгой илчлэл өгсөн] Бурханаар туслуулдаг, Бурхан Эзэндээ найдагч ерөөлтэй еэ (ерөөгдсөн, золтой, атаархмаар)!”

Дуулал 146:5

Итгэл найдварын хүч гэж юу байдгийг та харж, таны аз жаргалтай амьдрах нь итгэл найдвар өвөрлөхтэй чинь ямар уялдаатай байдаг талаар ойлгож эхлээсэй гэж би залбирч байна. Найдваргүйгээр итгэл өвөрлөх боломжгүй. Яагаад гэвэл, найдвар бол ямар нэг сайн юм тохиолдоно гэсэн эерэг хүлээлт билээ. Энэ л итгэл юм байна гэж бодсон зүйлээ би дадлагажуулж, өөртөө суулгах гэж олон жил оролдсон. Гэвч надад итгэл найдвар биш, харин амьдралын талаарх сөрөг хандлага л байсаар байв.

Би Христэд итгэгч болсон атлаа, хайртай гэр бүлтэй, бүтэн цагийн үйлчлэл хийдэг хэрнээ л ихэнх үед аз жаргалгүй амьдарч байлаа. Юу нь болохгүй байгааг би ер ойлгохгүйгээр барахгүй бидний олонхын хийдэг тэр л алдааг давтаж, “юмс” өөрчлөгдвөл л би аз жаргалтай болно доо гэж боддог байлаа. Би итгэлээ ашиглан Бурханаар юмсыг өөрчлүүлэх гэж оролдсон боловч миний нөхцөл байдлыг өөрчлөхөөсөө илүү намайг өөрийг минь л өөрчлөхийг Тэр хүсэж байгааг ухаарч чадаагүй байв.

Ямар ч нөхцөл байдалд аз жаргалтай, баяр хөөртэй байхыг надад заахыг Тэр хүсжээ. Гэтэл бид итгэл найдвар өвөрлөх шийдвэр гаргасан нөхцөлд л тэр нь боломжтой аж. Найдвар өвөрлөх гэдэг нь өөрт минь, өөрөөр минь дамжуулаад, эргэн тойронд минь байгаа бүхэнд ямар нэг сайн сайхан зүйл тохиолдоно гэж баяртайгаар хүлээж амьдрахыг хэлж байгаа юм.

Түрүүн дурдсанчлан, энэ номоо би “Аз жаргалын ном” гэдэг. Энэхүү номын хуудсуудад байгаа зарчмуудыг та амьдралдаа хэрэгжүүлэх аваас өнөөг хүртэл бөглөөг нь онгойлгож чадахгүй байсан баяр хөөрийн лонхоо онгойлгож чадна гэдэгт би чин сэтгэлээсээ итгэдэг.

“Өнөөдөр надад ямар нэг сайн сайхан зүйл тохиолдох болно”, “Өнөөдөр надаар дамжуулаад ямар нэг сайн сайхан зүйл болно” гэж тунхагласаар байгтун.

АРАВДУГААР БҮЛЭГ

Аливаа зүйлээс сайн сайхныг нь олж хар

“Учир нь та нарт зориулж байгаа төлөвлөгөөнүүдийг Би мэдэх бөгөөд тэдгээр нь та нарт найдвар ба ирээдүйг өгөх, та нарыг хорлох биш харин дэвжин дээшлүүлэх төлөвлөгөөнүүд юм” гэж Эзэн тунхаглаж байна.

Иеремиа 29:11 (NIV)

“Бүх гай зовлонгоо биш, харин үлдэж хоцорсон гоо үзэсгэлэн, сайн сайхныг би боддог”.

—Анна Фрэнк

Онцгой нэгэн талбар дээр ажиллаж байсан гурван эрийн тухай түүхийг ярья. Тэд бол Лондонгийн агуу сүрлэг мөргөлийн сүмийг бүтээн босгох барилгын ажилд гар бие оролцож байсан хөлсний ажилчид юм. Алдарт архитекторч Сер Христопфер Врэн энэ сүмийн зураг төслийг гаргасан бөгөөд архитектурын хувьд хосгүй бүтээл болно гэж бүгд хүлээн харж байлаа. Сүндэрлэн босож буй агуу сүмийн талаар сонин сэтгүүлүүдэд маш их бичигдэж байсан бөгөөд Лондонгийн нэг сурвалжлагч энэ гурван эрээс энгийн нэг асуултыг асуужээ. “Та энд юу хийж байгаа вэ?” гэж. Эхний хүн: “Би өдрийн арван шиллингээр чулуу зүсэж байгаа” гэж хариулжээ. Хоёр

дахь эр: “Энд би өдөрт арван цагийг зориулан ажиллаж байна” гэжээ. Харин гурав дахь хүн тэс өөр хариулт өгч гэнэ. “Лондонгийн хамгийн сүр жавхлантай сүмийн нэгийг барьж босгоход нь Сер Христофер Врэнд би тусалж байна” гэжээ.¹

Амьдралыг үзэх үзэлд чинь таны хандлага ямар их нөлөөлдгийг олж харахад гайхалтай биш гэж үү? Та юунд итгэхээр сонгох нь чухал юм. Эхний хүний хувьд мөнгө хамгийн гол зүйл байлаа. Түүнээс ажлынх нь тухай асуухад хэр их мөнгө (эсвэл хэр багыг авч байгаа) олж байгаагаа тэр эхлээд ярьсан. Хоёр дахь ажилчны хувьд цаг заваа хамгийн эрхэм чухалд үзэж байлаа. Юу хийж байгааг нь түүнээс асуухад энэ ажлыг хийхэд хэр их цаг зарцуулж байгаагаа шууд ярьсан. Харин гурав дахь ажилчны хувьд, хэр их мөнгө олох, хичнээн цаг зарцуулахаас цаашихыг харсан. Энэ төслийг тэр зүгээр нэг ажил гэдгээр авч үзээгүй. Сүр жавхлантай агуу сүмийг барихыг амьдралд олдох ховорхон боломж гэдгээр нь харжээ. Нөхцөл байдлаасаа хамгийн сайн сайхныг нь тэр олж харсан байна. Тиймээс ч гүйцэтгэж байгаа үүргийнхээ төлөө баярлан хөөрч, баясан догдолж байлаа.

Тэгэхээр хүн итгэл найдвараар дүүрэн, баяр хөөрөөр бялхсан, бадрангуй дэврүүн амьдрахын тулд хийх ёстой хамгийн үнэ цэнэтэй зүйлсийн нэг бол ямар ч нөхцөл байдал дунд сайн сайханд итгэх явдал гэж би үздэг. Үргэлж ийм байх нь амархан биш. Алдаа зөрүүг нь олж, буруутгаж чичлэх нь угаасаа л хялбар. Бие махбод маань үүнийг хийгээд дадчихсан. Амьдралын сайн сайхныг олж харж, итгэх нь өөрөө сонголт юм.

Хамгийн муу муухай нь тохиолдох юм шигээр тааварлаж суухын оронд хамгийн сайн сайхнаар итгэ.

Амьдралаа чиглүүлэх сөрөг өгөгдлөө зэрэг болгон өөрчлөх шийдвэр билээ. Хамгийн муу муухай нь тохиолдох юм шигээр тааварлаж суухын оронд хамгийн сайн сайхнаар итгэ. Хамтран зүтгэгчдийнхээ талаар хамгийн сайн сайхнаар итгэ. Чуулганыхаа талаар хамгийн сайн сайхнаар итгэ. Хань

ижлийнхээ талаар хамгийн сайн сайхнаар итгэ. Эрүүл мэндийнхээ талаар хамгийн сайн сайхнаар итгэ. Үр хүүхдийнхээ талаар хамгийн сайн сайхнаар итгэ. Ирээдүйнхээ талаар хамгийн сайн сайхнаар итгэ. Амьдралынхаа нөхцөл байдал, амьдралдаа байгаа хүмүүсийн талаар хамгийн сайн сайхнаар итгэснээр амьдралыг харах үзэл бодол чинь бүхлээрээ өөрчлөгдөхөд та гайхан баярлах вий.

Биднийг Тэр хайрласны адилаар бие биенээ хайрла гэсэн шинэ тушаалыг Есүс өгсөн. Хайр хамгийн сайн сайханд итгэдэг гэж Бурханы Үгэнд заасан байдаг (1 Коринт 13:7). Үнэндээ, хайрлана гэдэг бол хүн бүрийн талаар “хамгийн сайн сайхнаар итгэхэд үргэлжид бэлэн байх” явдал гэдгийг Библид хэлжээ. Өдрийн туршид хамгийн сайн сайхан итгэл өвөрлөнө гэсэн сэтгэлгээтэйгээр өглөө бүрийг угтагтун. Үүнийг л хүн өөртөө зориудаар суулгах ёстой гэж би боддог!

Та хичнээн бага мөнгө авахаа, урт өдөр хүлээж байгааг бодсоор өглөө бүр ажилдаа ирдэг эхний хоёр хүн шиг байж болно л доо. Эрмэлзэл тэмүүлэлгүй энэ хандлагаасаа болоод амьдралыг үзэх үзэл нь дундуур гутранги болжээ. Эсвэл та гүйцэтгэх ёстой ажил гэхээсээ амьдралд ховорхон тохиох боломж гэж харсан гурав дахь хүнтэй адил байж болно. Хийж байгаа зүйлдээ ач холбогдол өгч, өдөр бүрийн үүргээ баяр хөөртэйгөөр гүйцэтгэж байсан. Энэ бол аливаа зүйлийг хэрхэн харж байгаатай л холбоотой асуудал. Тэд гурвуулаа адилхан ажил хийж байсан ч нэг нь л ажилдаа дуртай байжээ.

Хийж байгаа зүйлээ эергээр харахад хэцүү болох үед Христэд үйлчилж байгаа гэдгээ өөрөө өөртөө сануулах нь сэтгэлгээгээ өөрчлөхөд асар тустай байдаг. Колоссай 3:23-24:

“Та нар юу ч хийсэн, хүмүүсийн төлөө бус, Эзэний төлөө [үүнийг хийж өгч байна гэж] чин зүрхнээсээ (сэтгэл зүрхээ зориулж) хийгтүн. Учир нь та нар Эзэнээс [хүмүүсээс биш] өв залгамжлалын [жинхэнэ] шагналыг хүлээн авахаа мэддэг [баттай мэддэг]. Та нар Эзэн Христэд (Мессиад) үйлчилж байгаа юм”.

Найдвар тээсэн хандлага

Найдвар тээх, егзөр зан гаргах хоёр хамтдаа оршин тогтнож чадахгүй. Тийм учраас амьдралдаа байгаа хүмүүс болон өдөр тутмын үүрэг харицулагынхаа талаар хамгийн сайнаар итгэх нь чухал юм. Ингэснээрээ найдвар улам дэвжиж, егзөр зан үгүй болно. Өөчлөн шүүмжлэх сэтгэл, гомдол тоочих хандлагаасаа та салах аваас баяр баяслыг бүр шинэ төвшинд мэдрэх болно. Байж л байх юм шигээр санаж байсан хүмүүсийнхээ төлөө та талархах сэтгэлтэй болно. Өдөр тутмын үүрэг хариуцлагаа залхмаар ачаа гэж биш олдошгүй боломж мэтээр хардаг болно. Аливааг харах хараагаа өөрчилж засаад, Бурханы харж байгаагаар харахаар сонгох аваас амьдрал чинь өөрчлөгдөнө.

Аз жаргалгүй амьдарч байгаа ихэнх хүмүүс аз жаргалгүй, гутранги зүйлс дээр анхаарлаа төвлөрүүлдэг болохоороо л тийм байдаг. Тэд бусдаас дандаа муу муухайг нь олж харж, болж бүтэхгүй болгоныг л хөндөн ярьж, ерөнхийдөө л сөрөг зан авир гаргадаг. Харин найдвар үүний яг эсрэгээр ажилладаг. Найдвар нь хамгийн муу муухайг биш, хамгийн сайн сайхныг л олж хардаг. Тийм ч учраас найдвар нь аз жаргал авчирдаг. Ямар нэг сайн юм хийж өгөх гэж байна гэж Бурханыг та хүлээдэг бол баяр хөөрөө барьж дийлэхгүй ээ. Ямар нэг сайн зүйл болно гэж хүлээдэггүй болохоороо л маш олон хүмүүс цөхрөнгүй, гутранги амьдардаг.

Найдвар нь хамгийн муу муухайг биш, хамгийн сайн сайхныг л олж хардаг.

Хүүхэд бага насандаа би маш эмгэнэлтэй муухай, хүчирхийлэл доромжлол их амссан. Үүнээс болоод баяр хөөртэй, аз жаргалтай байна гэдэг нь ямар байдгийг би ерөөсөө мэддэггүй байлаа. 23 настайдаа би Дэйвтэй гэрлэсэн юм. Тэгээд хэдхэн долоо хоногийн дараа л тэр надаас: “Чи яачихаад байгаа юм бэ? Яагаад бүх юмыг ингэж сөргөөр, муугаар хараад байгаа юм бэ?” гэж асууж байсныг би тодхон санаж байна.

Тэгэхэд нь: “Яах вэ дээ. Сайн юм болоосой гэж хүсэхгүй бол, сайн юм болоогүй гээд сэтгэлээр унахгүй” гэж би хариулж байсансан. Хүн ингэж хэлнэ гээд бодоод үз дээ? Тийм ээ, би ингэж хэлж байсан юм шүү дээ. Тухайн үедээ би үнэхээр л ингэж бодож байсан.

Миний амьдралын философи энэ л байв. Сайн юм болно гэж хүсэн хүлээхгүй байснаараа шархалж гомдон, сэтгэлээр унахаас өөрийгөө би хамгаалж байна гэж бодож байлаа. Сурч дадсан юм минь байсан тул ямар ч нөхцөл байдлаас сөрөг мууг нь би шууд л олоод тодорхойлчихдог байв. Харин итгэл найдварын талаар маш их зүйлийг энэ олон жилийн туршид Бурхан надад зааж өгсөнд би үнэхээр их баярлан талархдаг. Тэр миний хандлагыг өөрчилж, Түүн дээр, Түүний Үгэн дээр оюун бодлоо төвлөрүүлэх, байнга тийш хандуулахын ач холбогдлыг харуулж өгсөн. Ингээд би үргэлжид муу муухай юм болно гэж хүлээдэг хүн байхаа больсон юм. Таныг хийгээсэй гэж ятгаж байгаа зүйлээ би өөрөө ч хийдэг. Би сайн сайхан зүйлийг зориуд хайж, хүсэн хүлээдэг. Надад юмуу надаар дамжуулаад Бурханы хийсэн аливаа сайн зүйлийг анзаарч, тэмдэглэж авахын тулд би зориуд тогтмол цаг гаргадаг. Бурханы сайн сайхныг илүү анзаардаг болох тусмаа өдөр бүр улам л баяр хөөртэй, илүү их хүлээлттэй амьдарч эхэлдэг.

Найдвар бол бүхэлдээ хандлагаас хамаардаг. Бурханы тусламжтайгаар, та ч, би ч амьдралд учирч буй бүх зүйлийн талаар... нөхцөл байдал ямар ч байсан хамаагүй, эерэг хандлагатай байж чадна. Тухайн өдрийн туршид юу ч тохиолдсон байхамаагүй, найдвар, баяр хөөр дүүрэн байхын тулд Бурханд итгэж, ямар ч нөхцөл байдалд хамгийн сайн сайхнаар итгэснээрээ эерэг үзэл бодол тээхийг сонгогтун.

- Өглөө босоход хүүхэд чинь ханиад хүрчихсэн байгаад хичээлдээ явж чадахгүй болчихвол үүнийг эергээр харахаар сонго. Энгийн нэг ханиаднаас ноцтой зүйл биш байгаад нь Бурханд таларх;
- Угаалтуураас ус шүүрээд, гал тогооны шалаар дүүрэн

ус алдчихсан бол ийм юм болоход гэртээ байж таарсны-
хаа төлөө, бүр том асуудал болохоос нь өмнө мэдсэний-
хээ төлөө Бурханд таларх;

- Хими цэвэрлэгээнд өгсөн хувцсыг чинь буруу цэвэр-
лээд баллчихсан бол эергээр харах гэж хичээ. Шинэ
хувцас худалдаж авах шалтаг гарж байна;
- Ажлаасаа халагдлаа ч эергээр харахаар сонго. Илүү
сайн ажил олох боломж нээгдэж байгаа хэрэг биш үү.

Ямар ч гэнэтийн сорилт бэрхшээл, хэцүү байдал тулгар-
лаа гэсэн баяр хөөрөө үүгээр сүйдлүүлэхгүй юм шүү гэж урьдаас
дотроо баттай шийд. Баяр хөөргүй, аз жаргалгүй байлаа гээд

*Ямар ч гэнэтийн
сорилт бэрхшээл,
хэцүү байдал
тулгарлаа гэсэн
баяр хөөрөө үүгээр
сүйдлүүлэхгүй юм
шүү гэж урьдаас
дотроо баттай шийд.*

муухай царайлахаас өөр ямар ч нэ-
мэргүй. Тиймээс үүнд цагаа битгий
үр. Хэрхэн яаж амьдрахаа өдөр тут-
мын аар саар зүйлсээр бүү шийдүүл.
Дургүй хүрмээр онцгүй нөхцөл бай-
дал дунд ч инээмсэглэхийг хичээ. Ма-
шины түгжрээ, үсээ самнаагүй зэрэг
жигжиг сажиг юмаар аз жаргалаа бүү
бусниул.

Үнсэн овооноос үзэсгэлэнтэй сайхныг бүтээх нь

Бурханы Үгэнд өгөгдсөн амлалтуудын улмаас л ямар ч
нөхцөл байдалд сайн сайхныг олж харах, эерэг үзэл бодол
тээх зэрэг нь боломжтой зүйл болсон. Ром 8:28-д (NIV) элч
Паул хэлэхдээ: “Түүнийг хайрладаг, Түүний зорилгын дагуу
дуудагдсан хүмүүсийн сайн сайхны төлөө бүх зүйлийг Бур-
хан сайнаар эргүүлдгийг бид мэднэ” гэжээ. Энд Бурхан *зарим
зүйлийг л* таны сайн сайхны төлөө эргүүлдэг гээгүй байгааг
анзаар. Харин *бүх юм* гэжээ. Бүхий л нөхцөл байдал дунд, бүх
учрал бүрд, бүх зовлон дунд, бүхий л шаналал дунд *бүх юмыг*
таны сайн сайхны төлөө Бурхан эргүүлж байгаа.

Таны туулсан хамгийн хүнд хэцүү зовлонг ч таны сайн сайхны төлөө ашиглаж Бурхан чадна. Исаиа 61:3-т (NKJV): Тэрээр танд: “үнснээс үзэсгэлэн гоог бүтээж”, “гашуудлын оронд баяр хөөрийн тосыг” өгнө хэмээн айлджээ. Таны туулж буй зовлон, хүнд хэцүү байдлын шалтгаан нь Бурхан биш ээ. Гэхдээ таны шархыг Тэр эдгээж, үзэж туулсан бүхнийг чинь таны төлөө, бусдын төлөө ямар нэг гайхалтай сайхан зүйл гүйцэлдүүлэхийн тулд ашиглаж чадна.

Миний үзэж туулж байгаа ямар ч төвөг бэрхшээлийг Бурхан сайн сайхнаар эргүүлж чадна гэдэгт итгэх нь найдвар өвөрлөсөн хандлагаар үүнийг туулж гарахад тусалдаг гэдгийг би өөрийн амьдралаар амссан. Яг л Бурханы амласнаар цаг үргэлж, дахин дахин хэрэгждэг гайхалтай амлалт энэ мөн. Хөхний хорт хавдар тусах үед минь, хүүхэд байхдаа амссан бэлгийн хүчирхийллийн нөлөөг даван туулахад минь, итгэж байсан нөхөд миний эсрэг босох үед гээд тоолж баршгүй олон удаа энэ зарчим миний амьдралд биелэгдсэн. Яг одоо та юу ч туулж байлаа гэсэн: “Бурхан үүнийг миний сайн сайхны төлөө эргүүлж чадна” гэж итгэж, тунхаглаарай. Сэтгэл санаа чинь хүртэл дээрдээд ирэхийг та мэдрэх болно.

Хүлээхдээ ч баяр хөөртэй бай

“Баяр хөөртэй, найдвар дүүрэн байхад хамгийн хэцүү цаг мөч хэзээ байдаг вэ?” гэж хэрвээ танаас асуувал: “Залбиралд хариулах юмуу хэрэгцээтэй зүйлийг хангаж өгнө хэмээн Бурханыг хүлээх үе” гэж та хариулах сайхан боломж гарна. Тэр ч байтугай, автомашины түгжрэл дунд хүлээж байхад, хамт хаа нэг тийш явна гээд хань ижлээ хүлээж байхад нь та хожимдож байгаа үед ч бас тийм санагдаж болох юм. Шинээр орсон кассны хүн хэтэрхий удаан бичиж байгаа болохоор хүнсний дэлгүүрт дэндүү удаан дугаарлан зогсох үе ч байж болно. Эсвэл таны залбирч байсан хүмүүс өөрчлөлт гаргатал хүлээх үе, эсвэл тасалж чадахгүй байсан муу зуршлаасаа чөлөөлөгдөх гэж хүлээж байх үе ч байж болох юм. Хүлээх

огтхон ч амархан биш. Гэхдээ хүн бүр л амьдралдаа хэзээ нэг цагт хүлээлттэй учирдаг билээ. Хүлээх зуураа баяр хөөрөө, амар амгалангаа алдчихсан олон хүнийг би танина. Тэдний нэг нь бүр сайн танил. Яагаад гэвэл, тэр хүн би өөрөө байхгүй юу! Гэхдээ олон жилийн турш над дээр ахиц гарч, хэрхэн “сайнаар хүлээх” тал дээр би улам л өсөж хөгжиж байгаадаа талархдаг. Хүлээж байх цаг мөчүүддээ ч гэсэн бид Эзэний баяр хөөрийг амсаж чадна гэж би итгэдэг. Хэрхэн хүлээхээр сонгосон бэ гэдэгт л учир бий.

Хүлээж байх цаг мөчүүддээ ч гэсэн бид Эзэний баяр хөөрийг амсаж чадна.

Исаиа 40:31-д (AMP): “Харин Эзэнийг хүлээгчид [Түүнээс найдан хүлээж, харж, найдвараа тавигчид] өөрчлөгдөж, хүч нь шинэчлэгдэнэ...” гэсэн байдаг. Хүлээх явцдаа та хүчирхэгжиж чадна. Гэхдээ Эзэнээс найдан хүлээж, харж, найдвараа Түүнд тавьсаар хүлээх юм бол шүү дээ. Бурханыг хүлээх зуураа цөхөрч, тэвчээр алдарч, гундаж гутраад ямар ч ашиггүй. Хүсэн хүлээж, зөгнөн мөрөөдсөн хандлагатай байснаараа л хүлээлтийн улирлыг та амьдралынхаа агуу сайхан үе болгож чадна. Хүнсний дэлгүүрт дугаарлаж зогсохдоо ч хүртэл, Библид Түүний хэлснээр, бидэнд өгөгдсөн цаг мөч бүр Түүний мутарт атгаастай байгаа гэдэгт итгэснээрээ сайн сайханд итгэж найдахаар сонгож бид чадна. Явах нислэгийг маань хойшлуулснаараа ямар нэг аюул ослоос биднийг Бурхан хамгаалж байж ч болох юм. Эсвэл сүнсээрээ төлөвшихөд минь туслах үүднээс “Өөрөө оролцон хойшлуулж”, арга хэмжээ авч байж ч магадгүй.

Санхүү мөнгөөр хангагдахын төлөө, сэтгэл санаа, бие махбодын өвчин эдгэрч илаарьшихын төлөө, хань ижилтэй болох, албан тушаал ахих боломж, эсвэл үр хүүхэд гэртээ буцаж ирэхийн төлөө та залбирч, хүлээж байсан байж болох юм. Чухам юу ч байлаа гэсэн, та хүлээж авахаасаа ч өмнө... сайн сайхан зүйл болно гэж итгэх аваас баяр хөөртэйгөөр хүлээж чадна. Яг энэ хүү шиг юм:

“Нэгэн хүн Бэйсболын бяцхан лиигийн тэмцээн дээр ирж гэнэ. Тэгээд сэлгээний сандал дээр сууж байсан хүүгээс ямар оноотой байгааг асуув. “Хүү 18:0 бид хожигдож байна” гэж хариулав. Нөгөө хүн “Өө, за за, одоо ч чи тэгвэл сэтгэлээр уначихсан байгаа юм байна даа” гэв. Хүү огт үгүй бид хариу цохилтоо ч хийгээгүй байна шүү дээ гэж хариулав”.²

Эгэл энэ түүхийн бяцхан хүү итгэл найдвараа алдаагүй нь надад их таалагддаг. Бяцхан лиигийн энэ тоглогчийн бөмбөг дамжуулах ээлж хараахан болоогүй, тэдний багийнхан нь хожигдож байгаад сэтгэлээр унасан байх гэж таамагласан. Тоглогчид өөрийн ээлжийг хүлээх зуур нөхцөл байдал базаахгүй харагдаж байлаа. Гэвч хүлээх зуураа гутарч гунихын оронд залуу бэйсболчин өөдрөг байхыг сонгожээ. Тэр сайн сайхан зүйл болно, тэдний баг 18-аас дээш оноо авна гэж итгэж байлаа. Хүлээх зуураа тэр сэтгэл дундуур биш, харин амжилтыг тэсэн ядан хүлээж байв.

Өнөөдөр ямар нэг зүйл хүлээж байгаа бол гаднаас нь хараад та итгэл найдвараа бүү алд, баяр хөөрөө бүү сүйдэл. Харилцаа сэргэхгүй мэт харагдаж байж болно. Санхүү мөнгө орж ирэхгүй юм шиг харагдаж байж ч мэднэ. Нөхцөл байдал өөрчлөгдөхгүй юм шиг, бүх юм бүтэхгүй юм шиг харагдаж байж болох юм. Гэлээ ч хүлээх зуураа сэтгэлээр унан суухын оронд баярлан догдол. Бөмбөг цохих ээлж чинь хараахан ирээгүй байна. Сайн сайхнаар итгэ. Яг хэрэгтэй үед нь, яг хэрэгтэй зүйлийг чинь Бурхан хангаж өгнө гэдэгт итгэ.

Гэлээ ч хүлээх зуураа сэтгэлээр уналгүй, харин баярлан догдол.

Үр дүн нь мэдэгдэхээс ч өмнө сайн сайхнаар итгэхээр та зориг шулуудсан бол хүлээх цаг чинь найдвар дүүрнээр зөгнөн мөрөөдөх үе байх болно.

“Яаж” хамгийн сайнаар итгэх юм бэ?

1 Коринт 13:7-д (АМР): “хайр... бүгдийн сайн сайханд итгэхэд бэлэн, найдвар нь ямар ч нөхцөлд сулардаггүй, энэ нь бүгдийг тэсвэрлэдэг [цуцаж гундахгүйгээр]” гэжээ. Ямар гайхалтай хэлээ вэ? Хайр хүмүүсийн сайн сайханд үргэлж итгэдэг бөгөөд хэзээ ч найдвар тасардаггүй ажээ. Ингэж амьдрах гайхалтай агуу биш гэж үү? “Хүн бүрийн талаар хамгийн сайн сайхнаар итгэхэд бэлэн бас бүхий л нөхцөл байдал дунд бүдгэриггүй найдвар тээнэ ээ?” Яг ийм л баяр хөөр, найдвараар дүүрэн амьдралыг танд Бурхан хүсэж байгаа юм шүү дээ.

Өнөөдөр л таны сөрөг хандлагаасаа салж, найдварыг зуурч авах өдөр чинь байж болно шүү дээ.

Амьдралдаа байгаа нэг юмуу үүнээс олон хүний талаар хам-

гийн сайн сайхнаар итгэж та чадахгүй байгаа бол тэдэнд биш танд л илүү хортой. Өнөөдөр л таны сөрөг хандлагаасаа салж, найдварыг зуурч авах өдөр чинь байж болно шүү дээ. Үүнийг хэрхэн хийх зарим арга замуудаас толилуулъя.

Нягтлан хар

- Тэр хүнээс ямар нэг сайн юм харуулахыг Бурханаас гуйн залбираад, өмнө нь харж байснаасаа илүүгээр нягтлан харах цаг гарга. Түүний юунд нь дургүйгээ та сайн мэдэж байгаа шүү дээ. Харин юу нь танд таалагдаж байгааг олж нээ;
- “Алдаа дутагдлыг нь эрэхийн” оронд, “сайн талуудыг нь харах” гэж хичээ. Тэр хүнээсээ өмнө нь харж чадаагүй байж мэдэх сайн талыг нь ол. Муу талыг нь онцлоод байхаасаа илүү нөөц чадавхийг нь хар.

Ямар нэг сайн сайхан зүйл төсөөл

- Тухайн хүний талаар бид хамгийн муу муухайгаар нь л төсөөлж харах нь олонтаа. “Тэр сэтгэлийг минь

гонсойлгох байх, зориуд намайг гомдоодог, адаг сүүлдээ намайг хаяад явна гэдгийг нь би мэдэж байна” гээд л. Харин ингэж муугаар төсөөлж байхын оронд найдвар бол хамгийн сайнаар нь үргэлж төсөөлдөг юм. Өмнө нь энэ хүн бөөн будилаан хутгаж, хамаг юм нураасан байж болно. Гэвч алдаанаасаа суралцсан байж магадгүй. Танд ивээл болж, гайхшруулах байх гэж түүний талаар төсөөлөөд үз. Тэгээд ийм боломжийг нь өг.

*Бурхан тэднийг яаж харж байгаагаар
та харах гээд үз*

- Бурхан хүмүүсийг хэрхэн хардаг, бид хүмүүсийг хэрхэн хардаг нь хоорондоо маш том ялгаатай. Жишээлбэл, хүмүүс олноороо цуглан Есүс рүү ирэхэд шавь нар тэднийг бөөн яршиг, бөөн ажил гэж харсан бол Есүс тэднийг өрөвдөн харж байсан. Өөрийнхөө хүмүүсийг яаж харж байгаагаар нь та бас адилхан харах нүдийг чинь нээж өгөхийг Эзэнээс гуй. Хайр, ойлголцол, өрөвдөж хайрлах сэтгэлээр харах нүдийг чинь нээх болтугай.

*“Би дургүй” биш, “Би найдаж байна”
гэсэн сэтгэлгээтэй бай*

- Ингэж сурахын тулд их дадлага сургуулилт хэрэгтэй. Гэхдээ хөгжилтэй сайхан дадлага сургуулилт байх болно. Тухайн хүнийхээ дургүй хүрмээр талыг үзэн ядахын оронд түүнд ямар нэг сайн тал байгаа гэдэгт найдаж эхэл. Найдварын үгээ илэрхийлж хэл. “Өөр хүмүүстэй танилцаж нөхөрлөхөөс дургүй хүрч байна” эсвэл, “Энэ хүнтэй зууралдсаар залхаж, дургүй хүрч байна” юмуу “Ийм юм хэлэхээр нь л дургүй хүрээд байдаг юм” гэх мэт юм хэлэх биш, харин “Энэ бүтэлтэй болох байх гэж найдаж байна” эсвэл “Чиний зөв гэдэгт найдаж байна” юмуу “Энэ харилцаа эдгэрнэ гэж би найдаж байна” гэж хэлэх гээд оролдоод үз.

Эхний алхмаа хийх сайн аргууд эдгээр нь мөн боловч бүх аргыг багтаасан жагсаалт биш шүү. Амьдралдаа байгаа хүмүүсийн талаар, нөхцөл байдлынхаа талаар хамгийн сайнаар итгэж, хэрхэн итгэл найдвар дүүрэн байхыг үнэхээр мэдэхийг хүсэж байгаа бол Есүсийн жишээг судлаад үзээрэй. Сайнмэдээний номуудыг унш. Есүс хэрхэн үйлчилж, эдгээж, урам зориг хайрлаж, зааж, хайрлаж байсныг ажигла. Есүс хүмүүст хамгийн сайныг нь хүсээд зогсоогүй хүн бүрийн дотор буй сайн сайхныг ч олж хардаг байсан. Бид дагах учиртай агуу жишээ биш гэж үү? Таны дотроос сайн сайхныг чинь Есүс олж харсанд та баяртай байна уу? Авууштай ямар нэг зүйлийг Тэр олж харжээ! Тэгвэл та ч, би ч бусад хүмүүсийг ингэж харах шийдвэр гаргаж болно. Өнөөдөр эхэлцгээе!

Есүс хүмүүст хамгийн сайныг нь хүсээд зогсоогүй хүн бүрийн дотор буй сайн сайхныг ч олж хардаг байсан.

Найдвар өвөрлөгтүн!

Хамгийн сайн сайхныг эрэн хайж, үүнд итгэхэд баяр хөөр ирдэг ажээ. Алтны судалд хүрэхэд ойрхон байна даа гэж итгэдэг уурхайчинтай л адил, найдвар тээсэн хандлагаар амьдралдаа байгаа хүмүүст, нөхцөл байдалдаа хандах аваас ямар нэг сайн сайхан зүйлийг заавал олж авна.

Тухайн өдрийн бүтэлгүйтлээрээ баяр хөөрөө бүү бусниул. Өдөр бүр учрах таагүй бүхнийг туулахдаа инээмсэглэлээ хадгалсаар байх эерэг хандлага өвөрлө. Зүгээр нэг таагүй зүйлээс илүү том юм туулж байгаа бол бүх зүйлийг таны сайн сайхны төлөө ажиллуулна гэсэн Бурханы амлалтыг санагтун. Тиймээс урагш алхам хийж, найдвар өвөрлөгтүн! Өнөөдөр... эсвэл маргааш... эсвэл нөгөөдөр сайн сайхан зүйлс тохиолдох л болно. Та зөвхөн л тэдгээрийг эрэн хайгтун.

АРВАН НЭГДҮГЭЭР БҮЛЭГ

Найдварын хоригдлууд

“Найдварын хоригдлууд аа! Бэхлэлт [аюулгүй байдал, цэцэглэлийн] уруу буцагтун. Би чамд өмнө байсан цэцэглэлийг чинь хоёр дахин ихээр сэргээнэ гэдгээ яг энэ өдөр тунхаглаж байна”.

Зехариа 9:12 (AMP)

“Найдвар бол сэрүүн хүний зүүд юм”.

—Аристотель

Хотын хүүхдийн эмнэлэгт урт хугацаагаар хэвтэн эмчлүүлж байгаа хүүхдүүдэд хичээл завсардалт гаргуулахгүйн тулд хичээлийг нь зааж, даалгавраа хийхэд нь туслах тусгай хөтөлбөр нэгэн том хотын сургуулиуд дээр хэрэгжсэн тухай түүхийг би сонсож билээ. Тэр хөтөлбөрт ажилладаг нэг багш ээлжит дуудлагаа авч, өвчтэй байгаа хүүхдэд гэрийн даалгаврыг нь хүргэж өгөх болжээ. Хүүгийн багштай товчхон яриад, аль тасгийг нь мэдэж авав. Хүүгийн ангийн багш: “Бид нэр үг, үйлт нэрийн тухай үзэж байгаа л даа. Хичээлээс хэт хоцрогдуулахгүйн тулд түүнд энэ ухагдахуунуудыг тайлбарлаад өгчихвөл танд тун их баярлахсан” гэжээ.

Эмнэлэг дээр хэрэгжиж буй хөтөлбөрийн нөгөө багш тэр оройноо хүүтэй уулзахаар очжээ. Юу хийхийг нь түүнд тайлбарлаж өгсөн хэрнээ, хүү ямар айхтар түлэгдэж бэртсэнийг, ямар их өвдөж шаналж байгааг хэн ч дурдаагүй юмсанж. Хүүг

харангуутаа цочирдсон багш өөрийн эрхгүй ээрч мууран: “Нэр үг, үйлт нэрийг ойлгоход чинь туслуулахаар намайг танай сургуулиас явууллаа” гэж гэнэ. Тэр орой эмнэлгээс гарч явахдаа тийм ч амжилттай байсангүй дээ гэж багш эмэгтэй бодож байжээ.

Харин маргааш нь эмнэлэг рүү иртэл нэг сувилагч түүн рүү гүйж ирснээ: “Тэр хүүг та өчигдөр ячихсан юм бэ?” гэж асуужээ. Өөрийгөө ямар нэг буруу зүйл хийж гэж таамагласан багш уучлал гуйж эхлэв. “Үгүй дээ. Та намайг буруу ойлгоод байна. Тэр хүүг тэсэхгүй нь гэж бид санаа зовж байсан юм. Гэтэл өчигдөр оройноос түүний хандлага тэс өөр болчихсон. Тэр өөрөө өвчинтэйгөө тэмцэж, эмчилгээ үр дүнтэй болж эхэлж байна. Тэр амьдаръя гэж эргэлт буцалтгүй шийдсэн хүн шиг л байгаа” гэжээ.

Харин тэгэхэд юу болсныг хоёр долоо хоногийн дараа хүү тайлбарлаж өгсөн ажээ. Нөгөө багшийг эмнэлэг дээр ирэхээс өмнө хүү цөхөрч, бүрэн найдвар тасраад байжээ. Харин багш өрөөнд нь орж ирснээр бүх зүйл өөрчлөгдсөн байна. Гэв гэнэт л ухаарсан зүйлээ хүү ингэж ярьжээ: “Үхэж байгаа хүүд нэр үг, үйлт нэрийн талаар заалгахаар багш явуулна гэж байхгүй биз дээ?”¹

Найдварын хүч гэдэг гайхалтай. Өвчиндөө баригдаж, муу мэдээ сонсоод сэтгэлээр унан, эмнэлгийн өрөөнд хэвтэж байсан хүү хэдийнээ шантарч цөхөрсөн байлаа. Харин өөрт нь туслах гэсэн сэтгэлтэй нэг багш, гэрийн даалгавар хоёр л хүүгийн амьдралыг харах харааг өөр тийш эргүүлэх итгэл найдвар авчирч, тэмцэн урагшлах учир шалтгааныг бий болгож өгчээ. Ганц хүн ийм их найдварыг авчирч чаддаг юм бол та өөрийгөө үргэлж ийм хүмүүсээр хүрээлүүлбэл ямар байхыг төсөөл дөө. Таван хүн, арав, хорин хүн юу хийж чадах бол?

Таны амьдралд юу болох бол? Үнэн гэвэл, таныг хүрээлж буй зүйлс танд нөлөөлнө, гүн гүнзгий нөлөөлнө. Найдварыг дэвжээдэг хүмүүсээр, үйл явдал, үйлдлээр та амьдралаа дүүргэх аваас найдвар, өөдрөг сэтгэлээр бялхах болно. Харин амьдралаа гутранги хүмүүсээр дүүргэж, сэтгэлээр унагах,

сөрөг муу юманд оролцохоор сонговоос үргэлж л сэтгэлээр унаж, энэлж шанална. Өдөр бүр өөрийгөө та юугаар хүрээлүүлэх вэ гэдгээс л энэ бүхэн шалтгаална.

Гэхдээ ингээд л амьдралд байгаа бүхий л сөрөг муугаас зайлсхийж чадна гэсэн үг биш ээ. Өөрсдийгөө хүрээлүүлсэн зарим зүйл яг ч бидний хүсэл, сонголтоор болдоггүй. Гэлээ ч хамгийн боломжтой сайн сонголтыг л бид хийж чадна.

Таныг хүрээлж буй найдвар

Зехариа 9:12-т найдвартай бид ямар хамаатай талаар нэг сонин үг хэлсэн байна. Библийн энэ ишлэлд, Бурхан Өөрийн хүмүүсийг “найдварын хоригдлууд” гэж нэрлэжээ. Тэрээр: **“Найдварын хоригдлууд аа!** Бэхлэлт [аюулгүй байдал, цэцэглэлийн] уруу буцагтун” хэмээн (тодотгол нэмэв) айлджээ.

“Найдварын хоригдлууд” гэсэн энэ дүрслэлд би дуртай. Бодоод үз л дээ. Хэрвээ та найдварын хоригдол юм бол энэ талаар танд сонголт алга. Та сөрөг байх, санаа зовнигч байх, итгэл найдвар өвөрлөхгүй байх аргагүй. Хэцүү бэрх цагт ч, сэтгэлээр унасан үед чинь ч таныг хүрээлэх найдвар нь итгэлээрээ босож ирэх шалтгаан чинь болно. Таныг хүрээлэх бүхий л зүйл Бурханд арга зам бий гэнэ. Яг ийм зүйл болоход сүнс дотор чинь нэг юм бургилна. “Надад, надаар дамжуулаад сайн сайхан зүйлс болно!” хэмээн та зоригтойгоор итгэж, тунхаглана.

Энэ номд эхлээд “Найдварын хоригдлууд” гэдэг нэр өгөх гэж байсан юм. Гэхдээ тайлбаргүйгээр хүмүүст ойлгогдохгүй байж магадгүй гэж болгоомжлоод, *“Итгэл найдвараар ирээдүйгээ хар!”* гэдэг шинэ нэр дээр бид тогтсон. Найдвар дотор хоригдчихсон юм шиг тийм их найдвар өвөрлөнө гэж бодохоор надад сайхан санагддаг. Найдварын хоригдол мэт амьдрахад та бэлэн үү?

Өөрчлөх хэрэгтэй бүхнийг өөрчилнө гэдэгт нь Түүнд итгэж, биднийг найдвар дотор хоригдоосой хэмээн Бурхан хүсдэг билээ. Бидний найдвар Бурханд бий! Тэр бүхнийг чадна!

Сэтгэл санаа ямар байна, аливаа зүйлс ямар харагдаж байна гэдгээс үл шалтгаалаад Бурхан ажлаа хийсээр байдаг гэдэгт, яг зөв цагт нь эерэг өөрчлөлтийг бид олж харна гэдэгтээ итгэдэг. Тийм ч учраас найдвар гэдэг бол тууштай, шантаршгүй билээ. Таны чадал барагдаж, тэнхээ сульдан алдрахад бүх зүйл дуусаж байгаа хэрэг биш ээ. Бурханы хүч чадалд ямар ч хязгаар байхгүй. Тэр яндашгүй их хүчтэй. Та найдвараасаа бат зуурч л байвал алзахгүй, ялагдахгүй... Яагаад гэвэл, Бурхан ялагдашгүй юм. Бурхан таны төлөө байгаа учраас ялалт ирэх нь баталгаатай.

Бурхан намайг олон жилийн өмнө үйлчлэлд дуудсан юм. Харин амжилт ганцхан шөнийн дотор бий болчихдоггүй гэдгийг танд өчих байна. Маш их шаргуу хөдөлмөр шаардагдсан бөгөөд Бурханыг би зөв л сонссон байгаа даа гэж санаашрах үе ч зөндөө гарч байсан. Хүмүүс намайг дандаа тийм уриалгачан хүлээж авч байгаагүй юм. Цуглаан болоход ер нь хүн ирэх юм болов уу гэж бодмоор ч үе их тохиолдож байсан. Өнөөдөр дэлхий дахиныг хамраад байгаа энэ үйлчлэлийг барьж байгуулахын тулд Дэйв бид хоёр маш олон жилийн турш бэлтгэсээр, маш олон жилийг Бурханд найдсаар туулсан. Тэр бүх он жилүүдэд шантарч больё гэсэн уруу татлагад би олон удаа орж байсан. Харин миний гэрчлэл юу вэ гэвэл, би энд байсаар байна! Надад маш олон асуулт, эргэлзээ байсан ч, цаашаа үргэлжлүүлэх сэтгэлийн тэнхээ алга гэж бодогдож байсан үеүдэд ч, ямар ч замгүй болсон юм шиг санагдаж байлаа ч Бурхан зам зааж өгч чадна гэдгийг би мэдэж байсан. Дэйв бид хоёр найдвараа Түүнд тавьсан. Бидний хамгийн дэврүүн хүлээлтээс ч давсан агуу зүйлсийг Эзэн хийж өгсөн.

Хэрвээ та найдварын хоригдол байхаар шийдсэн бол Бурхан ямар нэг сайн сайхан зүйлийг заавал хийх болно гэсэн өрнүүн сэтгэлээр хүрээлүүлж амьдрагтун. Яг тэр зүйл танд ирэх болно. Таны зүрх сэтгэлд Бурхан ямар зорилго, мөрөөдлийг суулгасан байна, энэ бүхэн биелэхийг та харах болно. Биелэгдэх байх гэсэн үед чинь энэ бүхэн болохгүй байж магадгүй. Бас таны бодсон шигээр биелэгдэхгүй байж ч бол-

но. Гэвч таны хамгийн өрнүүн дэврүүн хүлээлтээс ч давсан агуу зүйлсийг гүйцэлдүүлэх тийм л арга замаар Бурхан ажиллах болно. Та өөрийнхөө хүчээр энэ бүхнийг гүйцэлдүүлэх гэснийг хэрэггүй. Зүгээр л шантрахгүй, тэсвэрлэсээр байх нь таны ажил. Өөрийгөө найдвараар хүрээлүүлж, боломжтой гэж хэзээ ч бодож байгаагүй тийм арга замуудаар таныг Бурхан ерөөхийг нь хар. 1 Коринт 2:9-д:

Өөрийгөө найдвараар хүрээлүүлж, боломжтой гэж хэзээ ч бодож байгаагүй тийм арга замуудаар таныг Бурхан ерөөхийг нь хар.

“...Нүд үзээгүй, чих сонсоогүй, хүний зүрх сэтгэлд ороогүй юмсыг [энэ бүхнийг] Бурхан Өөрийг нь хайрладаг [Бурханыг хайрлан хүндэлдэг, Түүнийг шаламгайлан дуулгавартай дагадаг, Түүний хайрласан сайн сайхан ерөөлийг талархан олж хардаг] хүмүүст бэлджээ (хийж, бэлэн болгон хадгалсан)” хэмээн айлджээ.

Танд зориулсан олон сайхан гэнэтийн бэлгийг Бурхан бэлдсэн байгаа гэж би итгэдэг. Найдвараа хадгалагтун!

Таны авч явж болохгүй зүйлс

Хоригдол хүн өрөөндөө хууль бус зүйлсийг авч орж болохгүй. Түүний ойр орчинд гаднын юмуу зохисгүй буруу зүйлс байх нь зөвшөөрөгдөхгүй. Аюултай гэж үзэж байгаа тул зөвшөөрөхгүй байгаа хэрэг юм.

Харин та бол найдварын хоригдол. Та төмөр торны цаана байдаг хоригдол биш. Таныг Бурхан сайн сайхнаараа, нигүүлслээрээ, найдвараараа хүрээлэхийг хүсдэг. Та хаашаа ч харлаа гэсэн, хаашаа ч хандлаа гэсэн, баяр хөөр, амар амгалан, бат итгэл, Бурханы ерөөлүүдийг амсах болно. Энэ бол Есүсийн амиа өгч байж танд өгсөн амь амьдрал билээ.

Найдварын орчинд орохдоо таны авч ирж болохгүй зүйлс гэж байгааг ойлгох нь чухал. Яагаад гэвэл, эдгээр нь аюултай

юм. Та найдвараар хүрээлүүлэх гэж байгаа бол ардаа үлдээх ёстой хууль бус зүйлсийн жагсаалт энэ байна:

- сөрөг муу үгс;
- хохирогч сэтгэлгээ;
- бусадтай өөрийгөө харьцуулах;
- амьдралыг гашуунаар харах;
- гомдол зовлон тоочих;
- өөрийгөө өрөвдөх хандлага;
- сэтгэлээр унах, цөхөрч шаналах.

Дайсны энэ бүх ачаанд итгэгч хүн амьдралаараа дарлуулах ёстой юм биш ээ. Та шаналал дарамт дор, найдлага тасрах албагүй. Сэтгэлээр унагаам, амиа

Дайсны худал хуурмаг дээр биш, харин Бурханы Үгийн үнэнд суурилсан амьдралыг та барьж босгож чадна.

хоохойлсон, дайсны муухай худал хуурмагаас та Бурханы тусламжтайгаар ангижирч, найдвараар дүүрэн орчинд амьдарч чадна. Дайсны худал хуурмаг дээр биш, харин Бурханы Үгийн үнэнд суурилсан амьдралыг та барьж босгож чадна.

Библиэс миний иш татах дуртай нэг ишлэл бол 1 Петр 5:7 (АМР) юм. Энд ингэж айлдсан байдаг:

“Тэр та нарт халамж хайраар санаа тавьдаг, харуулдаг анхаардаг учраас бүх зовнилоо [бүхий л түгшүүр, бүхий л санаа зовнил, бүхий л шаналлаа бүгдийг нь нэг мөр] бүгдийг нь Түүнд хая”.

Бид санаа зовнилоо “хаях” ёстой. Юу гэхээр, хол шидээд, хаях гэсэн үг. Сайхан зураглал биш гэж үү? Бид санаа зовнилоо тайлж, дэргэдэх сандал дээрээ тавьж байгаад буцаагаад үүрчихнэ гэж байгаа юм биш. Бид бүрмөсөн хаях ёстой. Бид аль болох хол хаяад, ерөөсөө буцааж авч болохгүй. Бид үүнийг Бурханд хаяж, Тэр бидэнд санаа тавьдаг!

“Би ер нь хэнд ч таалагддаггүй”. “Надтай хамт хоолонд орохыг хүсэх хүн ч байхгүй”. “Миний өвчин ерөөсөө эдгэрэхгүй”.

“Би албан тушаал дэвшиж чадахгүй”. “Би ер нь хүнтэй гэрлэж чадахгүй байх” гэх мэт худал хуурмагийг амнаасаа гаргахаас татгалз. Иймэрхүү гутранги бодлоор өөрийгөө бүү хүрээлүүл. Байгааг нь мэдэнгүүтээ л ийм зовнилуудыг Бурханд хая. Тэгвэл амьдрал чинь дэгжин цэцэглэж эхлэх болно. Сэтгэлийг чинь чилээж байсан түгшүүр, зовнилууд гэнэт л таныг дарамтлах хүчгүй болчихно. Есүсийн “тайвшрал, тайтгарал, сэргээлт, амралт, амар амгалан ерөөл” гэж хэлснийг та амсаж байгаа хэрэг (Матай 11:29-ийг унш) энэ билээ.

Найдварын цэцэрлэг

Хэрвээ бид найдварын цэцэрлэг дотор амьдрах аваас ямар нэг зүйл үргэлж цэцэглэж байх болно гэж хэлж байсан даа. Ер нь цэцэрлэгт олон төрлийн цэцэг суулгадаг бөгөөд энэ бол шинэ амьдралаар буцалж байдаг газар. Нэг төрлийн цэцэг цэцэглэж дуусах үед нөгөө нь нахиалж эхэлнэ. Ийм цэцэрлэгтэй хүмүүс үргэлж л янз бүрийн цэцэгсээр хүрээлүүлж амьдардаг. Манайх гурван янзын буттай, бут бүр өөр өөрийн гэсэн цэцэг ургуулдаг. Нэг нь хавар эрт нахиалж байхад нөгөө нь хаврын сүүлчээр, гурав дахь нь зуны эхэн сард цэцэглэдэг. Ийнхүү манайд үргэлж л цэцэгс алаглан байдаг!

Харин зориуд ширтэж, харах цаг гаргахгүй л юм бол хичнээн их цэцэг байлаа ч үзэсгэлэнтэй сайхныг нь мэдэрч чаддаггүй юм байна гэдгийг би анзаарсан. Үүнчлэн, бидний эргэн тойронд тогтмол болж байгаа сайн сайхан зүйлсийг олж харах цаг гаргаж байх хэрэгтэй ажээ. Мэдээ үзэхээр дэвэн дэлхийд болж байгаа муу муухай бүхнийг л сонсож дуулдаг. Харин зориуд олж харах гэж хичээх аваас бидний эргэн тойронд сайн сайхан зүйлс үргэлж болж байгаа.

Бид асуудал бэрхшээлтэйгээ зууралдаж хамаг цагаа барахдаа амьдралдаа тохиолдож буй сайн сайхныг эрэн хайх зав гаргааа больчих нь зөндөө. Зовлонгийн үед хямралыг давахын тулд хийх ёстой бүхнээ хийх нь чухал боловч амьдралдаа тохиолдож байгаа сайн сайхныг олж харах цаг

гаргах нь үүнээс ч дутахгүй ач холбогдолтой. Үзэж туулж байгаа хэцүү бэрхшээлийг маань тэр сайн сайхан зүйл саармагжуулж чадна гэж хэлж ч болох юм. Амт муутай хоолонд давс нэмдэгтэй л адил шүү дээ. Итгэл найдварын цэцэрлэгт маань өглөө бүр юу нахиалан дэлгэрч байгааг харах цаг гаргах аваас амьдралд учрах сорилт бэрхшээлийг сөрөн туулах илүү их хүч тэнхээг бид олдог ажээ.

Бичих ажлаа түр хойш тавиад, цэцэрлэгт маань юу цэцэглэн ургаж байгааг би очиж харсан юм. Сэтгэл минь сэргээд, өнгөрсөн шөнө сайхан бөх унтсанаа санав. Алтан наран ээж, нөхөр минь өглөө намайг тэвэрч үнсээд гарснаар барахгүй дөнгөж өглөөний арван цаг гучин минут болж байхад л би дөрвөн хүүхдийнхээ гуравтай нь холбогдож, ярилцаад амжчихсан байлаа. Гэвч зээ нарын маань нэг нь яг одоо маш хүнд хэцүү цаг үеийг туулж байна, дотнын найз маань хорт хавдраар өвдсөн, энэ долоо хоногт амжуулах ажил ч зөндөө, бас утас минь эвдэрчихсэн байдаг. Найдварын цэцэрлэг дотор маань юу нахиалан дэлбээлж байгааг олж харах цаг үргэлж гаргадаг байх юм бол “бэрхшээл” гэсэн тодорхойлолтод багтах ямар ч зүйл баяр хөөртэйгөөр шийдээд гарч болохуйц санагддаг.

Та анзаараагүй байж мэдэх ч таны амьдралд ямар нэг зүйл цэцэглэн дэлбээлж байгаа гэдэгт би итгэлтэй байна. Үүнийг олж харах цаг гаргаарай л гэж таныг ятгая.

Хүрээллээ сайжруул

Заримдаа бид найдварын төлөө тэмцэх шаардлагатай байдаг. Найдварыг маань хатааж ширгээх гэсэн хорвоогийн дуу хоолойнуудыг бид дайраад өнгөрөх ёстой болдог. Сөрөг хандлага, баргар царайтай биш хүмүүсээр өөрийгөө хүрээлүүлэх нь чухал юм. Ядаж л, найдвар өвөрлөдөг, найдварыг түгээдэг хэдэн хүн бидний амьдралд байх хэрэгтэй. Шаналж зовон, хэцүү асуудалтай зууралдаж байх үед зовлонгоо дахин дахин тоочихыг минь хүлээж авах хүмүүс рүү өөрийн эрхгүй бид татагддаг л даа. Найздаа зовлонгоо ярьж, залбирч

өгөхийг гуйх нь буруу юм биш. Гэхдээ хэдийнээ найдвараа алдаж, гутарч гунихарсан хүмүүсийг сонгож хэрэггүй юм. Ямар нүхэнд уначихаад байгаагаа бүх юмыг сөргөөр харж байдаг найздаа та хэллээ гэж бодъё. “Миний унасан нүхийг харах юм бол чинийх юу ч биш гэдгийг өөрөө чи мэднэ ээ” гэж өөдөөс чинь хэлэх вий. Ямархуу төрлийн хүмүүсийн тухай яриад байгааг минь та мэдэж байгаа биз дээ.

Өнөөдөр та хүрээллээ сайжруулах хэрэгтэй байна. Сөрөг дуу хоолойг хааж, өөрийгөө найдвараар хүрээлүүл. Өдөр бүр танд урам зориг өгөх тийм хүмүүсийг амьдралд чинь оруулж ирэхийг Бурханаас гуй. Зовлон гунигийг чинь л сануулах хүмүүстэй байнга уулзахын оронд үүнийг даваад гарч чадна, Бурхан чамд тусална гэж хэлэх хүмүүсийг ол. “Дандаа л гутарч гунихарсан, намайг доош чангаа хүмүүсийн дунд байгаа болохоор сэтгэлээр унахаас өөр юу би хийх билээ. Бүгдээрээ л өдөржингөө зовлонгоо тоочдог юм чинь” гэж гутранги үзлээ өмөөрөх амархан. Яг ийм үед л найдварын төлөө тэмц. Сөрөг хандлагатай биш, хов жив сонсохоос татгалздаг хэдэн хүн өөрөө олж ав. Гомдол зовлон тоочигсодтой хамт өдрийн хоолны ширээнд суухын оронд ганцаараа гараад, алх. Гэрт чинь ийм сөрөг нөлөөтэй хүн байх аваас та зайлсхийж чадахгүй байж болох юм. Гэлээ ч ийм сөрөг нөлөөг ядаж жаахан саармагжуулахын тулд эерэг хандлагатай өөр хүмүүстэй уулзаж, гутранги этгээдүүдээс өөрийгөө хааяа ч болов салгаж бай.

*Сөрөг дуу
хоолойг хааж,
өөрийгөө
найдвараар
хүрээлүүл.*

Бурханы Үгийг судлах явдлыг амьдралынхаа нэн тэргүүний зорилго болгон тавь. Ямар ч нөхцөлд байсан тэргүүнийг маань өргөж, найдвар өгөх хүч Үгэнд бий. Өөрийгөө найдвараар хүрээлүүлэхийн тулд хийж болох өөр нэг зүйл бол магтаалын хөгжим, Библийн сайн номлолын бичлэг сонсох явдал. Өнөөгийн техник технологийн дэвшлийн үрээр амь өгөх сургаал номлол, сэргээн шинэчлэх магтаалын хөгжим дуу сонсох, үзэх боломж урьд өмнө байгаагүйгээр өргөн

дэлгэр болжээ. CD байна уу, радио байна уу, утсан дээрх апп-
ликейшн байна уу, видео хичээл байна ялгаагүй, танд тохи-
ромжтой, цаг завд чинь таарч буй юу байна, Бурханы Үгээр
өдөр бүр өөрийгөө хүрээлүүлж тэтгүүлэх боломжийг бий
болго.

Хорон муу хуйвалдаан хийдэг хүмүүс, зовлонтой хэцүү
нөхцөл байдлуудаар биднийг дайсан хүрээлүүлж болох юм.
Гэвч Бурханы Үгэнд айлдахдаа, Өөрийн оршихуйгаар бас
маш олон сайн сайхан зүйлсээр биднийг Тэр хүрээлдэг гэж
заадаг.

*“Та миний хоргодох газар,
Та намайг зовлон шаналлаас хамгаалан
Та намайг авралын дуугаар хүрээлдэг”.*

Дуулал 32:7

*“Иерусалимыг уулс хүрээлэн байдаг шиг
Өдгөөгөөс мөнхөд хүртэл
Өөрийн хүмүүсийг Эзэн хүрээлнэ”.*

Дуулал 125:2

Найдвар өвөрлөгтүн!

Хэрвээ та сөрөг хандлага, эргэлзээ, тээнэгэлзэл, санаа
зовнил, цөхрөл шаналлаар хүрээлүүлсээр ирсэн бол одоо
өөрчлөлт хийх цаг болжээ! Энэ бүх зүйлээр амьдралаа
цаашид захируулах албагүй юм. Та хүрээллээ өөрчилж
чадна. Та найдвараар амьдарч чадна. Таны нөхцөл байдал
өөрчлөгдөхөөс ч өмнө, сэтгэл сүнсэндээ өөрчлөлтийг хийж та
чадна. Найдварын хоригдол байн, амьдралдаа алдсан бүхнээ
хоёр дахин ихээр сэргээж Бурханаас хүлээн авахаар хүлээн
найдахаар сонгож болно.

АРВАН ХОЁРДУГААР БҮЛЭГ

Хэн нэгний залбирлын хариу байгтун!

*“...хүн бүр [зөвхөн] өөрийн ашиг сонирхлыг
бус, харин бусдын ашиг сонирхлыг хүндэлж,
харж, санаа тавь”.*

Филиппой 2:4 (AMP)

“Найдвар тасрах нөхцөл байдал гэж бай-
даггүй. Харин юунд ч найдаж сураагүй хүн
гэж л байдаг”.

—Кларе Бүүт Луис

Хэрэв та аз жаргал, итгэл найдвараар дүүрэн амьдрахыг хүсэж байвал бусдад тусал. Энэ тун хачин сонсогдож байгааг би мэдэж байна. Гэхдээ үнэхээр ийм байдаг. Зөвхөн амин хувиа бодохоо больж, бусдад тус болох арга замуудыг эрж хайж эхэлснээр та өөрийнхөө асуудал бэрхшээлийг анзаарахаа болино. Үг, үйлдлээрээ хүмүүст найдвар, урам зориг өгөх үед тэдэнд өгсөн бүхэн тань хэд дахин өсөж үржин ургацаа өгдөг.

Фермер талбайдаа ургамал тариалахдаа эхлээд жижигхэн үр суулгаад, хэсэг хугацааны дараа гэр бүлээ тэжээхүйц арвин их ургац хураан авдаг. Бид юу тарина түүнийгээ хурааж авах болно гэсэн Бурханы амлалт одоо ч гэсэн намайг гайхшруулдаг. Хэрэв бид ямар нэг зүйл авахыг хүсэж байгаа бол яг тэр зүйлээсээ бусдад өгөх хэрэгтэй.

Канзас хот дахь “Зүрхнээс зүрхэнд” олон улсын байгууллагыг үндэслэгч, Гэри Морш эмч ядуу буурай улс орнуудыг эмнэлгийн тоног төхөөрөмжөөр хангах тал дээр маш их зүйлийг хийсэн. Тэрээр “Бусдад үйлчлэхийн хүч” номдоо Энэтхэгийн Калькутта хотын “Үхлийн ирмэгт буй ядууст үйлчлэх Тереза эхийн төв”-д сайн дурын ажил хийж байсан тухайгаа өгүүлсэн байдаг.

Тэрхүү төв нь хорвоог орхих нь тодорхой болсон хүмүүст үйлчилдэг газар юм. Асарч сувилах хүнгүй, эмнэлгийн тусламж үйлчилгээ авах мөнгөгүй хүмүүсийг Тереза эх сайн дурын ажилчдынхаа хамтаар энэ төвдөө авчирч тусалдаг байжээ. Энд маш хүнд өвчтэй хүмүүст эмнэлгийн үйлчилгээ үзүүлэхээс гадна, өдөр бүр үгээгүй ядуу хүмүүст санаа тавьж халамжлан тусалдаг байв.

Мэргэжлийн арвин туршлагатай, өөртөө бат итгэлтэй Морш эмч энэ газрын зайлшгүй хэрэгцээг мэдэж байсан учраас их зүйлийг хийнэ гэсэн урам зориг дүүрэн иржээ. Тэрээр: “*Би энэ газрыг үгүй хийнэ. Би маш том туслах учраас энэ байгууллага нэрээ солихоос өөр аргагүй болно доо*” гэсэн тун ч дээгүүр бодол тээж ирсэн байна. Тэр зөв газраа, зөв санаа өвөртлөн ирсэн боловч угтах өдрүүдэд тохиолдох зүйлсэд бэлэн биш байжээ.

Моршийн ахалсан сайн дурын 90 ажилтантай баг Тереза эхийн байгуулсан төвд ажиллахаар ирэхэд англи аялгатай, намуухан дуутай Прискила гэлэнмаа тэднийг угтаж, тус бүрийнх нь хийх ажлыг хуваарилан өгөв. Морш өөрийгөө эмч гэдгийг гэлэнмаад мэдэгдэх санаатай чагнуураа хүзүүн дээгүүрээ ил харагдахаар тохжээ. Хэрэв Прискила үүнийг мэдвэл мэргэжлийнх нь ур чадварт тохирсон чухал ажил даалгах нь гарцаагүй.

Прискила хүн нэг бүрд янз бүрийн ажил үүрэг хуваарилж өгснийхаа дараа өмнөө зогсох Гэрид хандан: “Намайг дагаад явна уу” гэж хэлэв. Тэд явсаар эрэгтэйчүүдийн тасагт ороход, өвчиндөө энэлэн шаналж, үхлээ хүлээж буй хүмүүс тэр өрөөгөөр дүүрэн байлаа. “*Тийм ээ, намайг ийм ажил хүлээж байгаа*

гэдгийг би таамаглаж байсан юм” хэмээн Моршийг бодож байх зуур Прискила өрөөн дундуур явсаар дараагийн тасаг руу явж оров. Тэр өрөөнд амьдралынхаа сүүлийн өдрүүдийг үдэж буй эцэж туйлдсан эмэгтэйчүүд байв. “Хамгийн их хэрэгцээ байгаа газар энэ л байж таарлаа. Тэд намайг энд ажиллуулах гэж байгаа юм байна” гэж Моршийг таамаглаж байтал Прискила гэлэнмаа цааш алхсаар байлаа. Тийнхүү явсаар ил гал дээр будаа агшааж буй гал тогооны өрөөнд орох үед Моршийн сэтгэл зовж эхлэв. “Тэд яагаад эмч хүнийг энэ гал тогоонд ажиллуулах гээд байгаа юм бол?” хэмээн гайхаж байтал Прискила гал тогооны өрөөн дундуур шаламгай гэгч алхсаар гарлаа.

Тэрээр галт тогооны өрөөг өнгөрөн гаднах нарийхан гудамжид гарч, муудаж ялзарсан маш том хогон овоог заагаад: “Та энэ хогийг гудамжны төгсгөлд байгаа хогийн далан руу зөөх хэрэгтэй байна. Далан эндээс хэдэн хороолол өнгөрөөд баруун талд байгаа. Олно биз дээ” гэж хэлээд, хоёр хувин, нэг хүрз бариулчихаад инээмсэглэлээр үдэн яваад өгөв. Хогны үнэрт Морш өөрийн эрхгүй хамраа дармаар болж байлаа.

Морш хэрхэхээ мэдэхүй, хэсэг зуур алмайран зогсов. Энэ ажлаас татгалзах ёстой юу, эсвэл хэн нэгэнтэй ярилцах хэрэгтэй юу? Түүнд жаахан гомдолтой санагдаж байлаа. Тийнхүү нэг, хоёр минут хэртэй эргэцүүлснээ, тухайн мөчид өөрийнх нь хийж чадах цорын ганц зүйл бол оноосон ажлыг хийх явдал хэмээн эвлэрч ажилдаа оржээ. Эрхэм хүндэт эмч маань бүхэл өдөржингөө ялзарч өмхийрсөн хогийг хотын хогийн цэг рүү зөөв. Орой гэхэд нэвт хөлөрч, өмхий самхай ханхалсан тэрээр бүх хогийг зөөж дуусгасан байлаа.

Сэтгэлээр унаж, уурласан Морш ирсэн замаараа гал тогооны өрөө, эмэгтэйчүүдийн тасаг, эрэгтэйчүүдийн тасгаар дайран, багийнхаа гишүүдийг цуглуулаад буудалласан газар руугаа явав. Тэдгээр өрөөн дундуур явж байхдаа Морш өөрийнх нь үйлчлэлийг арай илүү зүйлд ашиглаж болох байсан талаар, үгүй ядахдаа л гал тогооны ажилд тусалсан бол хог зөөснөөс хамаагүй дээр байхгүй юу гэж бодож байлаа. Тэрээр

ёсыг бодон Прискила гэлэнмаад баяртай гэж хэлэхээр хүлээж зогсохдоо гараар бичиж хадсан нэгэн бичиг байхыг анзаарав. “Бид агуу зүйлсийг бус, харин өчүүхэн жижиг зүйлийг агуу хайраар хийж чадна” хэмээн Тереза эхийн үгнээс бичиж тавьсан байлаа.

Тэр мөч Гэри Моршид эргэлтийг авчирчээ. “Миний зүрх хайлан урсах шиг болсон. Би хамгийн гол зүйлийг бүрмөсөн алдсан байжээ. Надад тэр сургамж хэрэгтэй байж. Бусдад үйлчлэхэд миний эзэмшсэн мэргэжил, мэдлэг боловсрол, зэрэг дэв огт хамаагүй. Хамгийн гол нь хэрэгтэй бүхнийг хайраар хийх хандлага ба чадвар юм” гэж Морш хэлсэн байдаг.

Тийнхүү Тереза эхийн эрхэм найз болох зорилгодоо Гэри Морш тууштай байж, бусдын амьдралд тус дэм болох онцгой чиг зорилгыг олж авсан юм. Тэрээр Энэтхэгийн үгээгүй ядуус үйлчлэхээр илүү олон багийг Калькуттад авчирсан бөгөөд тэнд ирэх бүрдээ багийнх нь ажилчид ажил үйлчлэлээсээ маш их зүйл сурч байгааг харахдаа сэтгэл хангалуун байдаг байлаа. “Сайн дурын ажилтнууд маань ихэнхдээ яг л миний анхны ирж байсан шиг өөртөө хэт итгэлтэй ирдэг ч бусдад үйлчилж байх явцдаа бүгд өөрчлөгддөг байлаа” гэж Морш дурссан байдаг.¹

Найдварыг олж авахын тулд түүнийг бусдад өг

Үйлс 20:35-д ингэж бичжээ:

“Ингэж зүдэж зүтгэж байж л дорой нэгэндээ тус болох ёстойг би та нарт бүх талаар үзүүлсэн. Мөн Эзэн Есүсийн айлдсан “Авахаасаа өгөх нь илүү ерөөлтэй” гэсэн (хүнийг илүү баяр хөөртэй, атаархмаар болгодог) үгийг санагтун гэж хэлэв”.

Бусдад тусалснаар танд өөрт тань аз жаргал ирдэг гэж Есүс хэлсэн. Харин бид үүний эсрэгээр бодож төсөөлдөг. Зөвхөн өөртөө бүх анхаарлаа хандуулж, хичээнгүйлэн ажиллавал аз жаргалыг олж авч чадна гэж бид боддог. Их мөнгө олж,

эд хөрөнгө хурааж, бодож төлөвлөсөн бүхнээ гүйцэлдүүлж, багыг алдаж, ихийг олж, бусдад хүлээн зөвшөөрөгдөж чадах юм бол аз жаргалтай байх болно гэж итгэдэг. Тиймдээ ч нэг л өдөр тэрхүү аз жаргалд хүрэхийн тулд бид улам бүр хичээж, шаргуу хөдөлмөрлөдөг.

Бидний эргэн тойронд ядарч туйлдсан хүмүүс олон байгаа гэдгийг би хэлмээр байна. Аз жаргалын эрэл нь аз туршсан, хэцүү ажил байдаг. Би өөрөө удаан хугацаанд тэгж амьдарсан учраас сайн мэдэж байна. Амьдралынхаа олон жил би нэлээд төөрч будилсан христэч байсан. Би Бурханд хайртай байсан ч, тэр бүр аз жаргалтай байж чаддаггүй байлаа. Тийм болохоор сэтгэлээр унахдаа ч амархан байсан. Машинд маань дуу орох, Дэйв Бямба гаригийн өглөөг надтай өнгөрөөхийн оронд гольф тоглохоор явах, хүүхдүүд маань өөдөөс санал зөрөх, хийхээр төлөвлөсөн зүйлсээ бүгдийг нь хийж амжихгүй байх гэх мэт зүйл тохиолдвол тэр өдрийг сайхан өнгөрөөх бүх найдвараа алдаж орхидог байв. Аз жаргалын төлөө шаргуу ажиллах тусам аз жаргал улам бүр хол байх шиг санагдана.

Харин тэдгээр өдрүүдэд Бурхан надад амьдралаас хэрхэн таашаал авахыг харуулдаг байсан. Бурханы Үгнээс суралцах тусмаа би, миний бодол санаа, үг яриа, хандлага амьдралд маань маш их нөлөөлдөг юм байна гэдгийг олж харсан. Бодол санаа, сэтгэлийн хөдөлгөөндөө захирагдаж болохгүй юм байна гэдгийг ойлгосон. Бурханы тусламжтайгаар би тэр бүхний цаана гарч, Христ амиа өргөн байж надад өгөхийг хүссэн тэрхүү амьдралд сэтгэл хангалуун байх боломжтой гэдгийг ухаарсан.

Эдгээр сэдвээр Бурханы Үгэнд заасан зарчмуудыг би олон жилийн турш бичиж, бас зааж ирсэн боловч, хэрэв бид итгэл найдвар, аз жаргалаар дүүрэн амьдрахыг хүсвэл энэ бүхнийг бусдад өгөх хэрэгтэй гэдгийг Бурхан надад ойлгуулсан. Энэ бол надад Түүний харуулсан хамгийн энгийн бөгөөд хүчирхэг зүйлсийн нэг байлаа. Та өөрийн асуудал бэрхшээлээс хараагаа салгаад бусдад туслахад анхаарлаа чиглүүлэх үед Бурхан гайхамшигтай зүйлийг хийх болно.

Цөхрөл гутрал, хэрэгцээгээ хойш тавиад, эргэн тойрондоо байгаа хүмүүст туслахад бүх анхаарлаа хандуулах бүрд миний хандлага бүхэлдээ өөрчлөгддөг. “Бурхан, надад... хэрэгтэй байна” эсвэл “Эзэн минь, надад яагаад... байдаггүй юм бэ?” гэж залбирахынхаа оронд “Бурхан минь, би өнөөдөр хэн нэгэнд яаж туслах вэ?” юмуу “Эзэн минь, хэн нэгний хэрэгцээг хангах боломжийг надад өгөөч” гэж би залбирч эхэлсэн. Хэн нэгний залбирлыг хариулахад Бурханаар ашиглагдана гэдэг ямар их баяр хөөрийг авчирдгийг би олж мэдсэн.

*Зөвхөн өөр
рүүгээ биш, харин
бусад руу харах
үед таны төсөөлж
ч байгаагүй
тийм гайхалтай
итгэл найдвар, аз
жаргал байдгийг
та мэдэх болно.*

Та ч бас иймэрхүү зүйлийг анзаарсан байх. Өгөх нь авахаасаа илүү ерөөлтэй. Таны аз жаргалыг дүүрэн болгохуйц хангалттай хэмжээний эд мөнгө хурааж, амжилтад хүрнэ гэж байхгүй. Хүний аминч үзэл хэзээ ч ханнаж цаддаггүй. Гэхдээ зөвхөн өөрийгөө биш, харин бусад руу харах үед таны төсөөлж ч байгаагүй тийм гайхалтай итгэл найдвар, аз жаргал байд-

гийг та мэдэх болно. Гэри Морш, түүний сайн дурын багийнхны адил та “бусдад үйлчлэх явцдаа өөрчлөгдөх” болно.

Миний тусламж хэрэгтэй хэн нэгнийг надад харуулахыг би өдөр бүр Бурханаас асуудаг. Заримдаа Тэр надаар нэлээд том зүйл хийлгэдэг боловч, бараг хэнд ч анзаарагдахааргүй жижиг зүйл хийлгэх удаа ч цөөнгүй байдаг. Өнөөдөр манай жорлонг засахаар нэг хүн ирлээ. Засаж дууссаныхаа дараа тэр хүн надтай хоромхон зуур ярих зөвшөөрөл асуув. Зөвшөөрч байгаагаа түүнд хэлтэл, тэрээр таван хүүхэдтэй, эхнэртэй гэдгээ хэлээд, миний номнуудаас алиныг нь Ээж нарын өдрөөр эхнэртээ бэлэглэвэл зүгээр вэ гэж асуулаа. Би түүнтэй гэр бүлийнх нь талаар хэсэгхэн зуурт ярилцсаны эцэст номын тавиур руугаа дагуулж очоод, эхнэртээ зориулаад хоёр ном авахыг санал болгов. Энэ явдал ердөө хэдхэн минутад болж өнгөрсөн бөгөөд надаас ямар ч хөлс хүч шаардаагүй. Харин түүний хувьд маш чухал мөч байсан. Түүнд

хийсэн өчүүхэн эелдэг үйлдэл маань өнөөдрийн турш намайг аз жаргалтай болгоно гэдэгт би итгэлтэй байна. Энэ гайхамшигтай зарчмыг ойлготлоо нэлээд урт хугацааг алдсандаа би харамсдаг ч ямартаа ч мэддэг болсондоо талархдаг. Бид бусдад эелдэг сайхан сэтгэлээр хандсанаар амьдралдаа урам хугарах явдалтай өдөр бүр тэмцэх боломжтой.

Хамгийн агуу Нэгэн хүртэл үйлчилдэг

“Америкийн хувьсгалын үеэр морь хөлөглөсөн, энгийн хувцастай нэгэн эр хамгаалалтын жижиг бэхлэлтийг засварлаж байгаа хэдэн цэргийн дэргэдүүр өнгөрчээ. Дарга нь тэдэн рүү хашхичин зааварчлах авч өчүүхэн ч туслах шинжгүй байв. Морьтой эр түүнээс яагаад цэргүүддээ туслахгүй байгааг нь асуухад, тэрээр “Эрхэм ээ, би бол ахлах түрүүч” хэмээн бахдангуй хариулжээ.

Өнөөх үл таних хүн түүнээс уучлал гуйгаад, мориноосоо буун, ядарч сульдсан цэргүүдэд тусалж эхэлжээ. Ажил дууссаны дараа тэрээр ахлах түрүүчид хандан, “Ноён ахлах түрүүч ээ, дараагийн удаа танд яг ийм ажил гараад, ажиллах хүч дутагдвал ерөнхий командлагчдаа хандаарай. Би ирж танд туслах болно” гэв. Тэрхүү үл таних хүн Жорж Вашингтон байсан юм”.²

Та хичнээн чухал хүн болсон байлаа ч өөрийгөө бусдад туслахад хэтэрхий ахдахаар чухал хүн гэж бодож болохгүй. Магадгүй, та олон жилийн ажлын туршлагатай, хувийн амьдралдаа болон албан ажилдаа маш их амжилтад хүрсэн, нэрийнхээ өмнө элдэв мундаг цол гуншинтай байж

Та хичнээн чухал хүн болсон байлаа ч өөрийгөө бусдад туслахад хэтэрхий ахдахаар чухал хүн гэж бодож болохгүй.

болох ч өөрийгөө даруу болгож, бусдад туслахад томдохоор тийм чухал хүн огт биш. Есүс өндөр дээд газраас доош буун ирж, Өөрийгөө даруу болгон боолын дүрийг авсан (Филиппой 2:7). Түүнийг даруу байдлын үлгэр жишээгээ болгохыг Бичвэр бидэнд заадаг (Филиппой 2:5).

Дэлхийг хамарсан томоохон үйлчлэлийн ерөнхийлөгч байх аз завшаан надад тохиосон. Би өдөрт маш олон шийдвэр гаргаж, олон газар очих хэрэгтэй болдог. Энэ бүх боломжийг надад олгосонд би Бурханд талархдаг ч, амьдралын минь хамгийн баяртай мөчүүд дандаа хурлын танхимд хуралдаж, эсвэл индэр дээр номлож байхад тохиолддоггүй юм. Эдгээр зүйлд баярлах тусам миний амьдралын хамгийн баяртай, сэтгэл хангалуун мөчүүдийн маань нэг нь *“Найдварын гар”* хэмээх үйлчлэлдээ оролцож хүмүүст тусалж байсан үе санагддаг. Сайн дурын ажилтнуудтайгаа хамтдаа өлсөж буй хүмүүст хоол хүнс тарааж, ядууст хичээлийн хэрэгсэл өгч, цангасан хүмүүст ундны усны худаг гаргах гэх мэтчилэн хүмүүст ивээл ерөөлийг түгээх бүрд бид тэр бүхнийг ямар учраас хийж байгааг минь надад сануулдаг. Бусдад найдварын гараа сунгахдаа би шинэ итгэл найдлага, шинэ аз жаргалыг хүлээн авдаг. Би олон удаа гуравдагч орны ядарч туйлдсан ард түмэнд үйлчлэхээр явж байсан. Тэгэхдээ тэдэнд үйлчлэх боломж олдсонд харамсаж байсан удаа ер үгүй.

Алдагдсан итгэл найдварыг нь хүмүүст эргүүлэн өгөх зорилготойгоор бид энэ үйлчлэлээ хориод жилийн өмнө эхэлсэн. Тийм ч учраас үйлчлэлээ *“Найдварын гар”* гэж нэрлэх ёстой мэт санагдсан. Бусдад найдвар бэлэглэж байдаг хүмүүс өөрсдөө итгэл найдвараа алдах боломжгүй гэдгийг хэлэх нь зүйтэй гэж би бодож байна.

Есүс бол энэ дэлхийн гэм нүглийг авч явахаар ирсэн, Бурханы Хүү билээ. Тэрээр Бурханы Хүү атлаа хүмүүст үйлчлэхэд цаг гаргасан байдаг. Марк 10:45-д: “Учир нь Хүний Хүү үйлчлүүлэхийн тулд бус, харин үйлчлэхийн тулд мөн олны төлөө (тэдний оронд) амиа золиос болгон өгөхийн тулд ирсэн” гэж Есүс айлдсан байдаг. Есүс цаг үргэлж хүмүүст ту-

салж, олон хүнийг хооллож, өвчтэй хүнийг эдгээж, хүүхдүүдтэй хамт цаг өнгөрөөж, тэр ч байтугай дагалдагч нарынхаа хөлийг угааж байсныг бид Сайнмэдээний номуудаас уншиж мэддэг. Есүс бусдад үйлчлэхдээ маш их баяр хөөртэй байдаг байсан байж таарна. Яагаад гэвэл, Тэр үүнийг цаг үргэлж хийдэг байсан. Өөрийнх нь замналаар замнах боломжийг өгөхийн тулд Тэр бидэнд ийм үлгэр жишээг үлдээсэн юм.

Есүс бусдад үйлчлэхдээ маш их баяр хөөртэй байдаг байсан байж таарна. Яагаад гэвэл, Тэр үүнийг цаг үргэлж хийдэг байсан.

Бидний даган дуурайх үнэхээр гайхамшигтай үлгэр жишээ биш гэж үү. Хэрэгтэй хүнд нь найдвар өгөхөд хэтэрхий чухал хүн, эсвэл хэтэрхий завгүй хүн бүү бай. Ивээл ерөөлөө өгч болох хүнийг хайх цагийг өдөр бүр гаргаж бай. Зүгээр л энгийн нэг эелдэг дохио зангаа юмуу, эсвэл нэлээд томоохон буяны өглөг ч юмуу, хэрэгцээтэй хүнд тусалж чадах юуг ч байсан хийгээрэй гэж би таныг урамшуулж байна. Таны тусалсан хүн ерөөгдөөд зогсохгүй та ч өөрөө ерөөгдөх болно.

Хүмүүст Есүсийн тухай ярих хамгийн сайн арга бол Түүнийг тэдэнд харуулах явдал юм

Ром 2:4-д (NKJV) Бурханы сайн сайхан нь хүмүүнийг хөтлөн гэмшилд хүргэдэг хэмээн сургасан байдаг. Та өөрийн найз нөхөд, хөрш, ажлын газрынхандаа сайхан хандсаны үр дүнд тэднээс хэд нь Есүсийг хүлээн авах байсан бол. Заримдаа бид хүн бүрд тунхаглахаа болиод, хүмүүст эелдэг хандаж, тэдэнд үнэн сэтгэлээсээ анхаарал хандуулж, тэдний төлөө залбирч, тэдэнд хэрхэн үйлчилж болох талаар мэдрэмжтэй байхад туслахыг Бурханаас гуйж эхлэх хэрэгтэй байдаг. Өөрөөр хэлбэл, бид Есүсийн хайрыг хүмүүст “харуулах” ёстой байдаг.

Иаков 2:15-16 ишлэлд:

“Хэрэв ах дүү чинь, эсвэл эгч дүү чинь нүүцэн, өдөр тутмын хоолоор дутагдаж байхад нь, та нарын

нэг нь тэдэнд “Амар тайван яв. [өөрөө] Дулаацах болтугай, цадах болтугай” гэж хэлчихээд биед нь хэрэгцээтэй байгаа зүйлсийг нь тэдэнд өгөхгүй бол ямар ашигтай юм бэ?” гэжээ.

“Амар тайван яв. Дулаацах болтугай, цадах болтугай” гэж хэлдэг хүмүүс болохгүйн тулд хичээцгээе. Хэрэв хэн нэгэн

Хэрэв та Бурханыг хэн нэгэнд туслаач гэж залбирах гэж байгаа бол таныг хэн нэгэнд туслуулахаар явуулахад нь бэлэн бай.

хүнд хэрэгцээ байгаа бол, түүнийг нь та хангаж чадахаар байгаа бол хангаж өгөөрэй. Бид хүмүүст туслахын тулд юу хийж болохоор байгааг Бурханаас асуух ч үгүй хэрнээ: “Би чиний төлөө залбирна аа” гэх төдийгөөр аргацааж, бодит туслалцаа үзүүлэх

гүй байх нь олонтаа тохиолддог. Өөрөө хялбархан хангаад өгчих хэрэгцээний төлөө Бурханаас асууж, залбирах шаардлагагүй юм байна гэдгийг би сурсан. Харин бид магадгүй тэгж хийхийг хүсдэггүй. Хэрэв та Бурханыг хэн нэгэнд туслаач гэж залбирах гэж байгаа бол таныг хэн нэгэнд туслуулахаар явуулахад нь бэлэн бай.

Оросод өлсгөлөн нүүрлээд байсан хүнд бэрх цагт Библи түгээх багийн бүрэлдэхүүнд багтан тэнд очсон тухайгаа нэг хүн ярьсан юм. Зүсэм талх, таваг шөлөнд дараалан зогсох хүмүүс дээр тэд Библиэ авч очжээ. Багийнхны нэг нь дараалалд зогсох нэгэн эмэгтэйд Библиэ өгөх гэтэл тэрээр ихэд уурсан: “Хоосон ходоодыг минь чиний наад Библи дүүргэж чадахгүй биз дээ” гэжээ. Мэдэгдэхүйц, бодит тусламж үзүүлээгүй хэрнээ хэн нэгэн сайн Бурханы талаар ярьсанд нь тэр эмэгтэйн дургүй их хүрсэн байх. Библи тараахаар очсон тэр хүмүүс тэр явдлыг хэзээ ч мартаагүй. Тэдний зовлон шаналлыг эхлээд хөнгөлөхгүй бол тэд Сайнмэдээг сонсож чадахгүй гэж хэлж байгаад зарим хүмүүс маш ихээр гутарч байгаа гэдэгт би итгэлтэй байна.

Гэхдээ хүмүүст Библи өгөх хэрэггүй гэж би мэдээж хэлээгүй, харин тэдэнд Бурханы үгийг хүргэхийн хажуугаар хэрэгцээг нь хангаж өгөх хэрэгтэй гэж хэлж байгаа билээ. Есүс

чухамдаа үүнийг л хийдэг байсан. Есүс хүмүүст Үгийг дамжуулж, *бас* хэрэгцээг нь хангадаг байсан. Тэр тэднийг хооллож, эдгээж, тэдэнд зааж сургаж, тэднийг сонсдог байсан. Тэр Эцэгийн энэрэл хайрын тухай ярихаас илүүг хийдэг байсан. Тэрхүү энэрэл хайрыг *бодитоор харуулдаг* байсан.

Хэрэв таны амьдралд өнөөдөр Есүсийг мэдэх шаардлагатай хүн байгаа бол Сайнмэдээг өөр арга замаар хуваалцаад үзэхийг зөвлөж байна. Христ дотор олж авсан найдварын тухай тэдэнд ярихын оронд тэрхүү найдварыг өг. Тэдний хэрэгцээг олж хараад, түүнийг нь хангаж өгөхөд туслахыг Бурханаас гуй. Магадгүй тэдэнд хоол хүнс, машины шатахуун, эсвэл эмчид үзүүлэх мөнгө хэрэгтэй байж болох юм. Аль эсвэл шөнө нойр бүтэн хонохын тулд хүүхдийг нь харах хүн хэрэгтэй байж ч болно. Магадгүй, зүгээр л өөрийг нь сонсох хүн хэрэгтэй байж ч болно. Тэдэнд Есүсийг харуулахын тулд та юу хийж чадахаар байна түүнийгээ л хий. Хүмүүсийн бодит хэрэгцээнд туслах үед тэд сүнслэг хэрэгцээгээ тун амархан нээн ярьж байгааг хараад та гайхах болно.

Хүмүүсийн бодит хэрэгцээнд туслах үед тэд сүнслэг хэрэгцээгээ тун амархан нээн ярьж байгааг хараад та гайхах болно.

Найдвар өвөрлөгтүн!

Амьдрал бол зөвхөн би өөрөө биш гэдгийг үргэлж санаж байх нь чухал. Магадгүй бид амьдралын хүнд бэрхийг туулж байж болох юм. Тийм үедээ бид яах ийхийн зуургүй зөвхөн өөртөө анхаарч, бидэнд туслахыг, хэрэгтэй зүйлээр маань хангахыг, бидэнд байхгүй зүйлийг өгөхийг Бурханаас гуйдаг. Гэхдээ өөрт тань шууд нөлөөлж байгаа асуудлыг шийдэх явцдаа өөрийнхөө эргэн тойронд байгаа хүмүүсийг бүү март. Таныг хаашаа ч харсан тэнд таны хангаж өгч чадах зүйлээр гачигдаж дутагдсан найз нөхөд, төрөл садан, ажлын хамт олон, хөршүүд болон үл таних хүмүүс байдаг.

Найдварыг хүлээн авах хамгийн сайн арга бол түүнийг бусдад түгээх юм. Бурханы үзлээр бол, сүүлчийнх нь эхнийх (Матай 20:16-г унш), хамгийн өчүүхэн нь хамгийн агуу (Лук 9:48-ыг унш), сул дорой хүн хүчирхэг (Иоел 3:10-ыг унш) байдаг бөгөөд өгвөл (Лук 6:38-ыг унш) хүлээн авдаг. Тиймээс урагш алхаж, найдвар өвөрлөгтүн. Зүгээр л бусдад тусалж, тэдний амьдралд талархан баярласнаар та өөрийнхөө амьдралд сэтгэл хангалуун байх цоо шинэ арга замыг олж нээж чадна. Эргэн тойрноо анзаараад, хэнд тусалж чадахаар байгаагаа олж хар. Энэ тийм ч хэцүү зүйл биш гэдгийг би танд амлаж байна. Таны танилуудаас хэн нэг нь яг одоо Бурханаас тусламж гуйн залбирч байна. Магадгүй та түүний залбирлын хариулт болох боломжтой.

АРВАН ГУРАВДУГААР БҮЛЭГ

Найдвар бол бидний зангуу

“Бидэнд байгаа сэтгэлийн зангуу мэт найдвар нь баттай бөгөөд аюулгүй...”

Еврей 6:19 (NIV)

“Найдахгүй байх нь тэнэг хэрэг юм”.
—Эрнест Хемингүэй, *“Өвгөн, тэнгис хоёр”*

Биднийг тогтвортой байж, эргэн тойрондоо болж байгаа зүйлээс үл хамааран жаргалтай амьдраасай гэж Бурхан хүсдэг гэдэгт би итгэдэг. Тэрээр биднийг Өөрт нь нэгэн үзүүрт сэтгэлээр бэхлэгдэж, ямар ч үед итгэл найдвараар дүүрэн байхыг хүсдэг. Бидний хувьд итгэгч гэдгээ харуулах хамгийн чухал гэрчлэл бол бидний баяр хөөр гэж би боддог. Бидэнд баярлан хөөрөх зүйл асар их бий. Бид уучлалыг хүлээн авч, эдгээгдэж, эрх чөлөөтэй болсон. Есүс бидэнд зөвхөн Тэнгэрийн улсад мөнх амьдрах замыг нээж өгөхийн төлөө амиа өгөөгүй, харин энэ дэлхий дээр өдөр бүр баяр жаргалтай амьдрах боломжтой гэсэн амлалтыг өгдөг. Энэ дэлхий дээрх хамгийн аз жаргалтай хүмүүс бол христитгэгчид байх ёстой!

Энэ дэлхий дээрх хамгийн аз жаргалтай хүмүүс бол христитгэгчид байх ёстой!

Хэдийгээр бид Бурханы хүүхдүүд ч гэсэн бидэнд сорилт туршилт, зовлон шаналал тулгардаг бөгөөд энэ бүхэнд бодол санаа, зан авир, хандлагаа удирдуулчихсан явах үе олонтаа

тохионо. Бидний инээмсэглэлийг хулгайлах боломжийг бид тэдгээрт өгдөг бөгөөд энэ бол туйлын эмгэнэлтэй явдал юм. Учир нь бидний нүүрэнд тодрох Эзэний инээмсэглэл бол Есүсийг хүмүүст таниулах агуу сурталчилгаа юм. Бурхан бүх зүйлийг Өөрийг нь хайрладаг, амьдралд нь зориулсан Түүний төлөвлөгөөг эрж хайдаг хүмүүсийн сайны төлөө ажиллуулна гэсэн амлалт бидэнд байсаар атал тулгарсан хүндрэл бэрхшээл биднийг аз жаргалгүй болгож яахин чадах билээ.

Аз жаргал, баяр хөөр гэдэг тав тух, сонголт төдий зүйл биш юм. Харин аз жаргал, баяр хөөр бол Христ дорх бидний амьдралын маш чухал хэсэг билээ. Нехемиа 8:10-д: “...Бүү шанал. Учир нь ЭЗЭНий баяр баясгалан та нарын хүч чадал юм” гэсэн байдаг бол Ром 14:17-д: Бурханы хаанчлал бол “Ариун Сүнс дорх зөвт байдал, амар тайван хийгээд баяр баясгалан нь юм” хэмээсэн байдаг. Хэрэв та ялалтаар дүүрэн амьдрахыг хүсэж байгаа бол баяр хөөр туйлын чухал.

Найдвар: Аз жаргалгүй байдлыг эдгээх байгалийн анагаагч

Баяр хөөр, итгэл найдвар хоёр үргэлж хамт явдаг. Бурхан таны амьдралд гайхалтай зүйлийг хийнэ гэж итгэн, Бурханд үнэнээр найдаж эхлэх үед таны амьдралд баяр хөөр цутган орж ирдэг. Та өөрөө хүсэж байсан ч урам хугарч, шаналж чадахгүй болно. Найдвар бол аз жаргалгүй байдлыг эдгээх байгалийн анагаагч юм.

Найдвар бол аз жаргалгүй байдлыг эдгээх байгалийн анагаагч юм.

Миний ингэж итгэдэг зөв эсэх, таны амьдралд үйлчлэх эсэхийг та туршаад үзэж яагаад болохгүй гэж? Дараагийн удаа та гуниглаж, сэтгэлээр унах үедээ зориуд цаг гарган: “Надад тулгараад байгаа асуудлыг миний сайны төлөө Бурхан ашиглах учраас надад ямар нэг сайн зүйл болно гэж би найдаж байна” гэж бодоорой. Тэгээд бодсон зүйлээ чангаар хэлж тунхаглаарай. Энэ үйл явцыг бүтэн өдрийн турш

давтаарай. Танд үнэндээ тэгж санагдахгүй байгаа ч энэ бол үнэн. Бурханы үнэн бидний бодол мэдрэмжийг ялан дийлэх хүчтэй. Гагцхүү бид тэгэх боломжийг өгөх хэрэгтэй.

Бурханы сайн сайханд итгэх үед бидэнд төрсөн түгшүүрт бодол, мэдрэмж арилж, сэтгэл санаа тогтворждог. Тэр биднийг тайтгаруулж, урам зориг өгдөг. Бидний сэтгэл (оюун санаа, хүсэл, мэдрэмж) Бурханы амлалт дотор амарлин тайвширдаг. Хэрэв хүнд итгэл найдвар байхгүй бол амьдралын шуурган дунд сэтгэл түвшин, тогтвортой байх боломжгүй. Амьдралд гуйвж дайвалгүй зуурах бат бөх үндэс суурь тэндэнд байдаггүй. Хэрэв Бурханы дотор бидэнд найдвар байхгүй бол бид үргэлж аюулгүй байх найдвартай газрыг энэ дэлхий дээрээс олно гэж үү? “Энэ дэлхий дээр тийм газар байхгүй” гэвэл шударга хариулт болно.

Сэтгэл санаагаа өргөх гэж “хичээх” юмуу, нөхцөл байдал өөрчлөгдөх хүртэл сэтгэл санаа тайвшрахгүй нь дээ гэж бодож суухын оронд Бурханы Үг таны амьдралд ажлаа хийх боломжийг өг.

Амьдрал тань баяр хөөрөөр дүүрэн байх боломжтой. Бага залуудаа би хэзээ ч баяр хөөртэй байгаагүй учраас энэ амьдралынхаа сайхныг мэдэрч, аз жаргалаар дүүрэн байх болно гэж олон жилийн өмнө оюун бодолдоо суулгасан. Бурханы үйлчлэлийг хийж байхдаа ч би ихэнхдээ зав чөлөөгүй ажиллаж, хөдөлмөрлөж, тэмцэлдэж, бас өөрийгөө буруутгадаг байлаа. Би өөрийнхөө алдаа дутагдалд анхаарлаа хандуулдаг байсан учраас ихэнх өдөр өөрийгөө буруутгаж, ер нь л их гутранги байдаг байсан. Эцэст нь би Есүс намайг баяр хөөртэй байж, амьдралдаа сэтгэл хангалуун (Иохан 10:10) байхыг үнэхээр хүсэж байгааг ойлгосон. Бурханы хаант улсад байдагтай адил энэ дэлхий дээр ч гэсэн баяр хөөртэй байх боломжтой, харин түүнийг барьж тогтооход шийдэмгий байдал шаардлагатай. Таны аз жаргалыг булаах гэж дайсан чадах бүхнээ хийх болно. Тэр таны амгалан тайвныг алдагдуулж, буруутгалын дарамт дор хүлж, Бурханы хайранд итгүүлэхгүй байхын тулд худал хэлж, хууран мэхлэх болно.

Итгэл найдвар алдагдаж, баяр хөөргүй болох үедээ та энэ бүхэн диаволын ажил гэдгийг тэр даруй ухаарч, түүнийг эсэргүүцэх хэрэгтэй.

Та амьдралдаа талархаж, түүний талбар бүрээр баярлан бахдах шийдвэр гаргаж чадна. Хүнд хэцүү мөч тулгарсан ч,

Таны найдвар, баяр хөөр энэ дэлхийн нөхцөл байдал дээр биш, харин таны амьдрал дахь Бурханы сайн сайханд суурилсан учраас та аз жаргалтай байж чадна.

хайрлаж халамжилдаг хүмүүс чинь таныг шүүмжилсэн ч та амьдралд баярла. Таны найдвар, баяр хөөр энэ дэлхийн нөхцөл байдал дээр биш, харин таны амьдрал дахь Бурханы сайн сайханд суурилсан учраас та аз жаргалтай байж чадна. Удахгүй ямар нэг сайхан зүйл болно гэсэн найдвар, хүлээлттэй амьдрах үед баяр хөөр нь бидний ердийн хандлага болж хувирдаг.

Хэрэв таны баяр хөөр нөхцөл байдлаас хамаарч байгаа бол та энэ хандлагаа өөрчлөхөөс нааш нөхцөл байдал тань хэзээ ч өөрчлөгдөхгүй нь ойлгомжтой юм. Хүсээгүй нөхцөл байдал үүссэнээс болж аз жаргалгүй байхын оронд, бидэнд Есүс дотор найдвар байгаа учраас аз жаргалтай байцгаая.

Энэ дэлхий дээр ахуй нөхцөл маань үргэлж өөрчлөгдөж байдаг. Хүмүүсийн сэтгэл санаа нь яагаад тогтворгүй байдгийг ойлгоход тун хялбар. Яагаад гэвэл, тэдний эргэн тойронд байгаа бүх зүйл тогтворгүй байдаг. Юмс нэг өдөр сайн байснаа, нөгөө өдөр нь тийм ч сайн биш болдог. Хүмүүс таныг нэг өдөр хайрлаж байснаа дараагийн өдөр нь хайрлахаа больж ч мэднэ. Та өнөөдөр ажилтай байгаа бол маргааш ажлаа алдаж ч болно. Өнөөдөр танд хангалттай мөнгө байгаа ч дараагийн өдөр нь гэнэтийн зардал гарч та мөнгөгүй хоосорч ч мэднэ. Хүүхдүүд чинь өнөөдөр маш сайн байснаа маргааш нь таны зааж сургасан бүхнийг мартаж орхисон мэт аашлах боломжтой. Хэрэв бид сэтгэл мэдрэмж, эсвэл юмсын харагдаж байгаа байдлаар удирдуулах юм бол бидний сэтгэл санаа тогтворгүй, маш их савалгаатай байх болно. Харин тэр ямар

ч эргэлзээгүйгээр итгэлээрээ гуйг. Биднийг салхиар туугдан давалгаалах тэнгисийн долгио мэт (Иаков 1:6) гэж элч Иаков хэлсэн бол элч Паул, давалгаанд энд тэнд шидэгдэх хөлөг онгоц адил (Ефес 4:14) өөрчлөлтийг даган дайвалздаг хэмээн дүрсэлсэн байдаг. Гэвч сэтгэлийн зангуу мэт найдвар бидэнд байвал ямар ч зовлон бэрхшээлийн дунд тогтвортой, гуйвшгүй байж чадна.

Далайн шуурга болоход далайчид хамгийн түрүүнд хийдэг нэг зүйл бол зангуугаа буулгах юм. Усан онгоц ямар нэг хөдөлгөөнгүй зүйлд уягдсан учир далайчдын эргэнд тойронд байсан бүх юм хөдөлж дайвалзаж байсан ч тэд хөдлөхгүй. Учир нь тэд далайн ёроолтой аргамжлагдсан байгаа. Бурхан доторх бидний найдвар яг л ингэж нөлөөлдөг. Бидний эргэн тойрон дахь бүх юм ганхан дайвалзаж байхад бид Түүний дотор тогтвортой, бат суурьтай байж чаддаг.

Найдвараа өндөрт хөөргөцгөө

Энэ дэлхийн санаа зовнил, айдас түгшүүр биднийг доош чангаахыг биш, харин Бурхан дахь найдвар маань бидний сэтгэлийн зангуу болохыг бид хүсдэг. Бурхан дахь найдвар бол хязгаар үгүй баяр хөөр юм. Энэ дэлхийн санаа зовнил, ачаа дарамт түүнийг доош нь чангааж чадахгүй. Та бүхэн агаарын бөмбөлгийг төсөөл дөө. Хэдийгээр бөмбөлөг дээш хөөрөхийн тулд бүтээгдсэн ч түүнээс хүнд юм дүүжилж, газраас бэхэлбэл хөөрч чадахгүй. Таны амьдрал ч мөн үүнтэй адил. Хэрэв та санаа зовнилын дарамтад дарагдаж, айдас түгшүүрт хүлэгдэх юм бол Бурханаас танд зориулан өгсөн амьдралын амтыг мэдэрч чадахгүй. Таныг доош нь татах гэсэн ачаа дарамтаас салахыг би танд уриалж байна. Найдварыг зангуугаа болгож, түүгээр бэхлэгдэх нь санаа зовнилын ачаанд дарагдахаас огт өөр зүйл юм.

Танд ачаа дарамт болдог зарим зүйлийг энд дурдъя.

Бусадтай адил байх гэсэн санаархал

Би бусадтай адил байх шаардлагагүй юм байна гэдгийг мэдсэн тэр мөчид маш их эрх чөлөөг мэдэрсэн. Өөртэйгөө огт адилгүй хэн нэгэнтэй адил болох гэж хичээснээрээ бусдад хүлээн зөвшөөрөгдөнө гэж найдах хэрэггүй. Бурхан намайг зөвхөн өөрөөрөө байхаар л бүтээсэн.

Харин би үүнийг ойлгохоосоо өмнө олон жил хэн нэгний хэвэнд таарах гэж хичээж явсан. Би яг л Дэйв шиг зөөлөн аядуу байхыг хичээсэн боловч удаан тэсээгүй. Мөн цуглааныхаа пасторын эхнэр шиг намуухан яриатай, дөлгөөн хүн болохыг хичээсэн ч бас л амжилт олоогүй. Өөр хүн болох гэж хичээх бүрдээ би сэтгэлээр унаж орхидог байлаа. Гэхдээ үнэндээ би хэн нэгний хуулбар байхаар бүтээгдээгүй... тэгж ч чадахгүй.

Бурхан таныг зөвхөн өөрөөрөө байхаар л бүтээсэн. Хэрэв та амьдралдаа сэтгэл дүүрэн байхыг хүсэж байгаа бол Бурхан таныг хэн байхаар бүтээсэн түүнд сэтгэл хангалуун байх нь хамгийн чухал. Хөрштэйгөө, ажлынхаа газрын хүнтэй, чуулганы магтаалын багт үйлчилдэг охинтой, эсвэл Холливудын жүжигчинтэй адилхан байх гэж хичээх нь таны баяр хөөрийг хулгайлахаас өөр юунд ч хүргэхгүй. Өөрийгөө өөр хэн нэгэнтэй бүү харьцуул. Харин таныг Бурхан хэрхэн бүтээсэн түүнд л сэтгэл хангалуун бай.

Та өөрөө мэддэг ч бай, үгүй ч бай, Бурханаас танд онцгой билиг авьяас өгөгдсөн билээ. Таныг: “аймшигтай болоод гайхамшигтайгаар бүтээгдсэн” (Дуулал 139:14 NIV) гэж Библид хэлсэн. Тэр таныг Өөрийн хүсэний дагуу урлан бүтээсэн. Тантай яг адилхан хүн энэ хорвоо дээр хаа ч байхгүй. Та бол цорын ганц шилдэг сор бүтээл.

Тантай яг адилхан хүн энэ хорвоо дээр хаа ч байхгүй. Та бол цорын ганц шилдэг сор бүтээл.

“Би энэ хүн шиг ч байсан болоосой гэх юмуу, эсвэл тэр хүн шиг авьяастай ч байсан бол мөн сайхан аа” гэж бодох бүрдээ тэд ч бас хэн нэгэнтэй, тэр ч байтугай тантай адилхан болох юмсан гэж

ярьж байж болно гэдгийг ухаараарай. Иймэрхүү бодол бидэнд бүгдэд нь төрдөг ч үүнийг өөртөө ачаа дарамт болгож болохгүй. Харин үүний оронд, таныг хэн байхаар Бурхан бүтээсэн түүнд сэтгэл хангалуун, аз жаргалтай байж, сэтгэлээ найдвар дотор аргамжиж, баяр хөөрөө дээш хөөргө.

Ул уучлал

Өөрийг тань гомдоож шархлуулсан хүнийг уучлах сонголт хийх нь таныг доош нь чангааж байсан уяаг тасар татаж буйтай адил юм. Уучлах шийдвэр гаргахад таны амьдралд баяр хөөр эргэн ирдэг. Хэн нэг нь чамайг гомдоовол дараах хоёр зүйлийг хийхийг зөвлөж байна. Үүнд:

1. Бурханы тушаалд дуулгавартай байж уучлалыг сонго;
2. Таны амьдралд шударга үнэн ялахын төлөө Бурханд найдвараа тавь. Амссан зовлон шаналлын минь төлөө Бурхан бидэнд хоёр дахин ихийг шагнана гэж амласан (Исаиа 61:7). Үүнд итгэж, тэрхүү шагналыг хүлээ.

Ул уучлал, уур хорслоо өөртөө тээсээр явах нь өөрийгөө л зовоохоос хэтрэхгүй. Биднийг гомдоож шархлуулсан хүмүүс болсон явдлыг аль хэдийн мартаж орхиод амьдралаа хөөгөөд явсан байхад бид цаг үргэлж сэтгэлдээ тээж, хорсол гомдлын гашуун хор амьдралыг минь сүйрүүлэхийг зөвшөөрсөөр явдаг. Хуучны гомдол шарх чинь таныг дахин нэг хором ч гэсэн хойш чангаахыг бүү зөвшөөр. Таныг гомдоосон хүнийг уучлаад, гомдол шархаа Бурханд өг. Мартаж чадахгүй байгаа шаналлаа орхиод, босож ирэхэд чинь туслахыг Бурханаас гуй.

Амьдралын тайван бус хэмнэл

Хэрэв та найдварыг сэтгэлийнхээ зангуу болгож, баяр хөөрийг амьдралынхаа хэв маяг болгох гэж байгаа бол бага зэрэг арчилгаа цэвэрлэгээ хийх шаардлагатай. Таны амьдралд ямар

ч үр жимс ургуулдаггүй зүйлсийг тайрч, амьдралаа энгийн хялбар болгох хэрэгтэй байж болох юм. Мөн зарим нэг зүйлд “үгүй” гэж хэлээд, үүнийхээ төлөө өөрийгөө буруутгахгүй байж сурах хэрэгтэй байж болно. Амьдралаа баяр хөөр тань улам дээш дүүлэн хөөрөхөд хангалттай хөнгөн болго.

Би амьдралынхаа туршлагаас энэ бүхнийг та бүгдтэй хуваалцаж байна. Миний хувьд: “Яаж дандаа ингэж байх юм бэ? Амармаар байна. Би ер амарч байгаагүй” гэж гомдоллох дуртай байлаа. Гэтэл нэг өдөр Эзэн надад: “Хэрэв чи хийж байгаа бүхнээ хийхийг хүсэхгүй байгаа бол тэдгээрийг зүгээр л хасаж орхи. Төлөвлөгөө гаргаж байгаа хүн нь чи өөрөө шүү дээ” гэж хэлэх шиг болсон. Тэр бол надад эрх чөлөөг олгосон мөч байв. Тэр бүгдийг би заавал хийх шаардлагагүй байсан бөгөөд үүнийхээ төлөө өөрийгөө буруутгах ч хэрэг байсангүй. Биднийг завгүй байгаасай гэж Бурхан боддог болов уу, эсвэл баяр хөөртэй байгаасай гэж боддог болов уу? Бодоод үз дээ. Бид бүгдээрээ хариултыг нь мэдэж байгаа тийм үү? Тиймээс өөрсдөдөө ачаа дарамт болохгүй зүйлсийг хийцгээе.

Үнэхээр чухал зүйлийн тухайд бол цаг гаргаж, тайван хандах хэрэгтэй. Гэр бүл, найз нөхдөдөө цаг гарга. Эзэнтэй харилцахдаа баяртай бай. Өөртөө цаг гарга, дуртай зүйлээ хий.

Аажуу тайван байж, амьдралдаа сэтгэл хангалуун, баяр хөөртэй байх нь маш чухал. Хэрэв та аз жаргалтай байхын аргагүй хэт завгүй байгаа бол, хэрэв та маш завгүй учраас аливаа зүйл ямар ч найдлагагүй санагдаж байгаа бол өөрчлөлт хийх цаг нь хэдийнээ иржээ. Төлөвлөгөөгөө хялбар болгож, Бурханаас танд ерөөл болгосон амьдралын сайхныг мэдэр.

Биднийг доош нь чангаах тоо томшгүй олон зүйл байдаг. Тэдгээрээс би энд гурвыг л нэрлэсэн бөгөөд өөрийн нөхцөл байдалд үндэслэн үүн дээр нэмэхийг танд санал болгож байна. Таны нэмэх зүйл энэ гурвын аль нэгтэй давхцсан ч, үгүй ч худал хуурмаг зүйл таныг доош чангаахыг бүү зөвшөөр.

Баяр хөөрөө олж авах хамгийн сайн эх сурвалж

“Бурхан минь, миний яг юу нь болохгүй байгаа юм бол? Надад ямар ч баяр хөөр алга, асуудал нь чухам юунд байгааг би ойлгохгүй байна” гэж залбирч байсан удаа танд бий юу? Тухайн өдөрт өгөгдсөн Бурханы үгийг авах гэж, эсвэл Бичвэрээс урмын үг авах гэж Библиэ дөрөв, таван удаа нээсэн ч сэтгэл гонсгор үлдэж байсан удаа танд бий юу? Магадгүй, та Эзэнээс удирдамж авах санаатай, христэч телевизийн нэвт-рүүлэг хэдхэн хором үзэж байсан уу?

Нэгэн үдэш би сэтгэл хөндүүрлүүлсэн гүн цөхрөлөөс минь намайг гаргачих юм байна уу хэмээн ухаан мадаггүй хайж, гал тогооны өрөөндөө хайрцагт хадгалдаг байсан Бичвэрийн олон ишлэлүүдээс нэгийг нь сугалж автал Ром 15:13-р ишлэл таарсан юм:

“Найдварын Бурхан та нарыг итгэл дотор [таны итгэлээр дамжуулан] бүх баяр баясгалан ба амар тайвнаар дүүргэх болтугай. Ингэснээр та нар Ариун Сүнсний хүчээр найдварт бялхах (халин дүүрэх) юм”.

Энэ ишлэлийг уншсан даруйдаа би аливаад итгэж найдахаа больж, сөрөг бодолд автах болсноор баяр хөөрөө алдсан байснаа ухаарсан. Үргэлж Бурханд болон Түүний амлалтуудад итгэ. Юу ч болж байсан, хичнээн хэцүү, гомдолтой байсан ч, хэр удаан шаналсан ч хамаагүй, үргэлж итгэлтэй бай. Тэрхүү итгэл найдвар тань таны сэтгэлд зангуу болох болно. Өөрчлөлт болгонд дэнчигнэн гуйвах нялх христитгэгч биш, харин бүх цаг мөчид Бурханы итгэлийг даахуйц төлөвшсөн, насанд хүрсэн христитгэгч бай.

Найдвар өвөрлөгтүн!

Найдвар ба аз жаргал нь зөвхөн бусад хүмүүст зориулагдсан юм биш. Таныг ч гэсэн энэ бүхнийг амьдралдаа үзэж амсаасай гэж Бурхан хүсдэг. Баяр хөөрийг чинь хулгайлах боломжийг дайсанд бүү өг. Бурханы хүүхдийн хувиар танд ивээл ерөөл хангалттай өгөгдсөн. Та ямар ихээр ерөөгдсөн гэдгээ олж мэдэх цагийг өдөр бүр гаргаж, тэгэх бүрдээ баяр хөөрөөр бялх.

Таныг доош нь чангааж, танд зориулан Бурханы бэлдсэн зүйлийг авахад тань саад болох гэсэн зүйлс энэ дэлхий дээр асар олон бий. Харин тэр бүх ачаа дарамтаас нэг ч атугай өдөр зуурах хэрэг танд байхгүй. Та бүх анхаарлаа Эзэнд хандуулбал хариуд нь Түүний баяр хөөрийг хүлээн авна. Тиймээс урагш алхаж, найдвар өвөрлөгтүн. Найдварыг сэтгэлийнхээ зангуу болго. Бурхан бол найдвартай бөгөөд хөдөлгөөнгүй зангуу юм. Түүн дээр хэн ч гишгэлсэн эвдрэхгүй (Еврей 6:19). Энэ хичнээн гайхалтай амлалт вэ!

ХЭСЭГ IV

НАЙДВАР ЭНД БАЙНА

....

“Та миний найдвар учраас, Эзэн Бурхан минь, залуугаас минь Та миний итгэл, бат итгэлийн минь эх сурвалж билээ”.

Дуулал 71:5 (AMP)

“Одоо” гэдэг үг Библийн маш чухал үгийн нэг. Есүс: “Би байдаг” гэж хэлсэн байдаг бөгөөд энэ нь “Би одоо энд байна” гэсэн утгатай. Та бүхэн Намайг дараа нь хэзээ нэгэн цагт хайх хэрэггүй. Би яг одоо энд байна! Найдвар энд байна!

Энэ дэлхийн нэрлэдэг найдвар нь жинхэнэ найдвар биш юм. Энэ найдвар сул дорой, тодорхойгүй, ямар ч хүчгүй байдаг. Энэ нь ирээдүйд тохиох боломжтой аливаа сайн зүйлийг үргэлж доош нь хийж байдаг. Одоо юу ч тодорхойгүй, юу ч ойлгомжгүй, юу ч байхгүй байна гэж хэлдэг.

Бид Бурханы хүүхдүүд учраас Бурхан яг одоо бидний амьдралд ажиллаж байгаа гэдэгт, сүнсний хаанчлалд ямар нэг сайн зүйл болж байгаа бөгөөд тэр зүйл тун удахгүй ил болно гэдэгт итгэх завшаан бидэнд олдсон билээ. Бурханы төлөвлөгөөгөөр бол бид эхлээд итгэх ёстой бөгөөд тэгсний дараа харах болно. Харин энэ дэлхийн ярьдаг найдвар гэгч нь биелэх, үгүй нь тодорхойгүй, ямартаа ч юм сайжраасай гэсэн “хүсэл” төдий байдаг. Гэхдээ тэр зүйл нь биелэгдэнэ гэсэн ямар нэг баталгааг харах хүртлээ түүнийг биелнэ гэсэн бодит найдвар, бодит итгэл байдаггүй.

Абрахамд найдвар төрүүлэхээр бодит шалтгаан огт байгаагүй ч Бурханы амласанчлан хүүхэдтэй болно гэсэн итгэлээр тэр найдаж байсан. Тэрээр Бурханы амласан зүйл биелнэ гэж “найдан хүлээж” байсан. Түүний хүлээлт бодитой байсан бөгөөд, одоо ч гэсэн бодитой билээ.

Номынхоо энэ хэсэгт би та бүхэнд өнгөрснөөр биш, ирээдүйгээр ч биш, харин өнөөдрөөр буюу яг одоогоор амьдрахад тань туслахыг хүслээ. Бурхан яг одоо таны дотор, таны амьдралд ажиллаж байгаа гэдэгт итгэхийг би танаас хүсэж байна. Еврей 11:1-д (AMP):

“Итгэл бол [бидний] найддаг зүйлсийн маань баталгаа (нотолгоо баримт), [бидэнд] харагдахгүй зүйлсийн нотолгоо мөн тэдгээрийн бодит байдлын үнэмшил юм [мэдрэгдэхгүй байгаа зүйлийг бодит мэтээр ойлгож хүлээн авах итгэл]” гэжээ.

АРВАН ДӨРӨВДҮГЭЭР БҮЛЭГ

Маргааш болтол гэж хойшлуулах хэрэггүй

“Харагтун, одоо хүлээн авах [Бурханаас чиний], ивээлт тааламжтай цаг үнэхээр мөн. Харагтун, өнөөдөр авралын өдөр”.

2 Коринт 6:2

“Өчигдөр бол түүх, маргааш бол оньсого, өнөөдөр бол Бурханы бэлэг бөгөөд тийм ч учраас бид түүнийг одоо гэж нэрлэдэг”.

—Бил Киин

Зохиолч Лио Бускалия ээжийнхээ тухай болон гэр бүлийн “зовлонт оройн зоог” гэж юуг нэрлэсэн тухайгаа нэгэнтээ өгүүлсэн байдаг. Энэ явдал нэгэн үдэш аав нь ажлаасаа ирээд, хамтрагч нь компанийх нь бүх мөнгийг аваад зугтсан учраас дампуурлын ирмэгт ирээд байгаа тухайгаа ярьсан тэр нэгэн орой болжээ. Бускалигийн ээж энэ яриаг сонссоныхоо дараа үнэт эдлэлээ зарж, тансаг баярын ширээ засахаар гадагш гарчээ. Гоёл зүүлтээ зарж, чамгүй их мөнгө үрсэнд гэр бүлийнхэн нь түүнийг буруутган зэмлэжээ. Харин тэр тэдэнд хандан: “Бидэнд баяр хөөр хамгийн их хэрэгтэй байгаа үе бол дараагийн долоо хоног биш, харин яг одоо”¹ гэж хэлсэн гэдэг.

Тэр эхийн зоригтой үйлдэл, мэргэн ухааныг би үнэхээр биширсэн. Найдвар, хайр хоёр нь хэзээ ч хойшлуулж болохгүй зүйлс юм. “Маргаашийг” хүлээж амьдралаа өнгөрөөдөг

хүн олон байдаг. Тэд: “За яахав, маргааш арай дээрдэж магадгүй”, “Маргааш гэж нэг өдөр бий шүү дээ” гэх юмуу, эсвэл “Энэ өдрийг л давчихвал маргааштай золгоно доо” гэж хэлдэг. Тийнхүү тэд найдвараа маргааш хүртэл хойшлуулж байхдаа өнөөдрийн баяр хөөрийг мэдэрдэггүй. Харин Есүс бидэнд ийм амьдралыг өгөх гэж амиа өгөөгүй юм. Есүс биднийг өнөөдөр, өдөр бүр баяр хөөртэй амьдраасай гэж хүсдэг.

Найдвар, хайр хоёр нь хэзээ ч хойшлуулж болохгүй хоёр зүйл юм.

Амар тайван, баяр хөөр, аз жаргал, итгэлтэй байдал, зүрх зориг, эрүүл бие, саруул ухаан, ивээл ерөөл, бат бөх гэрлэлт. Бурхан биднийг энэ бүгдийг өнөөдөр амсаж мэдрээсэй гэж хүсдэг. “*За яахав, өнөөдөр авах юмгүй өдөр болох шинжтэй, маргааш арай дээрдэж магадгүй*” гэж бодох бүрдээ та амьдралд тань зориулсан Бурханы хамгийн сайн төлөвлөгөөг алдаж байдаг. Хэрэв Бурхан тантай хамт байдаг юм бол өнөөдөр ч гэсэн Тэр тантай хамт байгаа. Тэр үргэлж тантай хамт байдаг бөгөөд баяр хөөртэй байхын тулд хэзээ нэг цагийг хүлээх хэрэггүй. Та Түүний элбэг баян, ялалт хийгээд баяр хөөрөөр дүүрэн амьдралыг өнөөдөр мэдрэх боломжтой. ӨНӨӨДӨР гэдэг өдөр өнгөрөөгүй байгаа дээр Бурханыг сонсож, Түүний амлалтын эсрэг зүрхээ бүү хатууруул гэж элч Паул хэлсэн (Еврей 3:15). Таны амьдралд Бурхан өнөөдөр ажлаа хийж байгаа бөгөөд Тэр таныг *өнөөдөр* үүнд итгэж, *өнөөдөр* баярлан хөөрөхийг хүсдэг.

Дуулал 118:24-д: “**Энэ нь** Эзэний бүтээсэн өдөр. Үүнд хөгжилдөн баярлацгаая” (тодотгол нэмэв) гэжээ. Бурхан энэ өдрийг зорилготой авчирсан. Түүнд хийхийг хүссэн ямар нэгэн онцгой зүйл байна. Та түүнийг хүлээн авахад бэлэн үү? Итгэл найдвараар дүүрэн хүмүүс энэ ишлэлд хэлсэн зүйлийг хийдэг. Өөрөөр хэлбэл, тэд баярлаж хөөрдөг. Цаг агаар, сэтгэл санааны байдал, хүмүүсийн хэл ам болон хичнээн олон хачин жигтэй зүйлстэй нүүр тулсан ч, мэдээллийн хэрэгслээр ямар мэдээ цадагдаж байсан ч найдвараа өндөрт өргөж чаддаг

хүмүүс: “Эзэн энэ өдрийг ямар нэг зорилготойгоор авчирсан. Тиймээс би хөгжилдөн баярлах болно. Тэр өнөөдөр **миний амьдралд** ямар нэг сайн зүйлийг хийх гэж байгаа учраас би аз жаргалтайгаар найдан хүлээх болно!” гэж хэлдэг.

Би та бүхэнд өөрийнхөө түүхээс ярья. 1976 он бол миний хувьд, цөхрөл гутралын гүн ангалын ёроолд нь унасан үе байлаа. Надад хэзээ ч ямар ч сайн зүйл болохгүй гэж би бодож байсан. Хэдийгээр би тэр үед Христэд итгэдэг болсон байсан ч амьдрал маань ямар ч ялалтгүй байв. Тэр жилийнхээ хоёрдугаар сарын нэгэн өглөө ажил руугаа явж байх замдаа Бурханд хандан гомдол цөхрөлөө гарган хашхирч билээ. Тэр үед би христэч амьдралдаа анх удаа жинхэнэ итгэл гэж юу болохыг мэдэрсэн. Бурхан нөхцөл байдлыг анхааран санаа тавьж байгаагаа миний зүрхэнд баталж өгөв. Хэдийгээр миний нөхцөл байдал тэр даруйдаа өөрчлөгдөөгүй ч гэсэн тэр мөчийн дараа би маш амар тайван болсон юм. Тэр өдөр ямар нэг сайн зүйл болно гэсэн аз жаргалтай мэдрэмжээр дүүрсэн. Би жинхэнэ найдварыг мэдэрсэн. Бурхан юуг, хэзээ хийх нь надад хамаагүй санагдаж байлаа. Учир нь тэр зүйл хэдийн хийгдсэн гэдгийг би зүрхэндээ мэдэж байв. Тэр үеэс эхлэн миний амьдралд юмс өөрчлөгдөж эхэлсэн гэдгийг би та бүхэнд өчих байна. Мэдээж бүгд нэг дор төгс болоогүй, харин бага багаар, өдрөөс өдөрт сайн сайхан зүйлс болж байсан.

“Жойс, хэрэв би, өнөөдөр миний амьдралд ямар нэг сайхан зүйл болно гэж итгэсэн чинь тэр зүйл болохгүй байвал яах вэ?” гэсэн бодол та нарын толгойд орж ирж байгаа байх гэж би бодож байна. Юуны түүрүүнд би та нарт, ямар нэг сайн зүйл өдөр бүр болдог гэдэгт бат итгэдгээ хэлье. Гэвч бид түүнийг хардаггүй байж болох юм. Хоёрт, тэрхүү сайхан зүйл нь бидний хүлээж байсан зүйл биш байх боломжтой. Гэхдээ итгэл өвөрлөж өнгөрөөсөн өдөр нь юунд ч итгэхгүй байсан өдрөөс илүү бөгөөд тиймээс ердөө энэ нь өөрөө сайн зүйл билээ. Эцэст нь, та маргааш өглөө нь ч гэсэн энэ өдөр ямар нэгэн сайн зүйл болно гэсэн итгэл найдвартай сэрэх хэрэгтэй. Та хэр олон өглөөг ийм найдвараар угтах хэрэгтэй байсан ч

хамаагүй үргэлжлүүлсээр л бай, тэгээд та Бурхан итгэмжтэй гэдгийг харах болно!

Жигд тогтвортой чанар маш чухал

Бидний хамгийн том алдаа бол жигд тогтвортой байж чаддаггүй. Олон хүн нэг хэсэг амжилттай явж байснаа өдөр бүр тогтвортой байж чадаагүйгээсээ болоод уналтад орж бүтэлгүйтдэг. Өдөр бүр жигд тогтвортой байх шийдвэр гаргаснаар ямар гайхалтай өөрчлөлт бий болохыг та хараад итгэмээргүй санагдах байх. Нэг удаа зөвийг үйлдэх биш, харин зөв зүйлийг тогтвортой хийх нь бидний амьдралыг өөрчилдөг. Хэрэв та нэг өдөр найдаад, дараагийн өдөр нь найдвар тасраад байх юм бол таалагдах үр дүн гарахгүй. Найдварын талаар миний та бүхэнд зааж буй зүйл үнэн гэж итгэж байгаа бол тэрхүү найдвараар дүүрэн амьдрах шийдвэр гаргаж, тогтмол тийнхүү амьдар. Зөвийг үйлдэх нь зөв учраас бид зөвийг үйлддэг! Шийдвэр төгс бай!

Бөмбөлгөө хөөргөцгөө

Нэгэн чуулганы танхимд болсон конференцийн талаар би сонссон юм. Хүмүүст бөмбөлөг тараагаад баяр хөөрөө илэрхийлмээр санагдсан үедээ үйлчлэлийн тодорхой хэсгүүдэд бөмбөлгөө дээш нь хөөргөхийг зааварласан байжээ. Үйлчлэлийн турш бөмбөлгүүд сүмийн өндөр, хүнхэр тааз өөд хөөрч байлаа. Гэвч конференц дуусахад нийт бөмбөлгийн гуравны нэг нь хөөргөгдөөгүй үлдсэн байжээ.

Сонин байгаа биз? Тэнд цугларсан хүмүүсийн гуравны нэг нь бөмбөлгөө хөөргөж, баяр хөөрт нэгдэх боломжоо алдах хүртлээ хүлээжээ. Баяр хөөр, найдвар дүүрэн амьдрах боломжийг гартаа атгасан Бурханы хүүхдүүд бид Түүний өгсөн амьдралд баярлахын тулд ирээдүйн хэзээ нэгэн цагийг хүлээх шаардлагагүй. Яг одоо баярлах боломжтой.

“Ямар нэг юм болбол л аз жаргалыг мэдэрч, амьдралдаа баярлан хөөрнө” гэж боддог хүн маш их байдаг. Амрах үедээ, гэрлэх үедээ, ажилдаа амжилт гаргах үедээ, хүүхэдтэй болох үедээ, их мөнгөтэй болох үедээ, хүүхдүүд нь өсөж том болох үед, хань нь өөрт нь сайхан хандах үед. Танд ерөнхий дүр зураг харагдаж байгаа биз дээ.

Би энэ үйлчлэлдээ үнэхээр дуртай хэрнээ өдөр тутмын үйл ажиллагаа, үүрэг хариуцлагадаа тэр бүр дуртай биш байлаа. Би яг тухайн мөчид амьдарч, конференцийн үйл ажиллагаа дуусах үед биш, төсөл дуусах үед биш, амралтад явах үед биш, харин яг одоо миний дотор болон надаар дамжуулан Бурханы хийж байгаа зүйлд баярлан хөөрч сурах хэрэгтэй байлаа. Яг одоо хийж буй зүйлийг нь талархан хүлээн авч, баярлан хөөрөхийн чухлыг Бурхан надад харуулсан.

Таны хувьд ч мөн адил. Таны амьдралд *тэгэх, ингэх үед* гэсэн үг үргэлж л байна. Өнөөдөр хүүхдүүд тань таныг маш их уурлуулсан, дарга чинь ааш муутай байсан, бие чинь өвдсөн, сэтгэл санаагаар унасан байж болно. Гэвч яг тэр мөчид Бурхан тантай хамт байгаа, таны амьдралд зориулсан сайхан төлөвлөгөө Түүнд байдаг. Тиймээс энэ үнэнийг дээрх бүх таагүй зүйлсийн нэг нь ч өөрчилж чадахгүй. Өнөөдөр бол... Түүний танд зориулсан гайхалтай төлөвлөгөөний нэг хэсэг.

Өнөөдрийг авар

Дуулал 71:14-д: “Харин би үргэлж найдаж, Таныг улам ихээр магтах болно” гэжээ. Энэ ишлэлд буй түлхүүр үг нь “үргэлж” юм. Найддаг хүн *хааяа юмуу алдаг оног* найддаггүй. Найддаг хүн Бурханаас ямар нэг сайн зүйлийг найдан хүлээхдээ маргааш болохоор найдъя гэж хойш тавьдаггүй. Найддаг хүн *үргэлж* найдаж, өдөр бүр... бүхэл өдөржин найдах сонголт хийдэг.

Өдөр бүрийг ямар нэг сайн зүйл болно гэсэн өөдрөг хүлээлтээр өнгөрөөж,

*Найддаг хүн
үргэлж найдаж,
өдөр бүр... бүхэл
өдөржин найдах
сонголт хийдэг.*

үргэлж найдаж амьдрах боломжийг танд олгох хэдэн зөвлөгөөг хэлье.

Өдөр бүр зоригтойгоор залбир

Хэрэв танд найдвар байгаа бол том зүйлд итгэхээсээ хэзээ ч бүү ай. Үнэндээ найдвар бол итгэлийн суурь хөрс гэдгийг би та бүхэнд хэлмээр байна. Тийм ч учраас өнөөдөр Бурханд хандан зоригтой залбирах нь сайхан санаа юм. Ямар нэг зүйлийг хүсэх ч итгэлгүй байх юм бол өнөөдөр аливаа зүйлд найдвар тавьж амьдарч чадахгүй.

Хэрэв таны зүрх сэтгэлд байгаа зүйл Бурханы үгтэй нийлж байвал түүнийг Бурханаас итгэлтэйгээр гуйж, найдвар тавин хүлээ. Бурхан зоригтой залбиралд дуртай. Библиэс харвал, Бурхан тэдгээр гуйлтад үргэлж хариулсан байдаг. Тэр өнөөдөр ч гэсэн хариулсаар байна. Найдварыг дасгалжуул, итгэл дотор зогс, ямар нэг зоримог зүйлийг гуй, ЯГ ОДОО!

Өдөр бүр ямар нэг хөгжилтэй зүйл хий

Заримдаа би баяр хөөрөө алдсанаасаа болоод найдвараа ч мөн алдсан байдаг. Амьдралын сайхныг өдөр бүр мэдрэхийн оронд бид элдэв төлбөр тооцоонд дарагдаж, төвөгтэй байдалд мухардаж цөхөрдөг. Тэгвэл өдөр бүр ямар нэг хөгжилтэй зүйл хийхээр төлөвлөж яагаад болохгүй гэж? Мэдээж, заавал өдөр бүр Дисней Лэнд рүү аялах албагүй. Зүгээр л, найз нартайгаа кофе уух, гэр бүлийнхэнтэйгээ инээдмийн кино үзэх, эсвэл цэцэрлэгт хүрээлэнгээр зугаалах гэх мэт таны царайд инээмсэглэл тодруулж чадах юу ч байж болно.

Хэрэв та үргэлж найдвараар дүүрэн байхыг хүсэж байвал ямар нэгэн хүлээлтийг бий болгох хөгжилтэй зүйлийг төлөвлө. Найдвар, баяр хөөр хоёр цугтаа явдаг тул ямар нэг хөгжилтэй зүйл төлөвлөөд, өдрийн туршид Бурханы оршихуй болон Түүнээс танд өгөгдсөн ерөөл бүрд талархан баярла.

Ямар нэг хөгжилтэй, баярлаж талархмаар зүйлийг хүлээх хэрэгцээ бидэнд бүгдэд маань байдаг. Өнөөдөр би нэлээд олон цаг бичгийн ажилдаа зориуллаа. Гэсэн ч өнөөдөр гадагш

гарч найз нартайгаа кофе ууж, дэлгүүр хэсэж, оройн хоол идэхээр төлөвлөж байна. Би өдрийнхөө төлөвлөгөөнд тэсэн ядан хүлээмээр ямар нэг зүйлийг заавал оруулдаг. Амьдралын баяр хөөрийг мэдэрье гэж бодохоо болих мөч хүртэл хүлээх хэрэггүй. Амьдралын сайхныг яг ОДОО мэдэр!

Өдөр бүр ядаж нэг хүнийг ивээ

Би үргэлж эргэн тойрноо харж, ямар нэг байдлаар ивээчихээр хүн байгаа эсэхийг хайдаг. Бусдыг ивээх нь үнэхээр ерөөлтэй. Хэрэв та өдрийг баяртай өнгөрөөхийг үнэхээр хүсэж байгаа бол хэн нэгэнд өдрийг баяртай өнгөрөөхөд нь туслахыг санал болгож байна. Магадгүй та түүнийг өдрийн хоолоор дайлах юмуу, урмын сайхан үгээр тэтгэх, эсвэл тэр хүн таны хувьд ямар чухал болохыг, түүнийг хүндэлж явдгаа хэлж ч болно.

Хэрхэн бусдад ивээл болж, Өөрийнх нь зааврыг дагах ёстойг харуулж өгөхийг Бурханаас асуу. Бусдын хэрэгцээг хангахад анхаарал тавих үедээ та өөрийн тань хэрэгцээг ч мөн Бурхан хангаж өгнө гэдэгт итгэх ямар хялбар зүйл болохыг хараад гайхах болно. Бусдад ивээл болохоо бүү хойшлуул. Өнөөдөр бусдыг ивээ! Яг ОДОО бусдад ивээл бол!

Таныг Бурхан хэрхэн ивээсэн талаар ядаж нэг жишээг өдөр бүр бичиж тэмдэглэ

Найдвар нь талархал дунд хөгжин цэцэглэдэг. Хэрэв та үргэлж найдвар дүүрэн амьдрахыг хүсэж байвал таныг Эзэн хэрхэн ивээж байсныг өдөр бүр сана. Таныг Бурхан хичнээн удаа ивээснийг харахдаа та гайхах болно. Бурхан таныг ОДОО хэрхэн ивээж байгааг та ухаарах тусмаа илүү агуу зүйлийг харах болно гэдэгтээ илүү итгэл найдвартай байх болно.

Өдөр өнгөрч, орой болоход та тэдгээр зүйлсийг тэмдэглэх цаг дандаа гаргаж бай. “Найдварын гэрчлэл” нэртэй өдрийн тэмдэглэл бичиж эхэл. Зарим өдөр та нэг, хоёр зүйл тэмдэглээд өнгөрөх бол зарим өдөр арав, хорин зүйлийн талаар бүтэн хуудас дүүртэл бичиж ч магадгүй. Таны амьдралд Бурханы хийж өгч байгаа сайн сайхныг баримтжуулж эхэл,

тэгээд оргилон буцалсан найдваргүйгээр нэг өдөр амьдрах ч ямар хэцүү болохыг ойлгоно.

Найдвар өвөрлөгтүн!

Одоо найдвар өвөрлөгтүн! Бурхан ажлаа хийхийг хүлээж олон өдөр, долоо хоног, сар, жилээр хүлээх хэрэгтэй юм биш ээ. Тэр тантай хамт, таны дотор хэдийнээ ажиллаж байгаа. Таны амьдралд Бурханы хийж байгаа зүйлийг алдалгүй олж харж чаддаг байх илүү их соргог харааны төлөө залбир.

“Одоо”-гийн хүчинд найдаж амьдрахын оронд ирээдүйд хэзээ нэгэн цагт хэмээн алгуурлахад таныг уруу татах зүйл үргэлж таарах болно.

“Одоо”-гийн хүчинд найдаж амьдрахын оронд ирээдүйд хэзээ нэгэн цагт хэмээн алгуурлахад таныг уруу татах зүйл үргэлж таарах болно. Тухайн өдөр тулгарч буй асуудал бэрхшээлээс болж Бурханы сайн сайхныг хүлээ-

хээ бүү хойшлуул. Урагш тэмүүлж, найдвараа сэрээгтүн. Өнөөдөр ямар нэг агуу зүйл тохиох боломжтой. Өнөөдөр гайхалтай чөлөөлөлт болох боломжтой. Түүнд маргааш итгэнэ гэж хойшлуулалгүй, өнөөдөр итгэ.

АРВАН ТАВДУГААР БҮЛЭГ

Бурханы төлөвлөгөөг ойлго

“Эзэнд итгэдэг, итгэлээ өгдөг, найдан түшидэг, Эзэн итгэл найдвар нь байдаг хүн [хамгийн] ерөөлтэй ээ!”

Иеремиа 17:7 (AMP)

“Зовлонгийн хөндийг найдварын хаалга болгож чадах цорын ганц Нэгэн бол Бурхан юм”.

—Катерин Маршал

Юмс чухам хаашаа эргэж болохыг таамаглахын аргагүй цаг үе олон байдаг. Та ийм байдалд орж байсан уу? Өдөр бүр Библиэ уншиж, эерэг хандлагатай байхыг хичээж, өөрийг чинь урамшуулж дэмждэг сайн нөхөдтэйгөө уулзаж, байдаг чадлаараа хичээгээд байгаа хэрнээ урам хугарч, цөхөрсөн хэвээр л байдаг. Энэ номон дээр өдий хүртэл яриад байгаа мөнөөх л найдвар танд мэдрэгддэггүй. Зарим өдөр та хэзээ хэзээнээс илүү итгэл найдвараар дүүрэн байдаг ч өөрийгөө итгэл найдвартай хүн гэж боддоггүй.

Ингэж бодож байгаа хүн ганцхан та биш ээ. Найдварыг олж авах гэж тэмцэлдэж буй хүн олон бөгөөд түүнээс зуурах гэж тэмцэж буй нь бүр олон. Найдвар нь таны нөхцөл байдал дээр биш, харин зөвхөн Христ дээр үндэслэдэг. Зөвхөн хүсэх төдийгөөр найдварыг олж авахгүй. Найдварыг тэжээж тэтгэж, хөгжүүлдэг. Түүнийг тэтгэхэд шаарлагатай түлш

бол Бурханы Үгнээс тогтмол суралцах явдал юм. Та хүлээх шаардлагагүй, найдвар энд байна. Та өнөөдөр найдварыг хүлээн авч эхлэх боломжтой. Үүнийг мэдрэхийн тулд хүлээх шаардлага танд байхгүй. Харин зүгээр л найдваргүйгээр амьдрахад хэцүү байгаа юм чинь яагаад яг ОДООноос найдвар өвөрлөж, найдвараар дүүрэн байж болохгүй гэж гэсэн тууштай шийдвэрийг өөртөө гарга. Өнөөдөр ямар нэг сайхан зүйл болно гэж найдан хүлээ!

Найдвараар дүүрэн амьдрахад буюу сайн сайхныг зөгнөн мөрөөдөх сэтгэлээр дүүрэн амьдрахад хамгийн чухал нэг зүйл бол аливааг Бурханы харж байгаагаар харж ойлгох явдал юм. Та өөрийн амьдралыг махан биеийнхээ, төрөлх төсөөлөл, ойлголтоор харсаар байх юм бол ямар ч найдваргүй, ялагдсан мэт бодол санаа таныг эзэмдэх болно. Хэрэв та амьдралаа Бурхан таны амьдралыг хардаг шигээр харж эхлэх аваас найдвар таныг нөмөрч хучна.

Абрахамд яг ийм зүйл тохиолдсон. Эхлэл номын 15-р бүлэгт Абрахам итгэл найдвараа алдсан байдаг тухай өгүүлдэг. түүнийг олон үндэстний эцэг болгож (Эхлэл 12:2), Канаан нутгийг түүний үр удамд өгнө (Эхлэл 12:5-7) гэж Бурхан амласан боловч энэ бүхэн хэрхэн биеллээ олохыг тэр харж чадахгүй байлаа. Тэрээр Бурханыг хайрладаг байсан бөгөөд Түүний амлалтад найдахыг хүссэн. Гэвч түүнд үр хүүхэд байгаагүй. Удмыг нь залгах ядаж нэг ч хүүхэд байхгүй атал Бурхан яаж түүнээс агуу үндэстнийг бий болгох юм бэ?

Эхлэл 15:2-3 ишлэлд, Абрахамын үнэн сэтгэлийн залбирал гардаг бөгөөд бид ч бас ийм залбирлыг олонтаа хийдэг. Тэрээр: “Эзэн БУРХАН минь! Та надад юу хайрлахсан бол? Би үр хүүхэдгүй...” хэмээгээд цааш нь, “Та надад үр удам заяагаагүй...” гэсэн байдаг. Абрахам цөхөрсөн байлаа. Тэрээр асуудлыг өөрийнхөө төсөөллөөр харж байсан бөгөөд энэ төсөөлөл нь түүнд найдвар төрүүлэхгүй байв.

Абрахам асуудлыг том зургаар нь харахгүй байсан тул Бурхан түүнд нэгэн гайхамшигтай зүйлийг харуулсан байдаг

Эхлэл 15:5-д ийнхүү өгүүлдэг:

“...түүнийг гадагш гаргаж [майхнаас нь гаргаад]
 –Чи тэнгэр өөд хар, оддыг тоолж чадваас тоол
 гэв. Тэгээд тэрээр түүнд
 –Үр удам чинь ийм олон болно гэж айлдав”.

Абрахамыг ийнхүү шаналж байхад түүнд юу хэрэгтэйг Бурхан мэдэж байжээ. Өөрөөр хэлбэл, Абрахам өөрийн төсөөллийг буюу харах хараагаа өөрчлөх хэрэгтэй байлаа. Бурхан Абрахамыг тоо томшгүй олон үр удмаар ерөөхөөр төлөвлөж байхад тэр өчүүхэн зүйлийн төлөө буюу голомт залгах ганц хүүхдийн төлөө Бурханаас итгэлгүйхэн залбирч байсан. Тиймээс Бурхан түүнийг гадагш гаргаж, нэгэн шинэ харааг өгсөн нь одод түгсэн тэнгэр огторгуй байлаа. Абрахам Бурханы төлөвлөгөөг ойлгох тэрхэн мөчид түүний найдвар амилсан. Ром 4:18-д (NIV): “Бүх найдварын эсрэгээр, Абрахам найдан итгэсэн бөгөөд “Үр удам чинь ийм олон болно” гэж түүнд айлдсан ёсоор олон үндэстний эцэг болсон” гэжээ.

Абрахамын түүх надад маш их урам зориг өгдөг. Бидний дундаас хамгийн мундаг шилдэг нь ч цаг хугацааны явцад урам хугарах боломжтой гэдгийг түүний түүх бидэнд өгүүлдэг. Амлалт нь хэрхэн биелэх боломжтойг хэрэв бид харж чадахүй байгаа бол Бурханаас асуух нь энгийн л хэрэг. Харин эргэлзээ, цөхрөл дундаа гацаж үлдэж болохгүй. Биднийг итгэл, найдвараар дүүргэхийн тулд *Өөрийн төлөвлөгөөг* бидэнд харуулахыг Бурхан хүсдэг. Өчүүхэн жижиг зүйлийг харж буй бидэнд илүү том зургийг буюу *Өөрийн зургийг* харуулахыг Бурхан хүсдэг. Учир нь түүний төлөвлөгөө бүгдийг өөрчилдөг.

Өчүүхэн жижиг
 зүйлийг харж буй
 бидэнд илүү том
 зургийг буюу Өөрийн
 зургийг харуулахыг
 Бурхан хүсдэг. Учир
 нь түүний төлөвлөгөө
 бүгдийг өөрчилдөг.

Бурханы шилийг зүү

“Бурханы шил” хэмээн миний нэрлэж буй үүнийг зүүгээд, зарим нэг зүйлийг Бурханы хараагаар хар. Тэр юмсыг биднийхээс өөрөөр хардаг. Учир нь Тэр бүхнийг эхлэлээс нь төгсгөл хүртэл хардаг.

Таныг Бурхан хэрхэн хардаг вэ? Тэр таны хэзээ ч ойлгохгүй тийм их хайраар таныг хайрладаг бөгөөд таны амьдралд зориулсан гайхалтай төлөвлөгөө Түүнд бий. Тэр үргэлж тантай хамт байдаг учраас та хэзээ ч ганцаараа биш юм. Бурханы уучлал нь таны үйлдсэн гэм нүглээс хавьгүй агуу. Түүний өршөөл нь өдөр бүр шинэ. Христитгэгчийн тань хувьд Бурхан танд хүч чадлыг өгсөн учраас таны амьдрал ялагдсан байх ёсгүй. Христийн дотор та цоо шинээр бүтээгдсэн, танд шинэ амь өгөгдсөн. Тиймээс та ард үлдсэн бүхнийг орхиод өмнөх зүйлс рүүгээ харах боломжтой. Та өөрийгөө Христийн дотор хэн бэ гэдгээ мэдэх үед, мөн Өөрийнх нь Хүүгийн амиар солигдсон таныг Бурхан хэрхэн хардаг вэ гэдгийг мэдэх үед таны амьдралын замнал өөрчлөгдөх болно.

Бурхан бүтээлээ хараад: “нэн сайн” гэж (Эхлэл 1:31-ийг унш) хэлсэн. Та Түүний бүтээлийн нэгэн хэсэг учраас та ч мөн сайн юм. Гэвч үүнд итгэхэд хэцүү үе бидэнд олонтаа тохиолдох нь бий. Би таны махбодын тухай яриагүй байна. Элч Паул: “Учир нь миний дотор буюу махбодод минь ямар ч сайн зүйл байдаггүйг би мэддэг” (Ром 7:18) гэж хэлсэн байдаг. Бидний махбод сул дорой бөгөөд бид бүгд алдаа гаргадаг. “Та нар бол сайн” гэж Бурхан хэлэхдээ сүнсний хувьд шинээр дахин бүтээгдсэн таны тухай ярьж байгаа юм! Ефес 2:10 (АМР):

“Бурхан [шинээр төрсөн] бидэнд урьдаас төлөвлөсөнчлөн (урьдчилж төлөвлөсөн) сайн үйлсийг хийх, Христ Есүс дотор бүтээгдсэн Бурханы [Өөрийнх нь] мутрын бүтээл (Түүний урласан бүтээл) бид мөн... Бид эдгээрийн дотор алхах [Түүний төлөвлөсөн, биднийг амьдруулахаар бэлдсэн сайн сайхан амьдралаар амьдрах] учиртай”.

Шинэ бүтээл бол бодит гэдгийг ойлгож, тэдгээрийг өөрийн болгон таних нь маш чухал. Маш олон хүн өөрийгөө муу хүн гээд *итгэчихсэн* байдаг учраас муу зүйл хийдэг. Христээр дамжин гэм нүглээсээ чөлөөлөгдсөн гэдэгтээ хүмүүс итгэдэггүй учраас гэм нүгэлт амьдралдаа шигдсээр байдаг. Тэд өөрсдийнхөө хэн байсаар ирснийг хардаг болохоос биш шинэ төрөлтийн бодит хүчийг мэддэггүй. Өөрөөр хэлбэл, хэрэв хэн нэг нь Христ дотор байвал тэр шинэ бүтээл бөгөөд, хуучин нь өнгөрч, шинэ болдог (2 Коринт 5:17-г унш).

Үүнийг ойлгоход, чин сэтгэлээсээ итгэхэд хэцүү мэт санагдаж байвч биднийг Есүсээр дамжуулаад зөвт болсон хэмээн Бурхан хардаг билээ. 2 Коринт 5:21-г:

“Нүглийг үл мэдэгч Түүнийг [үнэндээ] бидний төлөө Тэрээр нүгэл болгосны учир Түүний дотор бид Бурханы зөвт байдал [Түүний өршөөлөөр бид Түүнтэй зөв харилцаатай байх нь батлагдан, хүлээн зөвшөөрөгдсөн] болох юм [гэж үзэгдэх, тооцогдох, жишээ болох юм]” гэжээ.

Миний хувьд, амьдралынхаа ихэнх үед “буруутаж” явсан тул Христээр дамжуулан зөвтгөлийг авах тухай сургаалыг сонсоход үнэхээрийн гайхамшигтай байсан бөгөөд асар их эрх чөлөөг мэдэрсэн. Яг үүнийг ойлгоход нь хүмүүст туслах би дуртай. Тэгснээр тэд өдөр бүр төгс байж чадаагүйдээ өөрсдийгөө голохоо больж чадна. Бурхантай зөв харилцаатай байх нь бидний хийж байгаа зүйлээс биш, харин Есүсийн хийсэн зүйлээс шалтгаалдаг.

Бид Бурханы хайр, хүлээн зөвшөөрөл, нигүүлслийн талаар илүү ихийг мэдэх тусам найдвар нь бидний байнгын нөхөр гэдгийг ойлгодог. Яг үнэнээ хэлэхэд, хамгийн сүүлд би хэзээ итгэл алдарч, найдлага тасарснаа санахгүй байна. Бид Бурханд найдаж сурахаас гадна биднийг өсөж төлөвшиж, өөрчлөгдөж байх явцад Өөрийг нь хайрлах бидний хайр, үнэнч байдлыг Бурхан хараад, Өөртэй нь зөвт харилцаатай гэж үздэг гэдэгт үргэлж итгэлтэй байхад суралцах боломжтой.

Таны хэн байх, юу хийх хоёрын хооронд асар их ялгаа бий. Тийм ч учраас өөрийнхөө “хэн бэ” гэдгийг “юу хийж байна вэ” гэдгээс ялгаж салгаж үзэхийг би хүмүүст уриалдаг. Та бол Бурханы хүүхэд. Та дахин төрсөн. Та бол Бурханы Ариун сүнсээр дүүргэгдсэн. Өөрийгөө зөвхөн махбодын нүдээр харахын оронд Бурханы төлөвлөгөөг ойлгож, сүнс рүүгээ хар. Өөрийгөө Бурханы Үгийн толинд хараад, Христ Есүсийн дотор та хэн бэ гэдэгтээ баярлан хөөр.

Өөрт тохиож буй зовлон бэрхшээлээ ч Бурханы харж байгаагаар харж ойлгодог байхыг би танд уриалан ятгаж байна. Тэдгээрийг Бурхан яаж харж байгаагаар хар. Бурхан тэдгээр зовлон бэрхшээлийг түр зуурын зүйл гэж хардаг. Үүрд мөнхөд үргэлжилдэг зовлон бэрхшээл гэж байхгүй. Чөлөөлөлт таны бодож байгаагаас ойр байгаа тул найдвараа ямагт өндөрт байлга. Бурханы шилээр харах үедээ та: “Энэ үүрд үргэлжлэхгүй учраас би давж гарна” гэж хэлэх хэрэгтэй.

“Бүх зүйл таны эсрэг байгаа мэт санагдан, цааш нэг хором ч тэсэж байхын аргагүй мэт хэцүү байдалд орсон ч хэзээ ч бүү шантар. Учир нь энэ нөхцөл, энэ цаг хугацаа өнгөрөн одно”.

—Харриет Биичер Стөүви

Бүхнийг Өөртэй нь хамт туулахыг Бурхан хүсдэг. Цааш үргэлжлүүлэн явах уу, шантарч бууж өгөх үү гэдгийг бид л сонгоно. Бурхан бидэнд амлалтыг өгдөг, харин амьдралын шуурганд дайвшгүй байж, хүлээх нь биднээс шалтгаална. Мэдээж Бурхан бидэнд тусалдаг. Тэр бидэнд Өөрийн нигүүлсэл, хүч чадал, урам зоригийг өгдөг. Гэхдээ цааш нь эрч хүчтэйгээр үргэлжлүүлэх үү, болих уу гэдгээ эцсийн бүлэгт бид шийдэх ёстой. Зовлон бэрхшээлээс олж авах нэг ашиг тус бол биднийг хүнд бэрх зүйлсэд хатуужуулахын тулд тэдгээрийг Бурхан ашигладаг оршдог. Исаиа 41:10а (АМР):

“Би чамтай хамт, чи битгий ай! [айх зүйл байхгүй]. Айдас, түгшүүртэйгээр эргэн тойрноо харах

хэрэггүй. Учир нь Би чиний Бурхан! Би чамайг хүнд бэрхшээлээр бэхжүүлж, хатуужуулна...”

Энэ үнэхээр гайхалтай ишлэл бөгөөд биднийг хүнд бэрх үеийг туулж явахад хүртэл тэр дунд Бурхан ямар нэг сайн зүйлийг хийж, байдлыг сайнаар эргүүлэх болно гэдгийг өгүүлдэг. Тэрээр маш олон зүйлийг хийдэг бөгөөд тэдгээрийн нэг нь биднийг хүчирхэгжүүлэх явдал юм. Тэр биднийг хүнд бэрх үед тэнхрүүлдэг. Өөрөөр хэлбэл, биднийг нэгэн цагт сэтгэлээр унагаж, айлгаж, эсвэл бидний санааг зовоож байсан зүйл дахин бидэнд төвөг болохоосоо хэдийн өнгөрдөг.

Фитнес клубт дасгал хийж, хүндийн жин өргөдөг хүний булчин хөгждөг. Гэхдээ тэрээр нэгэн тодорхой цэгт хүрсэн тохиолдолд одоогийнхоосоо илүү том булчинтай болох цорын ганц арга нь өмнөхөөсөө илүү хүнд жин өргөх. Бид Бурханаас амьдралынхаа аль нэг талбарт илүү ахиц дэвшил гаргахын төлөө гуйх үедээ бидний төлөө ямар нэг зүйл хийхийнхээ өмнө бидний дотор ямар нэг зүйлийг Бурхан хийнэ гэсэн хүлээлттэй байх хэрэгтэй. Бид сүнс дотроо илүү хүнд жин өргөж сурах хэрэгтэй гэж хэлж болох юм.

Биднийг илүү агуугаар ашиглаач хэмээн Бурханаас гуйх үедээ бид Паулын хэлснийг санах хэрэгтэй. Тэрээр үлэмж том, үр нөлөөтэй үүд хаалга өөрийнх нь өмнө нээгдэхийн хамтаар маш олон эсэргүүцэгчид гарч ирсэн тухай өгүүлсэн байдаг (1 Коринт 16:9). Сатан сайн сайхан бүхнийг эсэргүүцдэг. Тэр бүхий л өсөлт, ахиц дэвшлийг эсэргүүцдэг ч хэрэв бид гуйвшгүй байж чадвал биднийг Бурхан чөлөөлөхийн зэрэгцээ бэрхшээл зовлонгийн дунд ч сүнсээр өсөхөд тусална.

Гэхдээ энэ нь, бидэнд тулгараад байгаа зовлонгийн зохиогч нь Бурхан гэсэн үг биш. Харин бидэнд янз бүрийн арга замаар туслахын тулд тэдгээр зовлон бэрхшээлийг Бурхан ашигладаг гэсэн үг. Хэрэв та төвөгтэй, хэцүү бэрх нөхцөлд байгаа бол ямар хэцүү юм бэ гээд суухын оронд үүнээс гарч болох сайн сайхан зүйлийн талаар бодохыг хичээ. Найдах ямар ч шалтгаан үгүй болох үедээ Абрахам шиг итгэл дотор найдаарай.

Бурханы үзэж буйгаар, та чөлөөлөгдөж, эрх чөлөөтэй болохоо хүлээж байх үед ч хүртэл сайн зүйл болж байдаг аж. Та сүнсний хувьд өсөж, тэвчээртэй байдалд суралцаж, шалгуурыг давж байдаг бөгөөд энэ бүхнийг давж туулсны эцэст ахиц дэвшилд хүрэх болно. Тийнхүү таны нөхцөл байдал өөрчлөгдөхөд та Бурханыг хайрлаж, үүгээрээ Түүнийг алдаршуулж байгаа юм.

Зовлон шаналлыг үнэлэх нь зүйтэй. Тэдгээр нь зовоодог, гэхдээ бас үнэлүүштэй эд! Бид бүгдээрээ түүнийг туулдаг, гэхдээ бүгд амжилттай туулан гарч чаддаггүй. Аливаа шалгуурыг давсныхаа дараа зарим хүмүүс гэрчлэл ярьдаг бол зарим нь зүгээр л “ёолон гомдоллодог” гэж би хэлдэг.

Найдварыг зуршил болго

Бурханы төлөвлөгөөг ойлгохын тулд та амьдралдаа зарим нэг шинэ хэвшил буюу зуршлыг бий болгох хэрэгтэй. Бурханы үгийг сонсох “зуршил” гээд ярихлаар муу зуршлынхаа талаар таныг бодоход хүргэж болох ч (учир нь өнөө үед муу зуршлуудын талаар их анхаарал хандуулж байна) та бас сайн зуршлыг бий болгож болно. Тухайлбал, та найдварыг зуршлаа болгож болно. Та найдварыг өөрийн төрөлх хандлага болох хүртэл удаан хугацаанд өөртөө хөгжүүлэн төлөвшүүлж болно.

Та найдварыг зуршил болгож болно.

Бурхан ямар нэгэн агуу зүйл хийх гэж байна хэмээн харж, хүсэн хүлээж, найдах энэ хандлага нь аяндаа хүрээд ирдэг зүйл биш. Үүнийг өөрийн хоёр дахь мөн чанар буюу зуршил болгох хүртлээ зориудаар өөртөө хөгжүүлэн төлөвшүүлэх болно гэсэн найдварын сэтгэлгээг ухаан санаандаа та суулгах хэрэгтэй гэсэн үг. Үүнийг хийх нэг арга зам бол сайн сайхан зүйлсийг хүсэн хүлээдэг байхыг өөртөө сануулах. Найддаг зүрх сэтгэлтэй байхыг танд сануулах тэмдгийг гэрийнхээ энд тэнд байрлуулж болох юм. Шинэ зуршлыг бий болгож, төлөвшүүлэхээр ажиллаж байхдаа шаардлагатай бүх аргыг

хэрэглэх нь зөв гэж би боддог. Сайн зуршил нь муу нэгэнд орон зай үлдээдэггүй тул хэрэв бид найдах зуршлыг өөртөө бий болгож чадвал зүрх сэтгэл, оюун ухаанд найдвар тасрах, урам хугарах, цөхрөх гэх мэт зүйлсэд орон зай үлдэхгүй.

Хабаккук 2:2-т (АМР):

“Эзэн надад хариулж, хэлсэн нь, “Үзэгдлийг бичээд, хавтангууд дээр тодорхой сийл. Яаруу өнгөрч яваа [уншиж чадах] хүн ч үүнийг [амархан, хурдан уншиг] уншаад яваг” гэж бичжээ.

Үзэгдэл харсан бол түүнийгээ тэмдэглэж ав. Тэр нь заавал урт, эсвэл нарийн тодорхой байх албагүй. Та болон таны гэр бүл хичнээн яарч байсан ч “түргэхэн зуур амархан” уншигдахаар жижигхэн сануулгуудыг бичиж байрлуулах хэрэгтэй. Хэрэв дараах сануулгууд таны нүдэнд харагдаж байвал ямар их итгэл найдвар төрөх байсан талаар бодоорой:

- Шүдээ угаахаар угаалгынхаа өрөөнд ороход тэнд: “Найдвар маш чухал. Бурхан өнөөдөр таны амьдралд ямар нэг агуу зүйл хийх гэж байна гэдэгт итгэхээ бүү март” гэсэн үгс толин дээрт байвал;
- Танхим дундуур алхаж явахад ханан дээр: “Найдвар бол сайн сайхан зүйлийг баяртайгаар хүлээх явдал мөн. Баяр хөөр, аз жаргалтай бай. Бурхан сайныг үйлдэхээр зэхэж байна” гэсэн бичиг байвал;
- Өглөөний цайгаа бэлдэхээр гал тогооныхоо өрөөнд ороход цахилгаан зуухны чинь дээд талд: “Баяр хөөртэй бай. Бурхан өнөөдөр гайхалтай зүйлийг хийх гэж байна” гэсэн бичиг байвал;
- Ажилдаа явахаар, хүүхдүүдээ сургуульд нь хүргэж өгөхөөр, эсвэл найз нартайгаа хамт кофе уухаар машиндаа суухад тань: “Найдвар өвөрлөгтүн. Бурхан өнөөдөр таньтай хамт байгаа бөгөөд Тэрээр таньтай сайн харилцаатай байгаадаа баяртай байдаг” гэсэн бичиг харагдаж байвал.

Таны тухайд ямар байгааг би хэлж мэдэхгүй ч, миний найдвар хэдийнээ дүүрч эхэлж байна. Хэрэв та найдвараар дүүрэн амьдрахыг хүсэж байвал хэрэгтэй бүхнийг хий. Өдрийн турш таны найдварыг хулгайлах гэсэн маш олон зүйл гарч ирдэг. Найдварыг сануулагч тэмдгүүдийг ашиглан “найджар хулгайлагчид”-ыг хөөн зайлуулах шийдвэр гарга.

Тэдгээр сануулга тэмдгүүдийг хаа сайгүй нааж байрлуул. Ялангуяа, сэтгэлээр унах, сөрөг бодолд автах хандлагатай үед, эсвэл хүнд хэцүү үеийг туулж яваа үед энэ маш чухал.

Илүү өндөрт гарах тусам илүү сайн хардаг

Би тэр бүр ууланд авираад байдаггүй, үүнийгээ ч хүлээн зөвшөөрөх хэрэгтэй гэж бодож байна. Магадгүй та сайн авирагч байх, харин энэ миний хийдэг зүйл биш. Миний хувьд, амралтын өдрүүдээр уул хад, ой модоор зугаалахаас илүүтэй хүүхдүүдтэйгээ хамт байх дуртай. Ууланд авирдаг хүмүүс яг хаана яваагаа мэдэх гэж эргэн тойрноо ажиглаж, илүү өндөр зүйл дээр гарч алсын бараа харахыг хичээдэг. Учир нь өндөр дээрээс алсын бараа сайн харагддаг. Тэд мод руу авирах юмуу, толгодын орой дээр гарах, үхэр чулуун дээр гарах гэх мэтчилэн өндөр зүйлс рүү мацдаг. Илүү өндөр дээр гарвал илүү алсыг харж чадна гэдгийг тэд мэддэг.

Өнөөдөр таны хувьд ч, миний хувьд ч энэ зүйл үнэн. Заримдаа бид хаана явж байгаагаа харахад хэцүү байдаг. Учир нь бидний харах алслал хязгаарлагдмал байдаг. Эргэн тойронд маань юу байгааг мэдэхгүй, зөв баримжаа байхгүй учраас бид дараа нь хаашаа явахаа мэддэггүй. Бидний найдвар ба чиглэл өнгөрсөнд амссан бүтэлгүйтэл, цөхрөлийн ангал, найдваргүй байдлын манангаас болж алдагддаг.

Бурханы төлөвлөгөөг ойлгохын тулд та илүү өндөр өөд явах хэрэгтэй. Та таагүй байдлаас хурдан холдож, эргэлзээ болон урам хугарлаас өндөрт авир. Хэрэв та илүү өндөр хүлээлт, илүү өндөр найдвартай байхаар шийдвэл нэгэн шинэ

төсөөлөл, шинэ алсын хараа буюу бурханлаг харааг олж авна гэж би итгэж байна. Тэгсэн цагт та өмнө харж байснаасаа илүү алсыг харах болно.

Найдвар өвөрлөгтүн!

Та өөрийгөө болон амьдралынхаа нөхцөл байдлыг хэрхэн харах вэ гэдэг дээр суурилан чухам ямар амьдралыг сонгох вэ гэдгээ тодорхойлох боломжтой. Хэрэв та өөрийн алдаа, бүтэлгүйтлийг харж, тэдгээр зүйл таныг тодорхойлдог гэж бодох юм бол өөрийн тань амьдралд Бурхан маш их зүйлийг хийх болно гэдэгт найдаж чадахгүй гэсэн үг. Хэрэв та асуудлаа харж, байнга тэр талаараа ярьсаар байх юм бол тэдгээр асуудал давж гарахын аргагүй том харагдах бөгөөд итгэл найдвартай байна гэдэг улам бэрх санагдах болно.

Гэхдээ, үүнээс өөр алсын хараа, өөр хэтийн төлөвлөгөө байдаг нь үнэхээр талархууштай. Таны төлөөх, таны амьдралын төлөөх Бурханы хэтийн хараа төлөвлөгөө илүү сайн... бөгөөд тэр бол үнэхээр утга учиртай цорын ганц төлөвлөгөө юм. Таныг харахдаа Бурхан хайраар дүүрэн байдаг бөгөөд Тэрээр таны амьдралд агуу зүйлсийг төлөвлөсөн. Иеремиа 29:11-д (NIV) айлдахдаа: “Учир нь та нарт зориулж байгаа төлөвлөгөөнүүдийг Би мэдэх бөгөөд тэдгээр нь та нарт найдвар ба ирээдүйг өгөх, та нарыг хорлох биш харин дэвжин дээшлүүлэх төлөвлөгөөнүүд юм” гэж Эзэн тунхаглаж байна” хэмээсэн байдаг. Тиймээс урагш тэмүүлж, найдвар өвөрлөгтүн. Таныг өнгөрсөн үед чинь ч Бурхан ерөөсөн бөгөөд ирээдүйд ч мөн ерөөнө гэдгээ амласан. Энэ бүхэн хэрхэн хэрэгжих юм бол гэж та эргэлзсэн үедээ зүгээр л шөнө гадаа гараад тэнгэр өөд хараарай. Бурхан Абрахамд өгсөн амлалтаа биелүүлсэн бөгөөд Тэрээр танд өгсөн амлалтаа ч бас биелүүлэх болно.

АРВАН ЗУРГАДУГААР БҮЛЭГ

Сонголт таных

“Юунд ч санаа бүү зов. Харин аливаа зүйлд залбирлаараа болон гуйлтаараа талархалтайгаар хүсэлтээ Бурханд өргө. Бүх ойлголтыг давах Бурханы амар тайван танырын зүрх сэтгэл, бодол санааг Христ Есүс дотор хамгаална”.

Филиппой 4:6-7 (NIV)

“Найдвар нь урам хугалахуйц нөхцөлд ч баяр хөөртэй байх хүч юм”.

—Ж. К. Честертон

Та бид итгэл найдварыг өнөөдөр мэдрэх боломжтой гэдгийг мэдэх үнэхээр гайхалтай биш гэж үү! Гэхдээ тэрхүү бодит үнэн дотор амьдрахын тулд бид найдварын дайсан болох санаа зовнилыг ялан дийлэх хэрэгтэй.

Санаа зовнил бол найдварын заналт дайсан юм. Найдвар, санаа зовнил хоёр зэрэгцэн орших ямар ч боломжгүй. Тиймээс та аль нэгийг нь сонгох хэрэгтэй. Найдвар нь тохиолдож болох бүх сайн зүйлсийг хардаг бол санаа зовнил нь байнга муу со-

винг дуудаж байдаг. Муу совин нь ямар нэг муу зүйл болох вий гэсэн санаа зовнилыг төрүүлдэг. Санаа зовнил ба айдас нь үргэлж хамт байх бөгөөд нөхцөл байдлаа хэрхэн шийдэх

*Найдвар,
санаа зовнил
хоёр зэрэгцэн
орших ямар ч
боломжгүй.*

вэ, асуудал бэрхшээлээс хэрхэн гарах вэ гэсэн түмэн бодолд биднийг унагаж байдаг. Санаа зовних нь ямар ч ашиггүй бөгөөд хэрэггүй гэдгийг Библи бидэнд олонтаа сургадаг ч бид энэ уруу татлагад маш их автдаг. Асуудлаа зөвхөн өөрөө шийддэг, зөвхөн өөртөө найддаг байснаа больж, Бурханд даатгаж, Түүнд бүрэн найддаг болоход цаг хугацаа шаардах нь ойлгомжтой.

Санаа зовнилыг ялж, найдвараар дүүрэн амьдрах гол түлхүүрийг харуулсан нэгэн түүхийг би сонссон...

“Нэгэн пастор ажлын шугамаар нэлээд урт нислэг хийх болжээ. Онгоцонд суусны дараа түүнд ирсэн анхны анхааруулга нь: “Суудлынхаа даруулгыг хийнэ үү” хэмээн анивчих гэрлэн дохио байлаа. Хэсэг хугацааны дараа: “Удахгүй бид агаарын хүчтэй урсгалд орох гэж байгаа тул энэ удаа уух зүйлээр үйлчлэхгүй болно. Та бүхэн суудлынхаа даруулгыг хийнэ үү” хэмээн намуухан хоолойтой үйлчлэгч анхааруулав.

Мөнөөх пастор онгоцонд сууж яваа хүмүүсийг тойруулан хартал тэдний нэлээд нь санаа зовниж эхэлсэн нь илэрхий байлаа. Тэгээд хэсэг хугацаа өнгөрсөн хойно онгоцны үйлчлэгч: “Бидний замд агаарын хүчтэй урсгал байсаар байгаа тул энэ удаа хоолоор үйлчилж чадахгүй болсондоо хүлцэл өчье” хэмээн зарлав. Тэгтэл ч шуурга тавих нь тэр. Аймшигтай аянга цахиж, тачигнах дуун онгоцны хүнгэнэх моторын чимээнээс давж байлаа. Цахилгаан харанхуй тэнгэрийг зүсэн гэрэлтүүлж, тэрхэн мөчид асар том нисэх онгоц тэнгэрийн мандалд шидэгдсэн үйсэн бөглөө мэт санагдаж байлаа. Агаарын хүчтэй эргэлтийн нөлөөгөөр онгоц нэг мөчид дээш өргөгдөж, дараа нь сүйрэх гэж байгаа мэт доош хаягдав.

Пастор бусад зорчигчдын адил санаа зовж, айдаст автсанаа нуугаагүй юм. Тэрээр “Онгоцон доторхыг тойруулан хартал зорчигчид бараг бүгд айж сандарч, түгшсэн байлаа. Зарим нь залбирч байв. Ирээдүй бүрхэг, аймшигтай санагдаж байсан бөгөөд энэ шуургыг давж гарч чадах эсэхдээ олон хүн эргэлзэж байв. Гэтэл нэг жаахан охин миний нүдэнд тусав. Тэрээр айхавтар шуургыг тоож байгаа шинж огт алга. Тэрээр хоёр хөлөө нугалж суугаад ном уншиж байлаа. Түүний бяцхан ертөнцөд бүх зүйл эмх цэгцтэй, тайван амгалан байв. Тэр хааяа нүдээ анин, тэгснээ дахиа л номоо уншина. Тэгснээ хөлөө жийнэ. Түүний ертөнцөд ямар ч санаа зовнил, айдас байсангүй. Онгоц ийш тийш хазайж, дээш доош болсоор аймшигт шуургыг гатлах зуур зорчигчид бүгд үхтлээ айсан байхад өнөөх гайхалтай охин ер бусын тайван, ямар ч айдасгүй байлаа” гэжээ.

Пастор нүдэндээ итгэхэд бэрх байв. Онгоц зорьсон газраа хүрч газардахад зорчигчид бүгд буух гэж яаран зүтгэнэ. Пастор харин тэгсэнгүй, урт аяллын турш ажиглаж байсан мөнөөх охинтойгоо ярилцахаар зугуухан дөхөж байсан хэрэг. Тэрээр охинд агаарт болсон шуурга, онгоц хэрхэн тэнцвэр алдаж байсан талаар хэдэн зүйл хэлснийхээ дараа түүнийг яагаад айхгүй байсныг асуужээ.

Харин охин түүнд, “Яагаад гэвэл, миний аав нисэгч нь, бид хоёр гэртээ харьж яваа юм”¹ гэж хариулжээ”.

Шуурган дунд хүртэл хэрхэн амар амгалан байж болдгийг харуулсан ямар агуу дүрслэл вэ! Аав нь хийж байгаа зүйлээ сайн мэдэж байгаа гэдэгт бяцхан охин итгэж байсан учраас өчүүхэн ч айж түгшээгүй ажээ. Хүн бүр болж буй шуурганд

хамаг анхаарлаа чиглүүлж, түүнээс амьд гарч чадахгүй нь гэж айж, балмагдсан байсан. Харин тэр бяцхан охинд ийм бо-дол огт төрөөгүй байна. Аав нь тэр бүх хугацаанд нөхцөл байдлыг бүрэн хянаж байгаа гэсэн итгэл түүнд байсан учраас юунд ч санаа зовох хэрэг байсангүй.

Юмс хүнд хэцүү болох үед илүү муу зүйлийг төсөөлөхийн оронд биеэ суллаад, сэтгэлээ тайвшруулах итгэлтэй бай.

Хэрэв та амьдралдаа буй санаа зовнилоо даван туулахыг хүсэж байгаа бол тэр охинтой адилхан ханд-

лагатай байхыг би танд уриалж байна. Юмс хүнд хэцүү болох үед илүү муу зүйлийг төсөөлөхийн оронд биеэ суллаад, сэтгэлээ тайвшруулах итгэлтэй бай. Магадгүй сэгсрэгдэн донсолж, эргэн тойронд чинь байгаа хүмүүс айж сандарч байсан ч тэдний мэдэхгүй зүйлийг та мэдэж байж болно шүү дээ... Тэнгэрлэг Эцэг тань жолоо барьж яваа гэдгийг та мэднэ. Тэр таныг ямар ч үед доош унагахгүй. Тэр бүхий л цаг үед хяналтыг гартаа атгах болно.

Шуурган дунд тайван амгалан бай

Ром 8:24-25 (АМР) ишлэлд найдварын тухай:

“Учир нь бид ийм найдвараар аврагдсан. Гэхдээ харагдаж байгаа найдвар [харагдах зүйл] нь найдвар биш юм. Хүн харж буй зүйлдээ найдахын хэрэг юу байна? Харин бид харахгүй байгаа зүйлдээ найдвал түүнийгээ тэвчээртэйгээр биеэ барин хүлээдэг” (тодотгол нэмэв) гэж бичжээ.

Биеэ барина гэж юу гэсэн үг вэ! Бид сэтгэл хөдлөлөө хяналтад байлгана гэсэн үг. Хэн нэгнийг сэтгэл санаагаар түгшсэн үед нь та түүнд: “Тайвшир, биеэ барь” гэж хэлж болох юм байна. Найдвар нь Бурханыг тэвчээртэйгээр, биеэ барьж тайвнаар хүлээх боломжийг бидэнд олгодог гэж Библи сургадаг. Өөр үгээр хэлбэл, бид Бурханыг хүлээж байхдаа тайван амга-

лан байж болно. Бид хэзээ ч айдаст автаж, барьц алдах хэрэггүй. Магадгүй бид тийм байдалд соригдсон ч биднийг Бурхан хайрладаг, хэзээ ч орхихгүй гэдгийг санахдаа нөхцөл байдлыг даван туулж чадна. Сэтгэлээр унахгүй байхыг “хичээх” нь хангалтгүй, харин өнгөрсөн үед таныг Бурхан хэрхэн чөлөөлснийг эргэн санаж, Тэр дахин тийнхүү үйлдэх болно гэдгийг мэдэж тэдгээр бодолтой нүүр тул. Биднийг цохиж унагааж болох ч жагсаалтаас хасаж хэзээ ч чадахгүй.

Найдвар нь амар амгалан, тайван тогтуун байдлыг авчирдаг. Найдвар нь “Миний нөхцөл байдлыг төрөлх нүдээр харж хариулт өгөх хэрэггүй, харин Бурхан ажлаа хийж байгаа гэдэгт итгэж байна гэсэн итгэлээр хар” гэж хэлдэг. Санаа зовнисноор хамаг сэтгэлийн тэнхээгээ дэмий барна гэдгийг үргэлж сана. Санаа зовнил нь биднийг оюун бодол, сэтгэл санааны хувьд туйлдуулах ба ямар ч сайн зүйл хийдэггүй. Санаа зовнил нь биднээс өөр юуг ч өөрчилдөггүй. Зөвхөн Бурханы шийдэж чадах нөхцөл байдлыг өөрсдөө шийдэж, өөрсдөө хариулт олж авах гэж ухаан мадаггүй эрж хайж байхад минь санаа зовнил биднийг төөрөлдүүлж орхидог. Бурхан төөрөгдлийг бий болгоогүй, Тэр бол Амар тайвны Ханхүү. Тэр таныг найдвар дотор амьдраасай гэж хүсдэг. Тэгснээр та эргэн тойронд чинь болж бүхэн хяналтаас гарсан мэт санагдах өдрүүдэд ч ямар нэг сайн сайхан зүйл болно гэсэн итгэлээрээ бат зогсож чадна. Үүнд итгэж, үүнийг бясалгаж, үүний тухай ярь, тэгээд зовлон бэрхшээл туулж яваа хүмүүст урам зориг өгөөрэй.

Хэсэг эцэг эхчүүд хүүхдүүдийнхээ хөл бөмбөгийн тэмцээн үзэж байна гэж бүгдээрээ төсөөлье. Тэдний дунд маш их санаа зовомтгой эцэг эх байх аж. Бусад эцэг эхчүүд сайн сайхан зүйлд итгэж байхад тэд бол муу зүйл болох вий л гэж байнга төсөөлж зовно.

Тэдний хүү хоёрдугаар ангид сурдаг бөгөөд тэрээр маш идэвхтэй тоглогч ажээ. Тэр талбай дээгүүр бөмбөг эзэмшин гүйж явснаа гэнэт эргэж, эсрэг багийн тоглогчийн өдөөс довтлохдоо хальтирч унаад өвдгөө шалбалж орхив. Хүү хэдэн

дусал нулимс унагасан нь байдаг л нэг үзэгдэл бөгөөд түүний шархыг цэвэрлэж боох зуур бусад хүүхдүүд хүлээж байлаа. Хүүгийн эцэг эх хоёр хүүгээ зүгээр байгаа даа (тэр үнэхээр зүгээр байсан) хэмээн санаа зовнин талбай руу анхааралтай ширтэх авч амьдралыг үзэх үзэл нь огт өөр зүйл хийхэд хүргэж байв.

Биеэ барьдаг, тэвчээртэй эцэг эхчүүд бол дасгалжуулагч ирж хүүхдийнх нь шархыг шалгах хүртэл анхааралтай ажиглана. Тэд бусад эцэг эхчүүдийн л адил хүүхдийнхээ төлөө санаа зовних нь мэдээж, гэхдээ хүүгийнх нь шархыг цэвэрлээд, шархны лент наахад болохоор байгаа тохиолдолд хүүхэд рүүгээ эрхий хуруугаа гозойлгож, тэмцээнээ дуустал сайн тоглохыг урамшуулан зоригжуулдаг. Өөдрөг эцэг эхчүүд тухайн нөхцөл байдлыг мэдэхгүйдээ биш, харин учирч болзошгүй гэмтэл бэртлээс болж хүүхдийнх нь сэтгэл санаа тогтворгүй болж, сэтгэлээр унахаас сэргийлэхийн тулд тийнхүү үйлддэг. Ямар нэгэн муу зүйл болох нь гэсэн эрүүл бус бодолд дарагдан, айдас хүйдэст автахын оронд сайн зүйлийн талаар эрүүл ухаанаар төсөөлөн боддог.

Харин санаа зовомтгой эцэг эх огт өөр байдал гаргадаг. Тэд болсон явдлыг маш ширүүнээр шүүмжилдэг. Дас-галжуулагч, эсвэл шүүгч гарч ирж хүүгийн гэмтлийг шалгахаас өмнө санаа зовомтгой эцэг эхчүүд аль хэдийнээ талбай дээр гарч ирчихээд хүүгийнхээ өвдгийг үзэж харахаас гадна эмнэлгийн төлбөрт хүртэл санаа зовж зогсдог. Энэ зүгээр л нэг шалбарсан өвдөг гэдгийг сана. Гэтэл санаа зовомтгой эцэг эхчүүд сэтгэл санаагаа амар байлгаж, биеэ барьж чаддаггүй. Тэд хүүгээ гипсэн боолттой, таягтайгаар төсөөлөн, бөөн сүр дуулиан болгож, хүүгээ талбайгаас өргөж гарган, машин руугаа гүйнэ.

Магадгүй та эргэн тойрныхоо хүмүүсийн амьдралаас (эсвэл таны өөрийн амьдралд ч тохиосон байж болох) иймэрхүү дүр зургийг харсан байж болох юм. Таагүй зүйлийн анхны шинж тэмдэг илрэв үү үгүй юу барьц алддаг хүмүүс “Үгүй яахав дээ, би зүгээр л санаа зовомтгой хүн” гэж өөрсдийнхөө үйлдлийг байдаг л нэг хувь хүний зан чанар мэт зөвтгөж

ярьдаг. Харин санаа зовнил бол таны болон таны эргэн тойронд байдаг бүх хүмүүсийн баяр хөөрийг хулгайлах зорилготой дайсны зэвсэг юм. Энэ бол хүний зан чанарын онцлог биш, харин айдас болон Бурханд найдахгүй байгаа байдал дээр суурилдаг.

Адгийн муу зүйл болох вий гэсэн айдастайгаар амьдралыг туулах хэрэггүй. Өвдөг шалбарах тоолонд үхтлээ сандарч, сэтгэлээр унах шаардлагагүй. Бүх зүйл зүгээр болно гэсэн найдвараар амьдрах боломжтой. Үнэндээ зүгээрээс илүү бүр сайн, бүр агуу болох болно. Бүх зүйл Бурханы хяналтад байдаг бөгөөд таны амьдралд зориулсан Түүний төлөвлөгөөнд найдах үед найдвар, амар тайван, тайвшрал аяндаа танд ирэх болно. Гэхдээ бид хэзээ ч таагүй нөхцөл байдалтай тулгарахгүй юмуу, эсвэл амьдралд бүх зүйл бидний хүссэнээр болно гэсэн үг биш, харин сайн сайханд итгэх үү, эсвэл муу муухай зүйлийг зөгнөн хүлээх үү гэдэг сонголтыг хийх боломж бидэнд байна гэсэн үг. Алиныг нь сонгох нь бидний хэрэг билээ.

Найдвар нь тайвшруулах нөлөөтэй

Ер нь хүмүүст төдийгүй христитгэгчдэд ч гэсэн тогтвортой бус байдалтай холбоотой том асуудлууд үүсэх боломжтой. Тэрхүү тогтвортой биш байдал нь санаа зовнил ба айдсаас үүдэлтэй байдаг. Санаа зовсноосоо болоод хүмүүсийн сэтгэл санаа дээш, доош савлаж, бодол санаа нь үймж гүйцдэг. Гэр бүлийн чинь санаа зовомтгой гишүүд юмуу найз нөхдөд чинь юу тохиолдохыг та хэзээ ч хэлж мэдэхгүй. Тэдний сэтгэл санаа тухайн өдөр болсон явдлаас шалтгаалдаг тул ямар нэг байдлаар урьдчилан таамаглах боломжгүй байдаг. Тэд ийм байдалтай байхыг хүсдэггүй ч санаа зовнил нь тэднийг ийм байдалд оруулдаг. Тэд тайван дөлгөөн байхыг хүсдэг ч бүх зүйл аятай таатай, нөхцөл байдал тааламжтай байсан цагт л тийм байх боломжтой гэж андуу боддог.

Би олон жил сэтгэл санааны хувьд тогтворгүй амьдарсан. Тайван амгалан амьдрахын тулд надад тохиолдсон

асуудлуудыг цэгцэлж өгөхийг Бурханаас байнга залбиран гуйдаг байлаа. Есүс далайн их шуурган дунд тайван амгалан байсан шигээ биднийг ч мөн тийнхүү амар тайван байлгахыг зорь-дог гэдгийг би одоо мэддэг болсон. Бурхан яагаад бидний асуудлуудыг зүгээр л алга болгочихдоггүй юм бэ? Хэрэв Тэр хүсэх юм бол тэгж чадна шүү дээ. Хариулт нь тун энгийн. Бид энэ дэлхий дээр амьдарч байгаа бөгөөд энд зовлон байсаар л байх болно (Иохан 16:33). Хэзээ ч ямар ч зовлон бэрхшээлтэй тулгарахгүй байя гэвэл бид энэ ертөнцөөс бүрмөсөн явах хэрэгтэй болно. Энд байна гэдэг тэр бүр амар хялбар байхгүй ч юу ч тохиолдсон тайван дөлгөөн байж, амьдралын сайн сайхныг мэдрэхэд шаардлагатай бүх зүйлийг Бурхан бидэнд өгсөн.

Байдлыг бодитоор авч үз

Сайн сайхан зүйлсийг найдан хүлээх хэрэгтэй гэж би энэ номынхоо бүлэг бүрд та бүхнийг урамшуулж байна. Гэхдээ энэ нь бодитой бус хүлээлтийг өөртөө бий болго гэсэн үг биш юм шүү. Хүмүүс төгс болж, таныг хэзээ ч гомдоохгүй гэх юмуу, эсвэл өдөр бүр бүх зүйл таны хүссэнчлэн биелэх учиртай мэтээр найдаж хүлээх нь бодитой бус юм. Сайн сайхан зүйл болно гэдэгт итгэх нь амьдралын шуурган дундуур замаа алдахгүй залуурдаж, зорьсон газраа хүрэхэд тань туслах болно. Бид амьдралдаа олон зүйлийн дундуур туучдаг ч тэр бүхнийг “*туулан гардаг*” учраас Бурханд талархах хэрэгтэй. Тэдгээрийг туулж гарах нь тааламжтай биш байж болох ч тэндээ гацаж орхилгүй, туулаад гарна гэдэг хавьгүй дээр билээ.

Би өглөө сэрэхдээ ямар нэг асуудал тулгарна гэсэн хүлээлттэй сэрдэггүй ч асуудал тулгарах боломжтой гэдгийг мэддэг бөгөөд аливаа зүйлс ямар нэг сайн зүйлийн төлөө ажиллах болно гэсэн найдвар дүүрэн байж, эерэг хүлээлтийг бий болгоно гэж оюун санаандаа хэдийн суулгасан байдаг. Биднийг давуулан дийлэгч гэсэн байдаг. Өөрөөр хэлбэл, бидэнд асуудал тулгарахаас аль өмнө ялна гэсэн баталгаа

бидэнд өгөгдсөн байдаг гэсэн утгатай гэж би хувьдаа үүнийг ойлгодог. “Ялагч” гэдэг нь биднийг ялгах шинэ тодорхойлолт юм. Эцсийн мөчид бид үргэлж ялна гэсэн баталгаа байгаа учраас бид хохирогч сэтгэлгээгээр амьдрах учиргүй юм.

Эдгээр зүйлд бүрэн дүүрэн итгэх нь бидэнд тогтвортой, тайван байх боломжийг олгодог билээ. 1Коринт 15:58-д элч Паул: “...тууштай байж, гуйвж дайвалгүй, Эзэний үйл хэргээр үргэлж бялхаж бай” гэж хэлсэн байдаг. Есүсийг дагана гэдэг чухам юу гэсэн утгатай болохыг энд ямар гайхалтай дүрслээ вэ! Бурханыг амьдралынхаа үндэс суурь болгосон хүн чухам ингэж амьдрах боломжтой юм. “Тууштай, гуйвшгүй, тогтвортой” байна гэдэг нь санаа зовнилоо хойш тавиад, цаг үргэлж итгэл найдвараар дүүрэн амьдрах шийдвэр гаргасны дүнд төлөвшдөг онцлог шинж чанар юм.

Найдвар нь таны амьдралд эрч хүчийг, тогтвортой байдлыг авчирдаг. Таны амьдралын нөхцөл байдлыг Бурхан хяналтдаа байлгаж, ямар нэг агуу зүйлийг хийнэ гэсэн итгэл байгаа цагт та амьдралын шуурганд шидэгдэхгүй байж чадна. Таны найдвар Эзэний дотор байгаа учраас таны зангуу Эзэнд бэхлэгдэж, та аюулгүй байх болно.

Та аль нь вэ: Тас уу, колибри (эрээн далт бяцхан шувуу) шувуу юу?

“*Рийдерз Дижест*” (*Reader's Digest*) сэтгүүлийн нэгэн нийтлэлд ийнхүү өгүүлсэн байна:

“Колибри, тас шувуу хоёр бол манай улсын цөлөөр нутагладаг шувууд. Тас шувуу нисэж явахдаа ялзарч муудсан махыг л олж хардаг. Учир нь тас шувуу чухам тийм зүйлийг л эрж хайж явдаг. Тэр үүгээр л хооллодог. Харин колибри шувуу үхсэн амьтны өмхийрч муудсан сэг зэмд дургүй. Үүний оронд цөлийн өнгө алагласан ургамлыг

эрж хайдаг. Тас шувуу өмнө нь байсан ч, өдгөө үеэ өнгөрөөсөн зүйл дээр түшиглэн, өнгөрсөнд амьдардаг. Тэд үхэж үрэгдсэн юмсаар өөрсдийгөө дүүргэдэг. Харин колибри одоо байгаа зүйлд тулгуурлаж амьдардаг. Тэд шинэ амьдралыг эрж хайдаг. Тэд өөрсдийгөө шинэ, амьд зүйлээр дүүргэдэг. Эдгээр шувуудын аль аль нь хайж байгаа зүйлээ олдог. Бид ч мөн адил”.²

Тас, колибри шувуу хоёрын ялгаа нь санаа зовнил ба найдварын хоорондох ялгаатай маш их адил юм.

Тас, эрээн далт бяцхан шувуу хоёрын ялгаа нь санаа зовнил ба найдварын хоорондох ялгаатай маш их адил юм. Санаа зовнил нь тас шиг амьгүй зүйлээр хооллодог. Өөрөөр хэлбэл, санаа зовнил нь сөрөг хандлага, гутранги үзэл, айдас, түгшүүрээр тэжээгддэг. Хэдийн үхэж мөхсөн, эсвэл үхэж байгаа зүйлсийн дунд амиа зогоож явна гэдэг нь амьдралын төлөөх хамгийн муухай арга зам юм. Харин найдвар бол огт өөр. Найдвар нь колибри шувуу шиг үнэхээр үзэсгэлэнтэй. Найдвар нь шинэ, амьд зүйлийг эрж хайдаг бөгөөд шинэ зүйлээр хооллодог.

Бурханы хүүхдийн хувьд, амьдралын баяр хөөрийг амтлах эрх танд бий. Гэхдээ үүний тулд шинэ, цэвэр зүйлийг эрж хайж, эерэг хандлагатай байх сонголтыг хийх хэрэгтэй. Эерэг байна гэдэг нь сайн зүйлийг идэвхийлэн эрж хайна гэсэн үг юм. Дараагийн гамшиг хэзээ дайрах бол гэж хүлээж, харж суухын оронд, танд зориулж Бурханы бэлдсэн сайн сайхан зүйлс байгаа гэдэгт тууштай итгэж, тэдгээрийг эрж хайхыг хэлнэ.

Сөрөг хандлагаас салах нь дангаараа хангалтгүй юм. Энэ бол зөвхөн эхлэл. Сөрөг хандлагаа орхиод... дараа нь амьдралыг эерэгээр харах үзэл сэтгэлгээг дотроо суулгах боломж танд бий!

Миний сөрөг хандлага болон түүний үр дагавруудыг Бурхан маш шийдвэртэй авч үзээд, сөрөг зүйлийн талаар бодож, ярихаа болихыг шаардсаныг би санаж байна. Түүнээс хойш хэ-

дэн сар өнгөрөхөд би өөрийгөө нэлээд гайгүй болоод байна гэж бодож байсан боловч миний нөхцөл байдалд эерэг сайн өөрчлөлт огт харагдахгүй байлаа. Нөхцөл байдлаа эргэцүүлээд үзтэл, хэдийгээр би сөрөг хандлагаа орхих тал дээр нэлээд сайжирсан ч эерэг хандлагыг өөртөө төлөвшүүлж эхлээгүй байгааг Бурхан харуулж буйг ойлгосон юм. Биднийг буруу зүйл хийхээ болиод зогсохгүй сайн зүйлс хийдэг байхыг Бурхан хүсдэг. Хулгайч цаашид хулгай хийлгүй, харин ч гачигдалтай хүнд хуваалцах юмтай байхын тулд өөрийн гараар сайныг үйлдэх хэрэгтэй гэж Библи сургадаг. Мөн түүнчлэн уур хилэн, атаа хорслоос зайлсхийж, хүмүүсийн тусын тулд сайныг үйлдэж, энэрч, эелдэг, аядуу зөөлөн хандах хэрэгтэй гэж Бурхан бидэнд заасан (Эфес 4:28, 31-32-ыг уншина уу) билээ.

Бурхан энэ дэлхийн зарчмуудыг бурханлаг зарчмуудаар солихыг хүсдэг. Үүнийг та Библийн хаанаас ч харах боломжтой. Тэр бидний гэм нүглийг авч, Өөрийн зөвт байдлыг бидэнд өгсөн. Тэр бидний үймээн сандралыг авч, Өөрийн амар тайвныг өгдөг. Тэр бидний уй гашууг авч, Өөрийн баяр хөөрийг өгдөг. Муу муухай зүйлсийг Тэр зайлуулж, сайн сайхан зүйлсийг авчирдаг.

Энэ бүхэн таны амьдралд дараах байдлаар илэрч болох юм. Үүнд:

- Та хүмүүст зохисгүй хандахаа больсон байж магадгүй. Энэ бол сайн алхам. Харин одоо өөр нэг алхам хийж, тэдэнд сайн хандаж, өөрт олдсон боломж бүрийг ашиглан тэднийг ивээж эхлэх хэрэгтэй;
- Магадгүй та хүмүүсийг муулахаа больсон байж болох юм. Харин одоо та тэдний талаар ярих сайн сайхан зүйлийг идэвхийлэн эрж хайдаг болох хэрэгтэй;
- Та магадгүй, амьдралд тань тохиолдсон хүнд бэрх зүйлийн талаар цаг үргэлж гомдоллохоо больсон байх. Энэ үнэхээр сайн алхам. Харин одоо та өөр нэг алхам хийж, өдөр бүр танд тохиолдсон сайн зүйлсийн төлөө талархаж эхлэх хэрэгтэй.

- Магадгүй та өглөө сэрэхдээ өнөөдөр аймшигтай хүнд өдөр болох байх даа гэж муугаар төсөөлөхөө больсон байх. Энэ маш сайн алхам. Харин одоо та өөр нэг алхам хийгээд, өнөөдөр Бурхан дотор маш гайхалтай өдөр болно гэж төсөөлж хүлээдэг болох хэрэгтэй.

Сүүлийн бүлэгт миний дурьдсанчлан, Бурхан Өөрийнх нь буй болгосон бүхэн “нэн сайн болсныг” (Эхлэл 1:31) харсан гэж Библид өгүүлсэн. Бурхан сайныг олж харахад, мөн үүнийг үнэлэхэд цаг гаргаж байгааг харахдаа би баяртай байдаг. Бид ч мөн ийм байх хэрэгтэй гэж би боддог. Тас биш, харин колибри шувуу байх сонголт хийцгээе. Сөрөг зүйлсийг хойш тавиад, сайн сайхан зүйлсийг эрж хайцгаая. Та алиныг нь сонгохыг би хэлж мэдэхгүй ч, би л хувьдаа тас биш, колибри шувуу баймаар байна.

Найдвар өвөрлөгтүн!

Та амьдралдаа санаа зовнил, айдас түгшүүртэй байгаа бол энэ нь таны хувьд эргэлтийг авчрах мөч байх боломжтой. Та Бурхан дотор найдвараар дүүрэн амьдарч, таны амьдралд зориулсан Түүний төлөвлөгөөнд баярлан талархаж, өөдрөг байх шийдвэр гаргаж болно. Санаа зовнил нь таны ДНХ-ийн хэсэг биш. Энэ бол таны дайсан бөгөөд Эзэний тусламжтайгаар та үүнийг ялж чадна.

Хүнд бэрх нөхцөл байдал үүсэх үед та сандарч балмагдаж, барьц алдах хэрэггүй. Харин эрүүл ухаанаар сэтгэж, амар тайван байх боломжтой. Эзэн бол таны Хад, Тэр таныг амьдралын шуурганд шидүүлэхгүйн тулд Өөртөө бэхлэх зангуу болно. Тиймээс урагш алхаж, найдвар өвөрлөгтүн. Та тас биш, харин колибри шувуу байж чадна. Алив нөхцөл байдлын дунд муу муухайг биш, харин сайн сайхныг олж хар. Хэрэв шуурган дундуур явж байхад тань хүчтэй чичиргээ танд айдас төрүүлж байгаа бол бүү санаа зов... Тэнгэрлэг Эцэг тань таны хөлгийн жолоог атгаж яваа нисэгч билээ!

АРВАН ДОЛДУГААР БҮЛЭГ

Найдвараа дүүргэн бялхуулцгаая!

“Найдварын Бурхан та нарыг итгэл дотор бүх баяр баясгалан ба амар тайвнаар дүүргэх болтугай. Ингэснээр та нар Ариун Сүнсний хүчээр найдварт бялхах юм”.

Ром 15:13

“Баяр хөөр нь цөхрөлөөс илүү гүнд хүрдэг”.

—Корри тэн Бүүм

Хүссэн бүхнээ идэгтүн!

Номынхоо сүүлчийн энэ бүлгийг хэрхэн эхлүүлэх вэ гэж би нэлээд нухацтай бодсон ч хүссэн бүхнээ идэгтүн! гэсэн үгс л байнга сэтгэлд эргэлдээд болсонгүй. Би нийтдээ 100 гаруй ном бичсэн, нэг ч бүлгийг үүн шиг эхлүүлж байсангүй.

“Хүссэн бүхнээ ид” гэдэг нь таны тэр бүр хийгээд байдаггүй зүйл ч гэсэн яг ийм нөхцөлд орох юм бол та маш олон төрлийн хоол хүнс идэх байх. Саяхан миний нэг танил Талархалын баяраар гэр бүлийнхээ хамтаар хүссэн бүхнээ идэж болдог буфет ресторанд хооллодог уламжлалтай болсноо хуучилсан юм. Тэд Талархлын баяраар өглөөжин гэртээ хоол унд бэлдэж, оройжин аяга таваг угаахын оронд буфет ресторанд хооллож амардаг болжээ. Энэ онцгой өдөр тэд цацагт хяруулын мах хүссэнээрээ зооглож, төмс, хачир, ногоон вандуй, чихэрлэг төмс, цангис жимсний сүмс зэргийг таваг

тавгаар нэмж идэхээс гадна хүүхдүүддээ дуртай амттангаа хүссэн хэмжээгээрээ идэхийг зөвшөөрдөг аж. Тэрээр надад:

“Жойс, бид жилд ганц л удаа ийм газар хооллодог бөгөөд тэгэхдээ зарсан мөнгөндөө харамсахааргүй их зүйлийг идэж уудаг” гэж хэлсэн.

Найдварыг гуйхад хэтэрхий ихдэнэ гэж байхгүй.

Номынхоо сүүлийн бүлгийн эхэнд би энэ түүхийг дурьдаж буйн учир нь найдвар бол Бурханы буфет рестораны хоолны цэс гэж би боддог. Энэ бол Бурханы санал болгож буй цорын ганц хоол биш ч, хамгийн чухал нь юм. Нигүүлсэл, найдвар, хайр, уучлал, хүч чадал, аюулгүй байдал, хүлээн зөвшөөрөл зэрэг нь Бурханаас бидэнд хязгааргүйгээр өгдөг зүйлсийн зарим нь юм. Түүний нигүүлсэл рүү эргэхэд хэтэрхий олон удаа байна гэж байхгүй. Мөн та Эцэгийн хайрыг хэзээ ч шавхаж дуусгахгүй. Найдварыг гуйхад хэтэрхий ихдэнэ гэж бас байхгүй.

Та өнөөдөр гэр бүл, сэтгэл санаа, эрүүл мэнд, харилцаа, ажил мэргэжил, санхүү, ирээдүй гэх мэтчилэн Бурханаас юуг найдан асууж байна тэр бүхэндээ ямар ч хязгаар тавих хэрэггүй. Буфет ресторанд ороод найдвараас хүссэн хэмжээгээрээ ахин дахин нэмж аваарай. Хүмүүс таныг: “Тэр хүн итгэл найдвараар үнэхээр бялхах юм. Юу ч тохиолдсон, мөн эргэн тойронд нь юу ч болж байсан Бурханаас гуйхаа хэзээ ч зогсоодоггүй, Түүнд найдсаар л байдаг” гэж ярьдаг байх ёстой.

Та өөрийнхөө сэтгэлийг шилэн аяга гэж төсөөлөөд үзээрэй. Аяганы дөнгөж дөрөвний нэгд нь найдвар байх юм гэж үү. Бүү тийм байг. Аяганы хагасыг найдвараар дүүргэсэн ч энэ нь хангалтгүй юм. Дөрөвний гурвыг нь найдвараар дүүргэсэн ч бас хангалтгүй. Найдвараар дүүрэн байхаас илүүг ч та хийх боломжтой. Өөрөөр хэлбэл, найдвараа бялхам дүүргэж, хаа сайгүй халиан цалгиаж, хүмүүст түгээх боломжтой. Бурхан дотор найдвараар бялхах шийдвэр гаргаарай. Таны гуйх буюу бодох бүхнээс илүү хэмжээлшгүй бялхлаар Бурхан үйлдэх чадвартай гэдэгт итгэ (Ефес 3:20-ыг унш).

Хангалттайгаас ч илүү Бурхан

Есүсийн талаар бидний мэддэг зүйлсийн нэг бол Тэр аливаа хүлээлтээс давуулан биелүүлэх дуртай. Тэр бидний хэрэгцээ-нээс илүүг үйлдэж, хэрэгтэй байгаагаас маань илүүг өгдөг. Тэр бидэнд хэрэгтэй зүйлсийг өгөөд дээр нь бас нэмж өгдөг. Энэ зарчмыг 2 Коринт 9:8-д тайлбарлан:

“Та нарыг Бурхан бүхий л ерөөлөөр (бүхий л таалал болоод ерөөлийг) бялхаах чадалтай. Харин та нар бүх зүйлд, бүхий л талаар, үргэлж сэтгэл хангалуун байж, алив сайн үйлээр дүүрэн байгаарай [бусдаас тусламж дэмжлэг гуйхааргүйгээр хэрэгцээ нь хангагдаж, аливаа сайн үйл болоод хүмүүнлэгийн хандив өгч чадахаар байх]” гэжээ.

Бурхан танд хангалттайг амладаг бөгөөд таныг бусад хүмүүст туслах боломжтой байлгахын тулд амлалтынхаа дээр бүхий л ерөөлийг бялхаан өгдөг. Энэ бол амьдралын үнэхээр гайхалтай зам. Таныг энэ боломжийг алдахыг хүсэхгүй байгаа гэдэгт би итгэлтэй байна.

Иохан номын 6-р бүлгээс бид үүнтэй төстэй түүхийг олж хардаг. Есүс 5000 эрийг (дээр нь нэмээд хүүхэд, эмэгтэйчүүд) хооллосон тухай энд өгүүлдэг. Өлмөн зэлмэн тэр олон хүнийг хооллох хангалттай хүнс байгаагүй тул Есүсийн шавь нар маш их сандарсан байсан. Өлсөж цангасан олон хүн, юу хийхээ мэдэхгүй арга мухардсан шавь нар энэ бүхнийг харахад мэдээж сайхан зүйл үгүй.

Гар мухардаж, арга мөхөсдөх ямар байдгийг та төсөөлж чадах уу? Яаж ч хичээгээд зохицуулж, шийдэж чадахааргүй том асуудалд та орж байсан уу?

- Гэр бүлийн харилцаа чинь дээсэн дөрөөн дээр ирэхэд та яах учраа олохгүй байх;
- Ганцаардаж, урам хугарч байвч хэрхэн яаж түүнээс гарахаа мэдэхгүй байх;
- Ажил дээр үл ойлголцол, таагүй уур амьсгал үүссэн тохиолдолд түүнийг хэрхэн зохицуулахаа мэдэхгүй байх;

- Орлого тань бүх төлбөрөө төлж хүрэлцэхгүй байхад хэрхэн энэ асуудлаа шийдэхээ мэдэхгүй байх;
- Хүүхдүүд хичээл сургуульдаа сайн сурч чадахгүй тохиолдолд яах учраа олохгүй байх.

Шавь нарт эдгээртэй төстэй сэтгэгдэл төрж байсан байх. Хүмүүс тэднийг хараад хүлээгээд байдаг, харин тэд юу хийхээ мэдэхгүй арга мухардсан байлаа. Тэдэнд тулгарсан асуудал хэтэрхий том, харин боломж чадвар нь хэтэрхий бага байсан. Тиймээс тэд цорын ганц чадах зүйлээ хийсэн нь Есүс дээр очих байлаа. Есүс тэдэнд байсан өчүүхэн зүйлсийг (арвайн таван талх, хоёр жижиг загас) цуглуулаад, талархан залбирсныхаа дараа үй олон хүнийг хооллож эхэлсэн.

Эхэндээ шавь нар нь тэр хүнсээр хоёр, гурван хүнийг л хооллоно гэж таамаглаж байсан байх. Гэтэл Аврагчийн гараас хоол хүнс тасралтгүй урссаар байв. Тэгээд 10, 100, 500, 1000 хүнийг хооллов. Гайхалтай нь хоол унд тасралтгүй ундарсаар л байсан юм! Гэхдээ энэ түүхийн хамгийн гайхалтай нь тэнд цугласан бүх хүнийг цадтал нь хооллоод зогсоогүй... цаана нь 12 сагс хоолны үлдэгдэл гарсан явдал юм. Есүс хангалттайгаас илүүгээр хангасан юм.

Хүссэн бүхнээ идэгтүн!

Хэрэв Есүс өлмөн зэлмэн үй олон хүмүүсийг хооллож чадсан юм бол таны өлсөж цангасан сэтгэлийг хооллохын тулд Тэр юу хийх бол гэдгийг зүгээр л төсөөлөөд үз. Өнөөдөр танд ямар ч хүнд бэрх зүйл тохиосон энэ нь таны амьдрал дахь Бурханы хүчтэй харьцуулбал юу ч биш. Санаа зовох, айх шалтгаан танд байхгүй, учир нь танд найдвар бий. Үй олон хүнийг цадтал нь хооллоод, цаана нь арван хоёр сагс хоол үлдээж байсан тэр л Есүс өнөөдөр таныг ч бас хангаж байна.

Таны амьдралд төсөөлөхийн аргагүй зүйл хийнэ гэдэгт Бурханд итгэж, Түүнээс тийм зүйлсийг хийж өгөхийг гуйхаас тээнэгэлзэх хэрэггүй. Боломжгүй мэт санагдах зүйлийг гайхалтай боломж болгон өөрчлөх нь Бурханы хийх дуртай зүйлсийн нэг. Өөрийнх нь ард түмний зугтах замд тэнгис

таарах үед Тэрээр тэнгисийг дундуур нь хуваасан. Ялалт байгуулж байх үед нь нар гудайж эхлэхэд Тэрээр байгаа газартаа тогтохыг наранд тушаасан. Үй олон хүн өлсөж ядрах үед Тэр тэднийг ганцхан ширхэг хоолны савнаас цадтал нь

Хэрэв Есүс өлмөн зэлмэн үй олон хүмүүсийг хооллож чадсан юм бол таны өлсөж цангасан сэтгэлийг хооллохын тулд Тэр юу хийх бол гэдгийг зүгээр л төсөөлөөд үз.

хооллосон. Түүнийг ажлаа хийх бүрд тэнд ялалт, гэрэл гэгээ, хоол хүнс элбэг хангалуун байдаг. Тиймээс Бурханаас дөнгөн данган хангалттай зүйлийг гуйх биш, харин дэндүү их зүйлийг гуйхыг хичээ. Гэхдээ хувиа хичээсэн хандлагаар гуйвал юу ч бүтэхгүй. Харин ядарч зүдэрсэн, гачигдаж дутагдсан хүмүүсийг ивээх боломжтой байхын тулд хангалттайгаас илүүг хүсэж байгаа бол таны **найдах**, гуйх буюу бодох бүхнээс илүү давуулан, арвин ихээр, хэмжээлшгүй бялхлаар өгөгдөнө гэж (Ефес 3:20; тодруулж тодоор бичив) найдан хүлээж болно.

Шавь нар нь шөнөжингөө загасчлаад юу ч бариагүй байхад нь Есүс ирсэн тухай Лук номын 5-р бүлэгт өгүүлдэг. Тэрээр шавь нараа нуурын гүн хэсэгт очиж тороо тавихыг зөв-лөсний дагуу хийтэл үнэхээр гайхамшигтай зүйл болжээ.

“Ийн үйлдтэл маш олон загас орсноор тор нь дүүрч [задрах дөхсөн] эхлэв. Тэд нөгөө завин дээр буй нөхдөдөө ирж туслахыг дохиход тэд ирж хоёр завийг дүүргэсэнд живэх шахав”.

Лук 5:6-7

Эх ундаргыг нь бодолц

Юмс болж бүтэхгүй байх үед бид хэн нэгнээс маруухан зөвлөгөөг сонсох юмуу, “Угаасаа найдвар тавьсан эх сууриа аваад үзэхээр, өөр ямар юм үүнээс хүлээх билээ дээ” гэх хэн нэг найзынхаа үгэнд урам хугарах нь олонтаа. Өөрөөр хэлбэл, бид итгэл найдвараа баталгаагүй зүйлд тавьснаас болоод зовлон бэрхшээлд унадаг гэж тэд хэлдэг.

Олон хүн итгэл найдвараар бялхам дүүрэн байдаггүйн шалтгаан нь тэд найдвараа буруу зүйлсэд тавьдагтай холбоотой. Тэдний амьдралын тулгуур ажил, харилцаа, эдийн засаг, улс төрийн үзэл суртал, мөрөөдөл, эсвэл хань ижил дээр нь байдаг бөгөөд тэд Бурханыг эрж хайхын оронд эдгээр зүйл тэднийг аз жаргалтай болгож, гачигдаж дутагдсан зүйлсээр нь хангаж өгнө гэж найддаг. Өнгөц харахад үүнд буруудаад байх юм байхгүй боловч энэ мэт зүйл нь хэзээ ч бидний найдварын эх ундарга болж чадахгүй. Харин хэзээ ч ширгэшгүй цорын ганц эх ундарга бол Бурхан юм. Бурханыг итгэл найдварынхаа эх ундарга болгох нь ямар чухал болох талаар эл номынхоо эхэнд бид өгүүлсэн билээ. Гэвч бид энэхүү чухал үнэнээс тун амархан хазайчих гээд байдаг тул номынхоо төгсгөлийн бүлэгт энэ талаар дахин дурьдахыг хүслээ.

1 Коринт 8:6-д ийнхүү өгүүлжээ:

“...бидний хувьд [цор] ганц Бурхан Эцэг байна. Бүх юм Түүнээс гарсан бөгөөд бид Түүний төлөө [бид амьтай байгаа] юм. Мөн ганц Эзэн Есүс Христ байна. Бүх юм Түүгээр агаад бид ч Түүгээр байгаа [бид оршин байгаа] юм”.

Бурхан бол “бүгдийн Эх ундарга” бөгөөд зөвхөн “Түүний дотор бид амьтай” байдаг. Хэрэв таны найдвар Бурханаас өөр зүйл дээр суурилсан бол та зайлшгүй урам хугарч, сэтгэл гонсойх болно. Олон итгэгчид сэтгэл санааны дарамтад байдаг нь тэд найдлагаа буруу эх сурвалж дээр тавьсантай холбоотой. Хэрэв та хэн нэгэн хүнд, төсөл хөтөлбөрт, тэр ч байтугай өөртөө найдсан байлаа ч байн байн урам хугарч, сэтгэлээр унах болно. Яагаад гэвэл, эдгээр нь хязгаарлагдмал эх үүсвэр юм. Иймэрхүү хатаж ширгэсэн худагнаас ус татах гэж оролдох тусам та улам ихээр цөхрөх болно.

Дуулал 42:11-д (АМР): “Сэтгэл минь ээ, чи юунд цөхөрнө вэ? Яагаад чи дотор минь гасалж, үл чимээгүй болно вэ? **Бурханд найд**, Түүнийг хүсэн хүлээ. Учир нь миний тусламж, миний Бурхан Түүнийг би дахин магтах болно” (цохон харуулахын тулд тодоор бичив) гэжээ.

Бичвэрийн энэ ишлэлд Давид маш ухаалаг зүйлийг хийж байна. Хэдийгээр тэр сэтгэлээр унаж, итгэл найдваргүй мэт болсон байсан ч бүх найдвараа Бурханд тавих тухай өөртөө хэлж, шийдэж байна. Тэрээр: “Би өнөөдөр Бурханд найдаж, Түүнийг магтах болно. Миний дуртай, эсвэл дургүй байх, сэтгэлд ямар мэдрэмж төрөх нь энд хамаагүй. Бурхан бол миний эх сурвалж бөгөөд би бүх найдвараа Түүнд тавих болно!” гэж өөртөө тунхагласан. Тэр зан ааш, сэтгэл санааны нөхцөл байдлаа үл хэрэгсэн, өөрийг нь тэтгэж чадах цорын ганц Эх сурвалжид найдахаар шийдсэн. Давид өмнө нь Бурханы агуу хүчээр чөлөөлөгдөж, амьдралдаа үүнийг амсаж мэдсэн тул Түүнийг найдвартай гэж мэдэж байсан.

Бурхан итгэмжтэй гэдгээ миний амьдралд тоолж баршгүй олон удаа харуулсан, та ч бас надтай адилхан зүйл хэлэх байх. Тэгвэл бид яагаад найдваргүй зүйлд түшиглэж хамаг цагаа дэмий үрэх ёстой гэж? Итгэл найдвараа зөв эх сурвалж дээр суурилуулж, дэмий олон урам хугарал, цөхрөлөөс зайлсхийцгээе.

Найдвар ямар харагддаг вэ?

Ниагарагийн хүрхрээ бол Хойд Америкийн хамгийн гайхамшигтай, сүрдмээр газруудын нэг. Хэдийгээр тэнд очиж, бодитоор нь хараагүй ч гэсэн телевиз, зургаас хараад сүр жавхланг нь шагших нь эргэлзээгүй. Голын ширүүн урсгал, хүрхрээний чих дөжрөөм чимээ нь үнэхээр сэтгэл хөдлөхгүй байхын аргагүй. Бурханы бүтээсэн ертөнцийн гоо үзэсгэлэн ба гайхамшиг нь намайг үргэлж алмайруулан гайхшруулдаг билээ!

Ниагара хүрхрээний хамгийн гайхалтай нь түүний ундарга хэзээ ч ширгэхгүй гэдэгт оршдог. Энэ хүрхрээгээр минутанд 169901 куб.метр ус урсан өнгөрдөг¹ бөгөөд энэ ус хэзээ ч дундрахгүй. Ниагара голын ус татрангуут, байгаль хамгаалагчид усны нөөцийг дахин хуримтлуулахын тулд үзэж сонирхохоор ирсэн аялагчдыг гэр гэр лүү нь илгээх өдөр гэж

байдаггүй. Хормоос хоромд, цагаас цагт, өдрөөс өдөрт голын ус цутгасаар л байдаг.

Хэрэв та Ниагара хүрхрээ рүү очиж байсан бол түүний ойролцоо хаагуур нь ч явсан сэтгэл хөдлөн, бахдан баясахгүй байхын аргагүй гэдгийг мэдэж байгаа. Хүрхрээ рүү очихоор наахна байдаг цэцэрлэгт хүрээлэн дундуур алхаж явахад л түүний чимээ сонсогддог. Хүрхрээний ус доорх хад чулуун дээр сүртэй унах чимээ асар хүчтэй сонсоно. Тийш ойртоход чийг будан ихсэх ба тэндээс агаарт цацагдах ус дэргэдүүр нь өнгөрөх хүмүүсийг нэвт норгоно. Тэнд очсон хүн бүхэн дуусаж дундаршгүй гайхамшгийг нь бишрэн алмайрдаг.

Найдвар нь таны амьдралд ямар байж болохыг энэ зураглал маш оновчтойгоор дүрслэн харуулна. Хэзээ ч ширгэшгүй гол шиг найдвар тасралтгүй урссаар байдаг. Та түүний дотор сэлж, түүнээс ундаалж, түүнийг бусадтай хуваалцаж болно. Та хичнээн ч удаа түүнээс ус татсан хэзээ ч шавхаж чадахгүй. Сургаалт үгс 23:18-д: “Ирээдүй чухамдаа буй тул итгэл найдвар чинь үл тасарна” гэж амласан байдаг. Өөрөөр хэлбэл, найдварын гол руу очиход чинь хуурай сайр таныг угтах цаг үе хэзээ ч ирэхгүй гэсэн үг юм. Бурхан мөнх учраас Түүний доторхи найдвар мөнхөд ундарч байдаг. Бурхан таныг хэрэгтэй бүхнээр тань хангана гэдэгт та итгэж, өдөр бүр итгэл найдвараар дүүрэн Түүн өөд очиж болно.

Найдвар нь зөвхөн ундарга нь ширгэдэггүй гол төдий биш, өөр рүү нь ойртон ирсэн хүн бүрд нөлөөлж, гайхан бишрүүлж байдаг. Та эргэн тойрноосоо түүнийг сонсож, харж, бас мэдрэх боломжтой. Танаас найдвар бялхан гарах үед энэ нь зөвхөн таны амьдралд төдийгүй таны эргэн тойронд буй хүмүүст нөлөөлдөг. Таны найдвар тэдгээр хүмүүс рүү халин урсдаг. Тэд тантай илүү их холбоотой байх тусам хүрхрээний хүрхрэн шуугих чимээг илүү тод сонсож, будан чийгийг илүү сайн мэдрэх болно. Удахгүй тэд: “Би чамтай байх дуртай. Чамд бусдаас өөр ямар нэг юм байдаг юм аа. Чамтай ярилцахад нэг л итгэл төрөөд явчихдаг” гэж хэлэх болно.

Таны амьдралд Бурхан ямар нэг сайн зүйлийг хийх болно гэсэн итгэлтэйгээр өглөө сэрэхдээ та дээр дурьдсан хүрхрээний талаар бодоорой. Урам хугарч цөхөрсөн үедээ, Бурханаас таны зүрх сэтгэлд өгсөн мөрөөдлөөсөө няцах үедээ энэ хүрхрээг санаарай. Эргэн тойронд тань байгаа хүмүүст урмыг үг хэрэг болох үед энэ хүрхрээг санаарай. Найдвар бол ус багатай жижиг гол биш, найдвар нь горхи ч биш. Харин найдвар бол хүмүүс харж, мэдрэх гэж дэвэн дэлхийг туулж ирдэг ширүүн урсгалт, асар том хүрхрээ юм.

Та юунд итгэх гэж байна вэ?

Өөнтөгч, увайгүй энэ ертөнц танд итгэл найдвараа сэргээх хэрэггүй гэж шивнэдэг. Тэр танд: “Өмнө нь ингээд бүтээгүй шүү дээ” гэх юмуу, “Дахиад л цөхөрч гутрахаас цааш тэгтлээ дээгүүр бодох хэрэггүй” гэж хэлнэ. Мөн хэтэрхий их юм горьдолгүй, аливаад “бодитой” ханддаг байх хэрэгтэй гэж ятгаж ч магадгүй. Харин Бурхан бидэнд бодитойгоос илүүг найдан хүлээх хэрэгтэй гэж хэлдэг. Тэр биднийг хангалттайгаас илүүг найдан хүлээгээсэй гэж хүсдэг.

Энэ ертөнцийн хэлдэг зүйлийн эсрэг зүйлсийг хийхэд л болно гэж таныг урамшуулъя. Хүнийхээ ухаанаар бүү захируул. Харин оюун бодлоо Бурханы Үгийн дагуу шинэчилж, Бурханыхаар бодож сэтгэж сур. Таны амьдралд хамгийн сайныг Бурхан хийнэ гэж найдахад чинь түлхэц өгөх амлалтууд болон Бичвэрийн ишлэлүүдийг номын бүлэг бүрээс бүгдээрээ уншсан. Түүнчлэн бодит жишээнүүдийг Библиэс харсан. Мөн Бурхан Өөрийнхөө амлалтуудыг биелүүлнэ гэдэгт итгэж найдахаар шийдсэн та бидний адил энгийн хүмүүсийн тухай олон түүхийг сонссон. Танаас дараах зүйлсийг заавал асуух ёстой: Та ямар сонголт хийх вэ? Найдварыг сонгох уу, эсвэл найдахгүй байхаар сонгох уу? Өнөөдөр танд, таны гэр бүлд, таны хүүхдүүдэд, найз нөхдөд, таны нөхцөл байдал, ажил, сургууль, засгийн газар, энэ дэлхийд ямар нэгэн сайн зүйл тохионо хэмээсэн сайн сайхан, өрнүүн хүлээлт

найвараар амьдрахад та бэлэн үү? Баталгаатай хэлэх нэг зүйл бол: Итгэл найдваргүй байдал, сөрөг хандлага нь ямар ч сайн зүйл авчирдаггүй. Харин Бурхан доторх итгэл, найдвар ажиллах боломж байгаа юм бол бид түүнийг туршаад үзэж яагаад болохгүй гэж?

Дайсан таныг найдварын хүч дотор амьдруулахгүйн тулд таныг тэгж амьдрах зохисгүй нэгэн гэж худал хэлэх болно. Энэ бол түүний хэлдэг хамгийн ичгүүргүй худал хуурмагуудын нэг. “*Чи Бурханаас илүү их зүйл гуйх зохисгүй хүн*”. “*Чи бол Түүний сайн сайханд итгэх зохисгүй нэгэн*”. “*Чи маш их буруу зүйл хийсэн учраас амьдралдаа баяр хөөртэй, аз жаргалтай байх боломжгүй*”. Энэ дэлхий, махан бие болон диавол бүгд л таны алдаа дутагдал, бүтэлгүйтэл, гэм нүглийг, дутуу гучууг сануулах бөгөөд энэ буруутгал нь таныг Бурхан өөд итгэл найдвараар дүүрэн хандахад саад болохыг хичээх болно.

Бид төлөөсийг нь төлсөн учраас бидэнд найдвар өгөгдсөн юм биш, харин үүний төлөөсийг Есүс төлсөн юм.

Та ч... би ч тэрхүү найдварыг авах зохисгүй нь үнэн л дээ. Бидний хэн хэн нь маш их буруу зүйл хийсэн. Хэрэв найдвар нь бидний зөвт байдал дээр суурилдаг байсан бол бид түүнийг хүлээн авч чадахгүй байх байсан. Гэхдээ Бурхан биднийг харахдаа зөвт байдлын төлөөх бидний бүтэлгүй оролдлогуудыг биш, харин Есүсийн зөвтгөлийн төгс ажлыг хардаг бөгөөд энэ бол Сайн-мэдээний хүч юм. Биднийг гэм нүгэлдээ хутгалдан, Бурханаас хол байхад Есүс ирж бидний төлөө төлөөсийг төлсөн. Түүний үхэл бидний гэм нүгэл, алдаа дутагдал, бүтэлгүйтэл бүхний төлөөс болсон. Бурханаас бидэнд өгөгдсөн нэг ч зүйлийг бид өөрсдийн хүчээр, хичээл зүтгэлээр авч чадахгүй байсан бөгөөд Бурхан үүнийг мэддэг учраас үүнийг биднээс шаарддаггүй. Бид төлөөсийг нь төлсөн учраас бидэнд найдвар өгөгдсөн юм биш, харин үүний төлөөсийг Есүс төлсөн юм. Тэр хангалттайгаас илүүг төлсөн.

Найдвар

Дарамт зовлонгийн гинжийг тасалж
Дахин итгэх өөдрөг зориг өгч
Гутарч суухаа болиод
Гуйвшгүйгээр мөрөөдөх чин хүсэл хайрладаг
Угтах ирээдүйн хараа
Уярал хайр, зөөлөн сэтгэл
Урамтай хөхүүн баяр хөөр
Урагш алхах зорилго тэмүүлэл болдог
Сэтгэлд минь тэнхээ нэмж
Санаанд минь амирлал тайтгарал ирүүлж
Зовнилоос салгаад, айдсыг зайлуулж
Зовох, хүлээх цагт ч зол жаргалыг мэдрүүлдэг
Өөдгүй хүн ч өөрчлөгдөж болно
Өнөөдрийн зовлон сайнаар эргэнэ гэж
Шантрахгүй бат зуурах
Шазруун итгэл энэ билээ
Яах нь мэдэгдэхгүй нөхцөлд ч
Яавч ганцаараа хаягдахгүй гэдгээ мэдэн,
Дандаа Бурхан захирдаг болохоор
Дахин эхлэвч хожимдохгүй гэсэн бат суурь мөн

Итгэл найдвар юу авчирдгийг энд хэсэгхэнийг дурдсан байна. Гэвч найдвараасаа зуурч амьдарсан хэрнээ энэ бүхний алиныг нь ч амсаагүй байлаа ч итгэл найдваргүйгээр байхын оронд итгэл найдвараа тээх нь илүү их баяр хөөр, аз жаргал мэдрүүлдэг тул найдсан чинь дэмий өнгөрөөгүйд итгээрэй.

Урагш тэмүүлж, найдвар өвөрлөгтүн!

Найдварт хязгаар зааг, хориг саад гэж байхгүй. Улам илүү итгэх тусам Бурханд улам илүү таалагдах болно. Гэхдээ найдвар хэр хүчирхэг байх нь түүний эх ундарга нь хэр хүчтэй байхаас шалтгаална гэдгийг мартаж болохгүй. Хэрэв та хэн

нэгэн хүн, ажил төрөл, эсвэл өөрийн хүч чадал, авьяас чадварыг найдварынхаа үндэс суурь болгох гэвэл аз жаргалгүй болж, цөхөрч гутрахад хүрнэ. Энэ бүх зүйл хэмжээ хязгаартай байдаг. Харин Эзэн Бурханд ямар ч хязгаар байхгүй. Тиймээс Түүнийг итгэл найдварынхаа эх ундарга болго. 1834 онд Эдвард Мөүтийн зохиосон магтан дууг аялан дуулж өдөр бүрийг туулаарай.

*Зөвт байдал минь болсон Есүс Христ
 Найдварын минь үндэс суурь билээ
 Гагц Есүсийн нэрээс өөр
 Сэтгэл татсан юунд ч би итгэлээ өгөхгүй ээ*

*Хадан суурь минь болсон Христ дээр би зогсоно
 Харин өөр бүх суурь сордог элс мэт найдваргүй
 Хайраар дүүрэн Эзэний минь царайг
 Харанхуй будан хөшиглөн халхаллаа ч*

*Хэзээ ч хувириггүй нигүүлслээс нь зуурсаар
 Хүчит шуурган дунд ч зангуу мэт хөдлөхгүй ээ, би*

*Эзэний амлалт, Эзэний гэрээ, Эзэний минь цус
 Эгнэгт намайг түшинэ, үер мэт зовлон нөмрөхөд ч
 Найдах бүхэн замхарч, сэтгэл сүнс гундах үед
 Найдвар минь ганцхан Түүн дээр бат суурилна*

*Ялалтын бүрэн дуунаар Эзэн ирэхэд
 Ялгуусан Түүний дотор би олдох болно
 Зөвхөн Түүний зөвт байдал дор л
 Зөвтөд тооцогдон Хаан сэнтийн өмнө зогсоно, би²*

Урагш алхаж, найдвар өвөрлөгтүн! Тэгэхгүй байх нэг ч шалтгаан үгүй билээ. Хэдэн зууны туршид итгэл найдвараар дөрөөлөн амьдарч, үүндээ хэзээ ч харамсаж байгаагүй сая сая хүнтэй та нэгдээрэй!

ТӨГСГӨЛИЙН ҮГ

Номынхоо эхний бүлэгт бид муу муухайг л зөгнөж байдаг Бэттигийн тухай өгүүлсэн. Түүний байдал маш хэцүү байсан, тийм биз? Хэдийгээр тэр сайхан гэр бүлтэй, Эзэнийг үнэхээр хайрладаг боловч түүний найдвар өчүүхэн байсан. Сайн сайхан зүйл болно гэсэн өөдрөг зөн мөрөөдөл түүнд байгаагүй. Харин үүний оронд тэр байнга сэтгэлээр унаж, таагүй муу зүйлсийг таамаглан хүлээдэг. Бэтти аливаа зүйлийг сайн сайхнаар төсөөлөхийн оронд байж болох хамгийн муу хувилбаруудыг төсөөлөн бодох агаад... энэ нь түүний амьдралд муугаар нөлөөлж байлаа.

Урам хугарсаар, цөхөрсөөр, сэтгэлээр унасаар, зарим өдөр та Бэтти шиг байдаг байж болох юм. Магадгүй та заримдаа Есүсийн амиараа золин танд өгсөн баяр хөөр, ялалтаар дүүрэн, бялхам амьдралыг мэдрэх гэж хичээдэг байх. Энэ номын нэр танд таалагдах сайн мэдээ юм шиг сонсогдож, ягийм сайн үг дуулах хэрэгцээ танд маш их байгаа болохоор та үүнийг худалдаж авсан байж болох юм.

Энэ гар бичмэлийг хэвлэлтэд шилжүүлэхийн өмнө би тантай хувийн журмаар ярилцахыг хүслээ. Таны талаар маш өндөр итгэл найдвар надад байгааг та харж байгаа биз дээ. Бурхан танд “би чадна” юмуу “одоо яг зөв цаг нь мөн” гэсэн итгэлээр жигүүрлэн нисэх боломжийг өгөхийн тулд “би чадахгүй” эсвэл “хэтэрхий оройтсон” гэх хүнд гинжнээс чөлөөлнө гэдэгт би бат итгэж байна. Миний хувьд, таныг өнгөрсөн амьдралынхаа цөхрөл гутрал, урам хугарлыг тэнд нь буюу ардаа орхиод, ирээдүйн амьдралд тань өгөгдсөн амлалттай учран золгоно оо хэмээн баяртайяа хүлээн харж байна.

Эдгээр үгийг уншиж байхдаа та амьдралдаа яг юу үзэж туулж байгааг би хэлж мэдэхгүй. Магадгүй бүх зүйл сайхан байгаа болохоор шинэ шинэ адал явдал, шинэ шинэ учрал, боломжуудыг хараад сэтгэл тань сэргэсэн байж болно. Эсвэл, та арай ядан урагшлах агаад *үүнээс ч долоон дор юм болж мэдэх* тул “Энэ байгаа минь л хангалттай” гэсэн бодолтойгоо эвлэрчихсэн явж байж болох юм. Эсвэл, энэ зовлон шаналал хэзээ ч арилж салахгүй юм байна гэсэн гүн хямралд орсон байх ч магадлалтай.

Та яг одоо том, жижиг ямар ч сорилт бэрхшээл туулж байна хамаагүй, энэ бол таны дахин найдах цаг. Энэ бол өршөөл ивээлд найдах цаг. Энэ бол гайхалтай чөлөөлөлтөд найдах цаг. Энэ бол аз жаргалд найдах цаг. Таны өмнө тулгарч буй саад бэрхшээл бол таны амьдралд ямар нэгэн гайхамшигтай зүйлийг хийх боломжийг Бурханд олгодог юм. Та хэзээ ч ялагдахгүй, учир нь Бурхан таны талд бөгөөд Тэр ялагдашгүй билээ.

Тиймээс босоод урагш алх. Хүсэл хүлээлтээ илүү дээд түвшинд гарга. Танд “агуу” зүйлийг амласан байтал “боломжийн” сайнд нь сэтгэл ханахаас татгалз. Өнөөдөр таны амьдралын шинэ өдөр агаад энэ шинэ өдөр бол найдвараа сэргээх, найдвар өвөрлөж эхлэх төгс цаг мөн.

ИТГЭЛИЙН ЗАЛБИРАЛ

Бурхан танд хайртай бөгөөд хувьчилсан харилцаа тогтоохыг хүсэж байна. Хэрэв та Есүс Христийг таны аврагч гэдгийг өмнө нь хүлээн зөвшөөрөөгүй бол танд боломж байна. Түүнд зүрх сэтгэлээ нээгээд энэ залбирлыг хэлээрэй:

“Ариун Эцэг Бурхан минь, би Таны эсрэг гэмтэй гэдгээ мэднэ намайг уучлаач, намайг цэвэрлээч. Би Таны Хүү Есүс Христэд итгэхээ амлаж байна, итгэж байна. Тэр загалмайд цовдлогдохдоо миний гэмийг Өөртөө үүрсэн. Тэр миний төлөө нас барсанд би итгэж байна. Тэр үхлээс дахин амилсанд би итгэж байна. Би одоо өөрийнхөө амьдралыг Танд өргөж байна. Намайг уучилж, мөнхийн амьдрал өгсөнд баярлалаа. Эцэг Бурхан минь, Тантай хамт амьдрахад надад туслаач Есүсийн нэрээр амен”.

Хэрэв та зүрх сэтгэлээсээ гуйсан бол Тэр таныг хүлээн авч сүнсний боолчлолоос таныг чөлөөлж, цэвэрлэх болно. Библи уншиж Түүнд цаг гаргавал асуултынхаа хариултыг авах ба шинэ амьдралдаа Түүнтэй хамт аялаарай.

Иохан 3:16

Ефес 1:4

1 Иохан 1:9

1 Иохан 5:1

1 Коринт 15:3-4

Ефес 2:8-9

1 Иохан 4:14-15

1 Иохан 5:12-13

Түүнээс Библи болон зөвт сүмийг гуйн асууж Христтэй хамт нөхөрлөн өсөж урамыг аваарай. Бурхан үргэлж тантай хамт, Тэр таны амьдралыг удирдах бөгөөд Тэр таны амьдралыг элбэг хангалуун байлгах болно.

ЗҮҮЛТ

Бүлэг 1: Хүсэл хүлээлтийнхээ төвшинг өндөрсгө

1. Эх сурвалж тодорхойгүй; “Одой морь хаана байна”
<http://storiesforpreaching.com/category/sermonillustrations/hope/>.

Бүлэг 2: Удирдагч Бурханыг дага

1. Жеймс Браун, Эвангелийн Баптист сүм, Вайлдсвиллэ, ЛА,
“Дисковериис”, 2-р боть, № 4 (1991 Намар).

Бүлэг 3: “Чадахгүй” гэдэг бүхнийг илрүүлж, устга

1. “Бидний тухай”; “Надад мөрөөдөл бий” сан,
<http://www.ihaveadreamfoundation.org/html/history.htm>; <http://www.sermonillustrations.com/a-z/h/hope.htm>.
2. “Өнөөгийн дэлхий ертөнцөд”, МБИ, 1991 оны 12-р сарын 18.

Бүлэг 4: Найдварын эрч хүч

1. Жойс Майерийн “Өөрт байгааг хамгийн сайнаар ашиглах нь” номд иш татсан, http://www.joycemeyer.org/articles/ea.aspx?article=doing_your_best_with_what_you_have.

Бүлэг 9: Урагшилсаар бай

1. Дебра С.Ларсон, “Хөгжлийн бэрхшээлтнүүдийн Олимпод хараагүй цаначны гаргасан амжилт”, 1987 оны 2-р сарын 5,
http://articles.latimes.com/1987-02-05/news/vw-1122_1_water-skiing.

Бүлэг 10: Аливаа зүйлээс сайн сайхныг нь олж хар

1. Эх сурвалж тодорхойгүй; “Хандлага”,
<http://www.sermonillustrations.com/a-z/a/attitude.htm>.
2. Эх сурвалж тодорхойгүй; “Найдвар”,
<http://www.sermonillustrations.com/a-z/h/hope.htm>.

Бүлэг 11: Найдварын хоригдлууд

1. *Битс ба Пиисэс*, 1991 оны 7-р сар.

Бүлэг 12: Хэн нэгний залбирлын хариу байгтун!

1. Гэри Морш ба Диин Нельсон, “*Бусдад үйлчлэхийн хүч: Байгаа газраасаа та эхэлж болно*” (Сан Франциско: Барретт-Коэхлер Паблшерс компани, 2006), 19–21.
2. “*Өнөөгийн дэлхий ертөнцөд*”-д иш татсан, 1991 оны 3-р сарын 6.

Бүлэг 14: Маргааш болтол гэж хойшлуулах хэрэггүй

1. “Зовлонт үдшийн зоог”, Христофер Ньюс Нөүтс, 1993 оны 8-р сар, <http://www.sermonsearch.com/sermon-illustrations/1185/miery-dinner/>.

Бүлэг 16: Сонголт таных

1. Капучин Францисканс “Суудлын даруулгаа хий”, <http://www.beafriar.com/New%20Projects%202012/Our%20Father%20is%20the%20Pilot.pdf>.
2. Стиив Гүүдиер, “*Рийдерз Дижест*”-т, “*Ишлэл*” сэтгүүд, 1990 5 сар.

Бүлэг 17: Найдвараа дүүргэн бялхуулцгаая!

1. Ниагара Хүрээлэн, “Ниагара хүрхрээний талаарх геологийн баримтууд ба зураг”, <http://www.niagaraparks.com/about-niagara-falls/geolgy-facts-figures.html>.
2. “Өөр юунд ч найдвараа би тавихгүй”, <http://www.hymnal.net/en/hymn/h/298#ixzz31E5ASKsi>.

ИТГЭЛ НАЙДВАРЫН ТУХАЙ БИБЛИЙН ИШЛЭЛҮҮД

Энэ номын маань хуудсууд итгэл найдварын тухай өгүүлсэн Библийн ишлэлүүдээр дүүрэн билээ. Гэхдээ танд итгэл урам улам нэмэхийн тулд энэ жагсаалтыг орууллаа.

Өдөр бүрийн амьдралдаа итгэл найдвар тээ

“ЭЗЭН бол миний хувь” гэж сэтгэл минь хэлж байна. “Тийм учраас би Түүнд найддаг”.

Гашуудал 3:24

Найдвар дотор баярла, зовлон дотор тэвчээртэй бай, залбиралд өөрсдийгөө зориул...

Ром 12:12

Итгэл бол бидний найддаг зүйлсийн бодит байдал, харагдахгүй зүйлсийн баталгаа мөн.

Еврей 11:1

Харин та нарын доторх найдварын талаар асуух хүн бүрд хариу өгөхөд, гэхдээ дөлгөөн байдлаар болон хүндэтгэлтэйгээр өгөхөд ямагт бэлэн байн Христийг Эзэн хэмээж зүрхэндээ тусгаарлан нандигна.

1 Петр 3:15

Учир нь Бурханд боломжгүй юм гэж нэг ч байхгүй гэж хэлэв.

Лук 1:37

*Харагтун, ЭЗЭНий мэлмий Өөрөөс нь эмээгчдийг,
Түүний хайр энэрэлд найдагчдыг хардаг нь...*

Дуулал 33:18

*Тэр Өөрийн замыг Мосед,
Өөрийн үйлсийг Израилийн хөвгүүдэд мэдүүлсэн.*

Дуулал 130:7

*Учир нь эрт үед бичигдсэн аливаа зүйлс нь
биднийг сургахын тулд бичигдсэн юм. Ингэснээр
Судруудын тэвчээр болон урамшуулалтаар
дамжуулан бидэнд найдвар байх юм.*

Ром 15:4

*Намайг амьд байлгахын тулд
Өөрийн үгийн дагуу намайг дэмжин тэтгээч.
Намайг найдвараас минь болж ичгүүрт бүү оруу-
лаач.*

Дуулал 119:116

*ЭЗЭН, бидний Танд найдсаны дагуу
Таны хайр энэрэл бидний дээр байх болтугай.*

Дуулал 33:22

*Таны надад найдварыг өгсөн,
Өөрийн зарцад хандуулсан үгийг санаач.*

Дуулал 119:49

*Та нарын зүрхний мэлмий гийгүүлэгдэг. Тэгвэл та
нар Түүний дуудлагын найдвар юу болохыг, ариун
хүмүүс дотор Түүний өвийн алдрын баялаг юу
болохыг...*

Ефес 1:18

*Өмнө маань тавигдсан найдварыг барьж авахаар
хоргодох газар уруу зуттаагч бид Бурханы хувьд*

*худал айлдах боломжгүй хоёр өөрчлөгдөшгүй
зүйлээр дамжуулан хүчтэй урам авахын тудд
тэгжээ.*

Еврей 6:18

*Мэргэн ухаан нь сэтгэдд чинь үүнтэй адил
гэдгийг мэд.
Хэрэв түүнийг олох аваас чамд ирээдүй байгаа
бөгөөд Итгэл найдвар чинь ор тас мартагдахгүй.*

Сургаалт үгс 24:14

*Үүнийг би оюун бодолдоо дурсан саналаа, тиймээс
надад найдвар бий.
ЭЗЭНий хайр энэрэл үнэндээ хэзээ ч дуусахгүй.
Учир нь Түүний өршөөл хэзээ ч унахгүй.*

Гашуудал 3:21-22

*Сэтгэл минь Таны авралыг хайсаар сульддаг.
Би Таны үгийг хүлээдэг.*

Дуулал 119:81

*Та бол миний хоргодох газар ба миний бамбай. Би
Таны үгийг хүлээдэг.*

Дуулал 119:114

*Би Таны үгийг хүлээдэг учраас
Танаас эмээгчид намайг хараад, баярлах
болтугай.*

Дуулал 119:74

*Та нар Түүгээр дамжуулан Бурханд итгэгчид юм.
Бурхан Түүнийг үхэгсдээс амилуулж, Түүнд алдрыг
өгчээ. Ингэснээр та нарын итгэл ба найдвар
Бурханд байх юм.*

1 Петр 1:21

Харин бидний хүсэл нь та нарын хүн нэг бүр найдварын бүрэн баталгааны төлөө эцсээ хүртэл адилхан хүчин чармайлт гарган...

Еврей 6:11

Бидний Эзэн Есүс Христ Өөрөө болон биднийг хайрлаж, мөнх тайтгарлыг болон нигүүлслээр сайн найдварыг бидэнд өгсөн бидний Эцэг Бурхан зүрхийг тань аливаа сайн ажил үйлс хийгээд үг дотор тайтгаруулж, бататгах болтугай.

2 Тесалоник 2:16-17

Найдвар нь урам хугалдаггүй. Учир нь бидэнд өгөгдсөн Ариун Сүнсээр дамжуулан Бурханы хайр бидний зүрхэнд цутгагдсан байдаг.

Ром 5:5

Өө, ЭЗЭН, би Таны авралд найддаг бөгөөд Таны тушаалуудыг биелүүлдэг.

Дуулал 119:166

Учир нь бид үүний төлөө ажилладаг, зүтгэдэг. Яагаад гэвэл бүх хүмүүсийн, ялангуяа итгэгчдийн Аврагч болох амьд Бурханд бид өөрсдийн найдвараа тавьсан юм.

1 Тимот 4:10

Авралын найдвар

Бидний Эзэн Есүс Христийн Бурхан болон Эцэг магтагдах болтугай. Учир нь Бурхан Өөрийн агуу их өршөөлөөрөө Есүс Христийн үхэгсдээс амилсан амилалтаар дамжуулан биднийг амьд найдвар уруу...

1 Петр 1:3

Түүний нигүүлслээр зөвтгөгдсөнөөр бид мөнхийн амийн найдварын дагуу өв залгамжлагчид болгогдох юм.

Тит 3:7

Учир нь бүх хүмүүст авралыг авчрагч Бурханы нигүүлсэл үзэгдэн, бидэнд бурханлаг бус байдлыг болон ертөнцийн шуналыг үгүйсгэхийг, мөн эдүгээ үед ухаалаг, зөвт байдлаар болон бурханлаг амьдрахыг сургадаг. Ингэхдээ бид өөрсдийн агуу Бурхан ба Аврагч болох Есүс Христийн цог жавхлант илэрхийлэл хийгээд ерөөлт найдварыг хүлээдэг.

Тит 2:11-13

Тэр нь мэхэлдэггүй Бурханы мөнх цагаас өмнө амласан мөнх амийн найдварт үндэслэсэн юм.

Тит 1:2

Харин бид өдрийнх тул итгэлийн ба хайрын хуяг, дуулга болгон авралын найдварыг өмсөн, эрүүл ухаантай байцгаая.

1 Тесалоник 5:8

...тэнгэрт та нарт зориулж хадгалагдсан найдварын учир юм. Энэ найдварыг та нар урьд нь сайн мэдээ болох үнэний үгнээс сонссон.

Колоссай 1:5

Хэрэв бид зөвхөн энэ амьдралдаа Христ дотор найдсан бол бид бүх хүмүүсээс хамгийн өрөвдөлтэй нь болно. Харин чухамдаа Христ үхэгсдээс амилуулагдсан бөгөөд нойрсогсдоос анхны үр жимс мөн..

1 Коринт 15:19-20

ЗОХИОГЧИЙН ТУХАЙ

Жойс Майер бол Библийн сургаалыг амьдралд ойр дөтөөр заадаг, дэлхий даяар танигдсан багш нарын нэг билээ. «Баяр хөөрөөр дүүрэн амьдрал» (Enjoying Everyday Life) хэмээх өдөр тутмын нэвтрүүлэг нь дэлхий даяар олон зуун телевизийн сүлжээ, радио станцуудаар цацагдаж байна. Жойс хүмүүсийг урамшуулан зоригжуулсан нийтдээ 100 гаруй ном бичсэн байдаг. Түүний борлуулалтаараа монгол хэлээр тэргүүлсэн бүтээлүүдэд: “Мэдрэмжээ залж амьдрах ухаан”, “Итгэл найдвараар ирээдүйгээ хар!”, “Оюун ухаан тулалдааны талбар” гэх мэт.

Жойс жилийн туршид зохион байгуулдаг хурал цуглаануудаараа мянга мянган хүнд хүрч номлон дэлхий даяар идэвхтэй аялж үйлчилдэг.

ЖОЙС МАЙЕРИЙН ҮЙЛЧЛЭЛ МОНГОЛД

Жойс Майерийн монгол хэлээр
орчуулагдсан номууд:

“Амар тайван”

“Амьдралын шинэ зам”

“Итгэл найдвараар ирээдүйгээ хар!”

“Мэдрэмжээ залж амьдрах ухаан”

“Оюун ухаан тулалдааны талбар”

“Хайртай гэдгийг минь тэдэнд хэлээрэй”

“Жойс Майерийн үйлчлэл”-ийн материалуудыг
монгол хэлээр орж үзэх ба татаж авах боломжтой:

joycemeyer.mn

youtube.com/c/JoyceMeyerMinistriesMongolia

facebook.com/JoyceMeyerMinistriesMongolian

Дараах хаяг, утасны дугаараар холбогдоно уу:
16092 ш/х 504, Улаанбаатар-23, Монгол улс.

E-mail: **contactus@joycemeyer.mn**

Утас: +976 99700060

Хаяг: Энхтайваны өргөн чөлөө, 25-р эмийн
сангийн буудал, Кёкүшю цамхагийн 404 тоот

Монгол улс 2018 он

“Энэхүү номыг уншиж байхдаа, таныг, “амьтай байж, сайн сайхан амьдраасай” (Иохан 10:10) гэж Эзэн Бурхан хүсдэг гэдгийг олж харах байх гэж би танд найдаж байна. Сүнс, оюун ухаан, сэтгэл санаа, харилцаа, бие махбод гээд таны бүхий л зүйлд жил бүр, өдөр хоног, мөч болгонд Эзэн хамгийн сайныг хүсдэг. Танд Бурхан хамгийн сайн сайхныг хүсдэг юм байна гэдгийг мэдэхээр итгэл найдлага өвөрлөхгүй байж та чадахгүй ээ. Таны бүхий л хэрэгцээг хангаж, бусдад туслах чадвартай болгохыг Эзэн хүсдэг.

Та шаналж зовоод, энэ бүхэн засрах эсэхэд эргэлзэж байгаа бол... *итгэл найдвараар ирээдүйгээ хар!*

Амьдралын даваа нугачааг туулж, зүдэрч ядраад, дахиад юу тохиолдох бол гэж зүрхшээж байгаа бол... *итгэл найдвараар ирээдүйгээ хар!*

Үр хүүхдээ өсгөж байхдаа тэдний амьдралд юу тохиолдох бол гэж санааширч суугаа бол... *итгэл найдвараар ирээдүйгээ хар!*

Цоо шинэ, адал явдалт аяныг эхлүүлээд, урьд хожид гаргаж байгаагүй эрсдэлтэй алхам хийж байгаа бол... *итгэл найдвараар ирээдүйгээ хар!*

Найдлагаа сэрээхээр та зориглох аваас амьдралд чинь олон зүйл өөрчлөгдөж эхлэх болно. Итгэл ихсэж, баяр хөөр эргэн ирж, амар амгалан ноёрхоно”.

—Жойс